


Sc. sup. 23. Pl. 5.









MANVALE THOMISTARVM

SEV

BREVIS THEOLOGIÆ

CVRSVS,

Ingratiam, & commodum
studentium editus,

AB ADM. REV. PATRE

F. IO: BAPTISTA GONET

*Riterrensi, Ordinis FF. Prædicatorum,
Prouinciæ Tolosane, strictioris
Observantiæ, in Accademia
Cardigalensi Antecessore.*

TOMVS TERTIVS.

Admodum Reuerendo Patri

F. DOMINICO

MARIÆ

SANTINO


AB ÆXIO,

Ordinis Prædicatorum Sac: Theol: Magistro
ac Almi Conuentus S. Dominici
de Bononia Priori.

BONONIÆ, M DC. LXXXI.

Typis Iosephi Longi. *Superiorum Permissu.*





INDEX.

T O M I T E R T I I.



S Ecunda Pars Manualis Thomistarum, de
Deo ut ultimo fine & medijs ad illum
conducentibus. pag. 1

TRACTATVS I. De Beatitudine. 3

CAP. I. De ultimo fine hominis in commu-
ni. ibid.

§. I. *Quæ actiones hominis sint propter finem
seu effectus finis?* 4

§. II. *Utrum quæcumque vult homo velit
propter ultimum finem formalem, seu pro-
pter beatitudinem in communi?* 10

§. III. *Utrum voluntas possit simul intendere
plures fines ultimos totales & adequatos.*
pag. 13

CAP. II. De Beatitudine obiectiua. 18

CAP. III. De essentia beatitudinis formalis.
pag. 26

§. I. *Præmittenda ad resolutionem huius ce-
leberrimæ quæstionis.* ibid.

§. II. *Beatitudo formalis, non in pluribus,
sed in vno dumtaxat actu consistit essentiali-*

I N D E X

<i>ter; ille verò nec est amor, nec fruitio, seu delectatio, sed clara Dei visio.</i>	32
§. III. <i>Præcipuæ obiectiones solvuntur.</i>	44
CAP. IV. <i>De proprietatibus beatitudinis formalis.</i>	52
§. I. <i>Prima proprietas beatitudinis formalis, felix amandi necessitas.</i>	53
§. II. <i>Secunda proprietas beatitudinis formalis summum gaudium, summa delectatio.</i>	57
§. III. <i>Tertia beatitudinis formalis proprietas, felix impotentia peccandi, orta ex clara Dei visione & amore beatifico.</i>	61
§. IV. <i>Quarta beatitudinis formalis proprietas, eius perpetuitas seu inamissibilitas.</i>	68
CAP. V. <i>De dotibus & aureolis beatorum.</i>	75
§. I. <i>Dotæ animæ beatæ.</i>	ibid.
§. II. <i>Dotæ corporis gloriosi.</i>	78
§. III. <i>Aureolæ beatorum.</i>	84
TRACTATUS II. <i>De voluntario & involuntario.</i>	87
CAP. I. <i>De voluntario.</i>	88
§. I. <i>Definitio voluntarij eiusque divisio.</i>	ib.
§. II. <i>Virum omissio ut sit voluntaria requirat debitum non omittendi?</i>	91
CAP. II. <i>De Involuntario.</i>	95
CAP. III. <i>De Mixto ex voluntario & involuntario.</i>	102
§. I. <i>An & quomodo ex metu facta sint mixta ex voluntario & involuntario.</i>	ibid.
§. II. <i>Virum concupiscentia seu passio vehemens causet involuntarium secundum quid sicut metus?</i>	107
§. III. <i>Virum ignorantia causet involuntarium?</i>	107

I N D E X.

<i>rium?</i>	109
CAP. IV. De voluntario libero.	112
§. I. Libertas indifferentiæ convenit homini non solum in statu naturæ integræ, seu in creatione sua, sed etiam post Adæ lapsum & in statu naturæ corruptæ.	113
§. II. Ad humanorum ætuum moralitatem, seu ad meritum & demeritum, non sufficit libertas à coactione, sed requiritur libertas indifferentiæ.	115
§. III. Indifferentia contradictionis seu potestas ad agendum; vel non agendum est de essentia libertatis, secus vero indifferentia contrarietatis ad bonum & malum.	120
§. IV. Non est de ratione agentis liberi ut possit omnibus natura & causalitate ad agendum prærequisitis possit non agere in sensu composito.	132
TRACTATUS III. De actibus humanis.	
pag.	141
CAP. I. De simplici volitione finis.	142
CAP. II. De Motivo voluntatis.	145
§. I. Resolvitur prima difficultas.	146
§. II. Altera difficultas expeditur.	153
§. III. Resolutio tertiæ difficultatis.	157
CAP. III. De fruitione.	169
CAP. IV. De intentione.	171
CAP. V. De consilio & consensu.	174
CAP. VI. De electione mediorum.	178
CAP. VII. De usu.	186
CAP. VIII. De Imperio.	189
§. I. Datur in homine ætus imperij respectu sui ipsius suarumque operationum.	ibid.
§. II. Imperium est substantialiter ætus intellectus, præsupponit tamen necessario actum	

<i>voluntatis .</i>	195
CAP. IX. De Moralitate actuum humanorum incommuni.	201
CAP. X. De speciebus moralitatis .	203
CAP. XI. De principis moralitatis actuum humanorum.	212
§. I. <i>Prima & specifica moralitas actuum humanorum sumitur ex obiecto.</i>	<i>ibid.</i>
§. II. <i>Affectus humani aliquam bonitatem vel malitiam desumunt à circumstantiis.</i>	216
§. III. <i>Affectus humani desumunt etiam bonitatem vel malitiam à fine extrinseco operantis , distinctam ab ea quam habent ex obiecto & fine extrinseco operis .</i>	218
CAP. XII. An possit idem actus simul & eodem tempore , diuersas species moralitatis habere , & esse bonus ex obiecto & malus ex fine , vel è contra malus ex obiecto & bonus ex fine ?	223
CAP. XIII. De indifferentia actuum humanorum ad bonitatem vel malitiam moralem.	235
<i>Duo corollaria quæ obseruentur dignissima .</i>	<i>pag.</i>
	242
CAP. XIV. Actus exterior non addit bonitatem vel malitiam moralem intrinsecam supra interiorem, sed gaudet tantum bonitate vel malitia extrinseca, ab actu voluntatis imperante desumpta.	245
CAP. XV. De prima regula bonitatis & malitiæ moralis actuum humanorum scilicet lege æterna, seu voluntate diuina.	249
CAP. XVI. De altera regula bonitatis & malitiæ actuum humanorum , nimirum conscientia .	253

I N D E X.

<i>Soluntur obiectiones.</i>	274
TRACTATUS IV. De virtutibus in com- muni.	290
CAP. I. De natura virtutis .	291
CAP. II. De subiecto virtutum. .	295
§. I. Resolutio primæ difficultatis .	296
§. II. Resolutio secundæ difficultatis .	300
CAP. III. Traditur multiplex diuifio virtu- tum.	305
CAP. IV. De virtutibus moralibus infusis. pag.	307
CAP. V. Dux præcipuæ proprietates vir- tutum moralium, mediocritas & connexio. pag.	312
CAP. IV. An virtutes morales acquisite pos- sint esse sine charitate, & an sine illa veram rationem virtutis habeant ?	319
<i>Soluntur obiectiones.</i>	325
CAP. VII. De Donis Spiritus Sancti.	331
TRACTATUS V. De Peccatis.	335
CAP. I. De natura peccati in genere.	336
CAP. II. Peccatorum multiplex diuifio.	339
CAP. III. Comparatio peccatorum ad inui- cem.	342
CAP. IV. De subiecto peccatorum.	354
CAP. V. De causis internis peccati .	362
§. I. An & quæ ignorantia sit causa peccati & quanam ab illo excuset ?	363
§. II. Soluntur obiectiones .	373
§. III. Nullum nunquam contingit in volun- tate peccatum , absque præuio intellectus deffectu.	378
CAP. VI. De peccato originali .	382
§. I. Existentia peccati originalis contra Pela- gianos defenditur .	ibid.
§. II.	

I N D E X.

- §. II. Soluitur aliud argumentum difficile, & explicatur quomodo peccatum originale voluntarium sit. 387
- §. III. Quomodo peccatum Originale per generationem in posteros Adæ traducatur? 393
- §. IV. Corollaria præcedentis doctrinæ. 397
- §. V. Peccatum Originale formaliter & essentialiter consistit in priuatione iustitiæ originalis, quantum ad primum eius effectum, ut est voluntaria nobis voluntate Adami. pag. 400
- §. VI. Corollaria præcedentis doctrinæ. 406
- §. VII. Paruuli cum originali decedentes carebunt quidem visione beata, sed nullam pœnam sensus patientur; imo nec ullam ex pœna damni tristitiam: non erunt tamen beati beatitudine naturali. 413
- CAP. VII. De Peccato habituali personali. pag. 427
- CAP. VIII. De peccato commissionis. 438
- §. I. Peccatum commissionis in ratione malæ moralis non constituitur per priuationem, sed per aliquid positivum. ibid.
- §. II. Solvuntur obiectiones. 443
- CAP. IX. De peccato omissionis. 453
- §. I. Non potest dari omissio culpabilis sine actu præcedente, aut comitante, qui sit causa vel occasio omittendi. ibid.
- §. II. Aliæ difficultates circa peccatum omissionis breuiter resolvuntur. 460
- CAP. X. De Peccato mortali & veniali. 467
- §. I. Præcipua inter peccatum mortale & veniale discrimina. 468
- §. II. Qui mortaliter peccat, ultimum finem in creatura, virtualiter saltem & interpretati-

I N D E X.

- tātinè constituit.* 477
- §. III. *Quem finem ultimum actu intendat ille qui venialiter peccat.* 481
- §. IV. *Peccatum mortale, in ratione offensæ, continet malitiam & gravitatem in esse moris simpliciter infinitam.* 485
- §. V. *Virum peccatum mortale per se, & ex malitia sua intrinseca, reatum pænæ æternæ inducat?* 495
- §. VI. *Peccatum veniale in damnato, si non sit remissum quoad culpam in hac vita, per accidens puniatur in inferno pænâ æterna; secus verò si in hac vita quoad culpam dimissum fuerit, sed non quoad pœnam.* 500
- §. VII. *Impossibile est peccatum veniale esse in aliquo cum solo originali.* 503

F I N I S.


Vid.

Vid. D. Fulgentius Orighetus Cler. Reg.
S. Pauli, & in Metropol. Bonon. Ec-
cles. Pœnitentiarius pro Eminentiss. ac
Reuerendiss. D. D. Hieronymo Bon-
compagno, Archiep. Bonon. & Prin-
cipe,



Imprimatur

Fr. Thomas Raineri de Forliuio Vicarius
Generalis S. Officij Bononiæ,



SECUNDA PARS

MANVALIS

THOMISTARVM.

DE DEO

Vt vltimo Fine, & Medijs ad
illum Conducentibus.

PRÆFATIO.



IONYSIVS cap. 4. li-
bri de diuinis nominibus
sapienter docet, Dei amo-
rem, motum efficere orbi-
cularem, seu circulum ad-
mirabilem, dum extra se
suam effundit beneficen-


tiam n res creatas, nosque suæ bonitatis
illectibris suauissimè pellicit & trahit ad
seipsum, qui est rerum omnium principium


Tom. III.

A


& fi-

2
Et finis ; vt ab ipso egressi per creationem,
ad ipsum regrediamur per beatitudinem,
quam idcirco Picus Mirandulanus definit
reditum creaturæ intellectualis ad suum
principium . Vnde postquam D. Thomas
prima parte suæ summæ , Deum vt in se
vnum & trinum , rerumque omnium crea-
tarum principium considerauit , mox illum
vt finem vltimum creature rationalis con-
templatur , & tractat de beatitudine , &
medijs ad eius assecutionem conducentibus,
nimirum de actibus humanis , de virtutibus
ac donis in communi , de vitijs , & peccatis
illis oppositis (cū eadem sit contrariorum
scientia) de legibus , de gratia , & virtuti-
bus in particulari , tum Theologicis , tum
moralibus . De quibus etiam in hac secun-
da parte nostri Manualis , ea qua poterimus
breuitate & perspicuitate differemus tra-
ctatibus sequentibus.





TRACTATUS I. DE BEATITVDINE.




ss

PRIVSQVAM de beatitudine,
quæ est verus & vltimus hominis
finis, disputemus, aliqua de vlti-
mo fine in communi præmittenda esse cen-
suimus.

CAPVT I.

De vltimo fine hominis in communi.

Multa de fine in communi, quæ in Phi-
losophia pertractari solent, hic præ-
termittimus, vt ad vtiliora progrediamur,
& tres difficultates de fine vltimo resolu-
mus.



§. I.

*Quæ actiones hominis sint propter finem,
seu effectus finis?*

NOtandum primò, actiones quæ ab homine procedunt esse duplicis generis, quædam dicuntur *actiones hominis*, aliæ appellantur *actiones humanæ*. Prioræ sunt quæ ab homine producuntur, sed tamen ipsi cum alijs ratione carentibus communes sunt. Posteriores verò vocantur illæ quæ sunt propriæ hominis, inquantum est homo, seu quæ conveniunt homini, inquantum differt à brutis: dupliciter autem homo differt à brutis in operando, primò quantum ad substantiam operis, quia nimirum elicit operationes immateriales & intellectuales, quarum bruta capacia non sunt; secundò quantum ad modum operandi, quia nempe movet se non solum physicè & vitaliter, sicut bruta, sed etiam moraliter, agendo cum indifferentia, libertate, & dominio supra suos actus. Vnde duplici modo actiones ab homine procedentes possunt dici humanæ, videlicet quantum ad substantiam, & quantum ad modum. Primo modo omnes operationes procedentes à gradu intellectu, etiam quæ præveniunt omnem deliberationem rationis, dicuntur humanæ, secundo modo solæ actiones liberæ, seu deliberatæ. Ex quo intelliges, quadruplicis generis actiones in homine posse distingui. Quædam nec quoad substantiam nec quoad modum operandi humanæ sunt, sed purè brutales & animales,

Vt actiones corporeæ ; quæ non procedunt ex deliberatione rationis. Aliæ sunt humanæ quoad substantiam , sed non quoad modum , cuiusmodi sunt omnes intellectiones , & volitiones necessariae . Aliæ e contra sunt humanæ quoad modum , non quoad substantiam , vt actus comedendi , & bibendi , aliaq; actiones corporeæ , quæ sunt cum deliberatione & imperio rationis . Aliæ denique quoad substantiam & modum humanæ sunt , vt omnes intellectiones aut volitiones liberæ .

Notandum secundò , plures esse actus a voluntate elicitos , quorum aliqui versantur circa finem obtinendum , vt simplex volitio , & intentio ; alij circa finem iam obtentum , vt fructio ; alij circa media ad finem conducantia ; vt electio , & usus . De istis nulla est difficultas vel controuersia inter Theologos , manifestum enim est , illos esse propter finem seu effectus finis , eum voluntas eligat media , & illis vtatur , vt finem consequatur ; sed solum de duobus prioribus , qui circa finem obtinendum , vel iam obtentum versantur . Unde .

Dico primò , actus quibus voluntas fertur in finem nondum obtentum , vt simplex volitio ; & intentio , sunt effectus finis . Ità communiter docent Theologi contra Vasquez , & Lorcam , qui docent finem solum exercere suam causalitatem respectu illorum actuum qui versantur circa media , non verò respectu illorum qui respiciunt finem .

Probatur primò conclusio ex D. Thoma qu. 22. de verit. art. 2. vbi sic ait : *influire cause efficientis est agere , ita influire cause finalis*

est appeti seu desiderari. Quibus verbis aperte docet, causalitatem finis consistere in hoc quod appetatur seu desideretur, siue in hoc quod ad sui amorem moueat & alliciat appetitum: Atqui bonitas finis non solum mouet & allicit voluntatem ad electionem & usum mediorum, sed etiam ad sui amorem & desiderium: Ergo non solum electio & usus mediorum, sed etiam amor seu volitio finis est effectus illius.

Probatur secundò: Amor seu simplex volitio finis (idem cum proportionem de intentione dicendum) est actus voluntatis ab illa efficienter productus: Ergo est verè & propriè propter finem. Probatur consequentia, omne enim quod terminat causalitatem causæ efficientis, debet etiam terminare causalitatem finis, cum finis sit prima omnium causarum, & agens intellectuale non agat, nisi motum à fine.

Dico secundò, actum delectationis & quietis in fine iam adepto, qui fructio appellatur, non esse propriè propter finem.

Probatur primò ex D. Thoma hic qu. 2. art. 6. ad 1. ubi docet delectationem non esse propter aliud, tanquam propter causam finalem, sed tanquam propter formalem, seu obiectiuam. Vbi non loquitur de delectatione obiectiua, quæ non ponit in numero cum fine, ut quidam interpretantur, sed de formali, cum de ea loquatur, quæ est quietatio appetitus in bono.

Ratio etiam suffragatur, cum enim delectatio seu quies naturaliter sequatur ad possessionem finis, & sit veluti corollarium & comple-

plementum illius, non ponit in numero cum fine: Ergo sicut finis non est propter finem, neque effectus eius, ita nec delectatio seu fructio. Unde illa non est rigorosè actus humanus, sed meta & complementum actuum humanorum. Idem dicendum de amore beatifico, cum ille non sit in libera hominis potestate, nec homo ex deliberatione rationis, & electione voluntatis ad illum se moueat, & applicet, sed specialiter moueatur & applicetur à Deo, Quare non tam actus humanus, quam omnium actuum humanorum fructus & corona dici debet.

Obijcies primò contra primam conclusionem: Fieri propter finem est fieri ex amore finis, cum sit primus amor finis: Ergo non fit propter finem, nec per consequens est finis effectus.

Respondeo cum Carmelitis Salmanticensibus, quod sicut cum dicitur accidentia operari in virtute substantiæ, v. g. calorem in virtute ignis, hoc reddit constructionem intransitivam, ut loquitur Caietanus, quia non est sensus quod agant per superadditam aliquam virtutem, a substantia dimanantem, & in ipsa accidentia transeuntem, sed quod agant per seipsa, ut sunt virtutes à substantia dimanantes; illique subordinatæ. Ita similiter, cum dicitur primam volitionem fieri ex amore finis, id debet intelligi intransitivè, quia illa volitio est ipse amor finis, non verò transitivè, ita quod supponat alium amorem.

Obijcies secundò: Soli actus humani sunt propter finem: Sed simplex volitio, & intentio finis, non sunt actus humani: Ergo

non sunt propter finem. Minor probatur: *Illæ actiones propriè humane dicuntur, quæ ex deliberata voluntate procedunt*, ut ait S. Doctor hic artic. 1. Sed simplex volitio & intentio finis, non sunt ex deliberatione rationis; sicut enim consultatio non est de fine, sed de medijs, ita nec deliberatio: Ergo simplex volitio & intentio finis non sunt propriè actus humani.

Respondeo, permissa maiori, negando minorem, & ad eius probationem dico cum Contrado; quod deliberatio dupliciter vsurpari solet, nempe vel propriè & strictè, pro ea quæ ad electionem mediorum requiritur, & præsupponit intentionem finis: vel largè & communiter, pro ea scilicet quæ requiritur ad operandum bene vel male moraliter, ad quam sufficit facultas ad discernendum inter bonum & malum. Et de hac intelligi debet D. Thomas dum ait quod illæ actiones propriè humane dicuntur, quæ ex deliberata voluntate procedunt, non verò de prima.

Addo quod, actus etiam indeliberati & necessarij voluntatis, vel intellectus, possunt aliquo modo dici humani, non quidem simpliciter & absolutè, sed secundum quid, nempe causaliter, & initiatiuè; quia quamvis non sint actus deliberati, sunt tamen principium & initium deliberationis. Sicut motus cordis est initiatiuè vitalis, non consummatiuè; quia licet in eo animal nondum perfectè se moueat, est tamen initium vitæ, seu actionum, in quibus animal se mouet.

Obijcies tertio contra secundam conclusionem: D. Thomas hic artic. 1, ait quod omnes
actio.

actiones humanæ sunt propter finem : Sed fructio seu delectatio de fine adepto est actio humana : Ergo est propter finem.

Respondeo primò negando minorem , ut enim supra dicebamus , fructio non est rigorosè actus humanus, sed meta & complementum actuum humanorum.

Respondeo secundò, D. Thomam intelligendum esse de actionibus humanis quæ distinguuntur à fine, & ponunt in numero cum illo : fructio autem seu delectatio, aut quies in fine iam adepto, non ponit in numero cum fine , sed est veluti eius complementum & corollarium: unde sicut finis non est propter finem , ita nec actus fructitionis , delectationis, aut quietis in fine iam adepto.

Dices , Omne quod habet causam efficientem , habet etiam causam finalem , cum efficiens non agat nisi motum à fine: Sed fructio est actus voluntatis, ab illa efficienter productus : Ergo habet causam finalem, subindeque est propter finem.

Respondeo distinguendo maiorem : Omne quod habet causam efficientem , habet causam finalem , si non sit ipse finis, concedo . Si sit ipse finis , nego . Finis enim ut finis non habet causam finalem : v. g. si aliquis poneret rationem ultimi finis in contemplatione , ille actus haberet causam efficientem , sed non finalem, quia esset ipse finis.

Instabis, Voluntas delectatur de fine adepto, propter ipsum : Ergo delectatio voluntatis quiescentis in fine est propter finem .

Respondeo distinguendo Antecedens: Si ly *propter* dicat causam formalem concedo . Si

dicat causam finalem, nego. Solutio est D.
Thomæ loco supra laudato.

S. II.

*Verum quæcumque vult homo, velit propter
ultimum finem formalem, seu propter
beatitudinem incommuni?*

Dico primò, in omnibus quæ homo vult
& operatur, non intendit formaliter
ultimum finem formalem seu generalem, hoc
est beatitudinem in communi, bene tamen in-
terpretatiuè, & virtualiter.

Prima pars patet, experientia enim constat,
quod intellectu non cogitante formaliter de
beatitudine, sæpe voluntas operatur, & amat
bona particularia. Secunda verò sic ostendi-
tur: Tunc homo censetur interpretatiuè velle
aliquid, quando appetit aliquid quod ex na-
tura sua ordinatur ad illud, quamvis tunc de
eo non cogitet: v. g. qui dat eleemosynam
propter honestatem misericordiæ, nihil de
Deo vel de beatitudine cogitans, censetur
operari interpretatiuè propter Deum, & pro-
pter beatitudinem, quia ipsum bonum hone-
stum quod expressè intenditur, ex natura sua
refertur in Deum, & est medium quo tendi-
mus in beatitudinem: Sed bonum particula-
re ex natura sua ordinatur ad ultimum finem
formalem, & ad beatitudinem in communi,
cùm sit veluti quædam eius inchoatio & par-
ticipatio: Ergo quando homo bona particu-
laria appetit, vult interpretatiuè ultimum fi-
nem formalem, seu beatitudinem incommu-
ni.

ni. Hinc SS. Patres & Philosophi sæpe dicunt, omnia quæ appetit homo, appetere ut felix & beatus sit. Quod adeò verum est, ut D. Augustinus tractat. de Epicureis, & Stoicis cap. 3. dicat: *Qui malus est, malus non esset, nisi inde se beatum esse speraret.* Et ser. 1. in Plal. 118. *Beatum esse (inquit) tam magnum est bonum, ut hoc & boni velint & mali.* Nec mirum quod boni propterea sint boni: sed illud est mirum, quod etiam mali propterea sunt mali, ut sint beati; nam quisque libidinibus deditus ut luxuria, stuprisque corrumpitur, in hoc malo beatitudinem quaerit.

Tertia verò pars quæ asserit, hominem in omnibus quæ vult & operatur intendere beatitudinem, non solum interpretatiuè, sed etiam virtualiter, sic probatur. Ex volitione finis ultimi in communi, seu beatitudinis, relinquatur in voluntate virtus ad appetendum finem proximum, & bona particularia: Ergo ea virtualiter appetit propter ultimum finem. Consequentia pater, Antecedens verò docetur expressè à D. Thoma hic artic. 6. ad 3. ubi ait, quod *virtus primæ intentionis quæ est respectu ultimi finis, manet in quolibet appetitu cuiusque rei, etiam si de ultimo fine actu non cogitetur.* Et in 4. dist. 49. qu. 1. art. 3. quaest. hinc. 4. ad 6. *Desiderium beatitudinis (inquit) virtute est in omnibus desideriis, sicut causa in effectum.* Ratio etiam id suadet: cum enim intentio ultimi finis in communi, seu beatitudinis, sit volitio finis generalis, eius influxus debet, virtualiter saltem, se extendere ad omnes volitiones secundarias; sicut in-

fluxus primæ & vniuersalissimæ causæ efficientis, ad omnes in vniuersum effectus se extendit; influxus enim finis generalis, non minus debet se extendere, quam influxus causæ efficientis vniuersalis.

Dices, ex hoc sequi nullum dari actum otiosum: Nam actus otiosus ille dicitur, qui caret fine, seu qui ad nullum finem ordinatur: At si omnis actio humana respiciat beatitudinem in communi, nulla erit quæ careat fine, seu quæ ad aliquem finem non ordinetur: Ergo nulla erit otiosa.

Sed nego sequelam, & ad eius probationem dico, actum humanum non dici otiosum ex eo quod non ordinetur ad vltimum finem formaliter, siue ad beatitudinem in communi, sed ex eo quod careat fine aliquo particulari & intermedio, ab operante praestituto.

Dico secundo: Homo in omni operatione humana agit, saltem virtualiter, propter aliquem finem vltimum materiale, seu in particulari, verum, vel apparentem. Ita communiter docent nostri Thomistæ, & sequitur euidenter ex dictis conclusione præcedenti; cum enim intentio sit appetitus efficax finis, & illud vt futurum & obtinendum respiciat, non potest ferri in rem communem, vt omnino abstractam à subiecto, sed solum in rem communem, vt in subiecto in quo re vera potest existere, vel existimatur posse existere: Ergo quotiescumque homo intendit finem vltimum formaliter, seu bonum vt sic, & beatitudinem in communi, de facto vult aliquem finem vltimum in particulari, applicando talem rationem boni vt sic, seu beatitudinis in com-

humi, alicui rei in particulari, hoc est Deo, vel creaturæ, bono honesto, vel utili, aut delectabili; licet per affectum inefficacem & simplicis complacentiæ, possit ferri circa rationem boni ut sic, & beatitudinem in communi abstractam ab omni subiecto.

§. III.

Virum voluntas possit simul intendere plures fines ultimos totales & adequatos?

DIco primò, voluntas non potest efficaciter appetere duos ultimos fines totales & adequatos. Ita D. Thomas hic art. 5. & Thologi communiter.

Probatur primò ratione quam habet in argumento, *sed contra*: Ultimus finis adequatus & totalis habet totaliter dominari voluntati: Sed implicat duos esse fines qui totaliter voluntati dominantur, & quibus totaliter voluntas subijciatur & seruiat, iuxta illud Christi Matth. 7. *Nemo potest duobus dominis servire*: Ergo repugnat dari plures ultimos fines totales & adequatos.

Probatur secundò alia ratione quam habet in corpore eiusdem articuli: De ratione ultimi finis simpliciter est esse bonum perfectum, & satiativum totius appetitus hominis: At si essent duo ultimi fines simpliciter: neuter esset bonum perfectum, quia vni deficeret quod alter haberet; neuter etiam totum hominis appetitum satiaret, extra quemlibet enim aliud quippiam appeteret: Ergo repugnat dari duos ultimos fines simpliciter,

Pro-

Probatur tertio: De ratione ultimi finis simpliciter est quod omnia ordinentur ad ipsum, ipse verò ad aliud non ordinetur: Sed repugnat dari duo bona huiusmodi, nam vel vnum ordinaretur ad aliud, vel non? Si ordinaretur, iam esset bonum subordinatum, non ultimus finis. Si non ordinaretur ad aliud, istud iam non esset finis ultimus, vtpote non subiiciens omnia suæ ordinationi: Ergo repugnat duplex ultimus finis simpliciter. Vnde Gentiles qui plures Deos confingebant, rationem primæ causæ: & ultimis finis inter eos diuidebant, & vnū pro vno bono largiendo, alium pro alijs colebant: v. g. Martem pro re militari, Apollinem pro scientia, Venerem pro generatione, Cererem pro terræ foecunditate, vnumquē ex illis Dijs pro arbitrato suo alteri subiciebant & subordinabant. Hinc Tertullianus in Apologetico; Romanorum superstitionem in eligendis Dij deridens, bellissime ait: *Apud vos de humano arbitrato diuinitas pensatur: nisi homini Deus placuerit, Deus non erit; homo iam Deo propitius esse debet.*

Dico secundo, potest aliquis tendere in duos ultimos fines adæquatos, si tendat in vnum efficaciter & absolute, in alium verò ineffaciter & secundum quid. Ita docent Martinez, Ildephonsus, & alij ex nostris Thomistis, & probant duplici exemplo, Primum est, quando quis existens in peccato mortali facit opus moraliter bonum, v. g. dat eleemosynam pauperi ex motiuo misericordiæ, per talem actum tendit in Deum velut in vltimum finem; quia cum eleemosyna rite facta,

& quod.

& quodlibet bonum morale, deriuetur à Deo, vt naturæ ac boni honesti Authore, ex natura sua tendit, & facit tendere hominem in Deum, vt in vltimum finem naturalem; inefficaciter tamen, & secundùm quid, cùm per talem actionem non deferat creaturam, seu bonum proprium, & priuatum, ad quod tanquam ad finem vltimum per peccatum mortale conuersus est. Alterum exemplum est, quando quis existens in gratia; peccat venialiter; per peccatum enim veniale tendit in creaturam tanquam in finem vltimum, inefficaciter tamen, quia talis tendentia in creaturam, non sufficit vt illum auertat à Deo, quem respicit vt finem vltimum, per charitatem: Ergo tunc habet duos vltimos fines, vnum inefficaciter, alium efficaciter volitum.

Nec verum est quod ait Author Theologiæ mentis & cordis, nempe finem vltimum peccatoris bene agentis, & iusti venialiter peccantis, esse beatitudinem in communi, quam in omni actu incessanter inquirimus. Cùm enim appetitus hominis semper tendat in bonum, & illud importet existentiam, vel saltem ordinem ad illam, non potest efficaciter ferri in rem communem, vt omnino abstractam à subiecto, sed solum in rem communem, vt in subiecto, in quo re vera potest existere, vel existimatur posse existere. Vnde quotiescunque homo intendit finem vltimum formalem, seu beatitudinem in communi, vult aliquem finem vltimum in particulari, applicando talem rationem felicitatis seu vltimi finis, alicui rei, seu aliquibus rebus, hoc est Deo, vel creaturæ, bono honesto, utili, vel

vel delectabili, vt §. præcedenti ostendimus.

Obijcies primò contra primam conclusionem: Homo mortaliter peccans, constituit ultimum finem in creatura, vt communiter docent Theologi contra Adrianum: Sed homo potest diuersa peccata mortalia, etiam disparate se habentia, committere, puta fornicationem, furtum, superbiam, subindeque diuersas creaturas inordinatè diligere: Ergo potest habere plures ultimos fines simpliciter.

Respondeo finem ultimum peccantis mortaliter, esse ipsummet peccatorem, aut bonum proprium & priuatum ipsius, ad quod omnia quæ vult ordinat; illam verò creaturam propter quam peccat mortaliter, esse duntaxat finem proximum ad quem tendit, & à quo eius actus specificatur, vnde licet illa possit esse multiplex, non tamen propterea potest habere plures ultimos fines simpliciter. Solutio est D. Thomæ in 4: dist. 42. qu. art. 1. vbi sic ait: *Finis vltimus in amore commutabilium bonorum est ipse homo, propter quem omnia alia querit, & ideo si radix peccati accipiatur ex parte ipsius peccantis, erit vna; si autem sumatur ex parte eorum quæ propter seipsum peccans querit erunt plures.* Sed de hoc fusiùs in Tractatu de peccatis.

Obijcies secundò contra secundam conclusionem: De ratione vltimi finis est quod sit summum bonum, satians appetitum, & quod ad illum omnia alia ordinentur: Ergo implicat quod dentur duo vltimi fines, quamuis vnus appetatur inefficaciter. Consequentia patet, quia si vnus continet omnem appetibilitatem, non relinquit in aliò aliquid appetendum.

dum , & si omnia debent ordinari ad vnum ; alijs etiam ad ipsum ordinatur , & sic non potest esse finis vltimus , vt supra arguebamus .

Respondeo , concesso Antecedente , distinguendo consequens : implicat quod dentur duo vltimi fines , in re existentes , concedo . In apprehensione hominis , nego . Itaque existentia vltimi finis repugnat existentia alterius vltimi : quia hoc esset destruere essentiam vltimi finis , de cuius ratione est , quod sit summum bonum , satians appetitum , & quod ad illum omnia alia ordinentur . Apprehensioni autem vltimi finis , non repugnat apprehensio alterius vltimi imperfecti , quia apprehensio non adeo efficax est , vt imperfectam contrariam secum non compatiatur ; præsertim quando illæ cognitiones sunt in diuerso genere , & vna est practica , & alia purè speculatiua , vt contingit in proposito : nam peccans mortaliter , practicè iudicat vltimum finem esse bonum commutabilem , & speculatiuè esse Deum . Ex quo intelliges rationem a priori , cui homo non possit habere duos vltimos fines efficaciter volitos ; bene tamen , si vnus appetatur efficaciter , & alius ineffaciter ; quia nimirum duæ volitiones efficaces , requirunt duo iudicia practica de appetibilitate vtriusque finis , quæ sunt impossibilis ; ad duas autem volitiones , quarum vna sit efficax , & altera inefficax , sufficiunt duo iudicia , quorum vnum sit practicum , & alterum speculatiuum , quæ nullam habet inter se impossibilitatem & repugnantiam .

CAPVT II.

De Beatitudine obiectiua.

Manifestum est beatitudinem nostram obiectiuam; in nullo bono creato, sed in solo Deo consistere. Tum quia vltimus finis & primum principium sibi inuicem correspondent: Atqui esse primum principium soli Deo competit: Ergo & esse vltimum finem. Vnde in Apocalipsi dicitur Alpha & Omega, principium & finis, Tum etiam, quia beatitudo obiectiua est bonum perfecte satiatium hominis, subindeque vtriusque potentiae in anima eius existentis, intellectus scilicet & voluntatis: At solus Deus potest intellectum hominis satiare, quantum ad cognitionem veri; & voluntatem eius, quantum ad fruitionem boni: Ergo in illo solo beatitudo nostra obiectiua consistit. Maior constat, Minor etiam, quantum ad vtramque partem, manifesta est; nam obiectum intellectus est vniuersale verum, & obiectum voluntatis vniuersale bonum: Verum autem & bonum vniuersale in solo Deo reperitur, non verò in aliqua creatura, quæ habeat solum veritatem & bonitatem participatam, & ordinatam ad ipsum Deum, qui est fons totius veritatis & bonitatis: Ergo ille solus potest appetitum hominis satiare, quantum ad cognitionem veri, & fruitionem boni. Vnde Augustinus lib. de moribus Ecclesiæ cap. 8. *Bonorum summa nobis Deus est, nobis summum bonum; nec infra remanendum nobis est, nec ultra quarendum;*

al-

alterum enim periculosum, alterum nullum est.

Eadem veritas magis declarari & illustrari potest, discurrendo per singula bona creata, quæ sunt triplicis generis, nimirum bona animæ, quæ sunt virtutes & scientiæ; bona corporis, quæ sunt valetudo, robur, pulchritudo, voluptas; & bona fortunæ, quæ sunt diuitiæ, honores, dignitates, & similia, & demonstrando in nullo ex illis bonis, beatitudinem nostram posse consistere. In primis ergo incipiendo à bonis fortunæ, quæ sunt omnium minima, manifestum est, ea non esse beatitudinem hominis obiectiuam, cum sint purè externa, homine inferiora, & ei deseruientia ad vitam sustentandam, & non satient hominis appetitum, iuxta illud Eccl. 9. *Auarus non impletur pecunia, & iuxta istud Bernardi: Non plus satiat cor hominis auro, quam corpus aurum.* Adde quod beatitudo est bonum possessione percipiendum: diuitiæ autem non possessione, sed effusione, bonæ sunt, vt discit D. Thomas hic qu. 2. art. 1.

Idem dicendum de honoribus, dignitatibus, ac sæculari potentia; nam hæc etiam bona sunt purè externa, & humani cordis famem non satiant, sed acuiunt, & insuper caduca ac transitoria sunt. Exemplo sunt multi Summi Pontifices, qui nec integrum mensem, imò nec hebdomadam integram sui Pontificatus, numerare potuerunt. Sic Stephanus II. dies 4. Urbanus VII. dies 7. Bonifacius VI. dies 15, Coelestinus IV. dies 17. Sisinnius dies 20. Marcellus II. dies 21. Damasus II. dies 23. Pius III. dies 26. Leo XI. dies 27. Pontificatum tenuisse, tamque breui spatio absoluisse

di-


dicuntur? Hinc Bernardus ad Eugenium scribens, & hanc Pontificatus breuitatem illi inculcans epist. 237. sic ait: *In omnibus memento te esse hominem, & timor eius qui aufert spiritum Principum, semper sit ante oculos tuos: Quantom in breui Romanorum Pontificum mortes tuis oculis aspexisti? Ipse te prædecessores tui certissima & citissima decessionis admo-ueant, & modicum tempus dominationis eorum, paucitatem dierum tuorum nuntiet tibi.*

Constat etiam, beatitudinem in aliquo corporis bono non posse consistere, quia hæc bona communia sunt hominibus & brutis, imò in brutis sæpe reperiuntur perfectiori modo, quam in hominibus, vt vita longior, valetudo firmior, vires maiores, sensus acutiores. Idem dicendum de voluptatibus corporeis: Vnde Seneca epist. 74. *Quid mihi voluptatem nominas? hominis bonum quæro, non pecudis aut belluæ, quibus venter laxior est, & ad percipiendas corporis voluptates aptior. Illæ cibo avidius vtuntur, venere non æquè fatigantur. Addo quod beatitudo debet omnia mala excludere: voluptates autem corporeæ omnia mala non expellunt, sed potius multis amaritudinibus respersæ sunt. Vnde bellè ait Hugo a S. Victore: Voluptas mel habet in ore, fel in corde, aculeum in dorso. Et Boetius lib. 3. de consol.*

*Habet hoc voluptas omnis,
Stimulis agit fruenter?
Apumque par volantum,
Vbi grata mella fudit,
Fugit, & nimis tenaci,
Ferit ita corda morfu.*

Demum beatitudinem obiectiuam hominis, in bonis animæ, nempe scientijs, & virtutibus, non consistere, non minus euident est; scientiæ enim naturales, sitim animæ, & naturale sciendi desiderium, magis accendunt, quam extinguant; quia obiecta illarum summum bonum non sunt, nec primam veritatem continent; & aliunde in illis addiscendis, maximus contingit labor & afflictio spiritus, iuxta illud Eccles. 1. *In multa sapientia multa est indignatio, & qui addit scientiam, addit & laborem.* Virtutes verò, earumque operationes, sunt ordinabiles ad aliquod aliud, v. g. operationes iustitiæ ad seruandam pacem inter homines, actus fortitudinis ad victoriam & ad pacem; & sic de alijs virtutibus morali-
bus, quæ omnes ad hoc ordinantur, vt per eas conseruetur medium in passionibus internis, & decor in operibus externis: Ergo non possunt esse hominis felicitas, quæ non est ad vltiorem finem ordinabilis. Vnde Augustinus tract. de Epicureis & Stoicis cap. 8. *Non virtus animi tui facit te beatum, sed qui tibi virtutem dedit.* Et lib. 22. de ciuit. cap. 3. *Præmium virtutis erit ipse qui virtutem dedit.* Et alibi comparans sectam Epicureorum, Stoicorum, & Christianorum, hæc habet: *Epicurus ait: frui mea carne bonum est. Stoicus: frui mea mente bonum est. Christianus vero: mihi adherere Deo bonum est.*

His præmissis, breuiter resoluenda est celebris quæstio & controuersia quæ versatur inter Theologos, circa beatitudinem hominis obiectiuam, nempe an Deus, vt vnus, sit sufficiens ad nos beatificandum, ita vt si per impossi-



possibile non videretur vt trinus , hominis beatitudo subsisteret ?

Respondeo negatiuè , contra Scotum , Suarez , Molinam , & alios ex Recentioribus . Ratio fundamentalis est , quia vt visio Dei sit beatifica, debet terminari ad illum vt est in se: Sed visa per impossibile essentia diuina sine personis, visio Dei non terminaretur ad illum vt est in se : Ergo non esset beatifica . Minor constat, Deus enim vt est in se, non solum est vnus, sed etiam trinus . Maior verò probatur primò ex illo 1. Ioan. 1. *Cum appar erit similes ei erimus* (scilicet in beatitudine) *quia videbimus eum sicuti est* . Vbi ponderanda est causalis illa *quia*, illa enim significat , causam seu rationem à priori, cur visio Dei sit beatifica, esse quia terminatur ad illum vt est in se . Secundò probatur eadem maior , Vt cognitio Dei sit perfectè beatifica, debet esse intuitiua, & non purè abstractiua : Sed cognitio Dei intuitiua, debet ad illum vt est in se terminari; quia per hoc distinguitur cognitio intuitiua ab abstractiua , quod ista apprehendit obiectum proportionaliter ad captum intellectus, & distinguit illud , non vt est in se , sed tantum in habitudine ad ipsum intellectum ; illa verò videt & intuetur obiectum , vt est in se à parte rei . Tertiò eadem maior sic ostenditur: Vt visio Dei sit beatifica, debet perfectè satiare & quietare appetitum : At nisi terminetur ad Deum vt est in se , & prout subsistit in tribus personis , non satiabit nec quietabit perfectè appetitum : Ergo vt sit beatifica , debet terminari ad Deum vt est in se, & prout subsistit in tribus Personis . Maior patet , minor
pro-

probatur . Videns aliquam naturam, desiderat videre modum quo illa subsistit , & non quietatur, donec videat illum : Sed natura diuina subsistit in tribus personis : Ergo nisi visio Dei terminetur ad illum , vt subsistentem in tribus personis , non satiabit nec quietabit perfectè appetitum beati . Addo quod beatus videndo essentiam, connaturaliter desiderat videre proprietates cum essentia necessariò connexas : proprietates autem personales sunt ita necessariò cum essentia connexæ, vt sint de conceptu quidditatiuo Diuinitatis , vt in Tractatu de Trinitate demonstrauius : Ergo beatus videndo essentiam, connaturaliter desiderat illas videre, & per consequens non potest eius appetitus perfectè satiari , nisi illas videat . Addo etiam , quod beatitudo nostra est participatio diuinæ felicitatis : Deus autem non esset perfectè beatus , si per impossibile seipsum cognosceret vt vnum , & non vt trinum, quia talis cognitio non esset perfectissima, vtpote nec intuitiua , nec comprehensiuua : Ergo pariter , si Deus nobis cognosceretur vt vnus & non vt trinus , talis cognitio non esset nostra beatitudo . Vnde Ioan. 17. dicitur : *Hæc est vita æterna, vt cognoscant te Deum verum, & quem misisti Iesum Christum;* Vbi pro obiecto vitæ seu felicitatis æternæ, assignatur Pater & Filius , qui cum se inuicem amore infinito diligant , non possunt vt sunt in se videri, nisi pariter videatur Spiritus Sanctus , qui huius mutui ac infiniti amoris est fructus & terminus.

Obijcies primò : Essentia beatitudinis consistit in hoc quod sit visio & consecutio summi boni:

boni: Sed visa diuina essentia, tametsi non viderentur personæ, homo videret & consequeretur summum & infinitum bonum; cum relationes nullam addant bonitatem & perfectionem ad essentiam, vt in Tractatu de Trinitate docuimus: Ergo visa essentia sine Personis, beatitudo nostra subsisteret.

Respondeo distinguendo maiorem: Essentia beatitudinis consistit in hoc quod sit visio & consecutio summi boni, eo modo quo est in se, concedo maiorem. Sine tali modo, nego maiorem, & sub eadem distinctione minoris, nego consequentiam. Solutio patet ex supra dictis: Visio enim Dei non habet quod sit beatifica, ex præciso conceptu visionis & consecutionis summi boni, sed ex conceptu visionis & consecutionis Dei, vt est in seipso, quia sub hoc tantum conceptu est cognitio intuitiua, & quietatiua appetitus beatorum, vt supra ostensum est. Vnde sicut in sententia Aduersariorum, notitia abstractiua quidditatis & essentiae Dei, non foret beatifica; quia etsi esset cognitio summi boni, non tamen esset cognitio illius vt est in se: ita in nostra, visio diuinæ essentiae absque personis, non foret beatifica; quia licet terminaretur ad summum bonum; non tamen prout est in se, cum de facto natura diuina in tribus personis subsistat & existat.

Obijcies secundò: Relationes non sunt de essentia obiecti formalis & primarij nostræ beatitudinis: Ergo licet non viderentur, beatitudo tamen nostra subsisteret. Consequentia videtur manifesta: Antecedens verò docetur à nostris Thomistis in tractatu de visione
bea-


beatifica, & patet quia visio beatifica est participatio diuinæ intellectiōis, subindeque habet idem obiectum formale & primum: obiectum autem formale & primum, tam motuum quam terminatum diuinæ intellectiōis, est diuina essentia, vt attributis & relationibus virtualiter distincta, vt in Tractatu de scientia Dei cap. 1. ostensum est: Ergo & visionis beatificæ.

Respondeo negando Antecedens, licet enim relationes non sint obiectum formale & primum nostræ beatitudinis, ratione sui, non sunt tamen obiectum secundarium, sed pertinent ad obiectum primum, vt modi illius essentielles; vnde repugnat videri essentiam diuinam sine personis, & illis non visis essentiam beatitudinis subsistere; sicut repugnat corpus coloratum videri oculo corporeo, nisi sit extensum, & figuratum, quia sensibile commune modificare debet sensibile proprium.

Dices, relationes diuinæ non sunt de quidditate Dei, vt est primum principium, etiam vt modi essentielles illius, aliàs naturaliter ex creaturis cognitis posset cognosci Trinitas Personarum: Ergo nec sunt de essentia illius, prout est vltimus finis, & beatitudo nostra obiectiua, etiam vt modi eius essentielles. Antecedens patet, consequentia verò probatur ex eo quod sub eadem ratione Deus est vltimus finis, & primum principium creaturarum.

Respondeo, concessio Antecedente, negando consequentiam, & probationem illius. Licet enim illud quod est primum principium, sit etiam vltimus finis beatificans, non tamen

per illam eandem rationem constituitur beatificans, qua constituitur primum principium, nam constituitur in ratione primi principij per omnipotentiam, vel creationem, quæ conuenit Deo secundum se, vt præintelligitur relationibus & personis: in ratione verò vltimi finis beatificantis constituitur per visionem essentia suæ, vt est in se: vnde cum illa non possit vt est in se videri sine relationibus, & personis in quibus subsistit & existit, illæ sunt de essentia & quidditate Dei, vt habet rationem vltimi finis beatificantis, vt modi illius essentiales.



C A P V T III.

De essentia beatitudinis formalis.

Explicata beatitudine obiectiua, super est vt formalem, quæ est illius possessio seu affectio, declaremus, & in quo actu essentialiter illa consistat, seu per quam operationem beati Deum vt summum bonum, & finem vltimum beatificantem possideant, & explicemus.

§. I.

Premittenda ad resolutionem huius celeberrimæ quæstionis.

Quatuor vt certa, & ab omnibus ferè huius temporis Theologis vnanimiter re-

cepta, præsupponenda sunt . Primum est, hominem per increatam Dei visionem sibi unitam non posse beatificari . Ratio fundamentalis est, quia beatitudo formalis est operatio vitalis , qua beatus in actu secundo viuit , iuxta illud Ioan. 17. *Hæc est vita æterna, ut cognoscant te Deum verum*: Sed implicat beatum vitare in actu secundo per visionem increatam Dei: Ergo & per illam beatificari formaliter . Maior constat, minor probatur. Vita actualis debet convenire viuenti ab intrinseco, vel per identitatem , qualiter contingit in Deo , qui viuit in actu secundo per actum sibi omnino identificatum ; vel per egressionem effectiuam ab illo , qualiter contingit in vita actuali creata : Sed diuina intellectio nequit intellectui creato convenire ab intrinseco villo ex his modis , cum in utroque maxima imperfectio importetur : Ergo omnino repugnat intellectum creatum per illam constitui viuentem in actu secundo.

Secundò supponendum est , beatitudinem non consistere in illapsu speciali Dei in essentiam animæ, quo anima substantialiter sanctificetur, deificetur, & quodammodo in Deum transformetur, sicut ferrum candens in ignem, & diaphanum in lucem , ut docet Henricus Gandauensis quot lib. 13. quæst. 12. Probatur hæc suppositio : Cum Deus non sit præsens rebus nisi per operationem, ut in Tractatu de attributis cap. 9. ostendimus, non potest habere specialem præsentiam & illapsum in essentiam animæ , nisi producendo vel conseruando in ea formam aliquam vel qualitatem supernaturalem , quæ non potest esse alia

quam gratia sanctificans, quæ sola residet in essentia animæ: Sed hic illapsus non est beatitudo formalis, aliàs omnes iusti essent beati: Ergo beatitudo non consistit in illapsu Dei in essentiam animæ.

Confirmatur: Per beatitudinem formalem Deum consequimur, possidemus, ac tenemus, unde beati comprehensores dicuntur: per operationem verò & illapsum Dei in animam, non tenemus & possidemus Deum, sed potius ille nos tenet, ac possidet, vt patet de illapsu immensitatis quo Deus singulis rebus est præsens; per illum enim Deus omnia continet & portat verbo virtutis suæ, vt ait Apostolus ad Hebræos 1. Ergo beatitudo formalis non consistit in illapsu Dei in essentiam animæ.

Tertiò supponendum est, formalem beatitudinem, non in aliquo per modum actus primi, sed in actuali operatione consistere. Quod probatur hac ratione D. Thomæ hic qu. 3. art. 2. Beatitudo formalis est vltima hominis perfectio: Sed vltima hominis perfectio non est actus primus, sed operatio & actus secundus: Ergo beatitudo formalis in operatione consistit. Maior constat, nam si beatitudo non esset vltima hominis perfectio, non perfectè satiaretur eius appetitum, adhuc enim appetere vltiorem perfectionem. Minor etiam videtur certa. Tum quia actus primus ad secundum ordinatur, quod est contra rationem vltimæ perfectionis. Tum etiam, quia cum Deus sit actus purissimus, & omnis potentialitatis expers, homo magis illi assimilatur per operationem, & actum secundum, quam per habitum, vel actum primum, sub-

in

indeque maiorem perfectionem consequitur.

Quartò supponimus, hanc operationem, in qua beatitudo formalis consistit, elici ab ipso beato, & ab illo effectiue procedere; imò implicare contradictionem, quod beatus videat Deum per actionem à se non elicitam, & à Deo immediatè productam.

Prima pars, quæ est contra Nominales, constat ex dictis in prima suppositione; nam operatio illa in qua beatitudo formalis consistit, est actus vitalis: de ratione autem actus vitalis est quod procedat à principio intrinseco, & vitali: Ergo operatio illa, in qua beatitudo formalis consistit, elicitur de facto ab ipso beato, & ad illam non se habet merè passiuè. Addo quod, dato quod de potentia absoluta, posset à solo Deo produci, negari tamen non potest, suauius & connaturalius hominem beatificari, per formam effectiue ab ipso causatam, quam per formam solum in ipso receptam: At Deo semper, & maximè respectu beatorum, debemus adscribere id quod suauius & naturis rerum conformius est, nisi oppositum sit reuelatum, vel impossibiles quia ut dicitur Sapient. 8. *Attingit à fine usque ad finem fortiter, & disponit omnia suauiter*: Ergo cum non repugnet beatum effectiue causare formalem beatitudinem, neque reuelatum sit quod eam non causet, tenemur asserere ipsum actiue ad illam concurrere, & non merè passiuè se habere.

Nec valet si dicas, de ratione præmij esse quod procedat à solo præmiante. Hoc enim verum est de præmio obiectiuo, id est de re quæ datur in præmium; falsum autem de præ-

mio formali, id est de consecutione & tentatione præmij; hæc enim, cum sit actio nostra, debet effectiue à nobis procedere. Nec inconueniens est concedere, quod homo seipsum beatificet secundum quid, quatenus scilicet producit visionem, in qua formaliter eius beatitudo consistit; sicut dicitur seipsum iustificare 1. Ioan. 3. *Qui habet hanc spem in eo, sanctificat se*; quia ad actus disponentes ad iustificationem effectiue concurrunt. Non potest tamen dici hominem seipsum beatificare simpliciter, quia ut hoc verum esset, oporteret quod homo esset causa eorum quæ requiruntur ad ipsam beatitudinem, nempe luminis gloriæ, & vnionis essentia diuinæ in ratione speciei.

Secunda pars suppositionis, quæ asserit implicare contradictionem quod beatus videat Deum, per actionem à se non elicitam, colligitur ex dictis in prima: Si enim beatus ad visionem beatificam merè passiuè se haberet, simul viueret & non viueret, quæ sunt contradictoria. Viueret quidem, quia intellectio actio vitalis est; & beatifica visio vita æterna, ut dicitur Ioan. 17. Non viueret autem, quia de ratione actionis vitalis est quod effectiue procedat à principio intrinseco & vitali; unde implicat quod aliquis vitaliter se moueat per motum ab alio causatum, vel quod vitaliter generet generatione præcisè recepta, & à se non elicita.

Confirmatur: Viuens per hoc solùm à non viuente differt, quod non viuens habet perfectionem in se, non tamen à se; viuens autem non solùm illam recipit in se, sed etiam illam
ha-

habet à se ; vel per identitatem, qualiter contingit in vita actuali diuina ; vel per elicentiam seu realem egressionem, qualiter contingit in vita actuali creata: Ad quod præcisè recipit motum, & illum effectiue non causat, non habet illum à se, sed in se solùm : Ergo per illum non viuit, nec potest viuens in actu secundo constitui.

Dices, Deus potest producere se solo quidquid producit media causa secunda, vt docet D. Thomas 1. p. qu. 105. art. 2. his verbis: *Erroneum est dicere, Deum non posse facere per seipsum omnes determinatos effectus qui fiunt per quamcumque causam creatam.* At mediante intellectu eleuato per lumen gloriæ potest producere visionem beatam: Ergo & sine illo.

Respondeo Deum posse se solo producere quidquid producit media causa secunda, si sit purè efficiens, secùs verò si simul sit formalis: intellectus autem non solùm est causa efficiens sed etiam formalis extrinseca respectu intellectiõis, quæ à principio vitali speciem desumit. Vel secundo, respondeo, veram esse maiorem de illis effectibus qui non habent dependentiam essentialem ab aliqua causa; secùs verò de illis qui essentialiter ab aliqua causa dependent, quia Deus non potest essentias rerum destruere: Visio autem beatifica, cùm sit actio vitalis, essentialiter dependet ab intellectu creato. Et potest fieri instantia de generatione, nutritione, & augmentatione, quas Deus nequit se solo producere: quia cùm sint essentialiter actiones vitales, à potentia vitali generatiua, nutritiua, & augmentatiua petunt

procedere. Similiter verbum mentis, sub eâ ratione qua vitale est, & terminus vitalis à principio vitali actu intelligenti expressus & productus, non potest suppleri à Deo, & sine actuali intellectus concursu produci, licet, vt est actualissima obiecti repræsentatio, ab illo suppleri possit; vt contingit in visione beatifica, in qua essentia diuina actualissimè seipsam repræsentat intellectui beatorum, subindeque gerit vices verbi, quatenus est actualissima obiecti repræsentatio, vt in tractatu de visione beatifica declarauimus.

§. II.

Beatitudo formalis, non in pluribus, sed in vno duntaxat actu consistit essentialiter: ille verò nec est amor, nec fruitio, seu delectatio, sed clara Dei visio.

Prima pars huius assertionis, quæ est contra Valentiam, Suarez, & alios Recentiores, existimantes beatitudinem formalem plures operationes essentialiter includere, nempe visionem, & amorem, probatur hac ratione fundamentali. Beatitudo formalis est assecutio prima vltimi finis, alias beatitudinis perfectiones radicaliter seu causaliter continens: Sed hoc vni tantum operationi conuenit: Ergo in vna & non in multis operationibus: consistit essentialiter formalis beatitudo. Maior est certa, nam in alijs essentijs id intelligimus esse constitutum formale, quod primò illis competit, & in quo radicaliter ceteræ perfectiones continentur; vt patet in hominibus

mine, cuius constitutum est rationalitas, quia primò ei competit, & est radix risibilitatis, & aliarum proprietatum quæ conueniunt naturæ humanæ : Ergo cum beatitudo formalis in vltimi finis affecutione posita sit, in illo debet essentialiter consistere, cui primò conuenit ratio affecutionis, continentis radicaliter seu causaliter reliquas perfectiones, statum beatificum concomitantes. Minor etiam non est minùs certa, nam inter duas operationes rationalis naturæ, pertinentes ad diuersas potentias, intellectum scilicet & voluntatem necessariò interuenit ordo prioritatis & posterioritatis, cum nihil sit volitum quin præcognitum : Ergo vtraque nequit esse prima affecutio vltimi finis, alias beatitudinis perfectiones radicaliter seu causaliter continens. Sicut quia inter rationalitatem & risibilitatem reperitur ordo ac subordinatio, & risibilitas supponit rationalitatem, impossibile est, quod vtraque essentiam hominis primò constituat, & radicaliter contineat omnes alias perfectiones quæ competunt naturæ humanæ.

Nec valet quod dicunt Aduersarij, plures operationes partialiter concurrere ad consecutionem vltimi finis, nempe visionem, & amorem. Nam præter quam quod nullus actus voluntatis est adeptio seu consecutio vltimi finis, vt infra ostendemus, hoc dato & non concesso, subsistit tota vis nostræ rationis; quia cum amor beatificus necessariò supponat claram Dei visionem, & illi subordinetur, non potest esse prima affecutio Dei, omnes beati perfectiones radicaliter continens, sed id soli

visioni potest competere, vt infra patebit; & ita, etiam hoc dato, verum erit, beatitudinem formalem essentialiter in vnica operatione consistere, quamuis plures includat concomitanter vel consecutiue. Vnde plures in hac materia hallucinantur, confundentes essentiam beatitudinis, cum eius statu; licet enim status beatitudinis plures includat operationes, nempe claram Dei visionem, amorem beatificum, & fruitionem seu delectationem ex illis resultantem; essentia tamen beatitudinis est vnicus actus simplicissimus, nimirum clara Dei visio; quæ est radix & causa amoris, ac delectationis. Si enim ex multis operationibus coalesceret, non esset simpliciter alijs rebus creatis, imò esset veluti vnum per accidens, & per aggregationem plurium, quod summæ eius perfectioni repugnat; quando enim aliqua forma est perfectior, tantò debet esse simplicior, vt constat in Angelo, qui quò superior & perfectior existit, tantò est simplicior, & paucioribus ac vniuersalioribus vtitur speciebus, vt in tractatu de Angelis ostensum est.

Secunda pars, quæ asserit actum illum in quo beatitudo formalis essentialiter consistit, non esse amorem beatificum, probatur contra Scotum ratione iam insinuata: Beatitudo formalis est assecutio prima vltimi finis: Sed amor beatificus non est prima assecutio vltimi finis, Tum quia supponit visionem beatificam, per quam vltimum finem assequimur, vt infra patebit: Tum etiam, quia amor non est assecutius vltimi finis, quod ostenditur dupliciter. Primò ratione generali, quia nullus actus

actus voluntatis potest esse affectio ultimi finis : velle enim est quoddam appetere autem non est consequi rem appetitam , sed inclinari & tendere in eam . Vnde D. Thomas hic qu. 3. art. 4. *Si consequi esset per actum voluntatis , statim à principio cupidus consecutus esset pecuniam , quando vult habere illam.*

Secundò idem probatur specialiter de amore beatifico : Amor enim patriæ est eiusdem speciei cum amore viæ : Sed amor viæ non est affectio ultimi finis , alioquin viatores essent comprehensores : Ergo nec amor patriæ .

Nec valet quod respondent aliqui ex Scoti Discipulis , nempe amorem viæ & patriæ , quia regulantur diuersis cognitionibus , specie inter se differre . Primò quia cognitio non specificat actus voluntatis , neq; vt quod , neque vt quo , sed ipsa bonitas apprehensa , apprehensione ingrediente solùm vt conditione applicante , vt docent nostri Thomistæ in Philosophia . Secundò , quia si amor viæ & amor patriæ specie inter se differant , ex diuersitate cognitionum illos regulantium , sequitur habitum charitatis viatoris , specie distinguui ab habitu charitatis comprehensorum , subindeque charitatem viæ non remanere , sed euacuari in patria , contra illud Apostoli 1. ad Corinth. 13. *Charitas nunquam excedit.* Sequela probatur : idcirco dantur in intellectu habitus specie diuersi in via & in patria , nempe fidei , & luminis gloriæ , quia cognitio patriæ specie distinguitur à cognitione viæ : Ergo si amor patriæ similiter specie differat ab amore viæ , debemus in voluntate pro utroque statu admittere habitus diuersæ speciei .

Non valet etiam quod alij dicunt, nimirum amorem patriæ, licet sit eiusdem speciei cum amore viæ, obtinere tamen rationem afsecutionis vltimi finis, quæ amorì viæ non competit, vel ratione maioris intensiõis, vel ratione cuiusdam modi consummatiui, vel ex ratione indiuiduali. Amor enim B. Virginis, dum erat in viâ, amores omnium beatorum in intensiõne superabat, & tamen non habebat rationem afsecutionis vltimi finis: Ergo ratione graduum intensiõis, amor patriæ rationem afsecutionis obtinere nequit. Ex quo impugnatur id quod additur de modo consummatiui, nam modus sapit naturam rei cuius est modus, quo circa modus intensiõis nequit esse afsecutio, quia entitas amoris cuius est modus, afsecutio non est: Ergo eadem ratione modus ille consummatius amoris beatifici, afsecutio non erit. Quod etiam non obtineat rationem afsecutionis, ex ratione indiuiduali, manifestum videtur: Tum quia in intellectu actus qui est consecutio, specie distinguitur ab actu non consecutiuo, v.g. actus fidei à clara Dei visione. Tum etiam, quia in voluntate desiderium specie differt à gaudio, quia desiderium est de bono non habito, gaudium verò de bono possessio: Atqui similiter actus amoris qui esset afsecutio vltimi finis, obiecti præsentiam exposceret, non secus ac gaudium: Ergo specie differret ab actu amoris, qui non esset afsecutiuus vltimi finis, tubindeque non potest competere amorì ex sua ratione indiuiduali, quod sit vltimi finis consecutio.

Tertia pars quæ asserit beatitudinem forma-

mālem in fruitione beatifica non consistere essentialiter, manifesta videtur; nam sicut desiderium est de bono absente & nondum habito, ita fruitio seu delectatio est de bono iam habito & possessio; vnde non facit sed supponit finis consecutionem, & vt ait D. Thomas hic art. 4. *Delectatio aduenit voluntati, ex hoc quod finis est præsens, non autem è conuerso ex hoc aliquid sit præsens, quia voluntas delectatur in ipso.*

Quarta demum pars affirmans beatitudinem formalem essentialiter in clara Dei visione consistere, sequitur ex præcedentibus; si enim talis beatitudo sit vnicus actus simplex, & ille nec sit amor, nec fruitio, seu delectatio, necesse est vt sit ipsa Dei visio; nulla enim, præter istas datur in beatis operatio, quæ rationem beatitudinis formalis habere possit. Vnde Augustinus in soliloquijs cap. 36. *Hoc est plena beatitudo, & tota glorificatio hominis, videre faciem Dei sui.* Et in Ps. 90. *Nescio quid magnum est quod visuri sumus, quando tota merces nostra visio est.*

Deinde, vt supra arguebamus, beatitudo formalis est affectio vltimi finis, alias beatitudinis perfectiones radicaliter seu causaliter continens: Sed clara Dei visio habet has duas conditiones: Ergo in ea beatitudo formalis consistit essentialiter. Maior pater, minor etiam, quantum ad secundam partem, euidentius est; visio enim beatifica est radix amoris necessarii, summæ delectationis, omnimodæ impeccabilitatis, aliarumque perfectionum & proprietatum, quæ beatitudini connaturaliter conueniunt, vt constabit ex dicendis capi-

te sequenti . Probatur verò quantum ad primam. Primò ex Augustino lib. 83. quæst. 35. ubi sic ait : *Quid aliud est beatè vivere , nisi æternum aliquid cognoscendo habere ?* Quibus verbis aperte docet, claram Dei visionem esse beatitudinis consecutionem . Secundò ex differentia quæ inter intellectum & voluntatem reperitur , intellectus enim trahit res ad se, easque sibi præsentis efficit, vel secundum esse intelligibile , si cognitio sit rei aut absentis aut materialis, vel secundum esse entitativum, si cognitio sit obiecti spiritualis intimè præsentis , qualis est Deus clarè visus . Voluntas verò non trahit ad se res , sed potius fertur in illas, iuxta illud Augustini : *Amor meus pondus meum; eo feror quocumque feror .* Atqui trahere res ad se, easque sibi facere præsentis, est eas consequi & possidere; trahi verò est possideri, vel potius impelli in rem amatam: Ergo creatura intellectualis assequitur Deum per actum intellectus , non verò per actum voluntatis . Tertiò, cum gratia quæ naturam imitatur sit ordinatissima , non debuit eleuare ad maximum præstantissimum munus , quale est consecutio vltimi finis , nisi præstantissimam & perfectissimam creaturæ rationalis operationem : Sed visio beatifica est perfectissima operatio creaturæ intellectualis, cum sit participatio maioris excellentiæ diuinæ, participat enim diuinum intelligere , quod maiorem exprimit in Deo perfectionem, quam volitio, & alia attributa : Ergo visio beatifica est vltimi finis assecutio . Hanc rationem indicat Augustinus supra citatus, his verbis : *Omniū rerum præstantissimum est quod æter-*
num

num est, & propterea id habere non possumus, nisi ea re qua præstantiores sumus, id est mente.

Potest insuper probari eadem pars hoc discursu: Beatitudo consistit essentialiter in ea operatione, quæ formaliter, vel causaliter satiat omnem appetitum creaturæ rationalis, unde *desideriorum quies* appellatur: Sed visio beatifica hoc præstat: Ergo in illa essentialiter consistit formalis beatitudo. Maior constat ex supra dictis, minorem verò fusè ostendimus in digressionem quæ habetur in Clypeo Theologiæ Thomisticæ tract. de beatitudine disp. 3. ad finem articuli 2. potestque breuiter in hunc modum declarari. Quatuor sunt præcipua hominum desideria, quibus, veluti quatuor ventis, omnes viæ humanæ turbines excitantur. Primum est desiderium veritatis, commune cum Angelis; secundum est desiderium voluptatis, commune cum brutis; tertium desiderium æternitatis, commune cum omnibus rebus, quæ fugiunt interitum & corruptionem quantum possunt. Quartum desiderium dignitatis, & magnitudinis, proprium hominibus ad vitam politicam & civilem: Atqui hæc quatuor desideria cumulativè & perfectivè complentur per visionem beatificam: Ergo illa satiat omne desiderium creaturæ rationalis. Minor probatur, quantum ad singulas partes, discurrendo per quatuor illa desideria. Et in primis, quantum ad desiderium veritatis res adeò clara & perspecta est, ut vix probatione indigeat; cum enim quilibet beatus videat Dei essentiam, quæ est ipsa veritas per essentiam, in qua omnes veri-

tates

ates creatæ & increatæ eminentissimo modo continentur, manifestum est, illam affluere omni scientia, non solum rerum creatarum, sed etiam attributorum ipsius Creatoris, & videre in verbo omnia nostræ fidei mysteria, totum hoc vniuersum, plures creaturas possibles & futuras, & denique omnia quæ ad illius statum pertinent, vt in Tractatu de visione beatifica ostensum est. Vnde præclare Gregorius magnus 4. dialog. cap. 33. *Quid est quod ibi nesciant ubi scientem omnia sciunt.*

Deindè quantùm ad desiderium voluptatis seu delectationis, non minùs euidens est illud per visionem beatificam perfectè satiari, cum iuxta D. Thomam 1. 2. qu. 31. art. 5. ad delectationem tria concurrant, nimirum potentia cognoscens siue sentiens, obiectum ei conueniēs, & vnio obiecti cum illa; & hæc tria in visione beatifica perfectissimo modo reperiantur; nam intellectus à qua elicitur, inter potentias cognoscentias purior, altior, nobilior, & vt ita dicam viuacior est, subindeque multo aptior ad cognoscendum; & Deus, vtpote primum verum primum intelligibile, est altissimum & nobilissimum obiectum; atque vnio illius cum intellectu, ita intima est, vt excepta vnione hypostatica, maior & intimior dari non possit. Quare illud est discrimen inter gaudium huius mundi & paradisi, quod primum, vtpote paruum & modicum, dicitur intrare in cor hominis; aliud verò, vtpote immensum & infinitum, humano corde concludi nequit, adeoque melius dicitur homo in illud intrare gaudium, quam illud gaudium in cor hominis introire, iuxta illud

illud Christi Matth. 25. *Intra in gaudium Domini tui.* Vnde Anselmus in prolog. cap. 26. *Non ergo tantum illud gaudium intrabit in gaudentes, sed toti gaudentes intrabunt in gaudium Domini. Tam magnum est de Deo gaudium cælestis patriæ, ut non possit concludi in homine, & ideo homo intrat in gaudium illud incomprehensibile, & non intrat gaudium illud in hominem tanquam comprehensum ab homine.*

Porro ingens hoc gaudium ex triplici fonte profluit, seu tres præcipuas habet causas: In primis enim gaudent beati de bono diuino, ac infinita Dei felicitate; vera enim amicitia, qualis est charitas, congaudet bonis amici. Secundò gaudent de bono proprio, & de felicitate qua potiuntur, fruendo Deo tanquam bono proprio. Tertiò gaudent de bonis & felicitate aliorum Sanctorum, apud quos, ut ait Gregorius Magnus, *Non erit inuidia disparis claritatis, quoniam regnabit in omnibus unitas charitatis.*

Ingens hoc gaudium eleganter describit August. de Spiritu c. 64. his verbis: *Gaudium verò quale aut quantum, ubi tale & tantum bonum inuenitur? Cor humanum, cor indigens, cor inexpertum, eruptum, imò obrutum ærumnis, quantum gauderes si his omnibus abundares? Interroga intima tua, si capere possunt gaudium suum de tanta beatitudine sua. Sed certè si quis alius, quem omnino sicut teipsum diligeres, eandem beatitudinem haberet, duplicaretur gaudium tuum, quia non minus gauderes pro eo, quam pro teipso. Si verò vel duo, vel tres, vel multò plures ha-*
be-

berent id ipsum, tantumdem pro singulis;
quantum pro te ipso gauderes, si singulos, si-
cut te ipsum amares. Ergo in illa perfecta
charitate innumerabilium beatorum, Angelo-
rum & hominum, ubi nullus minus diligit
aliud, quam seipsum, erit gaudium innu-
merabile. Si ergo cor hominis de tanto suo bono
vix capies gaudium suum, quomodo capax
erit tot tantorum gaudiorum in illa perfecta
felicitate? ubi sicut unusquisque plus amabit
sine comparatione Deum, quam seipsum, & om-
nes alios secum, ita magis gaudebit absq; esti-
matione de Dei felicitate, quam de sua, & em-
inium aliorum suorum.

Tertio per visionem beatificam expletur
desiderium æternitatis, illa enim est æterna
& immutabilis, nec mensuratur tempore, vel
æuo, sed æternitate, quia principia ad illam
concurrentia, nempe lumen gloriæ, & essen-
tia diuina, per modum speciei intellectui
beatorum unita, manent omnino inuariata.
Vnde Bernardus serm. 20. in Cantica: Illa vi-
sio (inquit) stat, quia forma stat quæ tunc vi-
detur, nec ullam capiet ex hoc quod est, fuit,
vel erit mutationem.

Demum per eandem visionem satiatur desi-
derium magnitudinis, quia per illam beatus
ad supremum magnitudinis & dignitatis fa-
stigium euehitur, & non solum deiformis, sed
etiam quodammodo Deus efficitur, iuxta il-
lud Prophetæ, Ego dixi dñs esis. Sicut enim
albedo unita homini, illum facit albedo uni-
ta homini, illum facit album, calor calidum,
sapientia sapientem; ita essentia diuina per
modum formæ intelligibilis intellectui beati
unita,

unita, reddit illum quodammodo Deum, si non in esse entitativo, saltem in esse intentionali & intelligibili; præsertim cum intellectus transeat quodammodo in rem intellectam, & ex intellectu & intelligibili fiat magis unum, quam ex materia & forma, ut ait Aristotelis Commentator. Vnde 1. Ioan. 3. dicitur: *Cum apparuerit similis ei erimus, quia videbimus eum sicuti est.* Et Diuus Thomas 3. contra Gent. capit. 51. ait quod secundum hanc visionem, maxime Deo assimilamur.

Ex his constat, omnia hominis desideria per beatificam visionem plenissime & perfectissime satiari, subindeque in illa consistere formalem hominis beatitudinem, quam D. Ioannes Apocal. 22. sub symbolo & figura amoenissimi fluuij eleganter describit, his verbis: *Ostendit mihi fluuium aquæ viuæ, splendidum tanquam crystallus, procedentem de sede Dei & Agni. In medio plateæ eius, & ex utraque parte fluminis lignum vitæ afferens fructus duodecim, per menses singulos reddens fructum suum, & folia ligni ad sanitatem Gentium.* Certè non poterat sub aptiori symbolo cœlestis beatitudo describi: etenim fluuius illæ aquæ viuæ, splendens tanquam crystallus, nihil aliud est quam clara Dei visio, quæ ad instar limpidissimi & purissimi fluminis totam Dei ciuitatem lætificat. Fluius ille à sede Dei & Agni procedere dicitur, quia visio beatifica ex Dei potentia, & Christi meritis originem ducit; vel quia gaudia æternæ beatitudinis, præcipuè ex fruitione Dei vniuersi & trini, & Christi Dei & hominis, procedunt, iuxta illud

Ioan.

Ioan. 17. *Hæc est vita æterna, ut cognoscant te solum Deum verum, & quem misisti Iesum Christum.* Præterea cœlestis ille fluvius ex utraque parte amœnissimis arboribus, quæ per singulos menses reddunt fructus suos, circumdatus dicitur; quia Dei visio plura habet adiuncta sibi gaudia, quæ nunquam veterascunt, sed nova semper apparent. Demum non solum fructus, sed etiam folia horum arborum, dicuntur esse ad sanitatem gentium; quia in cœlesti illa beatitudine, nihil est inutile, nihil superfluum, omnia quæ ad illam spectant, prætiosa sunt, atque utilia, & delectabilia. Ipsa quoque folia ligni vitæ, idest doctes corporis gloriosi, ex animæ dotibus profluentes, omnem languorem & infirmitatem depellunt, ac perpetuam incorruptionem & incolumitatem præstant, ut infra patebit, cum de dotibus corporis gloriosi,

§ III.

Præcipuè obiectione solvuntur.

Obijcies primò contra primam partem assertionis: Formalis beatitudo consistit in perfectissima coniunctione cum Deo: sed perfectior est illa quæ sit medijs actibus intellectus, & voluntatis, visione scilicet & amore, quam illa quæ sit per solum visionem: Ergo beatitudo formalis non consistit in unico actu, sed in pluribus.

Respondeo beatitudinem formalem non consistere in perfectissima coniunctione cum Deo, absolutè & simpliciter, aliàs deberet consistere in ynone hypostatica, sed in perfectissima con-

iunctione in genere affecutionis: licet autem actus voluntatis addat rationem coniunctionis super actum intellectus: non tamen addit rationem affecutionis, quia ut supra ostendimus, actus voluntatis affecutiuis non est, sed dumtaxat impellens, & inclinans in obiectum volitum.

Dices primò: facta affecutione per actum intellectus, adhuc restat Deus alteriùs assequibilis: At non nisi per actum voluntatis: Ergo iste non solum addit rationem coniunctionis, sed etiam rationem affecutionis. Minor est certa, maior probatur. Per actum intellectus Deus solum tenetur sub ratione veri: Sed assequibilis est etiam sub ratione boni, cum prout sic habeat rationem ultimi finis, de cuius ratione est quod sit consequibilis à creatura rationali: Ergo affecuto Deo per actum visionis beatificæ, adhuc restat vltteriùs assequibilis per amorem. Vnde D. Thomas hìc qu. 4. art. 8. ad 3. ait quod *perfectio charitatis est essentialis beatitudini, quoad dilectionem Dei, non autem quoad dilectionem proximi.*

Respondeo negando maiorem, & ad eius probationem, distinguo maiorem: solum tenetur Deus sub ratione veri, ly *sub* dicente rationem formalem *sub qua*, concedo maiorem: rationem *quæ* affecutam, nego maiorem. Similiter distinguo minorem: Deus assequibilis est etiam sub ratione boni, ut ratione *sub qua*, nego minorem, ut ratione *quæ*, concedo minorem & nego consequentiam. Itaque sicut intellectus non solum intelligit rationem veri, sed etiam rationem boni, & entis, & omnes formalitates quæ cuilibet rei possunt competere, licet

omnes illas sub ratione veri intelligat, ut ratione *sub qua*; ita non solum assequitur verum, sed etiam bonum, & omnes diuinas perfectiones, omnes tamen assequitur sub ratione veri, ut ratione *sub qua*; & quia Deus solum est assequibilis sub ista ratione, ut ratione *sub qua*, quamuis ut *quod* sub omni alia ratione assequibilis sit, ideo adæquatè tenetur ab intellectu, & ultra illius actum non restat ulterior assuetio, etsi restet ulterior coniunctio, per amorem beatificum.

Ad D. Thomam dicendum, illum solum loco cato declarare velle, dilectionem Dei esse essentialem beatitudini, consecutiue, idest sequi ad essentiam beatitudinis, nulla facta suppositione alicuius extrinseci: ad differentiam dilectionis proximi, quæ non sequitur ad essentiam beatitudinis secundum se, sed suppositione facta creationis proximi.

Dices secundò: Eiusdem mobilis est consequi finem vel centrum, cuius est tendere in illud: Sed homo per charitatem tendit in Deum & meretur beatitudinem: Ergo etiam per actum amoris illam consequitur.

Respondeo quod licet eiusdem sit mobilis consequi centrum vel finem, cuius est tendere in illam, non tamen illum debet consequi & possidere per eandem potentiam & virtutem, per quam in illum tendit. Lapis enim per gravitatem, quæ est inclinatio ipsius, tendit ad centrum, per quantitatem verò vel ubi illi vnitur. Avarus per appetitum mouetur ad quærendas pecunias, & manu percipit & arripit illas. Miles pugnat manu; & recipit coronam in capite. Licet ergo meritum & tenden-

tia

tia in ultimum finem, ad voluntatem pertineant, eius tamen consecutio ad intellectum spectat.

Dices tertio: Idcirco intellectus suum obiectum assequitur, quia intelligens per actum illius fit unum cum obiecto intellecto: Atqui etiam amans fit unum per amorem cum obiecto dilecto: Ergo pariter voluntas suum obiectum assequitur.

Respondeo distinguendo maiorem, quia fit unum cum obiecto intellecto, per assimilationem, concedo maiorem: quia utcumque fit unum, nego maiorem. Similiter distinguo minorem: Amans fit unum cum obiecto dilecto, ratione ponderis & inclinationis in illud, concedo minorem: ratione similitudinis & identitatis naturæ cum illo, nego minorem, & consequentiam.

Obijcies secundo contra secundam partem assertionis: Beatitudo formalis consistit in perfectissima operatione naturæ intellectualis: Sed amor perfectior est visione: Ergo illa in amore consistit. Maior videtur certa, minor verò probatur multipliciter. Primo, ex Diuo Thoma 1. part. quæst. 82. artic. 3. ubi docet amorem rerum quæ sunt supra nos, excedere in perfectione cognitionem illarum; & è contra cognitionem rerum quæ sunt infra nos, superare illarum dilectionem. Secundo, quia ordo Seraphinorum dictus ab ardore charitatis, perfectior est ordine Cherubinorum, qui sic denominantur à plenitudine scientiæ. Tertio, quia voluntas est perfectior potentia quam intellectus, tum quia illum mouet quoad exercitium, tum
etiam

etiam quia agit liberè , intellectus verò per modum naturæ ; agere autem liberè est perfectior modus agendi , quam agere necessariò : Ergo perfectissimus actus voluntatis, qualis est amor beatificus , in perfectione excedit perfectissimum actum intellectus , qualis est visio beatifica . Quartò , illud est perfectius , cuius oppositum est peius : At odium charitati oppositum peius est carentia visionis : Ergo amor visionem excedit.

Respondeo primò distinguendo maiorem : Beatitudo formalis consistit in perfectissima operatione entitatiuè , nego maiorem : perfectissima in linea affecutionis, concedo maiore : Similiter distinguo minorem : amor beatificus perfectior est visione, in ratione entis transeat : in ratione consecutionis , nego minorem , & consequentiam . Solutio patet ex supra dictis , cùm enim beatitudo formalis sit consecutio obiecti beatifici, præcisè ex excessu entitativo, vnius operationis supra aliam , non potest colligi quod illa sit beatitudo formalis, nisi etiam huic præstet in linea affecutionis.

Respondeo secundò , data maiori , negando minorem , ad cuius primam probationem ex autoritate D. Thomæ desumptam , dico illum ibi loqui de amore , & cognitione viatorum , qui res superiores intelligunt per species quidditatum & rerum materialium , quæ superiores essentias non repræsentant prout sunt in se ipsis , sed per analogiam & similitudinem ad res illas materiales , & corporeas , à quibus desumuntur ; & de cognitione vt sic terminata ad res superiores , verum est in perfectione excedi ab illarum amore , qui in illas

illas fertur prout sunt in seipsis: non autem de cognitione patriæ, maximè de beatifica visione, cum illa non fiat per speciem & similitudinem creaturarum, sed ipsa diuina essentia immediatè per seipsam gerat vices speciei & formæ intelligibilis. Ex quo patet responsio ad secundam probationem, Seraphin enim non dicitur ab ardore charitatis patriæ, sed viæ, & similiter Cherubin, non à scientia comprehensoris, sed viatoris suam denominationem desumit; vnde ex præstantia ordinis Seraphinorum supra ordinem Cherubimorum, solùm inferri potest amorem viæ excedere cognitionem viatoris; non autem visionem beatificam.

Ad tertiam nego antecedens, nimirum quod voluntas sit perfectior intellectu, ut enim ait Aristoteles 10. Ethic. cap. 7. *Mens est eorum omnium quæ nobis insunt præstantissima*. Ad primam probationem in contrarium, dico quod licet voluntas moueat intellectum quoad exercitium, in genere causæ efficientis, mouetur tamen ab illo quoad specificationem ex parte obiecti, & in genere causæ finalis, qui modus agendi & mouendi perfectior est.

Ad secundam probationem similiter dico, quod licet libertas formalis solùm sit in voluntate, radicalis tamen est in intellectu; vnde sicut intellectus dependet à voluntate, & illi subordinatur in libertate formali, ita & voluntas intellectui subordinatur, & ab ipso, ut à prima totius libertatis radice dependet. Addo quod modus agendi liberè non est perfectior simpliciter modo agendi naturali, sed tantùm secundùm quid, nimirum in genere

moris: nam perfectior est modus agendi quo Deus agit ad intra, producendo Filium & Spiritum Sanctum, modo quo agit ad extra, producendo creaturas, & tamen iste est liber, ille verò naturalis.

Ad quartam, concessa maiori, dist inguo minorem: edium est peius carentia visionis, in linea moris, concedo minorem: in genere physico, nego minorem. Ex quo solum inferri potest, amorem præstare visioni in genere moris, quod libenter concedimus, cum visio in genere moris non sit, utpote libertatis expers; non autem quod illam excedat in genere physico, quod solum negamus.

Obijcies tertio contra tertiam partem asserentem beatitudinem formalem non consistere in fruitione Dei: Benedictus XII. Extrau. *Benedictus Deus*, ait animas Sanctorum *visione & fruitione esse verè beatas*: Ergo censet beatitudinem formalem consistere, saltem partialiter, in fruitione Dei. Idem colligitur ex D. Thoma infra qu. 11. art. 3. ad 3. ubi asserit fruitionem esse vltimum finem, non sicut res quæ vltimò quæritur, sed sicut adeptio vltimi finis.

Respondeo mentem Pontificis in illa extrauagante, solum fuisse definire, iustorum animas ante diem iudicii verè esse beatas; aut verò operatione intellectus, aut voluntatis, vel vtriusque potentia, sua definitione non attigisse, sed disputationi Theologorum reliquisse. Vnde non ait illas fruitione & visione constitui essentialiter beatas, sed visione & fruitione esse verè beatas, quod facile explicatur de visione ingrediente beatitudinem

ut essentia, & fruitione, ut proprietate ex illa resultante. Similiter ad auctoritatem D. Thomæ responderetur, fruitionem esse adeptionem ultimi finis, non formaliter, sed consecutiue, & obiectiue, quia consequitur ad visionem beatificam, quæ adeptio est, & illam pro obiecto habet. Vel secundò dici potest, esse adeptionem, non formaliter, sed completiue, quia complet & perficit visionem beatificam, ad quam consequitur tanquam proprietas.


Obijciēs quartò contra quartam partem assertionis, in qua diximus beatitudinem formalem consistere essentialiter in visione beatifica: Beatitudo formalis debet seipsa hominis appetitum totaliter & perfectè satiare: Sed clara Dei visio hoc non præstat, cum non solum homo inclinatur ad videndum Deum, sed etiam ad ipsum amandum, eoque perfruendum: Ergo beatitudo formalis non consistit essentialiter in clara Dei visione.

Respondeo beatitudinem formalem seipsa satiare debere primam hominis inclinationem, inclinationes autem veluti secundas, non per seipsam formaliter, sed solum causaliter: Inclinatio autem hominis primaria est inclinatio ad verum cognoscendum, & hæc per claram Dei visionem satiatur formaliter cæteras verò satiat solum causaliter, causando scilicet actus per quos illæ satiantur, nempe amorem & fruitionem beatificam.

Obijciēs vltimò: De ratione vltimi finis est ut ad vltiorem finem non ordinetur, sed omnia ordinentur ad ipsum: At Clara Dei visio ordinatur ad amorem beatificum tanquam

ad finem, non autem è contra amor ad visionem; nam vt ait Anselmus lib. 2. cur Deus homo: *Pueruus ordo est amare, vt intelligas, rectissimus verò intelligere vt ames*: Ergo beatitudo formalis non consistit in clara Dei visione.

Respondeo, concessa maiori, negando minorem; cùm enim clara Dei visio sit essentia beatitudinis formalis, & amor eius proprietas; proprietates autem sint ad perficiendam naturam cuius sunt proprietates, hinc fit quod amor beatificus visionem tanquam finem respiciat, non verò è contra visio amorem beatificum. Ad Anselmum verò dicendum est, illum non comparare ibi amorem cùm cognitione patriæ, sed cum cognitione viæ; cùm enim ista sit imperfectior amore, ad illum tanquam ad finem proximum ordinatur; vnde esset peruersus ordo amare in via ad intelligendum, & rectissimus est intelligere ad amandum.



C A P V T V I.

De proprietatibus beatitudinis formalis.

EXplicata essentia beatitudinis formalis consequens est vt declarem eius proprietates, quæ sunt præcipuè quatuor, videlicet amor, delectatio, impeccabilitas, & incorruptibilitas, seu perpetuitas.

§. I.

*Prima proprietas beatitudinis formalis, felix
amandi necessitas.*

Nemo dubitat quin beati Deum videntes, necessitentur necessitate specificationis ad ipsum amandum; cum enim in Deo clarè viso nulla apparere possit ratio mali, nullo pacto voluntas, quæ est appetitus boni, ipsum odio habere vel fugere potest; sicut ob eandem rationem homo in via necessitatur quantum ad specificationem, ad volendum bonum ut sic, abstractum à vero & apparenti. Sed difficultas est de necessitate quoad exercitium, propter Scotistas, contendentes amoris beati exercitium esse liberum & contingens ex natura sua, etsi ab extrinseca Dei providentia, tollente omnia quæ possent à charitate diuertere, habeat quod in æternum sit duraturum. Nos verò asserimus, voluntatem beati Deum videntis, ita in eius amorem rapi, ut exercitium diuini amoris vel diuertere, vel suspendere nequaquam possit, subindeque beatitudinem formalem, seu claram Dei visionem, essentialiter consequi vel comitari felicem amandi Deum necessitatem, non solum quoad specificationem, sed etiam quoad exercitium.

Ratio fundamentalis est, quia voluntas, cum sit appetitus rationalis, & sequatur ductum ac dictamen rationis, non potest cessare ab aliquo actu, nisi in eo intellectus concipiat aliquam rationem mali, vel in eius cessatione aliquam rationem maioris boni: Sed

nullum horum potest iudicare beatus de amore Dei : Ergo non potest ab actu amoris cessare . Major constat , minor etiam videtur manifesta ; nam in patria actus amoris est incundus & facilis , cum charitas in patria sit veluti in suo centro , utpote coniuncta cum clara Dei visione , & regulata per lumen gloriæ . Neque esse potest lassitudo & defatigatio in eius exercitio , cum non dependeat ab aliquo organo corporeo , visio enim ad quam sequitur , non est per conuersionem ad phantasmata . Non potest etiam in continuatione amoris beatifici nausea aliqua vel fastidium reperiri , quia bonum increatum , cum infinitæ sit suauitatis & dulcedinis , tam suauiter implet , tam delectabiliter faciat , ut in eius fruitione regnet desiderium , & in satieta-
te vigeat illius appetitus . Vnde D. Petrus dicit quod Angeli beati , Spiritum Sanctum continuò contemplantes , desiderant in ipsum prospicere . Et D. Gregorius in moralibus : *Cum ad ipsum (inquit) fontem vitæ deuenimus , erit nobis , delectabiliter impressa sitis simul & satietas : Sed longè aberit à siti necessitas , longè à satieta-
te fastidium , quia sitientes saturabimur , & saturati sitiemus .* Deum clara Dei visio non compatitur iudicium erroneum , quo Beatus iudicet esse illi bonum cessare ab amore Dei , sed potius habet actum contrarium , quo iudicat illi esse bonum , continuò adherere Deo per amorem , & ab illo nunquam diuelli , ita ut non possit voluntas intellectum ab eo iudicio vel per vnum instans diuertere .

Dices primò ; Beati possunt in carentia seu
cessa-

cessatione amoris beatifici aliquam rationem boni apprehendere, nempe exercitium libertatis: Ergo possunt à tali amore cessare, seu eius exercitium interrompere.

Respondeo negando Antecedens, libertas enim exerceri non potest circa bonum vniuersale & infinitum, sed solum circa creaturas, & bona particularia & limitata, quæ cum illo necessariam connexionem non habent: Sicut intellectus facultatem discurrendi & ratiocinandi circa principia exercere non potest, sed solum circa conclusiones quæ in illis virtualiter continentur.

Instabis: Per fidem Deus proponitur voluntati, ut summum & infinitum bonum, & tamen amor per illam regulatus est liber: Ergo quamuis in patria per lumen gloriæ & claram visionem proponatur ut summum & infinitum bonum, amor tamen per illam regulatus erit liber.

Respondeo, concesso Antecedente, negando consequentiam, nam etsi vtrumque lumen, Deum ut summum & infinitum bonum repræsentet, vnum tamen illum repræsentat clarè, & ut est in se; alterum verò obscurè, & per alias species tale bonum proponit: Vnde sicut intellectus à vero, primo non autem secundo modo proposito, conuincitur, ita & voluntas solum à summo bono clarè cognito necessitatur.

Urgebis: Omnis actus potentie liberæ est liber: Sed voluntas est potentia libera, nam ut ait Augustinus in Enchiridio cap. 105. *Aut voluntas non est, aut libera est dicenda:* Ergo amor beatus est liber, saltem quoad exercitium.

Confirmatur: Idem S. Doctor lib. 5. de Trinitate Dei sic ait: *Si aliquid est voluntarium, non est necessarium*: Sed amor beatificus est voluntarius: Ergo non est necessarius, sed liber, saltem quoad exercitium.

Ad instantiam respondeo, quod sicut in nostro intellectu inuenitur ratio discursiui, respectu conclusionum, & ratio intellectiui sine discursu, respectu principiorum; ita in voluntate nostra reperitur modus agendi naturaliter, & modus agendi liberè: Non dixit autem Augustinus, voluntatem in omni actu liberam esse, sed solum quod non esset voluntas, si libera non esset, quod intelligendum est respectu aliquorum actuum. Vel secundo dici potest cum D. Thoma qu. 22. de verit. art. 5. ad 1. voluntatem semper esse liberam à necessitate coactionis, quia in suis actibus vim pati non potest, non autem semper esse liberam à necessitate naturalis inclinationis; & primo libertatis genere, scilicet à necessitate coactionis, gaudere amorem beatificum, cum quo tamen stat, illum necessarium esse quoad specificationem & exercitium. Per quod patet ad confirmationem, nam quando D. Augustinus ait, *si aliquid est voluntarium, non est necessarium*, hoc intelligendum est de necessitate coactionis, non verò de necessitate naturalis inclinationis; unde quamuis amor beatificus sit voluntarius, nihilominus hoc secundo modo necessarius est. Sicut amor quo Deus suum ipsum diligit, & quo Pater & Filius producant Spiritum Sanctum, voluntarius est subindeque immunis à necessitate coactionis, cum hoc tamen stat illum esse necessarium

ne-

necessitate naturalis inclinationis, non solum quantum ad specificationem, sed etiam quoad exercitium. De quo fusiùs infra, cum de voluntario libero.

Dices secundò, nullum obiectum necessitat voluntatem quoad exercitium actus, vt sæpe docet S. Thomas, quia obiecti quidem est specificare potentiam, sed non mouere illam quoad exercitium, vnde si necessitat, solum quoad specificationem necessitat: Ergo Deus etiam clarè visus non necessitat voluntatem ad exercitium amoris.

Respondeo D. Thomam solum velle quod nullum obiectum, ex vi & forma'itate obiecti, necessitet voluntatem; cum quo fiat quod possit illam necessitare ex propria voluntatis natura, quæ quia libera & naturalis est, aliquando vt libera, aliquando vt naturalis operatur. Primum ei conuenit circa obiectum cum indifferentia propositum, secundum verò circa obiectum propositum sine indifferentia iudicij.

§. II.

Secunda proprietas beatitudinis formalis, summum gaudium seu delectatio.

EX clara Dei visione, & amore beatifico, oritur in beatis ineffabile gaudium, & summa delectatio, quæ tanta est, vt D. Bernardus epist. 114. dicat quod *huic comparata omnis alia incun ditas, mæror est; omnis suauitas, dolor est; omne dulce amarum; omne decorum, sædum; omne postremò quodecumque de-*

lectare potest, molestum. In primis gaudent beati de bono diuino in se considerato: De quo gaudio intelligitur illud Apocal. 19. *Quoniam regnabit Dominus Deus noster omnipotens, gaudeamus, & exultemus, & demus gloriam ei.* Secundo gaudent de bono proprio, & de felicitate qua potiuntur; de quo gaudio loquitur Profeta Regius Psal. 19. cum ait: *Adimplebis me letitia cum vultu tuo, delectationes in dextera tua, usque in finem.* Primum gaudium seu delectatio elicitar à charitate, tanquam actus secundarius eius, quia vt docet D. Thomas 2. 2. qu. 28. per totam, gaudere de bono amici est actus & fructus amicitiae & charitatis. De secundo difficultas est à quo eliciatur, cum enim ad amorem concupiscentiae pertineat, non videtur posse procedere à charitate, quae est amor amicitiae. Vnde Suarez, & alij ex Recentioribus, existimant illud elici ab habitu spei, quem dicunt remanere in patria. Sed hoc manifestè repugnat D. Thomae, qui pluribus in locis docet spem non remanere in patriam. Nam in hac parte qu. 67. art. 4. quaerit, *Utrum spes maneat post mortem in statu gloriae?* Et respondet non manere, idque probat in hunc modum. Motus cessat obiento termino: Sed spes se habet per modum motus tendentis in beatitudinem, & claram Dei visionem: Ergo illa obienta perit. Quam rationem insinuat Apostolus ad Roman. 8. his verbis: *Spes quae videt non est spes, nam quod videt quis quid sperat?* Idem docet 2. 2. qu. 18. art. 2. vbi sic discurret: Subtracto eo quod dat speciem, soluitur species: Sed in patria non subsistit

id quod dat speciem virtuti spei, actus scilicet sperandi æternam beatitudinem, ut diuino auxilio obtinendum, cum in patria habeatur ipsa beatitudo: Ergo in patria non remanet spes.

Nec valet quod ait Suarez, nempe habitum spei non respicere primario & essentialiter actum sperandi beatitudinem, sed actum amoris concupiscentiæ, quo quis Deum ut bonum sibi proprium diligit. Virtus enim denominatur à principaliori actu quem elicit: Atqui secunda virtus Teologica ab omnibus spes appellatur: Ergo precipuus eius actus est actus sperandi, non verò amor concupiscentiæ, quo quis Deum ut bonum sit proprium diligit. Addo quod spes quæ est virtus, respondet spei quæ est passio: Atqui actus principalis spei quæ est passio, non est bonum sibi proprium & conueniens concupiscere, sed bonum arduum possibile sperare, unde non est in appetitu concupiscibili, sed in irascibili: Ergo pariter præcipuus actus virtutis spei, non est amor concupiscentiæ, quo quis Deum ut bonum sibi proprium diligit, sed actus sperandi quo expectatur futura beatitudo.

Dicendum est igitur, delectationem qua beati de Deo ut bono sibi proprio, eos beatificante delectantur, elici ab habitu charitatis; cum enim non possit elici à fide, nec à spe, quæ in patria non remanent, consequens est ut eliciatur à charitate. Addo quod ab eodem habitu elicitur delectatio, à quo oritur amor quid est causa illius: Sed amor concupiscentiæ, quo beati Deum ut bonum sibi proprium diligunt, procedit à virtute charitatis,

quia vt docet D. Thomas 2. 2. qu. 25. art. 4. per charitatem non solum Deum & proximum, sed etiam nosmetipsos diligimus: Ergo & delectatio quæ ad illum amorem consequitur.

Dices, Amor concupiscentiæ beatitudinis futuræ, & gaudium subiectum ad illam, non pertinent ad charitatem, sed ad spem, iuxta illud Apostoli ad Roman. 12. *Spe gaudentes*: Ergo etiam in patria amor concupiscentiæ, quo beati Deum vt bonum sibi proprium diligunt, & delectatio quæ ad illum sequitur, non eliciuntur ab habitu charitatis sed spei.

Sed nego consequentiam, amor enim concupiscentiæ, quo in via appetimus beatitudinem, & de ea delectamur, illam respicit sub ratione boni ardui futuri, quod est obiectum formale spei: In patria verò amor quo beati diligunt beatitudinem, & delectantur de ea, respicit illam vi bonum præsens, & iam obtentum, vnde non potest elici à spe, quæ est de bono arduo & futuro, subindeque in beatis non remanet; sed solum à charitate, ad quam tanquam ad proximiorum virtutem reducitur, & quæ sola ex virtutibus Theologicis remanet in patria. Nec obest quod charitas sit amor amicitiae, & amor amicitiae respiciat bonum amici, amor verò concupiscentiæ bonum proprium. Nam bonum proprium non semper opponitur bono amici, sed interdum illi subordinatur, & cum eo connectitur, vnde amor concupiscentiæ quo nosmetipsos diligimus, potest oriri, & de facto oritur à virtute charitatis, quia Deum & proximum amamus, vt docet D. Thomas supra citatus;

tatus : Cùm ergo beatitudo , & delectatio quam ex ea beati percipiunt, non opponantur Deo & bono ipsius , sed illi subordinentur , & cum eo connectantur , à virtute charitatis, quâ Deum diligunt , vt eius actus secundarij procedunt.

§. III.

Tertia beatitudinis formalis proprietas , felix impotentia peccandi , orta ex clara Dei visione , & amore beatifico.

Scotus & Nominales docent, beatos esse im-peccabiles solum ab extrinseco , & ex diuina prouidentia impediante ne in peccatum labantur. Coeteri verò Theologi asserunt eos ab intrinseco impeccabiles esse, & felicem illam peccandi impotentiam, ex duplici radice seu causa procedere , nempe ex clara Dei visione , & amore beatifico.

Visio ergo beatifica quadruplici ratione potentiam peccandi à beato excludit. Primò, quia illum intimè & immobiliter coniungit primæ regulæ suæ operationis, nempe suo vltimo fini ; peccare enim nihil aliud est quam deflectere & declinare à rectitudine suæ regulæ : Vnde sicut si manus artificis esset ipsa regula incisionis , vel talem regulam inseparabiliter haberet sibi coniunctam , non posset nisi rectè scindere ; ita voluntas beati quæ immobiliter coniungitur regulæ suæ operationis, non potest nisi rectè operari.

Secundò , quia totam creaturæ rationalis capacitatē implet; sicut enim cœlum est im-

mu-

mutabile substantialiter, & incorruptibile, quia tota capacitas materiae eius expletur per ipsius formam; ita voluntas beati redditur immutabilis à bono in malum, subindeque impeccabilis, quia tota eius capacitas expletur per visionem beatificam, per quam omnia hominis desideria plenè & perfectè satiantur, vt capite præcedenti ostensum est. Vnde Isidorus lib. 1. de summo bono cap. 12. ait quod *Angeli, licet sint natura sua mutabiles, non sinit tamen eos contemplatio mutare diuina.*

Tertiò; quia non potest esse in voluntate peccatum, nisi in intellectu error, ignorantia, aut inconsideratio præcedant, vt ostendemus in tractatu de peccatis: Sed visio beata omnes illos defectus ab intellectu excludit: Ergo & à voluntate peccandi potentiam auferit.

Quartò, voluntas videntis Deum, ita se habet respectu boni diuini, sicut voluntas viatoris in ordine ad bonum in communi, vnde sicut impossibile est, aliquem in via operari, nisi respiciendo rationem boni in communi; ita qui videt Deum, non potest velle quidquam quod non ordinetur ad ipsum, subindeque non potest peccare, cum peccans appetat obiectum absque ordine ad bonum diuinum.

Secunda radix vnde oritur impeccabilitas beatorum est amor beatificus, nam per peccatum homo auertitur à Deo vltimo fine, per charitatem verò in Deum vt vltimum finem conuertitur: Ergo cum auersio à Deo, & conuersio in illum, simul esse nequeant, peccatum cum amore beatifico est omnino impossibile.

possibile . Vnde Gregorius lib . 5 . moral . cap . 27 . *Angelica natura in semetipsa mutabilis est , quam mutabilitatem vincit , per hoc quod ei qui semper idem est , vinculis amoris colligatur . Et Augustinus 14 . de ciuit . cap . 9 . Vbi amor boni immutabilis est , profecto si dici potest , maliciæ timor securus est .*

Dices , Charitas viæ & charitas patriæ sint eiusdem speciei , imò idem manet habitus charitatis in patria , qui fuit in via : Sed charitas viæ non excludit potentiam peccandi : Ergo nec charitas patriæ .

Respondeo quod licet charitas sit eiusdem speciei in patria , & in via , habet tamen diuersum modum operandi ; quia in via regulatur per fidem & cognitionem obscuram , quæ non repræsentat Deum clarè & vt est in se ; in patria verò regulatur per lumen gloriæ , & claram visionem , quæ Deum vt habentem omnem rationem boni clarè repræsentat , & iudicat nihil esse appetibile quod ad Deum ordinabile non sit , ex quo fit quod charitas patriæ tollit potentiam ad peccandum , non verò charitas viæ .

Ex dictis colligitur primò , non posse , etiam de absoluta Dei potentia , cum visione , & amore , peccatum actuale commissionis coniungi . Prima pars patet ex dictis , nam impossibile est quod aliquis peccet , nisi præcedat iudicium practicum , quo iudicetur hic & nunc esse appetendum aliquid quod ad Deum non est ordinabile : Sed implicat tale iudicium cum visione beatifica coniungi , nam illa est perfectum iudicium , quo beatus speculatiue & practice iudicat , Deum esse super omnia

nia amandum, & omnia ad ipsum tanquam ad vltimum finem esse referenda: Ergo peccatum actuale commissionis non potest, etiam de potentia absoluta, cum beatifica visione componi.

Quod verò non possit etiam coniungi cum amore beatifico, non minùs euidentis est; nam, vt supra dicebamus, per peccatum mortale homo auertitur à Deo tanquam vltimo fine, & in creaturam vt in vltimum finem conuertitur; charitas verò conuertit hominem in Deum tanquam in vltimum finem: Atqui implicat simul esse auersionem à Deo vt vltimo fine, & conuersionem in illum vt vltimum finem: Ergo & amorem beatificum simul esse cum peccato mortali actuali.

Eadem impossibilitas peccati mortalis cum visione & amore beatifico, etiam per respectum ad absolutam Dei potentiam, potest hac ratione demonstrari, Quando aliqua forma repugnant ex natura rei, non possunt inter se coniungi, nisi Deus concursu speciali & extraordinario concurrat ad vtriusque coniunctionem, vt patet in calore & frigore in gradibus intensis: At Deus nequit speciali concursu concurrere ad coniunctionem peccati mortalis cum visione & amore beatifico, aliàs peccatum illi vt auctori speciali tribueretur, quod infinitæ eius sanctitati repugnat: Sicut si de potentia absoluta impediret ne calor ignis expelleret frigus ab aqua, conseruatio frigoris in illum vt specialem authorem & conseruatorum reduceretur: Ergo repugnat, de potentia Dei absoluta, peccatum mortale coniungi cum clara Dei visione & amore beatifico.

Colli-

Colligitur secundò, visionem & amorem beatificum, non solum non posse de absoluta Dei potentia coniungi cum peccato commissionis, sed nec etiam cum peccato omissionis: quia visio & amor beatificus ex natura rei exposcunt nedum peccatum commissionis sed etiam omissionis excludere, aut impedire; unde ut illud secum compaterentur, requireretur non quidem concursus Dei positivus, conservans peccatum omissionis, sed negatio concursus postulati à visione & amore, ut illud impedirent: At eo ipso quod Deus negaret concursum eis debitum, illi attribueretur peccatum omissionis, ut supra arguebamus de peccato commissionis: Ergo repugnat, nedum peccatum commissionis, sed etiam omissionis, cum visione & amore beatifico coniungi.

Confirmatur: Ad peccatum omissionis ad minus requiritur actus interpretativus, id est fundamentum quo prudens iudicat; taliter voluntatem se habere, ac si per positivum actum vellet omittere: Sed posito quod voluntas beati, ex vi amoris & visionis, exposcat concursum ad evitandum peccatum omissionis, non adest fundamentum ad prudenter iudicandum, illam ita se habere ac si per actum positivum vellet omittere, sed potius esset fundamentum ad iudicandum talem omissionem appeti à Deo negante talem concursum: Ergo repugnat visionem & amorem beatificum cum peccato omissionis coniungi.

Dices, Potest Deus præceptum imponere beato de aliquo actu libero, v. g. de custodia hominum: At supposito illo præcepto potest beatus omittere talem actum, cum adhuc eo
suppa.

supposito, liberè illum exerceat: Ergo potest peccare peccato omissionis.

Respondeo distinguendo minorem: Supposito illo præcepto potest beatus omittere talem actum, omissione physica & naturali, concedo minorem: omissione morali, & culpabili, nego minorem. Vel aliter potest eadem minor distingui: potest beatus omittere talem actum, potentia antecedenti, & in sensu diuiso, concedo Antecedens: potentia consequenti, & in sensu composito, nego Antecedens, & consequentiam. Possunt hæc explicari exemplo Christi, qui respectu actus cadentis sub præcepto fuit liber quoad exercitium, & tamen non potuit peccare; quia licet potuerit omittere talem actum, prout omisso est pura negatio actus oppositi, non tamen quatenus est priuatio prædicti actus, vt debiti: vel quia licet illum potuerit ommittere potentia antecedenti, & in sensu diuiso, non tamen potentia consequenti, & in sensu composito. De quo fusè in tractatu de Incarnatione, cum concordiam libertatis Christi cum eius impeccabilitate exponemus.

Colligitur tertio, peccatum habituale, de absoluta potentia, non posse cum visione & amore beatifico coniungi; quia impossibile est per quamcunque potentiam quod homo simul habeat duos vltimos fines simpliciter, etiam si vnum habeat actualiter, & alium habitualiter, vt supra cap. 1. ostensum est: Sed beatus videns amans Deum, habet illum actualiter pro vltimo fine simpliciter, cum visio beatifica sit Dei vt vltimi finis adeptio; qui verò est in statu peccati mortalis, in creaturam vt in vltimum

num finem habitualiter conuersus est: Ergo repugnat peccatum habituale, cum visione & amore beatifico coniungi: alioquin talis coniunctio Deo vt authori speciali tribueretur, vt supra dicebamus de peccato commissionis & omissionis.

Addo quod peccatum habituale, seu macula peccati, nihil aliud est, quam priuatio gratiæ sanctificantis, vt voluntaria, seu ex præcedenti actu peccaminoso voluntatis causata: Sed talis priuatio cum visione & amore beatifico incompossibilis est: Ergo & peccatum habituale, seu macula peccati. Maior constabit in tractatu de peccatis, minor verò patet, tum quia in beatis non potest dari actus peccaminosus voluntatis, ex quo resultet voluntaria illa priuatio gratiæ sanctificantis, vt constat ex supra dictis. Tum ex eo quod visio & amor beatificus sunt actus vitales vitalitate supernaturali; vnde sicut actus vitales ordinis naturalis, v. g. intellectio, aut volitio, necessariò & indispensabiliter supponunt in subiecto à quo eliciuntur, principium radicale vitæ naturalis, scilicet animam rationalem; ita visio & amor beatificus; necessariò & indispensabiliter supponere debent in subiecto à quo eliciuntur principium radicale vitæ supernaturalis, quod non est aliud quam ipsa gratia sanctificans, vt constabit ex dicendis in tractatu de gratia.

Colligitur quartò, peccatum veniale cum amore beatifico non posse coniungi. Licet enim peccatum veniale non auertat à Deo vt vltimo fine, diuertit tamen ab ipso; vnde sicut actus charitatis est conuersio in Deum,
pec-

peccatum mortale auersio à Deo, ita peccatum veniale est diuersio ab illo: Sed cum amore beatifico est impossibilis nedum auersio à Deo, sed etiam diuersio: Ergo non solum peccatum mortale, sed etiam veniale, cum amore beatifico stare nequit. Maior est certa, minor probatur. Amor necessarius nedum quoad specificationem, sed etiam quoad exercitium, non solum cum auersione à Deo, sed etiam cum diuersione ab illo est impossibilis, cum enim sit continuus, & nunquam interruptus, omnia quæ beatus diligit, actu refert & ordinat in diuinam bonitatem tanquam in vltimum finem: Sed amor beatificus, nedum quoad specificationem, sed etiam quoad exercitium, necessarius est, vt §. i. ostendimus: Ergo cum illo, nedum auersio, sed nec etiam diuersio à Deo compossibilis est.

§. IV.

Quarta beatitudinis formalis proprietas, eius perpetuitas seu inamissibilitas.

DE fide certum est, beatitudinem sanctorum fore perpetuam & nunquam desitutam, nam in fidei symbolo profiteamur nos expectare vitam æternam. Et i. Petri i. beatitudo vocatur *hereditas incorruptibilis, incontaminata, immarcescibilis*. Et Augustinus lib. 15. de Trinit. cap. 8. ait quod *nullo modo esse poterit vita veraciter beata, nisi fuerit sempiterna*: Sed difficultas est & controuerfia inter Theologos, an hoc ei conueniat ab intrinseco, & ex natura rei, vel solum ab extrinseco, &

ex

ex gratuita voluntate Dei, eam perpetuò conseruantis? Scotus enim & Durandus existimant illam à sola Dei voluntate & non ab intrinseco esse perpetuam. Alij dicunt cum Curiele, beatitudinem posse dupliciter considerari, scilicet in ratione beatitudinis, & boni perfecti ac plenè satiatiui, & in ratione visionis & operationis, & primo modo esse ab intrinseco inamissibilem & incorruptibilem, non autem secundo modo. Thomistæ verò communiter docent, visionem beatam, tam vt beatitudo, quam vt visio est, ab intrinseco esse incorruptibilem.

Primum patet, nam de ratione beatitudinis formalis est quod perfectè satiet & quietet appetitum beati: At si visio, in quantum est beatitudo formalis, non esset perpetua & inamissibilis ab intrinseco, non satiare nec quietaret perfectè appetitum beati: Ergo visio, in quantum est beatitudo formalis, est perpetua & inamissibilis ab intrinseco. Maior patet, minor probatur. Vnum ex illis quæ beatus exoptat est perpetuitas boni quod possidet, vnde maximè anxietetur, si existimaret tale bonum non esse perpetuum: Ergo si visio, quatenus est beatitudo formalis, non esset perpetua & inamissibilis ab intrinseco, non satiare nec quietaret perfectè appetitum beati.

Nec valet si dicas, ad hoc vt beatus quietetur, & omnis anxietas ab eo tollatur, sufficere quod Deus decreuerit illius beatitudinem perpetuò conseruare, & hoc illi innotescat. Nam contra hoc est, quod de ratione beatitudinis formalis est, quod ratione sui, vel eorum quæ illi debentur, satiet appetitum bea-

beati, & omnem miseriam & anxietatem excludat, vt constat ex dictis capite præcedenti: Ergo visio, inquantum est beatitudo formalis, debet ratione sui, vel eorum quæ illi debentur, esse perpetua & inamissibilis, & non sufficit quod hoc illi competat ab extrinseco, & gratuita Dei voluntate, ad perfectè quietandum appetitum quo beatus exoptat perpetuitatem boni quod possidet.

Quod verò visio beatifica, non solum vt beatitudo formalis, sed etiam vt visio & operatio sit ab intrinseco incorruptibilis, probatur contra Curielem: Primò quia visioni essentialiter conuenit quod sit beatitudo formalis, vt ostensum est capite præcedenti: Ergo si vt beatitudo formalis, ab intrinseco petit durare perpetuò, idipsum ei conuenit, quatenus visio est. Secundò, illa operatio petit ab intrinseco durare perpetuò, cuius principia sunt ab intrinseco inuariabilia & incorruptibilia: Sed principia visionis beatificæ, nempe lumen gloriæ, & essentia diuina, per modum speciei intellectui beatorum vnita, sunt inuariabilia & incorruptibilia ab intrinseco: Ergo & ipsa visio beatifica. Tertiò, actio quæ mensuratur æternitate, est ab intrinseco immutabilis & incorruptibilis, nam vt ait D. Thomas 1. p. qu. 10. art. 2. *Ratio æternitatis consequitur immutabilitatem, sicut ratio temporis consequitur motum*: Sed visio beatifica mensuratur æternitate, & vt in Tractatu de visione Dei capite vltimo demonstrauius: Ergo est ab intrinseco immutabilis & incorruptibilis. Tertiò, forma perfectè complens, & satians appetitum beati, natura sua incorrupti-

bi-

bilis & inamissibilis est; sicut forma cœlorum est ab intrinseco incorruptibilis, quia perfectè satiat appetitum materiæ, nec finit eam appetere aliquam formam ipsi contrariam: Sed visio beatifica totaliter satiat appetitum beati, & omnia eius desideria explet, ut capite præcedenti ostensum est: Ergo ex natura sua incorruptibilis est. Demum S. Thomas 1. p. qu. 50. art. 5. ad 3. ait quod *non dicitur aliquid corruptibile, per hoc quod Deus possit illud ad non esse redigere, subtrahendo suam conservationem, sed per hoc quod in seipso aliquod principium corruptionis habet*. Vnde cœli, Angeli, & animæ rationales, sunt & dicuntur incorruptibilia, quia licet per absolutam Dei potentiam, & suspensionē diuini concursus conseruatiui, possint destrui, & desinere esse, non habent tamen in seipsis aliquod principium corruptionis: Atqui similiter, quamuis visio beatifica possit destrui, de potentia Dei absoluta: non habet tamen in se aliquod principium corruptionis, cum subiectum illius sit incorruptibile, nempe intellectus, & principia quæ ad illam concurrunt, nimirum lumen gloriæ, & essentia diuina, ut gerens vices speciei intelligibilis, similiter immutabilia & incorruptibilia sint, illaque excludat peccatum, quod posset esse causa moralis destructionis eius: Ergo est incorruptibilis ab intrinseco. Vnde visio Pauli quæ fuit illi in raptu communicata, ex se & ex natura sua erat perpetua, & exigebat ab intrinseco conseruari; sed ex dispensatione Dei, & per miraculum, non durauit de facto: Sicut cœlum vel Angelus, quæ ab intrinseco incorrupti-

ptibilia sunt, & exigunt perpetuò conseruari, de potentia absoluta possunt desinere esse.

Obijcies primò : Illa forma vel operatio est corruptibilis ab intrinseco, quæ habet potentiam ad non esse: Sed visio beatifica habet potentiam ad non esse, cum possit à Deo destrui: Ergo est corruptibilis ab intrinseco.

Respondeo distinguendo maiorem : Illa forma vel operatio est corruptibilis ab intrinseco, quæ habet potentiam physicam seu naturalem ad non esse, concedo maiorem ; Logicam seu obedientialem tantum, nego maiorem, & sub eadem distinctione minoris, nego consequentiam. Itaque vt aliquid dicatur incorruptibile ab intrinseco per respectum ad Deum, non sufficit non repugnantia, seu potentia logica & obedientialis, vt ab illo destruat (alioquin Angeli, cœli, anima rationalis, & vnio hypostatica, possent dici ab intrinseco corruptibilia, cum in eis sit potentia obedientialis ad non esse, illaque per absolutam Dei potentiam possint destrui & annihilari) sed exigitur potentia physica, inclinata secundariò ad non esse: Ideo enim homo v. g. dicitur corruptibilis ab intrinseco, quia materia ex qua componitur appetit alias formas incompatibiles cum anima rationali, & ex consequenti appetit expulsionem animæ, & non esse hominis.

Obijcies secundò : Forma recepta in subiecto non connaturali, sed extraneo, recipitur in eo amissibiliter seu corruptibiliter, vt patet in calore, qui in subiecto proprio & connaturali, scilicet igne, est inamissibiliter, sed in aqua est amissibiliter, eò quod aqua sit subiectum

ctum illi extraneum : At visio beatifica est in homine, & in Angelo, vt in subiecto extraneo & non connaturali, cū lumen gloriæ à quo dependet, nulli intellectui creato vel creabili connaturale sit : Ergo visio beatifica est assimiliter & corruptibiliter in intellectu humano, & Angelico.

Respondeo maiorem esse veram, quando forma non habet ex se quod sit incorruptibilis, sed ex conditione subiecti; tunc enim si recipitur in subiecto extraneo, est in eo corruptibiliter; secūs verò quando ex se & ex natura sua incorruptibilis est, tunc enim non solum non participat corruptibilitatem subiecti, sed insuper illud trahit & eleuat ad suam incorruptibilitatem, vt patet in subsistentia Verbi, quæ quia ex se & ex natura sua incorruptibilis est & æterna, communicata subiecto extraneo, scilicet humanitati Christi, incorruptibilis & perpetua manet, trahitque illam ad suam perpetuitatem & incorruptionem; vnde Christus naturam semel assumptam nunquam dimisit, etiam dissoluta vnione illius per mortem. Cū ergo visio beata, ex se & ex natura sua incorruptibilis sit (quia principia ad illam concurrentia, nempe lumen gloriæ, & essentia diuina in ratione speciei intellectui beatorum vnita, sunt incorruptibilia) quamuis recepta in subiecto extraneo & non connaturali, non participat eius mutabilitatem, sed potius illud trahit ad esse immutabile, & incorruptibile. Vnde quamuis intellectus secundum se mensuretur æuo, vt subiicitur tamen lumini gloriæ, & visioni beatificæ, mensuratur æternitate par-

ticipata, sicut ipsum lumen, & visio.


Dices, Gratia sanctificans est radix luminis gloriæ, & visionis beatificæ, & tamen non est incorruptibilis ab intrinseco, cum quotidie corrumpatur per peccatum: Ergo à fortiori lumen gloriæ, & visio beatifica, non sunt ab intrinseco incorruptibilia; non potest enim proprietas esse incorruptibilior natura à qua dimanat.

Respondeo quod licet gratia viæ non sit incorruptibilis ab intrinseco, nec petat durationem perpetuam, bene tamen gratia consummata patriæ, & hæc est radix luminis gloriæ, & visionis beatificæ.

Quod si instes, & dicas, gratiam ut consummatam non differre intrinsecè à gratia viatoris: Ergo si gratia viæ ab intrinseco non sit incorruptibilis, id etiam non habebit gratia consummata patriæ, Respondebo negando consequentiam, etsi enim gratia viæ & patriæ eiusdem sint entitatis, & consequenter quoad entitatem ab intrinseco incorruptibilitatem exigant; habent tamen duplicem statum, in quorum vno, scilicet viæ, caret non incorruptibilitate quoad entitatem, sed statu incorruptibilitatis; quia non plenè sibi subijcit liberum arbitrium creatum, sed potius illi subijcitur: in altero verò, nempe in statu termini, gaudet incorruptibilitate quoad entitatem, & statu incorruptibilitatis, opposita de causa; quia nimirum totaliter & plenè sibi subijcit flexibilitatem arbitrij, qua tendit ad malum: Sicut ergo gratia, absque intrinseca varietate entitatis, per solam variationem status, est radix fidei in via, & luminis gloriæ in termino,

ita

ita præcisè per mutationem status, transit de corruptibili ratione status, ad statum incorruptibilitatis. Et quia connaturaliter petit, ut ita loquar, radicare lumen gloriæ, fidem autem per accidens, ut tali lumini substitutam, & veluti eius vicariam, connaturaliter postulat statum incorruptibilitatis, permittit tamen statum corruptilitatis.



CAPUT V.

De dotibus & aureolis beatorum.

DOs à Iurisperitis accipitur pro dono quo sponsa datur, quando in domum sponsi solemniter traducitur, tum in solamen matrimonij, eiusque sustentationem, tum in ornatum ipsius sponsæ, ut dicitur lege *Dotis ff. de iure dotium*: Vnde cum in beatitudine sit coniunctio perpetua inter animam & Deum, & veluti spirituale quoddam connubium, in beatis dotes debent admitti, & de facto admittuntur à Theologis, aliæ quidem ex parte animæ, alæ verò ex parte corporis, de quibus breuiter hic agendum est.

§. I.

Dotes animæ beatæ.

TRes tantum sunt dotes animæ beatæ, scilicet visio, comprehensio, seu tentio, & delectatio, Ita D. Thomas 1. p. qu. 12. art.

7. ad 1. & in supplemento qu. 95. art. 3. & alij Theologi communiter. Ratio est, quia dotes patriæ immediatè coniungunt animam Deo, & correspondent virtutibus viæ immediatè in Deum tendentes, sunt tantum tres, nempe fides, spes, & charitas: Ergo & dotes animæ beatæ, nimirum visio, comprehensio, & delectatio. Visio ratione suæ claritatis correspondet fidei, illiusque imperfectionem, nempe obscuritatem, excludit. Spei correspondet comprehensio, per quam tenemus Deum, ad quem currebamus per spem, illiusque imperfectionem excludit, *nam quid videt quis, quid sperat?* ut ait Apostolus. Denique delectatio seu fructio charitati respondet, eiufque imperfectionem excludit, quatenus obiectum quod absens per charitatem amabatur, & desiderabatur in via, præsens & possessum, delectationem & fruitionem causat in patria.

Circa has dotes difficultas & controuersia est inter Theologos, an illæ sint habitus vel actus? Plures enim existimant illas esse actus, alij habitus, alij vtrumque importare. Sed secunda opinio videtur probabilior, primò quia illam expressè docet D. Thomas in 4. dist. 49. qu. 4. art. 2. in corp. his verbis: *Secundum alios dicendum quod beatitudo & dotes realiter differunt, ut beatitudo dicatur ipsa operatio perfecta, qua anima coniungitur Deo, sed dotes dicuntur habitus vel dispositiones, &c.* Secundò ob rationem quam idem S. Doctor ibidem insinuat, nam dotes exornant & disponunt animam ad coniunctionem spiritualem cum Deo: At visio, comprehensio; & fructio, ut sunt operationes, non disponunt illam
ad

ad talem coniunctionem, sed sunt ipsa coniunctio : Ergo ratio dotis non competit actibus, sed habitibus luminis gloriæ & charitatis, eos antecedentibus . Quod ut melius percipiatur.

Obseruandum est, duplicem rationem seu formalitatem in his habitibus reperiri, nam primò habent quod sint principia eliciendi operationes, quæ vel sunt consummatio beatitudinis, vel ad illam sequuntur : & sic non magis induunt rationem dotis, quam ipsa consummatio matrimonij : Secundò quod eleuent animam ad quendam statum altiore, & dissimilem à statu viæ, ratione cuius non potest amplius habere imperfectiones huius vitæ ; & sub hac ratione induunt rationem dotis, id est ornatus, dispositionis, & habilitationis sponsæ ad illas nuptias diuinas : v. g. lumen gloriæ non solum est principium quo eliciendi visionem Dei, sed etiam disponendi intellectum ad recipiendam diuinam essentiam loco speciei, & ita clarificandum intellectum, quod non sit capax vllius obscuritatis, sed solum euidentiæ & claritatis, & sub hac ratione vocatur visio habitualiter, & per modum dotis . Similiter comprehensio, quatenus est dōs, dicit eundem habitum luminis gloriæ, non ut clarificantem intellectum, & disponentem ad recipiendam essentiam diuinam speciem intellegibilem, sed ut tenentem habitualiter ipsam visionem, quæ est intentio seu comprehensio actualis . Demum dōs fruitionis, seu delectationis, est ipse habitus charitatis, non ut est principium amoris (sub hac enim ratione reperitur etiam in via) sed ut causans delectationem beatificam, quæ specie

ab amore differt, & sic solum reperitur in patria. Ex quo solvuntur præcipua argumenta, quæ contra prædictam sententiam fieri solent.

§. II.

Dotes corporis gloriosi.

Quemadmodum in ingressu beatitudinis anima desponsata Christo recipit tres dotes, scilicet visionem, comprehensionem, & fruitionem, ut §. præcedenti ostensum est: Ita corpus in resurrectione, quando animæ beatæ coniungetur, quatuor dotes seu ornamenta recipiet, nempe impassibilitatem, subtilitatem, agilitatem, & claritatem.

Impassibilitas non solum mortem & corruptionem, sed etiam omnem dolorem, & passionem læsam seu corruptivam excludet, non tamen passionem perfectivam, qualis est receptio actionum immanentium, etiam sensitivarum, & accidentium omnium perficientium, quia id tantum à corporibus gloriosis est auferendum, quod imperfectionem, non quod perfectionem includit. Hæc verò dos in corporibus gloriosis proveniet ex dominio animæ supra corpus, seu ex plena subiectione corporis ad animam, qua fiet ut materiæ potentialitas & appetitus, ita maneant expleta, aut saltem cohibita, & ligata ad ipsam formam seu animam, ut nulli alterationi, vel dispositioni ad aliam, locum aperiant vel relinquunt, ut docet S. Thomas in 4. dist. 44. qu. 2. art. 1. Vel etiam dici potest cum eodem S. Doctore ibi-

ibidem art. 2. ad 1. quod ex beatitudine & gloria animæ, effluet & redundabit in corpus gloriosum aliqua perfectio seu qualitas supernaturalis, per quam habile reddetur ad talem subiectionem, quæ perfectio seu qualitas, dos glorificati corporis dicitur. Vnde Augustinus Epist. 56. ad Dioscorum: *Tam potenti (inquit) natura Deus fecit animam, ut ex eius plenissima beatitudine, quæ in fine temporum Sanctis promittitur, redundet etiam in inferiori naturam, quæ est corpus. non beatitudo quæ fruētis & intelligentis est propria, sed plenitudo sanitatis, id est incorruptionis vigor.*

Subtilitas corpus gloriosum ab omni terrenæ labis concretione & crassitie liberum reddet, ipsi inque alioquin animale & terreste, efficiet quasi cœleste & spirituale, iuxta illud Apostoli 1. ad Corinth. 15. *Seminatur corpus animale, surget corpus spirituale.* Non quod mutandum sit in spiritum, ut quidam hæretici olim somniabant, sed quia erit spiritui perfectè subiectum, & quasi ad conditionem spiritus eleuatum. Habebunt etiam corpora gloriosa, ratione huius dotis, vim & facultatem penetrandi omnia alia corpora, non quod physicè seu efficienter hunc effectum præstet, sed moraliter tantùm, quatenus ad eius præsentiam, & in signum talis dotis, præstabitur penetratio illa à Deo, ad voluntatem beati, ut docet S. Thomas in supplemento qu. 83. art. 2. ubi sic discurret. *Necessitas distinctionis duorum corporum in situ, causatur à natura quantitatis dimensionis, cui per se conuenit situs. Subtilitas autem à corpore glorioso dimensionem non aufert, unde nullo modo aufert illi prædi-*

Etiam necessitatem distinctionis situs ab alio corpore; & ideo corpus gloriosum non habebit ratione suæ subtilitatis, quod possit esse simul cum alio corpore, sed poterit simul cum alio corpore esse, ex operatione diuinæ virtutis. Sicut enim corpus Petri non habuit ex aliqua proprietate indita, quod ad umbram eius sanarentur infirmi, sed hoc fiebat virtute diuina, ad ædificationem fidei: ita faciet virtus diuina, ut corpus gloriosum possit simul cum alio corpore esse, ad perfectionem gloriæ. Similia habet super cap. 15. epistolæ 1. ad Corinth. lect. 6.

Agilitas estabilitas seu vis quæ erit in corporibus gloriosis, ad promptè se mouendum quocumque beati voluerint, & absque vlla prorsus fatigatione. Vt enim discurrebat S. Doctor in supplem. qu. 84. art. 1. Per dotes corpus gloriosum erit perfectè subiectum animæ glorificatæ: anima autem coniungitur corpori, non solum ut forma sed etiam ut motor, & utroque modo oportet quod corpus gloriosum animæ glorificatæ sit summè subiectum. Vnde sicut per dotem subtilitatis subiicitur ei totaliter, in quantum est forma corporis, dans esse specificum; ita per dotem agilitatis subiicitur ei in quantum est motor, ut scilicet sit expeditum & habile ad obediendum spiritui in omnibus motibus & actionibus animæ.

Porro tanta erit agilitas corporum glorificatorum, ut S. Hilarius in Psal. 138. eam compareret vel ocitati volatus aquilarum: Pennigerabunt (inquit) tanquam aquilæ, naturam euolandi in cælum, in resurrectionis demutatione sumpturi. Laurentius Iustinianus eam explicat exemplo radij solaris, qui statim ab

orien-

oriente pertingit ad ultimas occidentis plagas; Sanctus Anselmus lib. de similitud. cap. 51. agilitatem corporum gloriosorum dicit equandam agilitati Angelorum: *Velocitas (inquit) tanta nos comitabitur, ut ipsis Angelis Dei æquè celeres futuri simus, qui è cælo ad terras, & è conuerso, dicto citius elabuntur.* Aduertendum tamen, quod sicut motus Angelicus, siue continuus, siue discretus, non potest fieri in instanti, ut in Tractatu de Angelis cap. 6. §. 3. ostensum est; ita nec motus localis corporis gloriosi, quamuis celerrimus & citissimus, potest esse instantaneus, ut docet D. Thomas loco citato art. 3. hoc enim repugnat naturæ, & quidditati motus localis, qui cum sit quid successuum, & partibus prioribus & posterioribus constans, non potest fieri in instanti.

Demum quarta dos corporis gloriosi est claritas seu luciditas, quæ ex gloria animæ in illud redundabit, ut docet S. Thomas 4. contra Gent. cap. 86. ubi sic ait: *Sicut anima diuina visione fruens, quadam spiritali claritate replebitur; ita per quandam redundantiæ ex anima in corpus, ipsum corpus suo modo claritatis gloria induetur.* Nec valet si dicas cum aliquibus Recentioribus, oppositum sentientibus, inter claritatem gloriæ animæ, & lucem corporis gloriosi, nullam esse connexionem, ut hæc dicatur proprietas illius, ab eaque dimanare, cum illa sit spiritalis, & ista corporea. Non valet, inquam, quia sicut est connexio inter potentias corporis, quæ dimanant ab anima, & ipsam animam, quamuis illa sit spiritalis, & illæ corporeæ, ut potentia

nutritiua, augmentatiua, & generatiua; & inter virtutes morales infusas, & gratiam sanctificantem, quamuis ista resideat in essentia animæ, & illæ in appetitu sensitivo subiectentur, vt temperantia, & fortitudo: ita inter claritatem animæ beatæ, & lucem corporis gloriosi, potest reperiri connexio & colligatio, & ista dimanare ab illa, quamuis vna sit spiritualis, & alia corporea. Vnde Augustinus supra rektius ait quod *tam potenti virtute Deus fecit animam, vt ex eius beatitudine redundet in corpus plenitudo sanitatis & incorruptionis vigor.* Qua antem ratione dimanat ab anima in corpus incorruptio, eadem claritas dimanare potest, quia sicut connectitur cum beatitudine animæ impassibilitas, ita & claritas. Id confirmari potest ex mysterio & transfigurationis, in quo claritas corporis Christi deriuata est & à diuinitate ipsius, & à gloriæ animæ, vt ex Damasceno docet Sanctus Thomas 3. p. qu. 45. art. 2.

Quærent hic aliqui, an claritas seu luciditas exitura sit in corporibus beatis, non tantum secundum superficiem, sed etiam secundum profunditatem, ita vt prædicta corpora non solum futura sint lucida, sicut specula, sed etiam perua & transparentia, sicut crystallus, subindeque interior organizatio videri perfectè possit? Respondeo affirmatiuè cum S. Thoma in supplem. qu. 85. art. 1. ad 2. vbi sic ait: *Ad secundum dicendum quod Gregorius (lib. 18. moral. cap. 27.) comparat corpora gloriosa auro, propter claritatem, & vitro propter hoc quod translucebunt. Vnde videtur dicendum quod erunt simul perua &*
cla.

clara . Quare addit ibidem Gregorius: *Patebit corporalibus oculis ipsa etiam corporis harmonia, sicque unusquisque tunc erit conspicabilis alteri, sicut nunc esse non potest conspicabilis sibi.* Item Cyrillus Hierosolymitanus catech. 18. circa medium: *Iussi (inquit) splendent ut sol & tanquam luna, & sicut splendor firmamenti. Et prouidens istam hominum incredulitatem Deus, vermibus paruulis astate lucidum dedit corpus, ut ex apparentibus crederetur id quod expectamus: Qui enim partem potest præstare, poterit & totum; & qui fecit ut vermis lumine splendeat, multo magis illustrabit hominem iustum.*

Dices, singulæ partes corporis gloriosi retinebunt suum colorem, ille enim requiritur ad pulchritudinem, quæ ab Augustino definitur partium conuenientia, cum quadam suauitate coloris: Sed omnis color causat opacitatem, & impedit transparentiam, & diaphaneitatem: Ergo corpora glorificata, non erunt transparentia, sed opaca.

Respondeo, concessa maiori, negando minorem: color enim corporis, non impedit eius transparentiam & diaphaneitatem, ut docet D. Thomas loco citato, & experientia constat, videmus enim topazium simul retinere colorem flauum, & diaphaneitatem sufficientem ut in oppositam partem totus videatur. Quod si in medio essent alij colores, rubri, virides, cerulei, &c. cum eadem diaphaneitate, haud dubiè videri possent. Et quàmuis esset naturalis repugnantia simul coniungendi in eodem corpore colorem & lumen in summo, ob diuersas dispositiones quas in su-

biecto requirunt, illam Deus facilè superare potest, ut reipsa superat in corpore glorioso Christi.

§ III.

Aureola Beatorum.

PRæter essentialem beatitudinem, & dotes animæ beatæ, ac corporis gloriosi, omnibus beatis convenientes, admittunt Theologi quasdam singulares prærogativas, aliquibus solum competentes, ob singularium virtutum eximios actus quas aureolas vocant, siue parvas coronas, ad distinctionem præmij essentialis, quod aurea, siue corona aurea appellatur.

Aureolæ definitionem tradit S. Thomas in 4. distinct. 49. quæst. 5. art. 5. dicens illam esse *Privilegiatum præmium, privilegiata victoriæ respondens*. Id est gaudium quondam accidentale quod beati percipiunt ex victoriâ, quam in vi alicuius virtutis particularis reportarunt. Vnde iuxta triplicem victoriâ, quam de triplici hoste perfectè triumphato, mundo, carne, diabolo, ex hac vita Beati reportant; de mundo per martyrium, de carne per virginitatem, de diabolo per doctrinam & prædicationem, illum à se & à cordibus aliorum expellendo, triplex assignatur aureola; prima Martyrum, secunda Virginum, tertia Doctorem.

Aureola martyrij tria requirit, primò mortem actu secutam, vel quæ naturaliter secuta fuisset, si miraculosè à Deo impedita non fuisset.


set. Vnde non dicuntur martyres, qui tantum cupiunt fieri martyres, vel qui lethalia vulnera non accipiunt, ex quibus nata sit sequi mors. Contra verò fuit verus martyr Ioannes Euangelista, vti illum Ecclesia celebrat, qui in feruentis olei dolium immissus miraculosè liberatus fuit. Secundo requiritur quod mors, vel propter fidem Christi, vel propter Ecclesiæ defensionem, aut pro aliqua virtute perferatur. Defectus cuius non est martyr, qui in bello licet contra hæreticos occumbit, non tamen religionis causa, sed vel tuendi regni, aut alio politico titulò. Tertiò requiritur voluntas, saltem virtualis, moriendi pro Christo, & subeundi martyrium; vnde qui dormiens in odium fidei à Tyranno occiditur, si nunquam pro fide Christi moriendi voluntatem habuerit, martyrij aureolam non consequitur; secus si ante somnum voluntatem moriendi pro Christi fide habuit.

Aureola virginitatis duo exposcit, nempe carnis incorruptionem, & propositum illam seruandi vsque ad finem vitæ, vt docet Sanctus Thomas in 4. distinct. 49. quæst. 5. art. 3. ad 1. quæst. Vnde ad obtinendam illam aureolam, non est necessarium virginitatis seruandæ votum sed sufficit simplex propositum; sicut nec illa amittitur, si corporis virginitatis violenter auferatur. Ex quo infert S. Doctor ibidem in resp. ad 4. virginem non amittere virginitatis aureolam, etiam si oppressa concipiat & pariet. Quod si quæras, an virgo à proposito seruandi virginitatem semel deflectens, & postea resumpto proposito virginitatem seruans vsque ad finem vitæ;

vita, illius aureolam promereatur? Respon-
debo affirmatiuè cum eodem Doctore Ange-
lico ibidem ad 1. quæst. quia virginitas mentis
contrario proposito interrupta, reparari po-
test, secùs virginitas corporis. Ex quo intert
Paludanus in 4. distinct. 49. quæst. 8. art. 4.
nec aureolam virginitatis illam amittere, quæ
contra suam voluntatem oppressa, corporis
integritatem perdidit, si post factum consen-
sit, & postea, proposito resumpto, virginita-
tem seruauit vsque ad mortem; eò quod con-
sensus posterior non fuit causa prioris actus,
& aliunde sola mutatio interioris propositi
non tollit virginitatem, si iterum resumpto
proposito seruetur. Ex quo intelliges, virgi-
nitatem non amitti, nec illius aureolam, nisi
hæc duo simul concurrant, & corporis corrup-
tio, & consensus in illam.

Demum Doctoris aureola tria requirit,
primum, vt quis actu doceat, non enim coro-
na debetur potenti certare, sed actu certanti.
Secundum, vt doceat ea quæ ad salutem spe-
ctant, non enim cuiunque doctrinæ debetur
aureola, sed illi duntaxat quæ ad salutem di-
rigitur, iuxta illud Danielis 12. *Qui ad iusti-
tiam erudiunt multos, quasi stellæ in perpetuas
æternitates*. Tertium est, vt id recta faciat
intentione, id est propter utilitatem anima-
rum, & gloriam Dei; secùs, si ob gloriam
propriam, & vanam sui æstimationem. Non
requiritur tamen, vt ille qui docet sit Præla-
tus, vel in Theologia graduatus aut quod do-
ceat voce & prædicatione; sed sufficit quod
id faciat scripto, vel lectione, vel quod pri-
uatim & secretò poenitentes in confessionalibus in-

instruat. Vnde Doctoris aureolam promerentur, non solum Prælati, Doctores, & Predicatores, sed etiam Scriptores, Lectores, & Confessores.




TRACTATVS II.

DE

VOLVNTARIO

ET INVOLVNTARIO.

Expedito Tractatu de beatitudine, agendum est de medijs quibus illam assequimur, quæ sunt actus humani. Sed quia prima & generalis conditio actuum humanorum est vt à voluntate procedant, vnde voluntarij nominantur, priusquam de ipsis in particulari differamus, brevis Tractatus præmittendus est, in quo agemus primò de voluntario, secundò de inuoluntario, tertio de mixto ex vtroque, quarto de voluntario libero, seu de libertate, quæ radix & fundamentum est totius bonitatis, & malitiæ moralis actuum humanorum.



CAPVT I.

De voluntario.

§. I.

Definitio voluntarij, eiusque diuisio.

Voluntarium communiter definitur, quod est à principio intrinseco, cum cognitione finis. Dicitur à principio intrinseco, vt distinguatur à motu violento, qui est à principio extrinseco, vt dicitur 2. physic. Additur cum cognitione finis, vt distinguatur à motu naturali, cuius principium est quidem internum, sed à nulla prælucente cognitione dirigitur. Vnde actus vegetationis, & nutritionis, & quicumque voluntatis imperio non subduntur, vt prima cognitio finis, quæ non procedit ex alia cognitione, cum sit ipsa prima cognitio voluntarij, atque adeò humani, dici non possunt; eò quòd, etiam nolentibus nobis, huiusmodi actus exerceantur. Porro cum duplex sit cognitio finis vna perfecta, quæ apprehendit non solum rem quæ est finis, sed etiam rationem finis, & proportionem medicum ad ipsum, & competit homini; alia imperfecta, quæ in sola rei quæ finis est apprehensione sistit, nec rationem finalem considerat, quæ reperitur in brutis animantibus; duplex est voluntarium, vnum perfectum, homini conueniens; alterum imperfectum, competens brutis animantibus. Item in homine voluntarium aliud est liberum, quod ita pro-

ce

cedit à suo principio, vt positis omnibus ad procedendum requisitis, adhuc possit non procedere: aliud necessarium, quod positis omnibus prærequisitis, ita procedit, vt non possit non procedere. Quod adhuc est duplex, vnum proueniens ex imperfectione cognitionis, quo pacto motus primò primi & indeliberati in homine sunt necessarij: alterum procedens ex summa perfectione cognitionis, & obiecti adæquantis capacitatem potentia, atque adèò obiectiuè determinantis illam ad sui persecutionem, & sic amor beatificus est necessarius, quia regulatur per visionem beatam, quæ tollit indifferentiam obiectiuam iudicij, & Deum vt in se est clarè voluntati repræsentat.

Est autem aliqua controuersia inter Theologos, an ratio voluntarij perfectiùs reperiat in actibus liberis, quam in necessarijs secundo modo: v. g. an amor quo liberè Deum hic diligimus, sit magis voluntarius, quam amor beatificus, quo beati Deum necessariò amant in patria? Respondeo negatiuè, contra Vasquez, & Lorcam. Ratio fundamentalis est, quia voluntarium est id quod procedit à principio intrinseco, cum cognitione finis: Ergo ille actus est perfectiori modo voluntarius, qui à principio magis intrinseco, & à perfectiori cognitione procedit: Atqui amor beatificus est magis ab intrinseco, quam amor viæ, cum toto connatu feratur in Deum, & ex perfectiori cognitione procedat; dimanat enim à visione beatifica, quæ est perfectissima cognitio vltimi finis: Ergo est magis voluntarius. Id apertiùs constat in actibus diuinis, quis

quis enim dicat amorem necessarium quo Deus seipsum diligit, non esset illi magis voluntarium, quam ille quo liberè diligit creaturas; & amorem notionalem quo Spiritus Sanctus producit, minus esse voluntarium Deo, productione huius vniuersi?

Nec obstat quod S. Thomas interdum dicat actus notionales in Deo, non esse perfectè voluntarios; nam vel sumit voluntarium pro libero, vel loquitur de generatione Filij, quæ non est voluntaria formaliter, cùm Filius non procedat à voluntate, sed ab intellectu, sed tantum concomitanter; quia Pater vult generare, & in tali generatione sibi complacet, ut ipsemet S. Doctor explicat 1. p. q. 41. art. 2.

Non obest etiam quod hic q. 6. art. 2. perfectam rationem voluntarij tribuat ijs solùm actibus qui cum libertate & deliberatione procedunt, quosue laus & vituperium comitantur. Nam solùm ponit exemplum quoddam voluntarij perfecti, in eo quod nobis notius est, scilicet in actu libero, ex quo non licet inferre, non dari voluntarium perfectum sine libertate. Sicut si quis dicat, animal distinguitur à planta in eo quod sentit, quemadmodum videmus hominem sentire, inde non licet colligere, quod solùm homines sentiant, non bruta.

Dices, modus operandi liberè, cùm conveniat naturæ rationali, secundum gradum perfectionis quem habet super irrationalem, est perfectior modo operandi necessariò: Ergo ratio voluntarij perfecti illi competit.

Respondeo distinguendo Antecedens: est perfectior modo operandi necessariò, qui sequi-

quitur cognitionem imperfectam, concedo Antecedens. Modo operandi necessariò, qui oritur ex cognitione perfecta, nego Antecedens. Sicut enim modus operandi liber est proprius naturæ rationalis, quatenus excedit omnes alias naturas inferiores; ita & modus operandi necessariò, sequens perfectam cognitionem, ut patet in amore beatifico; ille enim conuenit creaturæ intellectuæ, prout omnes alias naturas inferiores excedit.

§. II.

Virum omissio, ut sit voluntaria, requirat debitum non omittendi?

Negant Aluarez, Martinez, & Ioannes à S. Thoma: affirmant Caietanus, Conradus, Medina, Ildephonsus, Salmaticenses, Curiel, & plures alij, quæ sententia videtur probabilior, & menti S. Doctoris hic q. 6. art. 3. conformior.

Pro resolutione, obseruandum est cum Salmaticensibus, omissionem aliquam dupliciter posse contingere, nimirum per non positionem actus, vel per cessationem & interruptionem actus iam incœpti: v. g. potest aliquis omittere missam duobus modis, primò si illam nullatenus audiat, secundò si in medio missæ aduertenter exeat de Ecclesia, ad ludendum vel studendum. Hoc posito.

Dicendum est, omissionem quæ præcisè est per non positionem actus, non posse esse voluntariam, sine debito non omittendi, bene tamen illam quæ est per cessationem, & inter-

ruptionem actus iam incepti.

Prima pars probatur. Ut omissio sit voluntaria, debet aliquo modo causari à voluntate; cum de ratione voluntarij sit esse à principio intrinseco: Atqui omissio quæ est præcisè per negationem actus, non potest vlllo modo causari à voluntate, nisi adsit debitum: Ergo eo secluso non potest esse voluntaria. Maior constat, minor probatur. Omissio non potest causari à voluntate, nisi causetur vel tanquam priuatio, vel tanquam negatio: Si causetur tanquam priuatio, manifestè requirit debitum, cum priuatio non sit nisi formæ debitæ. Si verò causetur tanquam pura negatio actus omis- si, requiritur necessariò quod præcedat ipse actus; quia negationes non aliter possunt fieri & introduci de nouo, nisi quatenus formæ oppositæ præexistantes destruuntur; ut constat in negatione lucis, quæ alio modo fieri nequit, quam destruendo ipsam lucem. Non potest ergo ommissio actus à voluntate causari, nisi vel immediatè præcedat actus qui emittitur, vel debitum non omittendi.

Ex hoc probata manet secunda pars conclusionis: nam qui expellit aliquam formam ab aliquo subiecto, eo ipso, secluso omni debito, causat in eo non esse talis formæ: Ergo cum voluntas tollit & corrumpit actum præexistente, causat, secluso quocumq; debito, non esse & omissionem talis actus. Et certè quis dicat hominem existentem in Ecclesia, audientem sacrum, in medio Missæ aduertenter exire de Ecclesia ad ludendum, & tamen illum non voluntariè omittere Missam, quia id facit in die profesto; vel non magis voluntariè

riè Missam prætermittere, quam prandium, de quo non cogitat: Ergo omissio quæ est per sessionem & interruptionem actus iam incœpti, potest esse voluntaria, sine debito non omittendi.

Obijcies primò cōtra primam partem conclusionis: Voluntarium definitur quod est à principio intrinseco, cum cognitione finis: Sed etiam si non sit præceptum, omissio præiussa est à principio intrinseco, cum cognitione finis; cū enim præceptum forinsecūs sonans sit quid merè extrinsecū, impertinenter se habet ad rationem principij intrinseci: Ergo secluso præcepto omissio præiussa voluntaria est.

Respondeo, concessa maiori, negando minorem, secluso enim præcepto, omissio quæ præcisè est per negationem actus, non potest causari à voluntate; quia non potest ab illa causari, nisi vt priuatio, quæ requirit necessariò debitum & exigentiam formæ. Nec valet quod ait quidam Recentior, cogitationem seu aduertentiam rationis circa actum qui omittitur, sufficere vt eius omissio induat rationem priuationis, subindeq; voluntaria sit. Priuatio enim importat essentialiter debitum seu exigentiam formæ: simplex autem cogitatio seu aduertentia celebrationis Missæ v.g. die qua non obligat eius præceptum, non causat debitum seu exigentiam auditionis Missæ, cū talis cogitatio non dicet tali die esse audendam Missam, sed tantum eam audiri posse: Ergo talis cogitatio seu aduertentia celebrationis Missæ, non sufficit ad hoc quod eius omissio in die feriali induat rationem priuationis, & voluntaria sit. Ad probationem
verò

verò minoris , dicendum est , quod quamvis præceptum sit quid extrinsecum , non tamen impertinenter se habet ad rationem voluntarij , quod est à principio intrinseco , sed est conditio necessaria ut omissio causetur à voluntate , subindeque voluntaria sit ; quia , ut mox dicebamus , non potest causari à voluntate , nisi habeat rationem priuationis , nec talem rationem induere , nisi supponat præceptum .

Obijcies secundò : Quod est in potestate voluntatis , voluntarium est : Sed omissio Missæ , etiam si non sit præceptum , est in potestate voluntatis : Ergo voluntaria est .

Respondeo distinguendo maiorem : Quod est in potestate voluntatis , voluntarium est , in potentia concedo : in actu nego & concessa minori , distinguo consequens distinctione maioris . Quod diximus de voluntario , dicendum est etiam de libero , quod est quædam species voluntarij , quod enim est in potestate voluntatis , cum indifferentia & potestate ad eius omissionem , est liberum in potentia & in actu primo , non verò in actu secundo , si nulum sit libertatis exercitium . De quo insus in Tractatu de peccatis .

Ex dictis inferitur , effectum qui sequitur ad omissionem , non esse voluntarium , nisi sit voluntaria ipsa omissio , atque adeò nisi vel immediate præcedat actus qui omittitur , vel debitum non omittendi : v. g. omittit quis gubernare nauim , ex qua omissione sequitur nauis submersio , huiusmodi submersio non erit voluntaria , nisi is qui omittit , teneatur dirigere illâ , vel saltem actualis directio præcedat , & in-

interrumpatur . Ratio manifesta est , nam prædictus effectus non reducitur in voluntatem , nec participat rationem voluntarij , nisi media omissione , vnde vbi hæc non fuerit voluntaria , nec talis effectus voluntarius erit : cum ergo ad hoc vt omissio voluntaria sit , vnum ex prædictis , scilicet vel debitum actus omissi , vel præexistentia eius requiratur , vt supra ostendimus , consequens est , idem à fortiori requiri , vt effectus ex illa secutus , voluntarius sit .

CA P V T II.

De inuoluntario .

Quatuor sunt causæ inuoluntarij : violentia , metus , concupiscentia , seu passio veniens , & ignorantia : Sicut enim voluntarium causatur ex duplici principio , nimirum ex voluntate seu appetitu operante , qui est principium intrinsecum , & ex cognitione dirigente ; ita oportet quod oppositum eius , scilicet inuoluntarium causetur ex oppositis principijs , & proveniat vel ex eo quod operatio procedat à principio extrinseco , vt contingit in his quæ ex violentia aut metu fiunt , aut quia tollitur , vel ligatur , aut turbatur cognitio , sicut fit per ignorantiam & concupiscentiam seu passionem . Verum quia ea solùm quæ fiunt ex violentia , seu inuoluntaria simpliciter , ea verò quæ fiunt ex metu , concupiscentia , & ignorantia , sunt mixta ex voluntario

rio & inuoluntario, de primo solum hic agemus de alijs verò capite sequenti.

Violentum ergo à Philosophis definitur *id quod est à principio extrinseco, passio non conferente vim*, quod non debet intelligi purè negatiuè (quasi sufficiat subiectum cui vis inferatur, non cooperari motui violento) sed etiam positiuè, ita vt passum positiuè renitatur, - & agenti extrinseco resistat. Ex quo intelliges, hæc quatuor nomina, *necessarium, violentum, coactum, inuoluntarium*, quæ interdum confunduntur, inter se differre, secundùm diuersas formalitates quas exprimunt. Necessarium enim dicitur, prout opponitur contingenti seu indifferenti, & importat determinationem ad vnum, excludendo facultatem ad oppositum. Violentum includit quidem eandem necessitatem & determinationem ex parte eius qui patitur violentiam, sed addit supra necessarium, quod sit à principio extrinseco, quia à principio proprio & intrinseco nihil violentatur, cum tamen possit aliquid fieri necessario, & tamen esse à principio intrinseco, vt patet in brutis, & in motibus primis. Coactum ferè idem est quod violentum, sed propriè loquendo coactum solum opponitur spontaneo seu voluntario, ideoque solum inuenitur in cognoscentibus; violentum verò etiam in rebus inanimatis reperitur, vt cum lapis projicitur sursum. Inuoluntarium interdum sumitur pro coacto aut violento, sed tamen latiùs patet, quia potest contingere quod aliquid sit inuoluntarium non solum ratione violentiæ, sed etiam ratione ignorantix, & ex defectu cognitionis,

vt

vt capite sequenti dicemus.

Querunt hic Theologi, an voluntas humana, vel aliæ res creatæ, possint pati violentiam à Deo, & ab illo cogi? Pro resolutione huius difficultatis.

Dico primò, per nullam potentiam potest inferri violentia voluntati in actu ab ea elicitò. Ratio est, quia omnis actus elicitus à voluntate est essentialiter voluntarius, cum sit à principio intrinseco, cum cognitione finis; imò est quadam actualis inclinatio voluntatis, Ergo non potest esse coactus aut violentus, iuxta illud Anselmi lib. de libero arbit. cap. 6. *Inuitus nemo potest velle, quia non potest velle nolens velle.*

Dices primò, Voluntas in actu elicitò potest necessitari à Deo, vt patet in amore beatifico: Ergo & cogi. Sed nego consequentiam, ad hoc enim vt voluntas in actu elicitò necessite- tur, sufficit quod sine indifferentia iudicij moueatur & applicetur ad illum; vt verò coggeretur, deberet talis actus esse à principio extrinseco, cum resistentia intrinseci, quod repugnat actui voluntatis, cum essentialiter sit actus vitalis, & actualis eius inclinatio.

Dices secundò, Deus potest voluntatem inclinatum in aliquod obiectum, v. g. in odium inimici, per motionem efficacem inclinare in oppositum, eamque de odio in amorem transferre: Ergo potest illi inferre violentiam, etiam quantum ad actus elicitos.

Respondeo, concesso Antecedente, negando consequentiam, vt enim egregiè discurret D. Thomas qu. 22. de verit. art. 8. *Quantumcumque voluntas immutetur in aliquid non*

dicitur cogi in illud . Cuius ratio est , quia ipsam velle aliquid est inclinari in illud , coactio autem & violentia est contra inclinationem illius rei quæ cogitur . Cum igitur Deus voluntatem immutat , facit ut præcedenti inclinationi succedat alia inclinatio , ita ut prima auferatur , & secunda maneat , unde illud ad quod inducit voluntatem non est contrarium inclinationi iâ existenti , sed inclinationi quæ prius inerat , unde non est violentia , neque coactio .

Dices tertio . Peccatum est contra naturalem hominis inclinationem , ut dicitur in tractatu de peccatis ; Ergo quando homo peccat , facit contra naturalem inclinationem , & per consequens patitur violentiam .

Respondeo peccatum esse contra naturalem inclinationem hominis inadæquatam & partialem , quam , ut rationalis est , habet ad bonum honestum & rationi consonum , quod est obiectum parziale , & inadæquatum voluntatis humana ; non tamen contra eius inclinationem totalem & adæquatam , qua fertur in suum obiectum adæquatum , quod est bonum in communi , prout abstrahit à vero vel apparenti , ab honesto , vel delectabili : Unde licet actus peccati possit dici violentus homini secundum quid , non tamen simpliciter & absolute .

Dico secundò , voluntas potest pati violentiam , quantum ad actus ab ea imperatos , & ab alijs potentijs inferioribus elicitos . Patet hoc , nam aliarum potentiarum actus possunt vel exerceri vel impediri contra inclinationem voluntatis : V. g. possunt homini nolenti videre , oculi vi aperiiri : in quo casu visio illa
non

non esset quidem violenta respectu potentiae visuæ, cum ab illa ut à principio intrinseco procederet, bene tamen respectu voluntatis, quæ illi renueretur; unde cum voluntas sit inclinatio vniuersalis, tendens ad bonum totius suppositi, talis visio absolutè violenta dici deberet.

Dico tertio, non solum voluntatem, sed nec ullam etiam creaturam, posse pati violentiam à Deo. Ratio est, quia violentum simpliciter est quod fit contra principalem inclinationem creaturæ: Sed omne quod fit à Deo in creaturis, prout ab illo fit, est iuxta præcipuam illarum inclinationem: Ergo nihil huiusmodi potest dici simpliciter violentum. Maior constat, minor probatur. In qualibet creatura præcipua & superior inclinatio est ad obediendum Deo omnium creatori & gubernatori, siue faciendò quod vult eam facere, siue recipiendo quidquid in ea vult fieri: Ergo totum id quod Deus in creaturis fit vel facere potest, fit secundum præcipuam illarum inclinationem. Consequentia patet, Antecedens probatur à D. Thoma 1. p. qu. 60. art. 5. hoc discursu: Quod est alterius maiorem habet inclinationem in id cuius est, quam in bonum proprium: Sed quælibet creatura est pars vniuersi, & aliquid Dei: Ergo maiorem habet inclinationem in bonum vniuersi, & ad obediendum Deo, quam ad bonum sibi proprium & conueniens. Minor constat, maiorem verò declarat D. Thomas exemplo manus, quæ seipsam naturaliter exponit ictui, ad conseruationem totius corporis, & virtuosius cuius, qui se exponit mortis periculo, pro to-

tius reipublicæ conseruatione . Idem constat in creaturis insensibilibus , licet enim graue ex propria inclinatione per grauitatem tendat deorsum , & leue per leuitatem sursum , tamen ne detur vacuum , graue propriæ grauitatis oblitum ascendit , & leue contempta leuitate descendit : Ergo naturaliter magis inclinatur pars in bonum totius quam in bonum proprium .

Confirmatur : Omnis creatura naturaliter magis inclinatur in finem , quam in media ; opposita enim inclinatio est inordinata , subindeque non potest esse à Deo creaturæ impressa : Sed bonum vniuersi & bonum diuinum , sunt finis bonorum particularium , in quæ creaturæ inclinantur : Ergo creaturæ magis inclinantur in bonum diuinum , & ad obediendum Deo , vt creatori & gubernatori , quam in bonum sibi proprium & connaturale . Vnde Sapient. 16. dicitur : *Ignis vt nstri-
rentur iusti , etiam suæ virtutis oblitus est : crea-
tura enim tibi factori deseruiens , &c.* Quibus verbis Scriptura declarat , quod dum creaturæ à Deo mouentur ad effectum aliquem qui videtur contra inclinationem propriæ naturæ , quasi obliuiscantur huiusmodi inclinationis , subiiciendo illam potentia obedientiali , per quam Deo ad nutum inserviunt ; sicque prædicta inclinatio in ordine ad resistentia effectum , est ibi veluti sub obliuione , & quasi non esset . Hinc Augustinus lib. 26. contra Faustum ait quod *Deus creator & conditor omnium creaturarum , nihil contra naturam facit : id enim est cuique naturale , quod ille facit à quo est omnis numerus , motus , & ordo nature.*

De voluntario, & inuoluntario. 101

tura. Et D. Thomas qu. 1. de potentia art. 3. ad 1. dicit quod omnes creature quasi pronat rati habent quod à Deo in eis fit, & propter hoc in eis distinguitur potentia duplex, una naturalis ad proprias operationes & motus, alia quæ obediētia dicitur ad ea quæ à Deo recipiūt.


Obijcies primò: plura Deus efficit quæ naturis rerum repugnant, subindeque quæ ipsis resistentibus fiunt, vt cum Solem in medio celi detinuit ad vocem Iosue, & retroraxit tempore Ezechix Regis Iudæ; item quando diuidens mare rubrum & Iordanem, ad transitum filiorum Israel, fecit aquas sursum itare quasi pro muro: Ergo violentiam infert creaturis.

Respondeo effectus illos fuisse quidem contra particularem inclinationem illarum creaturarum, subindeque fuisse violentos secundum quid; quia tamen facti sunt secundum inclinationem vniuersalem, qua quælibet creatura magis inclinatur ad bonum diuinum, & ad obediendum Deo vt creatori, & gubernatori vniuersi, quam in bonum sibi proprium & connaturale, non possunt dici violenti simpliciter, vel contra naturam, sed præter aut supra naturam.

Obijcies secundò: Dæmones patiuntur violentiam in alligatione ad ignem inferni, cum illa habeat rationem poenæ, illique Dæmones renitantur quantum possunt: Sed illa alligatio fit à Deo: Ergo Deus potest creaturis inferre violentiam.

Respondeo Dæmones pati violentiam secundum quid in alligatione ad ignem tartareum, quæ violentia sufficit vt talis alligatio habeat rationem poenæ: Eos tamen non pati violentiam

tiam absolutè & simpliciter, quia etiam in Dæmonis natura & voluntate concedenda est illa inclinatio vniuersalis ad obediendum Deo, vt supremo Domino & conditori naturæ illius, quæ potentior est omnia alia, per quam Dæmones penè sibi à Deo infligere reluctantur.



C A P V T I I I.

De mixto ex voluntario & inuoluntario.

§. I.

An & quomodo ex metu facta, sint mixta ex voluntario & inuoluntario?

Dico primò, quæ ex metu aguntur, mixta sunt ex voluntario & inuoluntario. Ita D. Thomas hic qu. 6. vbi hanc conclusionem probat tum ex Philosopho & Niffeno, quia ea quæ per metum aguntur appellant mixta ex voluntario & inuoluntario. Tum etiam, quia ea quæ per metum aguntur, secundùm se non sunt voluntaria, imò sunt inuoluntaria, sed sunt voluntaria ex metu, ad vitandum scilicet malum quod timetur: v. g. mercator absolutè & sine periculo tempestatis, nollet proijcere merces in mare, tempore tamen tempestatis, ad fugiendam mortem quæ timetur, vult eas proijcere, & de facto proijcit in mare: Ergo quæ per metum aguntur, mixta sunt ex voluntario & inuoluntario. Addo quod in obiecto actus ex metu facti reperiuntur ratio
mali

mali & ratio boni, sufficientes ad causandum nolitionem, & volitionem, quæ sunt principia voluntarij & inuoluntarij: v. g. in hoc quod est projicere merces in mare est ratio mali, vt pater; cùm ex hoc mercator maximum damnum incurrat, & ratio boni, cùm assumatur vt medium ad conseruandam vitam, seu ad euadendum mortis periculum.

Ad pleniorẽ huius conclusionis intelligentiam, obseruandum est, aliud esse aliquid fieri ex metu, aliud cum metu; particula enim *cum*, solam concomitantiam; particula verò *ex* causalitatem importat. Vnde tunc dicitur aliquid fieri ex metu, quando metus est causa talis actus, ita vt ex metu moueatur homo ad sic operandum, vt cùm quis ex metu mortis projicit merces in mare. Tunc verò censetur fieri cum metu, quando reperitur metus simul cum actione, sed non est causa mouens & impellens ad illam; sicut Martyres cum metu mortis fidem confitebantur, non tamen ex metu, sed ex Dei amore & obedientia. Intelligitur ergo nostra conclusio de opere ex metu elicto, & qui sit vera causa actionis, non verò de metu concomitante tantum, cùm hic in actionem non influat, sed eam solam comitetur.

Dico secundo, quæ ex metu fiunt, sunt voluntaria simpliciter, & inuoluntaria secundum quid. Est etiam D. Thomæ articulo citato, vbi sic discutrit: Illud quod est voluntarium hic & nunc, ponderatis omnibus circumstantijs; & inuoluntarium tantum secundum se, abstrahendo à circumstantijs, est voluntarium simpliciter, & inuoluntarium tantum secundum

dum quid : Sed opus factum ex metu est voluntarium hic & nunc, ponderatis circumstantijs, & inuoluntarium, consideratum secundum se: Ergo est voluntarium simpliciter, & inuoluntarium secundum quid. Minor patet exemplo supra adducto proiectionis mercium. Maior autem probatur ex discrimine quod omnes admittunt inter intellectum & voluntatem nam per hoc distinguitur voluntas ab intellectu, quod iste considerat res secundum se, & cum abstractione à materia singulari; illa verò respicit obiectum existens, & vestitum omnibus circumstantijs, cum quibus in exercitio ponitur.

Confirmatur: Quod est volitum efficaciter & absolute, nolitum verò inefficaciter & conditionate solum, est voluntarium simpliciter, & inuoluntarium secundum quid: At opus factum ex metu est volitum efficaciter & absolute, & nolitum inefficaciter solum & conditionate, vt constat in predicto exemplo proiectionis mercium: Ergo est voluntarium simpliciter, & inuoluntarium tantum secundum quid.

Obijcies primò contra primam conclusionem: Quando quis metu poenarum inferni legem obseruat, talis obseruantia nihil habet inuoluntarij aut dissimulati, aliàs esset mala & vitiosa, quod repugnat Tridentino sess. 6. can. 8. & sess. 14. cap. 4. Ergo quæ fiunt ex metu, non sunt mixta ex voluntario & inuoluntario.

Respondeo primò, metum causare quidem inuoluntarium secundum quid, quando obiectum quod per metum eligitur, est malum secundum

quod secundum se, solumque ad vitandum maius malum habet rationem eligibilis, sicut in exemplo supra adducto prolectio mercium non aliunde est bona, nisi quia conducit ad mortem vitandam. Si verò obiectum quod per metum eligitur, non est malum secundum se, sed absolutè bonum, voluntas non habet actum nolitionis circa ipsum. Vnde cum observatio mandatorum sit per se bona, & nullo modo mala, etiam abstrahendo à periculo gehennæ inferni, hinc fit quod talis observantia ex metu pœnarum facta, nihil habet inuoluntarij aut displicentiæ. Iuxta quam solutionem & doctrinam, prima nostra conclusio non est accipienda omnino vniuersaliter, quasi D. Thomas intendat, voluntarium ex metu non posse reperiri absque inuoluntario, sed magis indefinitè, quia hoc verificatur in pluribus.

Si quis autem contendat, doctrinam & conclusionem D. Thomæ, veram esse vniuersaliter, & absque vlla exceptione, vel limitatione, responderi poterit, in observatione legis, facta ex solo metu gehennæ, posse esse aliquid inuoluntarij & displicentiæ, absque eo quod illa sit mala aut vitiosa: dupliciter enim considerari potest actio quæ præcipitur, nempe materialiter & in esse rei, & formaliter prout præcepta est, seu prout importat applicationem diuinæ legis ad illam. Si hoc secundo modo consideretur, eius displicentia semper illicita est, quia diuina lex nihil habet mali, ratione cuius possit licitè respui. Si verò primo modo spectetur, potest esse licita eius displicentia, quia res præcepta potest afferre aliquid laboris & fastidij, quod secundum se

consideratum, non habito respectu ad legem diuinam, potest licitam displicentiam terminare, vt patet in dolore & tristitia quam Christus habuit in horto oliuarum, non quidem de obseruatione præcepti moriendi, sibi à Patre impositi, sed de difficultate & molestia operis sibi præcepti, secundum se & præcisè sumpta.

Obijcies secundò contra secundam conclusionem: Matrimonium & votum solemne sunt inualida, si fiant ex metu cadente in constantem virum: Ergo ea quæ fiunt ex metu non sunt voluntaria simpliciter. Antecedens est certum, vt de matrimonio constat ex cap. *Locum*, & ex cap. *Veniens* de Sponsalibus, & de voto solemni ex Trident. sess. 25. de Regularibus cap. 19. vbi conceditur, vt Religiosi ex metu professi, possint intra quinquennium reclamare, & si probauerint professionem ex metu esse facta, quod sit nulla, Consequentia etiam videtur manifesta, nam omne matrimonium, & omne votum simpliciter voluntarium, debet esse validum.

Respondeo, concesso Antecedente, negando consequentiam, & ad probationem illius, distinguo Antecedens: Omne matrimonium & omne votum simpliciter voluntarium, debet esse validum, per se loquendo, & attento iure naturali, concedo. Per accidens, & attenta dispositione iuris positiui, nego. Potest enim Ecclesia ponere quasdam conditiones, sine quibus votum aut matrimonium non sint valida, quamuis sint simpliciter voluntaria, inter quas vna est, vt sunt sine metu: Sicut etiam in matrimonio aliam statuit conditionem, quod scilicet

licet fiat coram paracho, & duobus vel tribus testibus; ideoque matrimonium clandestinum, licet omnino voluntarium, inualidum est.

§. II.

Utrum concupiscentia, seu passio vehemens, causet inuoluntarium secundum quid, sicut metus?

R Espondeo negativè cum D. Thoma hic art. 7. ubi cum sibi primo loco hoc argumento obiecisset: *Sicut metus est quædam passio, ita & concupiscentia: Sed metus causat quodammodo inuoluntarium: Ergo etiam concupiscentia, sic respondet: Ad primum dicendum quod timor est de malo, concupiscentia vero respicit bonum: malum autem secundum se contrariatur voluntati, sed bonum est voluntati consonum: unde magis se habet timor ad causandum inuoluntarium; quam concupiscentia.*

Hæc tamen doctrina D. Thomæ videtur difficilis, & plures patitur instantias, nam experientia compertum est, plura agi per concupiscentiam, quæ secundum se sumpta repugnant voluntati; ut cum auarus expendit pecunias ad consequendam aliquam delectationem, quas secundum se, secluso ordine ad delectationem, vellet sine dubio retinere, doletque non parùm de earum expensione. Item in operante ex concupiscentia, vel passione, multoties sunt istæ duæ considerationes; hoc opus est mihi bonum secundum sensum, quia delectabile, & est mihi malum secundum rationem, quia contra legem Dei: Ergo quando

consentit concupiscentiæ, vel passioni, sic vult illud agere quatenus delectabile sensui, quod nolle illud facere, quatenus est contra rationem.

Respondeo quod cum D. Thomas articulo citato, post Aristotelem, Nyssenum, & Damascenum, docet ea quæ fiunt ex concupiscentia, non esse inuoluntaria secundum quid, sicut ea quæ procedunt ex metu, non intendit omnino negare, ei quod ex concupiscentia sit, posse aliquid inuoluntarij admisceri, sed asserere duntaxat huiusmodi inuoluntarium non causari ex concupiscentia, sicut in his quæ fiunt ex metu, ab ipso metu causatur. Et ratio discriminis quam S. Doctor tradit, optima est: nam cum concupiscentia ex nulla parte malum respiciat, sed præcisè bonum delectabile, non habet ex se inducere ad aliquid voluntati repugnans; unde si in his quæ fiunt ex concupiscentia, aliquid inuoluntarij admisceatur, non est ex ipsa concupiscentia, sed aliunde omnino per accidens provenit. E contra verò, cum obiectum metus sit malum quod difficile potest vitari, & ideo ut vitetur habet inclinare ad eligendum minus malum, quod secundum se voluntati repugnat, solumque eligitur ut conducit ad talem finem, hinc fit ut inuoluntarium in operibus metu factis repertum, ex ipso metu quodammodo ortum ducat, & non ei per accidens solum adiungatur, sicut in his quæ fiunt ex concupiscentia.

§. III.

Utrum ignorantia causet involuntarium?

Ignorantia diuiditur in antecedentem, concomitantem, & consequentem. Antecedens ea dicitur quæ antecedit actum voluntatis, hoc est quæ nullo modo est volita, vnde ad illam requiritur, quod ille qui ignorat, sufficientem adhibeat diligentiam ad eam vincendam, cum tali intentione, vt si ea ablata esset, non produceret effectum quem producit ex ignorantia. Exempli causa, emittit a liquis sagittam in aliquem locum vbi est homo absconditus, ignorat tamen ibi latere hominem, & sufficientem adhibet diligentiam vt exploret an ibi sit homo, ea intentione vt si sciret eum ibi latere, sagittam non emitteret: si ille talem hominem configat & interficiat, talis occisio dicitur procedere ex ignorantia antecedenti.

Concomitans vocatur illa quæ merè per accidens & concomitanter se habet ad actum voluntatis, & quæ neque mouet hominem ad operandum, neque illum remouet seu prohibet ab operatione, sed homo est ita dispositus, vt æqualiter & eodem modo operaretur, si talis ignorantia non adesset, ac operatur cum illa: v.g. si quis venationis causa circumueat syluam, & deprehendat hostem, ignorat tamen eum esse hostem, & adhibita prius sufficienti diligentia, existimans esse feram ibi latitantem, emittit sagittam, & interficit hostem, talis occisio dicitur procedere ex ignorantia-

rantia concomitanti, quia tunc licet ille ignoret esse hostem, est tamen ita dispositus, ut si illum agnosceret, interficeret.

Denique ignorantia consequens illa est quæ consequitur actum voluntatis, seu quæ volita est, quando scilicet voluntas vult ignorare id quod scire poterat & tenebatur. Porro dupliciter ignorantia potest esse volita, primò directè, quādo scilicet voluntas expressè vult rem aliquam ignorare, ut liberior peccet, iuxta illud Psalmi 35. *Noluit intelligere, ut bene ageret*, & hæc ignorantia dicitur *affectata*. Secundò indirectè, quando voluntas expressè quidem non vult ignorare, non tamen curat addiscere ea quæ potest & tenetur scire, & hæc ignorantia vocatur *crassa*, quia est voluntaria ob incuriam negligentis voluntatis, quæ tunc pore veluti impinguatur, & incrassatur. Dicitur etiam *supina*, quia qui desides sunt, supini iacere solent. His præmissis.

Dico, ignorantiam antecedentem causare involuntarium simpliciter; consequentem voluntarium simpliciter, & involuntarium secundum quid; concomitantem verò neque causare voluntarium, neque involuntarium, sed non voluntarium.

Prima pars huius assertionis patet, quod enim causat effectum omnino nolitum, & repugnantem inclinationi voluntatis, causat involuntarium simpliciter: Sed ignorantia antecedens hoc præstat, ut patet in exemplo supra adducto, projiciens enim sagittam ex ignorantia antecedente, occidit hominem quem nolisset occidere, & quem dolet occidisse: Ergo ignorantia antecedens causat in-

inuoluntarium simpliciter.


Secunda verò sic ostenditur: Qui vult causam alicuius effectus, vult etiam in ipsa causa effectum ex ea secutum: Ergo cum ignorantia consequens sit simpliciter volita, etiam effectus ex illa secutus, erit simpliciter volitus in illa, & per consequens simpliciter voluntarius.

Quod verò talis ignorantia causet inuoluntarium secundum quid, & sic probatur: Quod fit contra aliquam inclinationem voluntatis, est inuoluntarium secundum quid: Sed effectus proueniens ex ignorantia consequente, fit contra aliquam inclinationem voluntatis: Ergo est inuoluntarius secundum quid. Maior patet, minor probatur. Operans cum tali ignorantia, ita est affectus dum operatur, vt si adesset scientia, non poneret effectum, vnde illo posito, & adueniente scientia, tristatur; vt patet cum quis non facta sufficienti diligentia, putans occidere feram, occidit amicum: Ergo voluntas operans cum tali ignorantia, habet aliqualem inclinationem in oppositum. Patet consequentia, nam vt ait Aristoteles 3. Ethic. cap. 1. *Forum qui per inscitiam agunt, is quem facti pœnitet, inuitus egisse dicitur.*

Tertia denum pars, quæ asserit ignorantiam concomitantem neque causare voluntarium neque inuoluntarium, sed non voluntarium, patet exemplo supra adducto; si aliquis enim ardens hostis necem exoptans, & casu per syluam obambulans, credens interficere feram, occidat inimicum, talis hostis internecio, ex vna parte non est inuoluntaria positivè, cum voluntati occisoris nequaquam re-

pugnet; non est etiam positivè voluntaria, cum voluntarium debeat esse à principio intrinseco cum cognitione, ille verò ignoret ibi latere hostem, unde emissio sagittæ non imperatur nisi à voluntate necandi feram: Ergo talis effectus neque est voluntarius, neque involuntarius, sed solum non voluntarius.

Ex his intelliges, ignorantiam antecedentem excusare à peccato, cum tollat rationem voluntarij, sine qua non potest esse peccatum, consequentem accusare, cum effectus ex illa secutus sit simpliciter volitus; concomitantem verò nec excusare, quia non tollit omnem voluntatem saltem conditionatam peccati, nec accusare de se, quia voluntas non peccat, dum omnem debitam & sufficientem diligentiam adhibet.



C A P V T IV.

De voluntario libero.

Liberum tripliciter dicitur, à servitutē, à coactione, & à necessitate. Non agemus hic de prima vel secunda specie libertatis, sed solum de tertia, quæ libertas arbitrij seu indifferentia appellari solet, de qua egregiè Bernardus serm. 81. in Cantica: *Arbitrij libertas est planè divinum quiddam, præfulgens in anima, tanquam gemma in auro.*

§. I.

Libertas indifferentiæ conuenit homini, non solum in statu naturæ integræ, seu in creatione sua, sed etiam post Adæ lapsum, & in statu naturæ corruptæ.

Vtrumque de fide certum est, nam de homine in primo statu considerato dicitur Gen. 1. *Faciamus hominem ad imaginem & similitudinem nostram*, quod SS. Patres ad libertatem indifferentiæ, quam homo a Deo in creatione accepit, communiter referunt, ut Tertullianus, Irenæus, Damascenus, & alij.

Nec obest quod etiam plures per imaginem Dei in homine intelligant dominium eius super reliquas creaturas. Consequens enim est, ut qui habet aliorum dominium, habeat multo magis & sui. Vnde Tertull. l. 2, contra Marcionem cap. 6. *Quale enim erat ut totius mundi possidens homo, non in primis animi sui possessione regnaret, aliorum dominus, sui famulus.* Et Nouatianus lib. de Trinit. cap. 1. *Cum omnia (inquit) in seruitutem illi dedisset solum liberum esse voluit; nam & liber esse debuerat, ne incongruenter imago Dei seruiret.* Ex quo probata manet secunda pars, cum enim imago Dei non fuerit omnino deleta in nobis per peccatum originale, post lapsum Adami, & in statu naturæ corruptæ, remansit in homine libertas indifferentiæ, licet non tam perfectæ, sicut erat in statu iustitiæ originalis. Vnde Tridentinum sess. 6. can. 3. *Si quis liberum hominis arbitrium, post Adæ pec-*

catum amissum & extinctum esse dixerit, anathema sit.

Dices primò, Augustinus epist. 107. ad vitalem sic ait: *Liberrum arbitrium ad diligendum Deum, primi peccati granditate perdidimus.* Et in Enchir. cap. 30. *Libero arbitrio malè utens homo, & se perdidit, & ipsum:* Ergo censet hominem in statû naturæ lapsæ libero carere arbitrio, in pœnam peccati originalis.

Respondeo Augustinum his locis non intendere per peccatum Adami perditam fuisse naturalem & nativam hominis libertatem, sed facultatem ad bene agendum expeditam, seu completam bene agendi & peccati vitandi possibilitatem; quia illa habetur per gratiam, quam peccato primi parentis perdidimus. Itaque clarè seipsum explicat Augustinus lib. 1. contra duas epistolas Pelagian. cap. 2. his verbis: *Libertas quidem perijt per peccatum, sed illa quæ in paradiso fuit, habendi plenam cum immortalitate iustitiam, propter quod natura humana divina indiget gratia.* Et lib. 2. cap. 15. *Peccato Adæ liberum arbitrium de natura hominum perijisse non dicimus, sed ad peccandum valere in hominibus s. bditus diabolo; ad benè autem pièque vivendum non valere, nisi ipsa voluntas hominis Dei gratia fuerit liberata, & ad omne bonum actionis, cognitionis, sermonis adiuta.*

Dices secundò, D. Augustinus in libro operis imperfecti contra Iulianum, & pluribus alijs in locis, bifrontem indifferentiæ potestatem, quam Iulianus & alij Pelagiani, in libertatem inducebant, acerrimè impugnât, eam-

eamque veluti basim , & fontem ; ac nidum hæresis Pelagianæ reijcit : Ergo talis libertas non potest tribui hominibus in statu naturæ lapsæ, sine hæresi manifesta, & euidenti cum Pelagianus commercio.

Respondeo Augustinum reprobasse libertatem indifferentiæ, quam Iulianus & alij Pelagiani admittebant , quia existimabant voluntatem hominis lapsi esse in perfecto æquilibrio, sicut erat in statu innocentix, & æquè pronam in bonum ac in malum ; subindeque negabant liberum arbitrium per peccatum Adami fuisse attenuatum ac debilitatum , & ratione concupiscentiæ magis propensum ad bonum delectabile contrarium rationi, quam ad bonum honestum & rationi consonum , vt testatur D. Prosper in epistola ad Augustinum, vbi Massiliensium errores referens , ait : *Putant , vt quia præuicator idèò dicitur non obedisse quia noluit, fidelis quoque non dubitetur ob hoc deuotus fuisse, quia voluit; & quantum quisque ad malum, tantum habeat facultatem ad bonum, parique momento animum se ad vitia vel virtutes mouere.*

§. II.

Ad humanorum actuum moralitatem , seu ad meritum & demeritum, non sufficit libertas a coactione , sed requiritur libertas in differentia .

HÆc etiam assertio est certa de fide , & opposita sententia ab Innocentio X. damnata vt hæretica, constatque ex SS. Patribus

bus, qui passim docent sublata libertate indifferentiæ, actus nostros nec præmio, nec pœna, nec laude, nec vituperio dignos esse. Ita Hieronymus lib. 2. contra Iovinianum, ubi sic ait: *Liberi arbitrij nos condidit Deus, nec ad virtutes nec ad vitia necessitate trahimur; alioquin ubi necessitas est, nec damnatio, nec corona est.* Quod dictum refert Augustinus de natura & gratia cap. 5. illudque approbat ut verissimum, certissimum, atque notissimum. Et in lib. de duabus animabus cap. 11. ait quod *Ista cantant & in montibus Pastores, & in Theatris Poetæ, & indocti in circulis, & docti in bibliothecis, & Magistri in Scholis, & Antistites in sacris locis, & in orbe terrarum genus humanum.*

Idem docet D. Thomas quæst. 6. de malo art. vnico his verbis: *Quidam posuerunt quod voluntas hominis ex necessitate se mouet ad aliquid eligendum, nec tamen ponebant quod voluntas cogeretur, non enim omne necessarium est violentum.* De qua sententia continuo sic censet: *Hæc autem opinio est hæretica, tollit enim rationem meriti & demeriti ab actibus humanis.* Et in 2. distinct. 24. qu. 3. art. 3. ait quod *ibi incipit genus moris, ubi primo dominium voluntatis inuenitur: Sed dominium voluntatis est per libertatem indifferentiæ, per quam eius potestate est agere vel non agere, aut agere hoc vel illud, ut docet idem S. Doctor 1. p. quæst. 82. art. 1. ad 3. ubi dicit quod sumus Domini nostrorum actuum, secundum quod possumus hoc vel illud eligere: Ergo libertas indifferentiæ est fundamentum moralitatis, subindeque me-*

riti & demeriti actuum humanorum.

Ratio etiam id suadet, nam actus nostri non alia ratione dicuntur morales, nisi quia subiacent regulis morum, & ab illis regulantur; sicut actio aliqua ex eo artificialis dicitur, quod subditur regulis artis: Sed actus purè spontanei, & à sola coactione immunes, non possunt regulis morum subijci, nec ab eis dirigi & regulari: Ergo nec morales dici. Maior patet, minor verò sic ostenditur. Cùm regula seu lex adhibeatur actionibus, ut eas ab extremis ad medium regulæ deducat, frustra illa adhiberetur actioni quæ non est variabilis secundum medium & extrema, sed suapte natura invariabilis, & ad unum determinata: Atqui actus purè spontanei, & à sola coactione immunes, sunt omnino invariabiles, & ad unum ex sua natura determinati, ut constat in amore beatifico, & in volitione beatitudinis in communi: Ergo illi non possunt subijci regulis morum, nec ab eis dirigi & regulari.

Observandum tamen, quod ut actus sint moraliter boni aut mali, meritorij vel demeritorij, non requiritur necessariò libertas contrarietatis seu specificationis, sed sufficit libertas contradictionis seu exercitij; nam eo ipso quod aliquis actus sit liber quoad exercitium, & indifferens ad hoc ut sit vel non sit, potest cadere sub regulis morum, & per eas dirigi ac determinari. Vnde Christus dum erat viator, exercebat actus meritorios & moraliter bonos, & tamen cùm esset ab intrinseco impeccabilis, non erat in eo libertas contrarietatis ad bonum & malum. Item Angeli in primo instanti beatitudinem meruerunt per actum

a ctum charitatis , qui fuit neceffarius quoad
specificationem, & liber tantum quoad exer-
citiū, cum in illo instanti peccare non po-
tuerint, vt in Tractatu de Angelis ostensum
est .

Obijcies primò : D. Thomas in 2. distinct.
40. quæst. 1. art. 1. ait quod actus sunt in ge-
nere moris, ex hoc quod sunt voluntarij : Sed
actus purè spontanei, vt volitio boni vt sic, &
amor beatificus, sunt voluntarij, cum sint à
principio intrinseco, cum cognitione : Ergo
sunt in genere moris, & gaudent bonitate
moralī. Ratio etiam id suadet, si enim amor
beatificus careret bonitate moralī, careret ali-
qua perfectione quæ conuenit amorī viæ,
subindeque esset minùs perfectus, quod vide-
tur absurdum.

Respondeo quod quando S. Thomas ait
actus esse in genere moris, ex eo quod sunt
voluntarij, vsurpat voluntarium pro libero,
vt frequenter fieri solet, non verò pro spon-
taneo. Vnde actus purè spontanei, vt amor
beatificus, non gaudent bonitate moralī. Nec
propterea amor beatificus est minùs perfectus
amor viæ, quia eadem & maior perfectio ea
quam habet amor viæ, ratione moralitatis, re-
peritur eminenter in amore patriæ, ratione
physicæ entitatis, & determinationis necessa-
riæ ad suum obiectum. Addo quod amor
beatificus non caret absolutè bonitate moralī,
sicut absolutè non caret libertate; quia licet
ad Deum secundum se terminetur necessariò,
ad ipsum tamen vt est in actu exercitio ratio
diligendi creaturas, terminatur liberè, & vt
sic participat moralitatem, vt constabit ex

mox dicendis de amore beatifico Christi.

Obijcies secundò : D. Thomas qu. 19. de verit. art. 6. & in 3. sentent. distinct. 28. qu. 1. art. 2. ad 2. docet actum charitatis, quo Christus Deum diligebat dum esset viator, fuisse meritorium : Ergo censet ad meritum non requiri libertatem à necessitate, sed sufficere libertatem à coactione. Vnde ibidem in resp. ad 5. sic ait: *Etiamsi liberum arbitrium Christi esset determinatum ad vnum numero sicut ad diligendum Deum (quod non facere non potest) tamen per hoc non amittit libertatem, aut rationem laudis sue meriti, quia in illud non coactè, sed sponte tendit, & ita est actus sui dominus.*

Respondeo D. Thomam locis citatis solum velle actum charitatis Christi dum erat in via, fuisse meritorium, non prout respiciebat Deum secundum se, quia vt sic erat necessarius, sed prout terminabatur ad essentiam & bonitatem diuinam, quatenus erat ratio diligendi creaturas, præsertim rationales, pro quibus mori debebat, quia vt sic erat liber quantum ad exercitium.

Sed dices : Ergo perperam assignauit D. Thomas pro ostendenda libertate actus dilectionis in Christo, hanc causalem : *Quia in illum non coactè, sed sponte tendit*, sed debebat dixisse, quia adhuc respectu istius actus vt terminati ad creaturas, habet indifferentiam.

Sed nego consequentiam : licet enim spontaneitas, seu negatio coactionis, non sit ratio formalis fundans in dilectione Christi laudabilitatem & meritum, est tamen ratio permit-
tendi

tendi in eadem dilectione ut terminata ad creaturas, indifferentiam contradictionis, fundantem rationem laudabilitatis & meriti; quia si dilectio beata Christi esset coacta, nullo modo posset esse libera libertate contradictionis, nec consequenter meritoria. Ut ergo D. Thomas saluet, actum dilectionis in Christo, sub aliqua sui consideratione fuisse liberum libertate contradictionis, ac proinde meritorium, recte hanc causalem assignat, *quia in illum non coacte sed sponte tendit*, additque, *et ita est sui actus dominus*: quia, ut dixi, spontaneitas, seu negatio coactionis, est ratio permittendi dominium ac indifferentiam contradictionis, in dilectione Christi beatifica, ut ad creaturas terminata.

§. III.

Indifferentia contradictionis, seu potestas ad agendum vel non agendum est de essentia libertatis, secus vero indifferentia contrarietatis ad bonum et malum.

Prima pars est contra Iansenium, qui lib. 6. de gratia Christi, ferè per totum, conatur ostendere, libertatem simpliciter dictam non importare essentialiter nisi solam immunitatem à coactione, cum luce ac directione rationis; sicque asserit voluntatem esse liberam simpliciter in omnibus actibus in quibus ex directione rationis operatur, quamvis aliqui sint necessarij simpliciter, ut amor beatificus, vel amor quo Deus seipsum diligit,

git, aut quo Spiritus Sanctus producitur.

Nostra tamen assertio communis est apud Theologos, tam domesticos, quam extraneos, & probatur primò ex SS. Patribus, qui propriam libertatis quidditatem explicant per indifferentiam ad contradictoria, & idcirco liberum arbitrium comparant stateræ in æquilibrio positæ, vel cardini in vtramque partem versatili. Ita Basiliius homil. in Psal. 61. ubi sic ait: *Unicuique nostrum intus inest statera quædam à conditore nostro fabricata, per quam rerum naturas possit appendere, bonumque à malo discernere. Quam cogitationem Tertullianus lib. 2. contra Marcionem cap. 6. his verbis expressit: Quasi libripens emancipati à Deo boni libertas, & potestas arbitrij. Similiter Augustinus lib. 3. de libero arbit. cap. 1. docet hominem esse liberum, quia huc atque illuc detorquere potest quendam quasi cardinem voluntatis suæ.*

Probatur secundò ex D. Thoma, qui 1. p. qu. 23. art. 1. probat hominem esse liberi arbitrij, quia *iudicium rationis ad diuersa se habet, & non est determinatum ad unum. Quæ ratio nulla esset, si libertas nostræ voluntatis, in sola spontaneitate seu immunitate à coactione consisteret. Et qu. 19. art. 10. ad 2. ut explicet quomodo Deus sit liber, licet non possit velle malum culpæ, respondet hoc non obesse, quia voluntas diuina ad opposita se habet, in quantum velle potest hoc esse vel non esse. Quibus verbis apertè recurrit ad indifferentiam voluntatis diuinæ, non verò ad spontaneitatem, ut eius libertatem saluet. Item in 2. dist. 25. qu. 1. art. 1. ad 2. Ad libertate*

(inquit) arbitrij pertinet, ut actionem aliquam facere possit vel non facere, & hoc Deo conuenit, bona enim quæ facit potest non facere. Vbi probat indifferentiam, ut saluet libertatem arbitrij: Ergo libertas non solum secundum statum accidentalem quem habet in nobis viatoribus, sed etiam secundum propriam rationem formalem, communem Deo & hominibus, indifferentiam, seu potestatem ad agendum vel non agendum includit, & non in sola spontaneitate, seu ratione perfectè voluntarij, adæquatè consistit.

Probatur tertio: Liberi arbitrij ratio consistit in eo quod actus nostros sub nostra potestate & dominio habeamus, vnde Græci principium liberum *αὐτεξούσιον* appellant, quæ vox significat sui potentem, & dominum actionis suæ: At dominium & potestas supra nostros actus, non dicit solam spontaneitatem & immunitatem à coactione, sed insuper essentialiter requirit indifferentiam & potestatem ad opposita: Ergo & libertas. Maior constat, minor probatur ex D. August. & S. Thoma: Ille enim de spiritu & littera cap. 31. sic ait: *Hoc quisque habere in potestate dicitur, quod si vult facit, si non vult non facit.* Ille verò 1. p. quæst. 82. art. 1. ad 3. *Sumus domini* (inquit) *nostrorum actuum, secundum quod possumus hoc vel illud eligere.* Et 1. contra Gent. cap. 68. *Dominium quod habet voluntas supra suos actus, per quod in eius potestate est velle vel non velle, excludit determinationem virtutis ad vnum, & violentiam causæ exterioris agentis:* Spontaneitas autem seu immunitas à coactione, non excludit determina-

tio.

tionem virtutis ad vnum ; sed tantum violentiam causæ exterius agentis: Ergo dominium & potestas supra nostros actus , non importat solam spontaneitatem, & immunitatem à coactione.

Probatur quartò : Certum est Lutherum & Caluinum , veram homini eripuisse libertatem : Sed illi non negabant voluntatem hominis agere spontaneè, & sine coactione , atque sub luce & regimine rationis; imò hoc ipsum apertè profitetur Calvinus lib. 2. instit. cap. 6. his verbis: *Liberi arbitrij hoc modo dicitur homo quod voluntate agat, non coactione.* Et lib. 2. de libero arbit. *Si coactione (inquit) opponitur libertas, liberum arbitrium & fateor & constanter assenvero, ac pro hæretico habeo quisquis secus sentiat :* Ergo vera hominis libertas in sola spontaneitate seu immunitate à coactione non saluatur, sed etiam indifferentiam seu potestatem ad agendum vel non agendum essentialiter includit.

Demum probari potest eadem pars hoc discursu : Augustinus passim profitetur concordiam libertatis cum gratia efficaci , difficillimam esse, obscurissimam, & paucis intelligibilem : At si vera hominis libertas in sola spontaneitate consisteret, & sola interna coactione violaretur , difficultas illa leuissima ac nulla prorsus esset; cum apud omnes ferè Theologos constet voluntatem nostram non posse à Deo cogi, quantum ad actus ab ea elicitos , vt cap. 2. ostendimus: Vnde libertatis nostræ cum gratia efficaci concordia, non solum manifesta esset, & ab omnibus intelligibilis , sed etiam illorum extremorum discordia impossibilis

esset, & prorsus intelligibilis, quia ut ait Anselmus supra relatus; *Inuitus nemo potest velle aliquid, quia non potest velle nolens velle*: Ergo vera hominis libertas non consistit in sola spontaneitate seu immunitate à coactione, ut contendit Iansenius.

Secunda pars assertionis, quæ dicit indifferentiam contrarietatis ad bonum & malum non pertinere ad essentiam libertatis, sed solum ad statum accidentalem quem habet in nobis viatoribus, nondum clarè videntibus diuinam essentiam, probatur primò ex Augustino lib. 1. operis imperfecti folio 150. vbi reprehendit Iulianum, aliosque Pelagianos, quod libertatis essentiam explicarent per potestatem indifferentiæ circa bonum & malum, seu quæ possit bene & male velle, & ex hoc falso eorum principio contra Iulianum sic argumentatur: *Liberum non est nisi quod duo potest velle, id est bonum & malum. liber ergo Deus non est, qui malum non potest velle, de quo etiam dixisti. Deus nisi iustus esse non potest. Siccine Deum laudas, ut ei auferas libertatem?*

Probatur secundò eadem pars: Indifferentia contrarietatis ad bonum & malum importat potentiam ad peccandum: Sed potentia ad peccandum non pertinet ad essentiam libertatis: Ergo nec indifferentia contrarietatis ad bonum & malum. Maior patet, minor verò probatur, primò ex Anselmo in dialogo de libero arbitrio cap. 1. vbi ait: *Nec libertatis pars est peccandi potestas*. Probatur secundò ex D. Thoma qu. 22. de verit. art. 6. vbi sic habet: *Velle malum, nec est libertas, nec*

pars

pars libertatis, quamuis sit aliquod signum libertatis. Id fufius declarat. 1. p. qu. 62. art. 8. ad 3. vbi sic difcurrit: Liberum arbitrium fic fe habet ad eligendum ea quæ funt ad finem ficut fe habet intellectus, ad conclufiones. Manifestum eft autem quod ad virtutem intellectus pertinet; vt in diuerfas conclufiones procedere poffit fecundum principia data; fed quod in aliquam conclufionem procedat prætermittendo ordinem principiorum, hoc eft ex defectu ipfius. Vnde quod liberum arbitrium diuerfa eligere poffit, feruato ordine finis, hoc pertinet ad perfectionem libertatis eius; fed quod eligat aliquid diuertendo ab ordine finis, hoc pertinet ad defectum libertatis; vnde maior libertas arbitrij eft in Angelis qui peccare non poffunt, quam in nobis qui peccare poffumus. Vbi notanda funt illa verba, libertas arbitrij, illa enim apertè declarant, S. Doctorem non loqui de libertate à peccato, vel à miseria (vt aliqui interpretantur) fed de libertate à neceffitate, hæc enim per libertatem arbitrij intelligitur. Quare falſum eft, & à mente S. Thomæ pænitus alienum, quod ait Petrus à Sancto Ioseph in opusculo quod Diui Thomæ defenfionem appellat difp. 2. fect. 8. nempe viatores eſſe magis liberos, quam beatos, libertate à neceffitate, tametſi beati dicantur magis liberi quam viatores, tum libertate à peccato, tum libertate à miseria. Hoc inquam prorsus à veritate alienum eft, quia cum libertas à neceffitate fit perfectio ſimpliciter ſimplex, & vt ait D. Bernardus ſupra relatus, Diuinum quiddam præfulgens in anima ſicut gemma in auro, ſi via-

tores sint magis liberi libertate à necessitate, quam beati & comprehensores, erunt illis superiores in aliqua perfectione simpliciter simplici, quæ in Deo formaliter reperitur, & quæ creatura intellectualis cætera omnes antecellit. Vnde fures & adulteri, Christum, Beatissimam Virginem, & supremum Angelorum, in aliqua perfectione simpliciter simplici superabunt; quod non solum videtur absurdum, sed etiam piarum aurium offensivum.

Confirmatur: Libertas indifferentiæ est eximia illa ac singularis perfectio, secundum quam homo dicitur ad imaginem Dei conditus, vt §. 1. ex SS. Patribus declaravimus: Sed absurdum est dicere, imaginem Dei perfectiorem esse in viatoribus, quam in beatis, & in peccatoribus, quam in sanctis: Ergo & asserere illos libertate indifferentiæ istis esse liberiores.

Obijcit primò Iansenius contra primam partem nostræ assertionis: Liberi arbitrij ratio in eo consistit, quod actus nostros habeamus in nostra potestate: Sed actus purè spontanei, seu à sola coactione immunes, sunt in nostra potestate: Ergo sunt liberi, atque adeò libertas in sola spontaneitate salvetur. Maior constat ex supra dictis, minorem autem probat Iansenius ex Augustino persæpè asserente, illud esse in nostra potestate, quod cum volumus facimus, vel quod facimus, si volumus, vt patet ex cap. 3. lib. 2. de lib. arbit. vbi ait: *Illud nos habere in potestate dicimur, quod cum volumus facimus.* Sed actus purè spontanei, & à sola coactione immunes, sunt à nobis cum volumus: Ergo sunt in nostra potestate,

Vnde ait Iansenius lib. 6. de gratia Saluat.
cap. 8. versus finem : *In Augustini doctrina paradoxum esse , quod actus aliquis voluntatis propterea liber sit , quia ab illo desistere voluntas , & non agere possit ; quamuis doctrina hac mira Scholasticis , & non medicriter mira videatur.*

Respondeo, concessa maiori , negando minorem, & ad probationem illius ex Augustini autoritate desumptam, dicendum est quod quando Doctor Sanctus ait illud nos habere in potestate, quod cum volumus facimus, hoc debet intelligi de eo quod ita facimus cum volumus, ut oppositum facere & velle possimus, subindeque de actu indifferenti, & non pure spontaneo. Patet hoc ex ipso Augustino de spiritu & littera cap. 31. ubi sic pronunciat : *Hoc quisque in potestate habere dicitur, quod si vult facit, si non vult non facit.* Indeque colligit fidem esse in nostra potestate, quia credimus si volumus, & non credimus si nolumus. Fauet etiam communis & vsitatus modus loquendi : Cum enim dicimur facere aliquid cum volumus ; aut si volumus, subintelligi solet, iuxta communem hominum sensum, & non facere cum volumus, aut si volumus, ita ut sit in nostra potestate velle aut nolle, & facere aut non facere, prout libet. Neque enim de his quæ necessariò fiunt, talis locutionis modus vsurpatur : v. g. Beati qui necessariò Deum diligunt, non dicunt de se ipsis, diligimus Deum cum volumus, aut si volumus, neque de illis quisquam sic ait : Sancti Deum videntes illum diligunt si volunt, aut cum volunt. Item dicimus Deum posse

creare alterum mundum si velit, quia id potest velle, sed non dicimus, Patrem & Filium posse producere Spiritum Sanctum, si volunt, aut cum volunt, quia nimirum iste modus loquendi significat potestatem ad oppositum, quæ in prædictis exemplis deest.

Falsum etiam est quod subdit Iansenius, nimirum in doctrina Augustini paradoxum inauditum esse, quod actus aliquis voluntatis propterea sit liber, quia ab illo desistere voluntas & non agere possit; nam præter testimonia supra adducta, idem S. Doctor cap. 2. libri de gratia & libero arbitrio, quem pro concilianda libertate cum gratia edidit, relatis his scripturæ verbis: *Apposuit tibi ignem & aquam, ad quodcumque volueris extende manû tuâ. In conspectu hominis vita & mors, quodcumque placuerit, dabitur ei*, subiungit exclamando: *Ecce apertissimè videmus expressum liberum humanæ mentis arbitrium*: Illis scilicet verbis, quæ manifeste sonant libertatem indifferentiæ circa bonum & malum. Ex quo patet alienam esse non solum à mente Augustini, sed etiam à Scripturâ sacra, Aduersariorum sententiam, quæ libertatis essentiam in sola spontaneitate, seu immunitate à coactione constituit. Vnde ad illos verba illa Augustini lib. 3. contra Iulianum cap. 3. meritò dirigere possumus: *Mira sunt quæ dicitis, noua sunt quæ dicitis, falsa sunt quæ dicitis: mira stupemus, noua cauemus, falsa conuincimus*.

Obijcit secundò Iansenius plura Augustini & aliorum SS. Patrum testimonia, quibus asserunt solam coactionem officere libertati, vel

libertatis essentiam definiunt aut describunt per solam immunitatem à coactione. In primis enim Augustinus lib. 3. de libero arbit. cap. 4. ait homines iustè puniri quos Deus prævidet peccaturos, *quia Deus præscientia sua non cogit facienda quæ futura sunt*. Et lib. de duabus animabus cap. 10. liberam voluntatem definit *animi motum cogente nullo*. Item D. Bernardus lib. de gratia & libero arbitrio consensum liberum dicit esse illum, *qui non cogitur, non extorquetur*. Et Magister in 2. dist. 25. docet, *liberum dici arbitrium, quia sine coactione & necessitate potest appetere*. Demum S. Thomas eadem distinct. qu. 1. art. 4. ait: *Librum arbitrium dicitur ex eo quod cogi non potest*.

Respondeo quod quando S. Augustinus ait homines iustè puniri quos Deus prævidet peccaturos, *quia Deus præscientia sua non cogit facienda quæ futura sunt*, non intelligit strictam illam & rigorosam violentiam, de qua loquuntur Philosophi, & Theologi, sed nomen illud usurpat pro simplici necessitate, & docere intendit, nullam à Dei præscientia voluntatibus nostris inferri necessitatem, quæ à peccato excuset. Similiter cum definit liberam voluntatem, *animi motum cogente nullo*, coactionem non sumit strictè pro violentia propriè dicta, quæ repugnat actibus à voluntate elicitis, sed latè pro necessitate antecedente. Quo sensu etiam D. Bernardus, Magister sententiarum, & S. Thomas intelligendi sunt. Quod verò hæc interpretatio sit legitima, constat primò ex Augustino disp. 1. contra Fortunatum Manichæum, ubi illum sic

affatur. *Quomodo habemus peccata, si naturā contraria nos cogit facere quod facimus? Qui enim cogitur necessitate aliquid facere, non peccat.* Et disp. 2. docet quod Manichæi affirmabant, *animam à contraria natura cogi delinquere*: Id est, ex ipsius interpretatione, ita pellici ad peccandum, *ut resistendi potestas nulla sit.* Constat secundò ex D. Thoma, qui in eodem sensu nomen coactionis usurpat in 2. dist. 25. q. 1. a. 2. dum dicit intellectum vi demonstrationis cogi, id est necessitari ad assentiendum. Et opusc. 3. cap. 10. in fine sic ait: *Est autem hic modus naturalis homini, ut liberè agat, non coactus, quia rationales potestates ad opposita se habent.* Item 1. p. qu. 82. art. 1. in corp. *Necessitas coactionis (inquit) est illa quæ convenit alicui ex agente, sicut cum aliquis cogitur ab aliquo agente, ita ut non possit contrarium agere.* Quibus locis S. Doctor manifestè coactionem pro necessitate usurpat.

Obijeies tertio: D. Thomas 1. p. qu. 82. art. 1. ad 1. ait quod *necessitas naturalis non aufert libertatem voluntatis.* Idem docet qu. 10. de potentia art. 2. ad 5. ex quo ibidem infert, Deum liberè seipsum diligere, & Patrem liberè producere Spiritum Sanctum: Ergo censet necessitatem non repugnare libertati voluntatis, sed duntaxat coactionem.

Respondeo duplicem in nobis distinguendam esse libertatem, vnam complacentiæ, seu spontaneitatis, & libentiæ, quæ est libertas improprie dicta, & secundum quid; dum enim quælibet res sponte in bonum sibi conaturaliter conveniens fertur, v. g. dum aqua sponte & sine vllò prorsus impedimento fluit,

di-

dicatur liberè fluere: Alteram propriè dictam, quæ libertas arbitrij nominatur, & indifferentiam iudicij ac electionem voluntatis importat. Quando ergo S. Thomas docet quod necessitas naturalis non repugnat libertati, quod Deus liberè seipsum diligit, & quod Spiritus Sanctus liberè à Patre procedit, loquitur de prima libertate, non de secunda, quam expressè docet non solam coactionem violentam, sed etiam necessitatem prorsus excludere, vt constat 1. contra Gent. cap. 68. vbi expressis terminis ait: *Dominium quod habet voluntas supra suos actus, per quod in eius potestate est velle vel non velle, excludit determinationem virtutis ad vnum, & violentiam causæ exterius agentis.*

Dices, D. Thomas in 2. distinct. 25. art. 1. ad 4. ait beatos habere liberam electionem circa visionem & amorem Dei: Ergo non solum libertatem spontaneitatis seu libentia, sed etiam libertatem arbitrij admittit in ordine ad actus necessarios, quales sunt clara Dei visio, & amor beatificus.

Respondeo D. Thomam tibi non loqui de visione & amore, prout terminantur ad Deum secundum se, sed prout terminantur ad diuinam essentiam, in quantum est ratio videndi vel amandi has vel illas creaturas, quæ cum Deo non habent necessariam habitudinem; sic enim cadunt sub libera electione beatorum, cum sub hac ratione non afferant bonitatem quæ necessariò rapiat voluntatem illorum.

Obijcies quartò contra secundam partem assertionis; Scriptura sacra Eccli. 15. explicat libertatem hominis per potestatem exten-

dendi manum ad bonum & malum : Ergo indifferentia contrarietatis ad bonum & ad malum est de ratione libertatis.

Respondeo, concessio Antedente, distinguendo consequens : est de ratione libertatis, quantum ad eius essentiam & quidditatem, nego : Quantum ad statum accidentalem quem habet in nobis viatoribus, non confirmatis in gratia, concedo. Solutio patet ex supra dictis.

§. IV.

Non est de ratione agentis liberi, ut positis omnibus natura & causalitate ad agendum praequisitis, possit non agere in sensu composito.

Probatur primò ratione fundamentali: Ea quæ secundum ordinem naturæ tantum prærequiruntur ad agendum, sunt simul cum actu (prioritas enim naturæ est solum prioritas causalitatis & instantis à quo, non verò prioritas temporis & instantis in quo) unde quia quod est, quando est necesse est esse, impossibile est quod positis omnibus natura præquisitis in agente libero ut operetur, possit non agere in sensu composito, seu negationem actionis cum illis componere, aliàs posset non actum cum actu, & formam cum eius negatione coniungere.

Confirmatur : Illa quæ prioritate solum naturæ & causalitatis operationem antecedunt, constituunt agens liberum in ratione principij actualis operationis, unde sicut
 pri-

principium actuale operationis non potest cum eius negatione componi, ita nec illa quæ proprietate solùm naturæ operationem agentis liberi antecedunt.

Probatur secundò: Vnum ex prærequisitis vt Deus operetur ad extra, est æternum decretum de illo opere, v. g. de creatione mundi: Sed posito tali decreto, Deus non potest non agere in sensu composito, id est non potest componere suum decretum de creatione mundi, cum non creatione illius (quia id implicat ob ipsius immutabilitatem) & nihilominus Deus liberrimè creauit mundum: Ergo non est necessarium ad saluandam libertatem, quod positis omnibus natura & causalitate ad agendum prærequisitis, possit quis non agere in sensu composito.

Confirmatur: In sententia Suarez, Vasquez, & aliorum Recentiorum, gratia congrua est de prærequisitis ad agendum, & tamen illa non potest componi cum dissensu, vel cum negatione actionis; alioquin falleretur diuina præscientia, quæ præiudicet hominem in his occasionibus, & circumstantijs infallibiliter censurum, & eadem gratia simul esset congrua & incongrua, quod implicat contradictionem. Item prædestinatio, donum perseuerantiæ, & confirmationis in gratia, libertatem non destruunt, & tamen non possunt cum peccato & damnatione componi. Nam vt ait D. Thomas qu. 23. de verit. art. 5. ad 3. *Non enim ista sunt impossibilia: Deus vult istum saluari, & iste potest damnari; sed ista sunt impossibilia, Deus vult istum saluari & iste damnatur.* Idem de dono perseuerantiæ docet

cer Augustin. in lib. de corrept. & gratia cap. 12. ubi ait illud donum esse tale, ut non solum sine illo perseverantes esse non possint, verum etiā ut per hoc donū non nisi perseverantes sint. Quod idem est ac cum tali dono non perseverantiam non posse componi. Vnde Petavius tom. 1. lib. 9. cap. 7. Illud quod per Christi merita tribuitur donum, non solum dat posse si velint, sed etiam velle quod possunt, & est tale ut eo dato non nisi perseverantes sint, id est ut certo, & quod in scholis dicitur, infallibiliter perseverant, tametsi liberè gratiæ illi donoque consentiant, non necessario, sed ita ut dissentire possint, quod Tridentina sciscit. Synodus, quamvis ut non dissentire velint, eodem illo perseverantiæ dono perficitur. Ergo non est de ratione liberi arbitrij, ut positis omnibus ad agendum prærequisitis, prioritare naturæ & causalitatis, possit non agere in sensu composito, seu negationem actionis cum illis componere.

Obijcies primò: Cū Philosophi dicunt, illud esse liberum agens quod positis prærequisitis omnibus ad agendum, potest agere & non agere, utrumque sine dubio eodem modo v surpant, & eodem modo posse putant: Ergo si agens liberum positis omnibus prærequisitis ad agendum, possit agere in sensu composito, poterit etiam eodem modo non agere.

Respondeo Antecedens esse verum, si intelligatur de prærequisitis ad agendum, prioritare durationis, & instantis in quo, non verò si intelligatur de prærequisitis, prioritare duntaxat causalitatis & instantis à quo, quia cū illa (ut supra dicebamus) constituent

agens

agens liberum in ratione principij actualis operationis, illis positis, agens liberum propriè loquendo non potest agere, sed de facto agit, retinendo tamen potentiam ad non agendum, seu ad non continuandum actionem quam elicit.

Obijcies secundò cum P. Iacobo Platel Societatis Iesu, in Synopsi cursus Theologici, tomo 2. num. 23. Tridentinum sess. 6. explicans concordiam libertatis cum gratia, cap. 5. docet hominem posse abijcere inspirationem, qua ad iustificationem perducitur. Et can. 4. definit liberum arbitrium, à Deo motum & excitatum, posse dissentire, si velit. Quæ verba abijcere, dissentire, apertè indicant sensum compositum; cum abijcere sit rem habitam dimittere, aut sibi oblatam respuere; dissentire verò non sit quomocumque non consentire, aut non consentire excitationi non existenti, sed excitationi de facto existenti non consentire, seu cum illa existente dissensum aut non consensum coniungere. Quod etiam apertius indicat Concilium Senonense in decreto fidei 15. dicens: *Non est tale Dei trahentis auxilium cui resisti non possit.* Et S. Thomas quodlib. 1. artic. 7. ad 2. ubi sic ait: *Propter hoc quod virtus rationalis se habet ad opposita, ideo sic monet Deus mentem humanam ad bonum, quod tamen potest huic motioni resistere.* Adde quod si istæ Conciliorum definitiones, non intelligerentur in sensu composito, non repugnarent erroribus Lutheri, Caluini, aliorumque libertatis hostium, quos clarum est ista non negasse in sen-

„ sensu diuiso , cum non fuerint tam stupidi ,
 „ vt senserint hominem , præcisè quantum est
 „ ex parte voluntatis , & indifferentiæ iudicij ,
 „ non posse actum diuinæ excitationi opposi-
 „ tum exercere absolutè , & non supposita ex-
 „ citationis existentia . Deinde eundem sen-
 „ sum conuincit hæc ratio , quod nempe ad
 „ perfectam libertatem indifferentiæ (quæ-
 „ lem conuenire homini lapsò constat) requi-
 „ ratur potentia proxima & expedita ad
 „ vtrumlibet , vi cuius homo dicatur simplici-
 „ ter posse vtrumlibet , & habere ita plenum
 „ sui actus dominium , vt vltimatè solum oria-
 „ tur ex propria eius determinatione , quod
 „ ponatur vel non ponatur . Iam verò ad hu-
 „ iusmodi potentiam necessarium est , vt ho-
 „ mo cum omnibus prærequisitis absolutè an-
 „ tecedentibus , seu quæ habere vel non habe-
 „ re non est in eius potestate , æquè possit
 „ actum ac non actum componere ; alioquin
 „ enim omnes aut ferè omnes nostri actus ne-
 „ cessarij , nobis essent liberi , vt consideranti
 „ facile patebit .

Respondeo Tridentinum , dum ait sess. 6.
 cap. 5. hominem posse abijcere diuinam illu-
 minationem & inspirationem , loqui de gratia
 moraliter excitante , quæ cum se reneat ex par-
 te actus primi , & non sit de prærequisitis ad
 agendum prioritate tantum naturæ & causali-
 tatis , vt gratia physicè præmonens , potest co-
 nungi & componi cum dissensu , Eodem mo-
 do aliqui interpretantur alium locum desum-
 ptum ex canone 4. eiusdem sessionis , talique
 interpretationi fauere videntur hæc verba im-
 mediatè præcedentia : *Si quis dixerit , liberum*

arbitrium à Deo motum & excitatum nihil cooperari assentiendo Deo excitanti atque vocanti, &c. quæ verba gratiam vecantem & moraliter solum excitantem significant. Vnde quando postea subditur, *liberum arbitrium posse dissentire si velit*, hoc ad eandem gratiam excitantem atque vocantem referendum esse existimant. Hæc solutio videtur prebabilis, stando in verbis & textu illius Canonis. Sed quia Plures Theologi censent, intentum Concilij in illo Canone fuisse prescribere errores Lutheri & Caluini, qui negabant voluntatem liberè cooperari diuinæ gratiæ, eamque sub motione Dei efficaci retinere potentiam ad dissensum, verosimilius & probabilius est, Concilium ibi loqui de motione Dei efficaci, ac definire liberum arbitrium, vt subest tali motioni, retinere dissentendi potentiam, non in sensu composito, sed diuiso: hoc enim sufficit ad illius intentum, & ad proscribendum errores Lutheri & Caluini, qui, vt infra ostendemus, in voluntate mota a Deo auxilio efficaci, absolutam dissentendi potentiam negabant. Nec obstat quod Concilium vtatur verbo *dissentire*, quod sensum compositum indicare videtur, illud enim explicandum est de dissensu materialiter & specificatiuè sumpto, prout significat actum contrarium illi ad quem, Deus mouet, non verò de dissensu reduplicatiuè & formaliter accepto, prout dicit sensum compositum resistentiæ cum gratia seu motione Dei efficaci.

Ad Concilium Senonense (præterquam quod illud à Sede Apostolica non fuit confirmatum, nec approbatum) facilè responde-

tur

tur, verba illa, *non esse tale Dei trahentis auxilium, cui resisti non possit*, vel intelligenda esse de auxilio sufficienti, & moraliter excitanti, vel explicanda esse de potentia resistenti seu dissentienti in sensu diuiso. Eodem modo intelligendus est & explicandus Sanctus Thomas, dum ait quodlib. 1. quod *sic Deus mouet mentem humanam ad bonum, quod tamen potest huic motioni resistere*. Nam idem S. Doctor pluribus in locis in Tractatu de voluntate Dei relatis, præsertim 1. 2. quæst. 10. artic. 4. ad 3. expressè docet, hominem non posse motioni Dei efficaci in sensu composito resistere seu dissentire, sic enim ait: *Si Deus mouet voluntatem ad aliquid, impossibile est poni quod voluntas ad illud non moveatur, non tamen est impossibile simpliciter*.

Illud verò quod subdit præfatus Author, nempe quod si prædicta Tridentini definitio non intelligeretur in sensu composito, non repugnaret errori Lutheri & Caluini, leue ac friuolum est, & veritati manifestè repugnans: cum enim illi hæretici doceant, diuinà decreta & auxilia ita esse efficacia, vt indifferentiam omnem humanæ voluntatis absorbeant, solamque spontaneitatem, seu immunitatem à coactione, in ea relinquant, euident est, eos non posse admittere, consequenter ad illud principium, in voluntate efficaciter à Deo mota potentiam dissentienti in sensu diuiso, quæ cum sola spontaneitate seu immunitate à coactione stare non potest; vnde hoc ipso quod Tridentinum citato canone definit, in voluntate mota remanere talem dissentienti potentiam, illorum hæreticorum errorem


pror-

prorsus eliminat, & concordiam libertatis cum gratia efficaci firmat & statuit.

Nec valet quod addit idem Author, nempe Lutherum & Calvinum non fuisse adeò stultos, ut senserint hominem, præcisè quantum est ex parte voluntatis, & indifferentiæ iudicij, non posse actum diuinæ excitationi oppositum exercere absolutè, & non supposita excitationis existentiam. Non valet, inquam, tum quia, ut dicebamus, illi existimabant efficaciam diuinæ motionis absorbere, & consumere omnem voluntatis indifferentiam, subindeque in ea non relinquere dissentiendi potentiam. Tum etiam, quia licèt admiserint, sublata gratia efficaci, & ut loquitur Aduersarius, *non supposita excitationis existentia*, voluntatem habere dissentiendi potentiam; inde tamen malè infert, eos non negasse potentiam dissentiendi in sensu diuiso, qualem admittunt Thomistæ; hæc enim non consistit in eo quod voluntas sublata gratia & motione Dei possit non agere, non verò quandiu illa stat in voluntate remanet, ut imaginatur & supponit ille Recentior, cum alijs eiusdem Societatis Theologis; hic enim sensus compositus & diuisus, planè Calvinisticus est, non verò Thomisticus, teste Aluare lib. 2. resp. cap. 1. num. 34. ubi sic ait: *Sensus compositus non est ille qui in argumento insinuatur, quod videlicet quando gratia efficax est in voluntate non possit voluntas non agere, hic enim sensus confictus fuit à Caluino*. Idem testatur P. Annatus in libro de libertate incoacta pagina 226. his verbis: *Quem inuenient Ianseniani inter Thomistas, qui dixerit voluntatem diuinæ gra-*

gratia prædeterminatam, carere proxima ad dissentiendum potentia? Quem dabunt qui distinctionem sensus compositi & diuisi sic interpretetur, ut sensus sit; voluntatem à Deo motam posse dissentire, quando illa motio abierit, & aduenerit alia?

Demum ad rationem respondetur, quod licet ad perfectam libertatem indifferentiæ requiratur quod liberum arbitrium habeat sui actus dominium, & oriatur ex propria eius determinatione quod ponatur vel non ponatur; quia tamen tale dominium non est supremum, sed subditum ac subordinatum dominio primi liberi, & primi determinantis, nunquam ponitur, nec poni potest liberi arbitrii determinatio, nisi prius natura voluntas sub indifferentia obiectiua iudicii, quæ est proxima radix libertatis, moueatur & applicetur à Deo ad volendum & se determinandum. Nec ad libertatem arbitrii necesse est (ut ait Adversarius) quod homo cum omnibus prærequisitis absolutè antecedentibus, æquè possit actum ac non actum componere; alioquin, cum prærequisita ad agendum prioritate solum naturæ & causalitatis, sint simul cum actu (utpote applicatio ad ipsum, & veluti quædam illius inchoatio) ad libertatem requireretur, quod voluntas posset simul ponere actum & non actum, seu negationem actus cum eius existentia & positione coniungere, quod manifestam implicat contradictionem.



TRACTATVS III.


DE

ACTIBVS

HVMANIS.

EXplicata conditione generali actuum humanorum, nempe ratione voluntarij, & liberi, quæ est fundamentum, moralitatis ipsorum, consequens est vt de illis, tam in esse physico, quam in esse moris, consideratis, breuiter differamus. Illi verò ad octo præcipuos reduci possunt, quorum aliqui respiciunt finem, alij circa media versantur. Primus est simplex volitio, quæ respicit finem præcisè secundum se, appetitu inefficaci, & simplicis complacentiæ. Secundus dicitur intentio, quia per illum voluntas tendit in finem, vt per media obtinendum. Tertius consilium, quod non solum importat inquisitionem mediorum, sed etiam iudicium seu sententiam, qua vnum cæteris esse præferendum iudicatur. Quartus consensus, quo voluntas complacet sibi de medijs inuentis, & approbat illa. Quintus electio, qua voluntas acce-

acceptat vnum præ alijs. Sextus imperium, quo intellectus cum motione quadam à præcedenti electione participata, intimat voluntati executionem mediorum. Septimus vsus, quo voluntas applicat potentias exequentes ad opus. Octauus est ipsius finis affectio, ex qua resultat quies seu delectatio, quæ fruitio appellatur. De his ergo octo actibus in hoc tractatu breuiter agendum est, incipiendo ab illis qui sunt circa finem, & progrediendo ad alios qui circa media versantur.



C A P V T I.

De simplici volitione finis.

Circa hunc actum nulla ferè est difficultas vel controuersia inter Theologos, constat enim ex iam dictis, illum appellari finem licet volitionem, eò quod habeat obiectum omnino simplex, nempe finem sumptum præcisè secundum se; cum alij posteriores, vel respiciant finem in ordine ad media, vt intentio, vel media cum respectu ad finem, sicut electio, consensus, & vsus atque ita non habent obiectum simplex, sed aliquo modo duplicatum.

Constat etiam hoc esse discrimen inter voluntatem sumptam pro potentia volitiua, & pro primo eius actu, qui est simplex volitio; quod in prima acceptione habet pro obiecto adæquato bonum vt sic, abstrahens à bono finis & medij, in secunda verò respicit solum finem


finem vt obiectum adequatum . Vnde S. Thomas hic qu. 8. art. 2. *Si loquamur de voluntate secundum quod nominat potentiam , sic se extendit ad finem & ad ea quæ sunt ad finem. Si autem loquamur de voluntate secundum quod nominat actum, sic propriè loquendo est finis tantum .* Quia nimirum voluntas, vt nominat actum, & simplicem volitionem significat , fertur in id tantum quod est obiectum per se potentiæ , vnde quia obiectum per se voluntatis est finis tantum (nam ea quæ sunt ad finem non sunt bona vel volita propter se ipsa, sed solum ex ordine ad finem) simplex volitio respicit solum finem, non verò media. Sicut primus actus potentiæ intellectiue, qui dicitur intelligentia , non respicit conclusiones, sed prima principia . Vnde Philosophus 3. Ethic. cap. 2. *Voluntas est finis, electio autem eorum quæ sunt ad finem .* Quæ verba exponens D. Thomas articulo citato ad 1. ait quod ibi Philosophus loquitur de voluntate secundum quod propriè nominat simplicem actum voluntatis , non secundum quod nominat potentiam.

Tertiò constat apud omnes ferè Theologos & Philosophos, exceptis Nominalibus , obiectum voluntatis, aut simplicis volitionis , esse solum bonum, vt abstrahit à vero vel apparenti, subindeque voluntatem non posse ferri in malum, sub ratione mali . Rationem assignat D. Thomas hic art. 1. quoniam appetitus siue appetitio nihil aliud est quam inclinatio quædam appetentis in aliquid : nihil autem inclinatur nisi in aliquid sibi simile , aut aliquo modo conueniens ; hoc autem est bonum: Er-

go nemo appetit nisi bonum, verum, vel appetens. Vnde Dionysius cap. 4. de diuin. nomin. *Nemo intendens ad malum operatur*. Et Aristoteles 1. Ethic. cap. 1. *Omnis ars, omnisque doctrina, & electio bonum appetere videntur*. Qua de causa bene antiqui dixerunt, *Bonum est quod omnia appetunt*. Cum ergo aliquis vult malum inimico, apprehendit illud vt sibi bonum, & similiter dolet de bono ipsius tanquam sibi malo. Similiter quando damnati appetunt non esse, illud appetunt vt conducent ad carentiam mali, seu ad liberationem à miseria & poena, sub qua consideratione habet aliquam rationem boni; nam vt ex Aristotele docet D. Thomas hic art. 1. ad 3. *Carere malo habet rationem boni*. Addo quod, cum beatitudo duo includat, vnum positium, scilicet esse cumulum omnium bonorum, & aliud priuatiuum, nempe carere omni miseria, potest appeti duobus modis, primò per modum prosecutionis boni, & hoc contingit quando aliquis appetit possidere aut obtinere positiuè aliquod bonum, secundò per modum remotionis mali, sicut quando aliquis desiderat carere aliqua miseria, & hoc secundo modo ipsi damnati & miseri, dum appetunt non esse, quarunt beatitudinem, quatenus tunc optant carere omni miseria.

Dices, Voluntas est libera libertate contrarietatis circa bonum & malum: Ergo potest indifferenter velle bonum & malum. Respondeo quod licet voluntas sit libera libertate contrarietatis in ordine ad quodcumque bonum & malum particulare & limitatum, subindeque possit indifferenter illud velle vel nolle,

nolle, non tamen circa bonum & malum ut sic sed est determinata ab Authore naturæ ad amandum bonum ut sic, & ad odiendum malum ut sic: Quare ad libertatem voluntatis non requiritur quod per actum prosecutionis possit ferri in malum sub ratione mali, sed sufficit quod possit velle malum sub ratione boni. Vnde Augustinus in Enchir. cap. 105. *Nec enim culpanda est voluntas, nec dicendum, aut voluntas non est, aut libera non est, quia beati esse sic volumus, ut esse miseri non solum nolumus, sed nequaquam prorsus velle possumus.*



CAPUT II.

De motu voluntatis.

Multa sunt voluntatis motiua. Primum est voluntas ipsa quæ seipsam efficienter mouet de potentia ad actum. Secundum est intellectus, qui illam mouet per obiecti propositionem. Tertium est appetitus sensitivus, qui propter connexionem & sympathiam cum rationali, sæpe illum inclinat ad idem obiectum. Quartum est Deus, qui per modum extrinseci principij, illam efficienter mouet ad omnes suos actus. Circa hæc motiua triplex est difficultas breuiter hic resoluenta. Prima est, quomodo intellectus per propositionem obiecti moueat voluntatem, an in genere causæ efficientis, vel solum finalis aut formalis extrinsecæ? Secunda an in prima

volitione finis voluntas seipsam moueat, vel ad illam à Deo specialiter moueatur & applicetur? Tertia, an voluntas non solum moraliter, sed etiam physice, moueatur à Deo?

§. I.

Resolvitur prima difficultas.

Dico primò, obiectum apprehensum, seu intellectus per apprehensionem obiecti mouet voluntatem in genere causæ finalis, & formalis extrinsecæ, non tamen efficienter, seu per modum principij quo actui.

Prima pars patet, obiectum enim propositum mouet voluntatem, in quantum est bonum: Ergo in eo genere causæ mouet in quo bonitas potest mouere: Bonitas autem mouet in genere causæ finalis, alliciendo appetitum ad sui amorem & desiderium: Ergo & obiectum apprehensum.

Secunda pariter euidentis est, cum enim voluntas ex se sit indifferens & indeterminata ad eliciendum actum huius speciei, v. g. actum amoris, vel odij, fugæ, vel desiderij, vt hunc potius quam illum producat, indiget aliqua forma, qua extrinsecè determinetur: Sed talis forma extrinseca nulla alia esse potest, quam obiectum propositum ab intellectu: Ergo obiectum cognitum mouet & determinat voluntatem in genere causæ formalis extrinsecæ. Vnde D. Thomas infra qu. 18. art. 2. ad 2. ait: *Obiectum habet quodammodo rationem formæ, in quantum dat speciem.*

Tertia verò pars, quam negant Caietanus,
Con-

Conradus, Medina, & alij ex nostris Thomistis, probatur ratione fundamentali. Principium quo, seu ratio agendi, est intrinseca potentia quæ operatur, cum illam constituat intrinsecè potentem ad agendum, nam species impressa v. g. quæ est principium quo intellectiōis, constituens intellectum in actu primo completè potentem ad intelligendum, in ipso recipitur: Atqui obiectum cognitum non afficit intrinsecè voluntatem, nec in ea recipitur: Ergo non potest concurrere per modum principij quo actui ad volitionem.

Nec valet communis responsio Aduersariorum, qui dicunt non requiri necessariò formam & rationem agendi esse intrinsecam potentia, eique inhaerentem, sed sufficere quod sit in eadem essentia animæ. Non solum enim principium radicale & remotum debet intrinsecè compleri, sed etiam proximum, quando est impotens & incompletum in actu primo; vnde non solum gratia habitualis ponitur in essentia animæ, sed etiam habitus supernaturales in intellectu & voluntate, vt possint elicere actus supernaturales: Ergo si voluntas non sit ex se sufficienter potens & in actu primo quoad specificationem suorum actuum, vt dicunt Aduersarij, non poterit per obiectum tanquam per rationem agendi intrinsecè compleri, & in actu constitui.

Confirmatur: Quod est impotens non potest fieri potens, nisi intrinsecè mutetur, quia denominatio potentis est intrinseca, vnde necessariò debet peti à forma intrinseca. Ex quod principio probant Thomistæ necessitatem præmotionis physicae ad operandum, lu-

minis gloriæ ad videndum Deum , motionis in instrumēto ad effectum causæ principalis procedendum : Ergo si voluntas de se sit impotens ad attingendam rationem specificam suarum operationum , vt fiat intrinsecè potens , debet intrinsecè mutari , & per consequens illud quod est illi ratio agendi , debet illi esse intrinsecum , & in ea immediatè recipi , & non solum remotè & mediatè.

Potest etiam probari eadem pars hoc discursu : Illud est ratio agendi cui terminus per actionem productus assimilatur : Sed terminus productus per volitionem non assimilatur obiecto , sed magis ipsi voluntati , cum nihil aliud sit quam impulsus & inclinatio actualis in obiectum , sicut voluntas est inclinatio in actu primo : Ergo obiectum non est ratio agendi respectu voluntatis , sed solum respectu intellectus , cum terminus productus per intellectionem , scilicet verbum , assimiletur obiecto , & sit eius similitudo formalis.

Obijcies primò : Verbum in diuinis influit actiuè in amorem , producit enim Spiritum Sanctum vna cum Patre , vnde S. Thomas 1. p. qu. 43. art. 5. ad 2. *Filius est Verbum, non qualecumque, sed Verbum spirans amorem* : Ergo etiam in creatis Verbum seu conceptio intellectus , actiuè in amorem & volitionem influit , saltem vt principium quo . Consequentia probatur : Verbum Diuinum differt à creato solum in hoc quod diuinum est per se subsistens , creatum verò est accidens : At subsistentia addita causæ non variat genus causalitatis , quamuis variet causandi modum ; nam si calor subsisteret sine limitatiuo , nihilominus

ominus actiue calefaceret, sicut modò, quamuis tunc operaretur vt quod, ex eo quod esset subsistens, nunc verò solum sit agens vt quo: Ergo si Verbum in diuinis actiue influat vt principium quod in amorem, debet etiam in creatis effectiue in eum influere, saltem vt principium quo.

Respondeo, concesso Antecedente, negando consequentiam & paritatem. Tum quia Verbum Diuinum, ex eo quod per se subsistat, habet ordinem originis cum Spiritu Sancto, quem non haberet, nisi esset principium productiuum illius: verbum autem creatum non habet hunc ordinem cum amore. Tum etiam, quia Verbum Diuinum, cum sit infinitum, & increatum, ac Patri consubstantialiale, habet eandem voluntatem, & per consequens eandem virtutem spiratiuam quam Pater, quod non conuenit amorì creato & finito; & ideò non mirum, si illud sit productiuum amoris, non verò istud. Vnde ad probationem consequentiæ dicendum est, quod licet subsistentia vt sic non variet genus causandi vel influendi, bene tamen subsistentia, quatenus est diuina & infinita; nam sicut facit Verbum Diuinum esse personam Patri coæqualem & consubstantialalem, ita facit vt vna cum illo actiue producat amorem personalem.

Obijciunt secundo Aduersarij, & hæc est ratio fundamentalis ipsorum: Quamuis voluntas sit sufficienter in actu, quoad exercitium sui actus, quia ipsa est principium mouens quoad exercitium, non est tamen ex se sufficienter in actu quoad specificationem sui actus; alioquin omnes actus ipsius essent

eiusdem speciei, sicut ipsa unus est naturæ, eo proportionali modo quo omnes actus caloris sunt eiusdem speciei, quia calor ex se est determinatus quoad speciem suæ actionis; unde oportet quod detur aliud principium quod cum ipsa voluntate causet specificationem actus: hoc autem non potest esse aliud quam ipsum obiectum ut actu intellectum, siue ut existens in intellectu in ratione termini intellectiōis: Ergo illud actiue ad specificationem actuum voluntatis concurrit. Vnde Commentator 3. de anima ait quod balneum intra animam est *agens desiderium*, & D. Thomas intra quæst. 22. art. 3. ad 2. dicit, *obiectum appetitus intellectiui esse magis actiuum, quam obiectum appetitus sensitiui*.

Respondeo, negando Antecedens, voluntas enim habet vim completam nedum ad substantiam suorum actuum, sed etiam ad rationem specificam illorum, vel ex se, vel ex habitibus aut donis illi superadditis, tam in ordine naturali, quam supernaturali; & ideo ex parte obiecti, seu intellectus proponentis obiectum, non requiritur actiuus influxus, sed solum finalis, obiectiuus, & formalis extrinsecus. Vnde D. Thomas 1. part. qu. 27. art. 4. sic ait: *Hæc est differentia inter intellectum & voluntatem, quod intellectus fit in actu per hoc quod res intellecta est in intellectu secundum suam similitudinem; voluntas autem fit in actu, non per hoc quod aliqua similitudo voliti fit in voluntate, sed ex hoc quod voluntas habet quandam inclinationem in rem volitam*. Quibus verbis apertè declarat, quod cum cognitio fiat per assimilationem potentia cum obiecto.

objecto, & sit veluti quidam partus intellectualis, ex objecto, & potentia, vt ex viro & foemina procedens, debet actiue procedere ab objecto, intra potentiam cognoscentem, ratione speciei intelligibilis existente. Volitio autem, cum sit inclinatio actualis, & tendentia in obiectum, non verò partus illius, non pendet ab objecto vt à principio effectiuo quo, sed solum tanquam à termino in quem tendit, vel tanquam à forma extrinseca à qua specificatur. Vnde non sequitur omnes actus voluntatis esse eiusdem speciei; tum quia voluntas comparatur ad suas operationes per modum causæ æquiuocæ, quæ licet sit vnus speciei, potest tamen effectus specie diuersos producere, sicut lux, Sol, cœlum, & similia causant effectus specie diuersos; tum etiam quia vt actus sint eiusdem speciei, non sufficit eos produci ab eadem causa, sed etiam requiritur vt sit eadem forma specificans: motus enim sursum & deorsum, tamen si aliquando ab eodem motore fiant, specie distinguitur, quia diuersos habent terminos à quibus formaliter specificantur: non est autem omnium ætuum voluntatis eadem forma specificans, sed diuersa, secundum diuersitatem obiectorum in quæ tendit, & à quibus vt à formis extrinsecè specificantibus dependet, vt in probatione secundæ partis nostræ conclusionis ostensum est.

Ad testimonia verò Commentatoris, & D. Thomæ, dicendum est, illos verbum *agere*, vel *esse actiuum*, in ampla quadam significatione vsurpasse, quatenus de quolibet genere causæ, & de qualibet causalitate & motione

dicitur, non verò strictè & in propria significatione, prout attribuitur soli causæ efficienti. Vnde idem S. Doctor 1. p. qu. 48. art. 1. ad 4. ait quod agere tribus modis accipi potest, primò formaliter, vt cùm albedo facit album; secundò efficienter, vt cùm pictor facit tabellam; tertio finaliter, sicut finis dicitur efficere, mouendo efficientem.

§. II.

Alter a difficultas expeditur.

Dico secundò, in prima volitione & intentione finis homo non se mouet, sed specialiter mouetur à Deo; non verò in quolibet primo actu cuiusuis negotij occurrentis; licet etiam talis actus aliquando procedat ex speciali instinctu & motione Dei.

Prima pars probatur: Vt voluntas moueret se in prima volitione finis, quam homo elicit initio vitæ, deberet esse in actu respectu illius: Sed voluntas non potest intelligi esse in actu respectu talis volitionis: Ergo ad illam non potest se mouere, sed debet specialiter à Deo moueri. Maior est certa, nam vnumquodque intantum mouet, inquantum est in actu: Ergo nihil potest se mouere ad illud respectu cuius non est in actu, sed in potentia. Minor verò ex eo patet, quod cùm volitio illa sit omnium prima, nullam aliam præsupponit, per quam voluntas constituatur in actu, & se reducat de potentia in actum.

Confirmatur & magis illustratur hæc ratio: Idcirco voluntas seipsam mouet ad electionem

nem mediorum, quia supponitur iam in actu per intentionem finis : cum ergo ad primam simpliciter finis volitionem nullus actus supponatur (nam ipsa est primus actus voluntatis) non potest seipsam voluntas ad illam mouere, sed debet moueri ab aliquo principio extrinseco actuali : Sicut animal mouet quidem se multipliciter, mediante motu cordis non se mouet, sed mouetur à generante, vel ab Authore naturæ; quia cum sit primus omnium motuum vitalium, non præsupponit alium, ex quo animal ad illum se applicet.

Ex hoc probata manet secunda pars, nam in inceptioe cuiuscumque negotij, & intentione cuiuscumque finis particularis, homo supponit primam volitionem & intentionem finis, ad quam sunt motus & applicatus à Deo, & alios voluntatis actus & affectus, puta boni utilis, honesti, vel delectabilis, ex quibus potest ad negotia illa, & volitiones bonorum & finium particularium sese mouere & applicare. Vnde necesse non est quod tunc incipiat ex speciali morione & instinctu Dei, sicut in primo actu totius vitæ.

Quod verò interdum id contingat (vt asseritur in tertia parte conclusionis) manifestum est, nam Deus interdum mouet hominem ad opera de quibus ante non cogitauerat, vt ad quærendum thesaurum, ad insequendos hostes, & similia. Vnde Machab. 4. dicitur : *Incident illis bonum consilium*. Et in vita S. Patritij refertur quod cum in Hiberniam captiuus adductus esset, thesaurum non sine diuino instinctu reperit, quo beneficio se in pristinam libertatem vendicauit. Im-

terdum etiam Deus mouet specialiter & subiecto aliquos ad finem, vel poenitentiam, aut alios actus supernaturales, per gratiam operantem, cuius effectus sunt à voluntate non femouente, sed mota à Deo, vt docet S. Thomas infra quaest. 111. art. 2. Vnde hic. quaest. 9. art. 6. ad 3. sic ait: *Interdum specialiter Deus mouet aliquos ad aliquid determinatè volendum, quod est bonum, sicut in his quos mouet per gratiam.*

Obijcies primò contra primam partem conclusionis: Deus non aliter mouet voluntatem ad primam volitionem finis, quam eam applicando ad talem actum eliciendum: Atqui etiam eam applicat ad intentionem cuiuscunque finis particularis, & electionem mediorum; cum iuxta sententiam Thomistarum, nec voluntas, nec vlla causa secunda, possit operari, & in actum prodire, nisi vt applicata à Deo: Ergo in prima volitione finis voluntas non mouetur specialiter à Deo.


Respondeo Deum dupliciter mouere & applicare voluntatem ad agendum, primò motione quadam & applicatione generali, quà omnes causas secundas mouet ad agendum, & reducit de actu primo ad secundum; secundò motione quadam & applicatione speciali, qua vt motor & prouisor specialis supplet defectum & impotentiam alicuius causae secundae; primoque modo mouere voluntatem ad intentionem cuiuscunque finis, & electionem mediorum; secundò verò ad primam volitionem finis, quia respectu illius voluntas non est in actu in ratione principij applicatiui. Vnde Deus facit respectu primae volitionis.

tionis quod facit voluntas, mediante intentione finis, respectu electionis mediorum, & idcirco dicimus illum concurrere ad primam volitionem finis, vt motorem specialem, quia supplet id quod in electione præstat causa particularis; ad electionem verò, vel ad intentionem cuiuscunque finis particularis, concurrere solum vt motorem & prouisorum generalem, quia dum applicat voluntatem ad illos actus, non supplet vices alicuius causæ creatæ, sed gerit munus causæ primæ, & motoris generalis.

Obijcies secundò: Homo potest peccare in primo instanti vsus rationis: Ergo non mouetur specialiter à Deo ad primam intentionem finis quam elicit initio vitæ moralis. Consequentia patet, aliàs peccatum refunderetur in Deum; hac enim ratione in tractatu de Angelis ostendimus, Angelos non potuisse peccare in primo instanti creationis, quia cum Deus specialiter moueat ad primam operationem, peccatum Deo vt auctori aut motori speciali tribueretur. Antecedens verò probatur à D. Thoma infra qu. 89. art. 6. vbì docet peccatum originale nunquam posse reperiri cum solo veniali, quia si homo in primo instanti vsus rationis se conuertat in Deum, iustificabitur à peccato originali, si verò non se conuertat, peccabit mortaliter.

Respondeo distinguendo Antecedens: homo potest peccare in primo instanti vsus rationis, si intelligatur de primo instanti initiatiuo attingentiæ vsus rationis, nego Antecedens. Si determinatiuo, concedo Antecedens, & nego consequentiam.

Explicatur solutio : homo non incipit attingere vsum rationis in vnico instanti physico, sed morali, id est in aliqua morula temporis, longiori, aut breuiori, secundum quod fuerit subtilioris aut tardioris ingenij. Cuius ratio est, quia non attingit vsum rationis, nisi per discursum formalem, procedendo de cognitione confusa & communi ad distinctam & in particulari. Quia verò omnis temporis morula terminatur duobus instantibus, & ab vno incipit, & in alio completur ac consummatur, cum dicitur hominem posse peccare in primo instanti vsus rationis, hoc non debet intelligi de primo instanti illius morulae, quod dicitur instans initiatiuum attingentiae vsus rationis & in eo enim se habet sicut Angelus in instanti creationis, quia eius intellectus applicatur à Deo ad primum dictamen rectum, ex quo infallibiliter sequitur primus actus voluntatis) sed de alio instanti terminatiuo illius, quia cum tunc voluntas supponatur in actu, per actum quem ex speciali Dei motione elicit, potest per consilium & deliberationem se applicare ad illud quod voluerit, & consequenter peccare, conuertendo se ad bonum vt ile vel delectabile dissonum rationi. Sicut Angelus in secundo instanti creationis peccare potuit, & de facto peccauit, inordinate appetendo propriam excellentiam, quia tunc plenè potuit deliberare, & se mouere.



§. III.

Resolutio tertie difficultatis.

Tertia difficultas est, an voluntas non solum moraliter, sed etiam physice mouetur à Deo ad operandum? Pro resolutione illius, obseruandum est cum S. Thoma q. 22. de veritate art. 9. quod cum actus voluntatis sit quasi medius inter potentiam & obiectum, immutatio actus voluntatis potest considerari vel ex parte ipsius voluntatis, vel ex parte obiecti. Vnde duplex potest dari motio voluntatis, vna moralis & obiectiua, se tenens ex parte intellectus, & nihil reale ac physicum ponens in voluntate, sed solum extrinsecè, per manifestationem bonitatis quæ est in obiecto, eam alliciens & inuitans; quam explicat Augustinus tract. 26. in Ioan. exemplo ouis, quæ ostensione ramus viridis trahitur, & pueri, qui demonstratione pomi vel nucis, ad currendum incitatur: *Ramnum* (inquit) *viridem ostendis oui, & trahis illam? nucas puero demonstrantur, & trahitur.* Alia se tenet ex parte voluntatis, & eam intrinsecè immutat & applicat ad volendum illud obiectum, quod sua bonitate & conuenientia eam allicit. Vnde ista spectat ad genus causæ efficientis, & realis ac physica, seu effectiua & applicatiua, appellatur; illa verò ad genus causæ finalis; & metaphorica seu obiectiua dici solet; finis enim cum non agat actione propria, sed metaphorica, alliciendo voluntatem ad sui amorem, impropriè tantum & me-

metaphoricè mouere dicitur . Hoc præſuppoſito .

Dico tertio, Deum mouere voluntatem ad operandum, non ſolùm moraliter , & ex parte obiecti, ſed etiam phyſicè , & ex parte potentia .

Probatuſ primò ex D. Thoma 1. p. qu. 105. art. 4. vbi quærit vtrum Deus poſſit mouere voluntatem creatam ? Et in corp. articuli diſtinguit duplex genus motionis . quarum vna ſe tenet ex parte obiecti , & altera ex parte potentia , & concludit , quod *utroque modo proprium eſt Dei mouere voluntatem* (intellige efficaciter , vt ibidem explicat) *ſed maxime ſecundo modo, interiori eam inclinando* : Ergo cenſet Deum mouere voluntatem, non ſolùm moraliter, & ex parte obiecti, ſed etiam phyſicè, & ex parte potentia . Vnde ibidem ſibi obijcit argumenta petita ex violentia & læſione libertatis, quæ in vanum ſibi opponeret, ſi loqueretur de motione ſolùm morali & obiectiua ; cùm nulli poſſit eſſe dubium aut ſuſpicio, quod talis motio inferat violentiam, aut lædat libertatem.

Probatuſ ſecundò ex eodem S. Doctore q. 22. de verit. art. 9. vbi ſic diſcurrit : *Cum actus voluntatis ſit quaſi medius inter potentiam & obiectum, immutatio actus voluntatis poteſt conſiderari vel ex parte ipſius voluntatis, vel ex parte obiecti . Et ex parte quidem voluntatis mutare actum voluntatis non poteſt, niſi quod operatur intra voluntatem , & hoc eſt ipſa voluntas , & id quod eſt cauſa eſſe voluntatis , quod ſecundùm fidem ſolus Deus eſt ; vnde ſolus Deus poteſt inclinationem voluntatis*

transfere de uno in aliud, secundum quod
vult. Quibus verbis aperte docet Deum non
solum mouere voluntatem ex parte obiecti,
sed etiam ex parte potentiae, eam realiter im-
mutando & transferendo de vna inclinatione
in aliam, idque probat ex eo quod est causa
esse voluntatis, subindeque in eam illabi po-
test, & intra ipsam operari, quod nulli crea-
turæ etiam angelicæ licet, iuxta illud Eze-
chiel. 44. Porta hæc clausa erit, non aperi-
etur, & vir non transibit per eam, quia Dominus
Deus Israel ingressus est per eam.

Simili discursu vtitur 3. contra Gent. cap.
88. ubi sic ait: Oportet quod omnis motus vo-
luntatis ab interiori principio procedat: nulla
autem substantia creata coniungitur animæ in-
tellectuali, quantum ad sua interiora; nisi so-
lus Deus, qui solus est causa ipsius, & susti-
nens eam in esse: à solo igitur Deo potest motus
voluntarius causari. Et 1. p. qu. 106. art.
2. in corp. Ex parte ipsius potentia voluntas
nullo modo potest moueri, nisi à Deo. Operatio
enim voluntatis est inclinatio quædam volentis
in volitum: hanc autem inclinationem solus
ille immutare potest, qui virtutem volendi
creaturæ contulit, sicut & naturalem inclina-
tionem solum illud agens potest mutare, quod
potest dare virtutem quam consequitur inclina-
tio naturalis. Hic autem discursus non vale-
ret, sed esset omnino nugatorius, si Diuus
Thomas de motione solum morali loqueretur;
quia ad motionem purè moralem & obiecti-
uam, non requiritur illapsus intra terminos
voluntatis, nec realis & physica eius immuta-
tio, & ad genus illud motionis impertinens
est

est quod Deus sit author & causa voluntatis, cum Angeli qui non sunt causæ illius, eam possint mouere moraliter & per modum suadentis, vt ipsemet docet 1. p. quæst. 111. artic. 2. his verbis: *Solus Deus potest mouere voluntatem efficaciter, Angelus aut. m. & homo per modum suadentis.* Quibus verbis aliam rationem insinuat ad probandam nostram conclusionem: Nulla enim motio se tenens ex parte obiecti, in hoc statu viæ, potest esse de se & ex natura sua efficax: Ergo si Deus potest mouere voluntatem efficaciter, illam potest mouere non solum moraliter, & ex parte obiecti, sed etiam physicè, & ex parte potentia. Consequentia patet, Antecedens verò probatur ex eodem S. Doctore 1. part. quæst. 105. art. 4. in corp. vbi sic discurre: *Non enim sufficienter aliquid potest mouere aliquid mobile, nisi virtus æterna mouentis excedat vel saltem adæquet virtutem passiuam mobilis: virtus autem passiuæ voluntatis se extendit ad bonum in vniuersali, est enim eius obiectum bonum vniuersale, sicut & intellectus obiectum est ens vniuersale: quodlibet autem bonum creatum est quoddam particulare bonum, solus autem Deus est bonum vniuersale, unde ipse solus implet voluntatem, & sufficienter eam mouet vt obiectum.* Quibus verbis apertè declarat, nullum bonum creatum, quantumuis congruè propositum voluntati, eam ex vi propria posse efficaciter mouere & determinare ad sui dilectionem, sed hoc conuenire soli bono infinito, & vniuersali. Vnde etiam Deus, prout à nobis viatoribus obscure & ænigmaticè cognoscitur,

tur, non potest in ratione obiecti mouere efficaciter voluntatem; quia non apprehenditur vt bonum vniuersale, continens in se omnem rationem boni, sed interdum repræsentatur, vt inferens malum pœnæ, vel vt prohibens bonum aliquod delectabile ad quod inclinatur voluntas, quæ subinde potest ipsum odio prosequi vel non diligere; atque adeò nulla motio se tenens ex parte obiecti, in hoc statu viæ, potest esse de se & ex natura sua efficax, & efficaciter seu infallibiliter mouere voluntatem.

Confirmatur: Motio cum qua non potest componi voluntatis dissensus, physica est, & non purè moralis: Sed Deus mouet voluntatem motione cum qua non potest componi voluntatis dissensus: Ergo mouet eam physicè & non solum moraliter. Maior constat ex iam dictis, minor verò probatur ex D. Thoma hic qu. 10. art. 4. ad 3. vbi sic ait: *Si Deus mouet voluntatem ad aliquid, impossibile est poni quod ad illud voluntas non moueatur.* Et 2. 2. qu. 24. art. 11. *Virtus Spiritus Sancti infallibiliter operatur quodcumque voluerit: unde impossibile est hæc duo simul esse vera, quod Spiritus Sanctus velit aliquem mouere ad actum charitatis, & quod ipse charitatem amittat peccando.*

Potest insuper nostra conclusio suaderi ratione quam insinuat D. Thomas qu. 22. de verit. art. 8. his verbis: *Sicut voluntas potest immutare actum suum, ita & multò amplius Deus.* Sed voluntas non solum moraliter, sed etiam physicè, seipsam mouet & immutat de vno actu in alium, absque violentia & læsione

ne suæ libertatis: Ergo multò magis Deus id potest.

Confirmatur: Voluntas potest seipsam physicè mouere ac immutare de vno actu in alium, illa sua libertate, ratione perfecti dominij quod habet in suos actus liberos: Sed Deus perfectius dominium habet in illos, cùm iuxta Augustinum de corrept. & gratia cap. 14. *Deus magis habeat in sua potestate voluntates hominum, quam ipsi suas*: Ergo à fortiori potest, absque læsione libertatis, voluntatem physicè mouere, ac immutare de vno actu in alium.

Demùm probari potest nostra conclusio hoc discursu: Deus per gratiam præuenientem verè & propriè efficit consensum & determinationem nostræ voluntatis ad bonum: Sed illum non potest verè & propriè efficere per solam motionem moralem: Ergo non solum moraliter, sed etiam physicè, mouet voluntatem. Maior est certa de fide, tum quia voluntas vt causa secunda verè & propriè efficit suam determinationem & consensum: Ergo à fortiori Deus vt causa prima præstat, nihil enim cadens sub causalitate & efficientia causæ secundæ, potest subterfugere causalitatem & efficientiam causæ primæ, vt de se patet. Tum etiam quia Tridentinum sess. 6. capit. 7. docet iustificationis exordium in adultis, à præueniente Dei gratia sumendum esse: Exordium autem iustificationis in adultis incipit à consensu & determinatione liberi arbitrij ad bonum: v. g. ad credendum mysterij reuelatis, vel ad diligendum Deum super omnia; Ergo

Ergo Deus per suam gratiam præuenientem verè & propriè efficit consensum & determinationem nostræ voluntatis ad bonum. Minor autem videtur manifesta, motio enim moralis non est vera & propria efficientia, sed impropria tantùm & metaphorica, magisque pertinet ad genus causæ finalis, quam efficientis; mouet enim solùm obiectiuè, exhibendo voluntati bonitatem quæ conuenientia sua eam alliciat. Id constat exemplo pueri, qui moraliter mouetur & excitatur ad currendum, ostensione pomi, vel imaginis; quis enim dicat hanc moralem motionem & excitationem esse verè & propriè causam efficientem cursus illius? Ergo Deus per motionem purè moralem & obiectiuam, non efficit verè & propriè consensum & determinationem nostræ voluntatis ad bonum, sed impropriè. Vnde Prosper in carmine de ingratis docet, diuinam gratiam, non solùm consilij & suasionibus mouere, sed intus immutare ac reformare mentem hominis.

Non hæc consilio tantùm, hortatuque benigno

Suadens atque docens, quasi normam legis haberet

Gratia, sed mutans intus mentem, atque reformans,

Vasque nõ um ex fracto fingens virtute creandi.

Similiter Augustinus lib. 1. ad Simplic. quæ 2. docet gratiam mentem hominis applicare ad bene operandum, quod non potest per

tinere ad motionem purè moralem & obiecti-
uam, quæ non applicat, sed solum excitat,
allicit, & inuitat voluntatem ad agendum.
Verba eius sunt: *Quis audeat dicere defuisse*
Deo modum docendi, quo etiam Esau ad
eam fidem mentem applicaret, voluntatem-
que coniungeret, in qua Iacob iustificatus
est. Et in Psal. 126. Nos loquimur foris, il-
le adificat intus, ipse mouet, ipse terret, ipse
intellectum aperit, ipse ad fidem applicat sen-
suum nostrum. Item Diuus Bernardus in libro
de libero arbitrio versùs finem ait quod Deus
per gratiam voluntatem applicat opere, &
opus explicat voluntati. Quibus verbis vtram-
que motionem indicat, physicam scilicet, cum
dicit quod voluntatem applicat operi, & mo-
ralem, cum subdit: *Et opus explicat volun-*
tati, id est conuenientiam & bonitatem obie-
cti seu operis ei ostendit, quod pertinet ad
motionem moralem. Vtramque etiam in-
nuere videtur Cyrillus Alexandrinus in li-
bro de adoratione in spiritu circa medium, his
verbis: *Quoniam hominis natura non valdè*
generosa est, neque satis idonea vt malum effu-
gere queat, simul quodammodo nobiscum certat
Deus, & duplex concedere beneficium vide-
tur, persuadens admonitionibus vt subsidium
inueniamus, & fortius illud præstans quam
vt malum præsens & violentum præualere
possit.

Sicut ergo in homine duplex datur poten-
tia, intellectus scilicet & voluntas, ita iuxta
doctrinam SS. Patrum, duplex requiritur mo-
tio, siue duplex gratia, tangens vtramque
potentiam. Ex parte enim intellectus requi-
ritur

ritur illustratio & pia cogitatio , ex parte verò voluntatis motio & applicatio , quam Augustinus *subministrationem spiritus* interdum appellat. Hæ duæ gratiæ sunt veluti duo brachia Dei, animam complectentia , de quibus dicitur in Canticis: *Laeva eius sub capite meo*, id est intellectu, qui est caput animæ, illustrato per cognitionem . *Et dextera illius amplectabitur me*, per inspirationem suam & motionem, tangentem, & per charitatem , inflammantem cor, & affectum. Vtranque hanc gratiam & motionem plures existimant insinuare Tridentinum sess. 6. can. 5. his verbis : *Si quis dixerit liberum arbitrium motum , & excitatum à Deo , non posse dissentire si velit , anathema sit*. His enim verbis distinguere videtur motionem ab excitatione , & docere liberum arbitrium non esse solum physicè motum à Deo , vt assererat Calvinus ; nec solum moraliter excitatum , vt docebat Pelagius , sed simul esse physicè motum , & moraliter excitatum , subindeque sub Dei motione retinere potentiam ad dissentiendum , ac proinde libertatem .

Obijcies primò : Augustinus de spiritu & littera cap. 34. ait quod *visorum suasionibus agit Deus vt velimus & credamus* , siue per exhortationes evangelicas extrinsecus , siue per revelationem intrinsecus : Sed consentire , vel dissentire , propriæ voluntatis est. Ergo admittit solum motionem & gratiam moraliter excitantem , subditam voluntati quoad efficaciam & vsum .

Respondeo Augustinum eo loco tradere quidem & explicare motionem & gratiam mo-

moraliter excitantem, & id quod in vocatione interna ex parte excitationis & illuminationis se tenet, sed non excludere motionem physicam, & effectricem bonæ voluntatis, sed clarè illam exprimere ibidem his verbis: *Profectò & ipsum bonum velle Deus operatur in homine, & in omnibus misericordia eius præuenit nos: Consentire autem vocationi Dei, vel ab ea dissentire, sicut dixi, propriæ voluntatis est: Quibus verbis apertè declarat, quod quamuis propriæ voluntatis sit consentire vocationi Dei, ipsum tamen velle Deus in nobis operatur per gratia. Vnde in libro de bono perseuer. cap. 13. sic ait: Nos ergo volumus, sed Deus in nobis operatur, & velle. Nos ergo operamur, sed Deus in nobis operatur & operari pro bona voluntate. Hoc nobis expedit credere & dicere: Hoc est piū, hoc est verum, ut sit humilis & submissa confessio, & detur totum Deo. Et de gratia & libero arbitrio cap. 16. Certum est nos velle cum volumus, sed ille facit ut velimus bonum, de quo scriptum est, præparatur voluntas à Domino. Et lib. 1. retract. cap. 10. Quando dixi in libro de Genesi, diuinum lumen pascit pura corda eorum qui ab amore visibilium se ad eius præcepta implenda conuertunt, quod omnes homines possunt, si velint: Non existiment noni hæretici Pelagiani, secundum eos esse dictum; verum est enim omnino hoc posse si velint, sed præparatur voluntas à Domino, & tantum augetur munere charitatis ut possint.*

Obijcies secundò: Si voluntas non solū moraliter, sed etiam physicè moueretur à Deo ad agendum, seipsam non moueret, sub-


bin-

bindeque ad suos actus merè passivè se haberet, quod est hæreticum, & à Tridentino contra Lutherum damnatum. Sequela videtur manifesta, implicat enim contradictionem, quod aliquid ab alio moueatur, & nihilominus seipsum moueret.

Respondeo Div. Thomam sibi idem argumentum proponere t. p. quæst. 105. art. 4. in quo quærit, *an Deus possit movere voluntatem creatam?* Et respondet Deum posse illam movere obiectivè & effectivè, *interius eam inclinando*, sibi que secundo loco in contrarium obijciat: *Deus non potest facere quod contradictoria sint simul vera: hoc autem sequeretur si voluntatem moueret; nam voluntatem moveri est ex se moveri, & non ab alio: Ergo Deus non potest movere voluntatem.* Ecce illud idem argumentum quod nobis obijciunt Aduersarij, cui sic respondet: *Ad secundum dicendum quod moveri voluntariè est moveri ex se, idest à principio intrinseco: Sed illud principium intrinsecum potest esse ab alio principio extrinseco, & sic moveri ex se, non repugnat ei quod mouetur ab alio: Idem docet quæ. 3. de malo art. 2. ad 4. his verbis: Cum liberum arbitrium mouet seipsum, non excluditur quod ab alio moueatur à quo habet hoc ipsum quod seipsum mouet.* Non ergo repugnat quod liberum arbitrium à Deo tanquam à prima causa & primo mouente moueatur, & nihilominus quod ut causa secunda, & ut secundum mouens, seipsum moueat ac determinet. Sicut nulla est implicantia, quod generatio plantæ sit simul à Sole, vel cœlo, ut primo generante, & alterante, & à terra, tanquam à se-

à secundo generante illi subordinato. Imò cum in mouentibus per se subordinatis secundum non se moueat nisi motum à priori, & voluntas in agendo & mouendo, Deo vt primæ causæ, & primo mouenti, per se subordinetur, omnino repugnat quod voluntas seipsam moueat, quin prius natura à Deo moueatur, subindeque præmoueatur, quia vt ait Aristoteles 4. metaph. textu 23. *Mouens natura prius est moto.* Vel vt loquitur D. Thomas 3. contra Gent. cap. 149. *Motio mouentis præcedit motum mobilis ratione, & causa.* Id est prioritate actionis, & causalitatis. Rectè ergo ac sapienter ait Henriquez, celebris Theologus Societatis, qui fuit Magister Suarez, lib. de fine hominis cap. 6. *Non tam difficile est intelligere, ut quidam putant, quod saluo usu nostræ liberæ cooperationis, Deus temperans vim sui concursus, efficaci auxilio moueat, tum physicè ex parte potentie, tum moraliter ex parte obiecti.*

Alia argumenta Aduersariorum, quæ procedunt, vel ex latione humanæ libertatis, vel ex violatione diuinæ sanctitatis, soluta sunt in tractatu de voluntate Dei cap. 4. §. 4. & 5. explicando concordiam decreti prædeterminantis, & physicæ prædeterminationis, cum libertate humana, & sanctitate diuina. Vnde ad hunc locum Lectorem remittimus, ne eadem inutiliter hic repetamus.



CAPVT III.

De fruitione.

VT clarè percipiatur quid sit fruitio, ~~sive~~ in quo essentialiter consistat, obseruandum est ad fruendum aliqua re hæc tria esse necessaria, amare, possidere, & gaudere, seu delectari: nam si quis amat, & nullo modo possidet, desiderat, sed non fruitur re quam diligit. Similiter qui amat & possidet aliquid, & de eius possessione non delectatur, illo non fruitur; vt constat in eo qui sumit portionem amaram quam desiderat, illa enim frui non dicitur, quia ex eius sumptione nullam percipit dilectationem. Quæritur ergo, in quonam ex his tribus formalitèr & essentialiter consistat fruitio? Pro resolutione.

Dico breuiter, fruitionem propriè nec esse possessionem seu consecutionem obiecti concupiti, neque eius amorem, sed delectationem ex amore & præsentia rei amatae causatam.

Probatur ratione quam insinuat D. Thomas hic quæst. 11. art. 1. fruitio deriuatur à fructu, quia sicut fructus est id quod ab arbore vltimò expectatur, & cum quadam dulcedine & delectatione percipitur: ita fruitio est quid vltimum quod in re expectamus, & quod cum quadam suauitate percipimus: hæc autem apprimè delectationi conueniunt, & potiori iure quam cuiuscumque alteri actui; nam delectatio est vltimum quod in re expecta-

mus, prius siquidem est, quod rem amemus ac desideremus, postea quod illam consequamur, & tandem in eius possessione quiescamus ac delectemur. Ipsa etiam quies seu delectatio semper habet dulcedinem seu suavitatem adiunctam, non verò amor & possessio: Ergo fruitio consistit formaliter in delectatione, non verò in amore, vel consecutione. Unde quando Augustinus 1. de doctrina Christ. cap. 4. ait quod frui est *amore inherere alicui rei propter seipsam*, loquitur in sensu causali, non formali; amor enim est causa delectationis, in qua fruitio formaliter consistit.

Ex his colligitur primò, perfectam fruitionem esse solùm de ultimo fine; nam ultimum simpliciter ab homine expectatum est finis ultimus, qui totaliter satiat, & quietat appetitum: quia tamen finis intermedius est delectabilis ex se, & terminat motum voluntatis, sub hac ratione aliquam terminat fruitionem & quietem voluntatis.

Colligitur secundò, quod quia finis ultimus potest duobus modis possideri, scilicet perfectè in re ipsa, & imperfectè in spe, duplex potest dari illius fruitio; una perfecta quæ habetur in patria de Deo clarè viso; alia imperfecta quæ habetur hic in via de Deo, per ipsam & amorem imperfectè possessio, de qua dicit Apostolus ad Roman. 13. *Spe gaudentes*. Illæ autem specie differunt, cùm una feratur ad bonum fide cognitum, & speratum, ac nondum habitum, & eliciatur à virtute spei: altera ad bonum præsens, possessum, & cognitum viso se intuitiva, & eliciatur in patria ab habitu charitatis.

CAPUT IV.

De intentione.

Intentio est formaliter actus voluntatis, licet præsupponat actum intellectus, ut docet D. Thomas hic qu. 12. art. 1. & probat ratione ex nominis ethymologia desumpta. Intendere enim, ut nomen sonat, est in finem tendere: est autem proprium voluntati tendere in finem: tum quia voluntas fertur in res secundum quod sunt in seipsis à parte rei, & ita propriè quasi extra seipsam ad illas tendit; intellectus verò fertur in res, prout sunt in seipso, ratione specierum intelligibilium, unde potius eas ad se trahit, quam tendat ad illas: tum etiam quia tendere in finem, primò & principaliter est illius potentiae, quæ seipsam & omnes alias mouet in finem, quod conuenit soli voluntati: Ergo intentio formaliter loquendo est actus voluntatis.

Quod vere præsupponat actum intellectus patet, quia cum nihil sit volitum, quin præcognitum, voluntas non tendit in finem per media obtinendum nisi intellectus prius illi proponat finem in ordine ad media, eorumque proportionem cum fine. Et ratione huius actus præsuppositi, intentio nomine oculi, vel luminis in Scriptura designatur, ut notat D. Thomas art. citato ad 1. his verbis: *Intentio nominatur oculus metaphoricè, non quia ad cognitionem pertinet, sed quia cognitionem præsupponit, per quam proponitur voluntati finis ad quem mouet, sicut oculo præuidemus*

quò tendere corporaliter debemus . Vnde egregiè Gilbertus in Cantica: Si plures habes oculos , sagittantis exemplo , omnes alios claudes , hoc vno visis quo dilectum valeas inueniri .

Obiectum formale intentionis est finis, tam ultimus, quam non ultimus, vt per media obtinendus . Patet tum ex communi Philosophorum moralium & Theologorum sententia, illi enim ponunt in voluntate actum intentionis circa particulares fines, vt circa sanitatem acquirendam, peregrinationem faciendam, aut quid simile; tum etiam ex differentia quæ reperitur inter intentionem, & fruitionem . Nam vt obseruat D. Thomas hic art. 2. ad 3. intentio se habet ad finem per modum cuiusdam motus & tendentiæ: motus autem & tendentia nedum versantur circa finem seu terminum ultimum, sed etiam circa proximum & intermedium . Fruitio verò versatur circa finem per modum quietis, quæ non est nisi quando cessat motus: motus autem non cessat, nisi acquisito ultimo termino . Vnde licet vera & perfecta fruitio non sit nisi de ultimo fine, qui est ultimum simpliciter ab homine expectatum, intentio tamen non solum est de ultimo fine, sed etiam de finibus particularibus & intermedijs.

Quod verò obiectum formale intentionis sit finis, vt per media obtinendus, patet ex discrimine quod inter intentionem, simplicem volitionem, & fruitionem versatur; simplex enim volitio respicit finem, vt absolutè in se bonum; intentio, vt est ratio volendi media, & quatenus est assequibilis per illa;
frui-

fruitio verò illum respicit, vt delectabilem, & quietatiuum appetitus. Vnde licet hi tres actus circa finem versentur, & habeant idem obiectum materiale, distinguuntur tamen specie, quia illud respiciunt sub diuersa ratione formali iam explicata; & se habent vt in lapide appetere centrum, tendere actualiter ad centrum, & quiescere in centro, quæ, vt constat, sunt essentialiter distincta.

De hoc actu eleganter differunt SS. Patres, præsertim Gregorius, & Bernardus, ille enim explicans illud Tob 38. *Super quo bases illius solidatæ sunt*, sic ait: *Bases vniuscuiusque animæ sunt intentiones sue, nam sicut fabrica columnis, columnæ autem basibus innituntur; ita vita nostra in virtutibus, virtutes verò in intima intentione subsistunt.* Iste verò in hæc verba Canticorum: *Pulchræ sunt genæ tuæ, sicut turturis*, hæc scribit: *Duo quedam in intentione (quam faciem animæ esse dicimus) necessaria requiruntur, res, & causa, id est quid intendas, & propter quid. Ex his sanè duobus vel decor vel deformitas indicatur: Vt anima, quæ ambo ista recta atque pudica habuerit, illi meritiò veraciterque dicatur: pulchræ sunt genæ tuæ sicut turturis. Quæ verò altero horum caruerit, non poterit dici de ea, quod pulchræ sint genæ eius sicut turturis, propter eam quæ ex parte erit deformitatem.*

CAPVT V.

De consilio & consensu.

ANtequam de electione differamus duo actus, qui ad illam prærequiruntur, explicandi sunt. Primus dicitur consilium, quod duos actus intellectus includit, inquisitionem scilicet mediorum quæ iurare possunt ad obtinendum finem, & iudicium de illorum bonitate, & conuenientia: primum se habet vt via, secundum vt terminus, nam per inquisitionem rationis peruenimus ad iudicium de medijs conuenientibus. Vnde Caietanus hic quaest. 14 artic. 1. ait: *Consilium significat inquisitionem completam, id est usque ad iudicium inclusiue*. Pater hoc in consilio communi plurimum, nam si multiplicatis difficultatibus, non peruenitur ad iudicium, seu deliberationem, vel sententiam, sed ipsa in alium diem vel horam differtur, communiter omnes sentiunt & dicunt, consilium non esse completum.

Consilium ergo, vt reperitur in hominibus, est *inquisitio & iudicium rationis practicæ, circa media à nobis apponenda, quando res est dubia, & momenti alicuius*. In qua definitione, seu descriptione, inquisitio & iudicium est genus, quia in homine non reperitur iudicium de bonitate & conuenientia mediorum, absque præuia inquisitione. Additur *rationis practicæ*, quia inquisitiones & iudicia intellectus speculatiui, vt mathematicæ consultationes & demonstrationes, consilia

lia non sunt, ut ait Aristoteles 3. Ethic. cap. 3. *Subditur circa media*, quia consilium non est de fine, sed solum de his quæ sunt ad finem; cum enim sit quidam discursus intellectus practici, sicut discursus non est de principijs, sed de conclusionibus; ita nec consilium de fine, qui se habet ut primum principium in agibilibus, sed solum de medijs, quæ ad eius assentionem conducunt. Vnde Aristoteles 3. Ethic. cap. 5. *Consultamus* (inquit) *non de fine sed de his quæ ad finem tendunt*; nam neque medicus an sanare, neque orator an persuadere, neque politicus an bonis legibus civitatem temperare debeat, neque ex alijs quispiam de fine consultat: sed omnes cum finem quemdam statuerint, quomodo, aut per quem eum consequi possint deliberant. Deinde dicitur, *à nobis apponenda*, quia consilium est solum circa ea quæ à nobis aguntur, seu quæ curæ & dominio nostro subiecta sunt: Galli enim v. g. non consulunt quomodo Indi vivere vel negotiari debeant. Tandem ponitur, *quando res est dubia, vel momenti alicuius*, quia ea quæ sunt certa & determinata in aliqua arte vel disciplina, sub consilio non cadunt. Vanè enim (inquit Philosophus ubi supra) consuleret Grammaticus, quomodo formandi sunt litterarum characteres, & Geometra quomodo describendum sit trigonum, quomodo circulus; hæc quippe eodem modo fiunt, & in arte determinata sunt. Sc. Moyses Exodi 25. non consuluit artifices peritos, quomodo fabricandum esset Tabernaculum, quia iam id determinauerat Deus. Similiter etiam de rebus parvis non est consultatio,

nam de illis vir prudens non est sollicitus , quia parum refert quod sic vel aliter agantur , aut contingant ; unde dicitur quod *de minimis non curat Prætor* .

Dixi autem consilium , prout reperitur in hominibus , esse inquisitionem & iudicium , nam sicut scientia reperitur in Deo sine discursu , ita & consilium absque inquisitione ; quia inquisitio supponit ignorantiam , vel dubitationem , quæ non habent locum in Deo . Unde consilium attribuitur Deo , quantum ad certitudinem scientiæ vel iudicii , quæ in nobis provenit ex inquisitione consilij , non verò quantum ad consultationem vel inquisitionem mediorum , ut docet D. Thoma hic qu. 13. art. 1. ad 2. & 1. p. q. 22. art. 1. ad 1. ubi ait : *Ipsa ratio rerum agendarum consilium in Deo dicitur , non propter inquisitionem , sed propter certitudinem cognitionis , ad quam consilientes inquirendo perveniunt .*

In Angelis verò in quibus potest esse nescientia , potest etiam esse inquisitio , licet sine discursu . Unde Dionysius 7. cap. cœlestis hierarchiæ introducit Angelos quaestionem facientes ad Iesum de susceptæ pro nobis carnis operè , iuxta illud Isaia 63. *Quis est iste qui venit de Eilem tingens vestibus de Bosra ? iste est formosus in stola sua .* Et Psal. 23. *Quis est iste rex gloriæ ?* Quare in Angelis consilium de supernaturalibus , quorum habent nescientiam , non solum iudicium , sed etiam inquisitionem potest includere , quia de illis dubitare possunt .

Consilij inquisitionem & iudicium sequitur consensus voluntatis , approbans media
pro-

proposita, eaque acceptans tanquam utilia & conducentia ad finem præintendum. Dubitant aliqui, an talis actus sit ab electione distinctus? Cui difficultati respondeo breuiter cum S. Thoma hic. qu. 15. art. 3. ad 3. quod cum voluntas per consensum fertur ad plura media, tunc talis consensus est actus realiter ab electione distinctus; nam tunc consensus prior est electione, cum prius plura illa media placeant, & deinde ex illis vnum eligatur. Cum autem voluntas fertur in vnicum medium, tunc consensus non distinguitur ab electione, quæ tunc non est determinatiua alicuius mediij inter plura, sed idem actus est consensus, prout complacet in medio proposito, & electio, prout præfert illud aliis quæ non placent. Vnde S. Doctor loco citato: *Si inueniatur vnum solum quod placeat, non differunt re consensus & electio, sed ratione tantum, ut consensus dicatur secundum quod placet ad agendum, electio autem secundum quod præfertur his quæ non placent.* Quare tunc consensus non antecedit electionem, sed in ea intimè imbitur, nec regulatur per aliud iudicium, quam per sententiam qua intellectus practicè iudicat, medium illud vnicum necessariò esse eligendum, ut finis obtineatur.



CAPVT VI.

De electione mediorum.

Electio est actus voluntatis circa media ; quorum vnum acceptat præ alio , in ordine ad finem . Dicitur actus voluntatis , quia licet præsupponat actum rationis , quo media inter se & in ordine ad finem intentum comparantur , & indicatur quodnam vtilius sit ; quapropter ab Aristotele 3. Ethic. cap. 2. electio appetitus præconsilii appellatur , id est obiecti per consilium propoliti , & per rationem deliberati ; tamen est elicitiue & substantialiter à voluntate . Tum quia obiectum electionis est bonum vtile : Sola autem voluntas versatur circa bonum . Tum etiam , quia electio est actus libertatis , quæ idcirco *vis electiua* appellatur : liberum autem in voluntate tanquam in propria sede & cubili residet . Tum ter id , quia virtus moralis , quæ est habitus electiuus , in voluntate subiectatur : Ergo & ipsa electio . Tum denique , quia vt discurret D. Thomas hic qu. 13. art. 1. quando duo principia concurrunt ad aliquem actum , vnum vt dirigens , aliud vt directum , præbens materiam ordinandam ; tunc actus ille non elicitur à potentia dirigente , sed à directa ; vt constat in actu fortitudinis , vel temperantiæ , relato & ordinato per charitatem in Deum tanquam in vltimum finem ; nam actus ille , non ab habitu charitatis , sed fortitudinis , vel temperantiæ elicitur : Atqui in electione medio-
rum

rum voluntas fertur in bonum ordinatum per rationem: Ergo talis actus elicitiuè & substantialiter à voluntate procedit, & directiue solum ab intellectu.

Dicitur deinde electionem versari circa media, non circa finem; quia sicut intellectus non discurrit circa principia, sed circa conclusiones, ita nec voluntas eligit finem, in quantum huiusmodi, sed tantum media quæ ad illum conducunt. Dixi, *in quantum huiusmodi*, quia sicut in speculatiuis, quod in vna demonstratione est principium, potest esse conclusio respectu alterius, ut patet in principiis scientiæ subalternatæ, quæ sint conclusiones subalternantis: Ita quod in vna operatione est finis, potest ordinari ad aliud ut ad finem, & tunc de illo, ut habet rationem mediæ formaliter, rationem verò finis tantum materialiter, potest esse electio. Sicut sanitas, quam medicus non eligit, sed supponit tanquam principium medicinæ potest ordinari ad exercitium virtutis, & salutem spirituales, & sub hac ratione eligi.

Tertiò dicitur quod per electionem voluntas acceptat vnum medium præ alio, quia semper eligimus id quod intellectus in consultatione quæ electionem præcedit, iudicat melius & conuenientius ad finis affecutionem, iuxta illud Aristotelis 3. Ethic. cap. 3. *Quod ceteris ex consultatione prætulimus id eligibile est.*

Ex hoc colligitur primò, voluntatem ex pluribus medijs non posse eligere illud quod intellectus iudicat esse minus utile, & minus accommodatum ad finis affecutionem, quia

cum sit appetitus rationalis, sequens ductum rationis, & cognitionem intellectus, non potest prosequi nisi obiectum sibi ab intellectu propositum: Ergo non potest vnum praeligere alteri, nisi intellectus iudicet illud esse praeligendum, subindeque magis utile & magis accommodatum ad finis assecutionem.

Addo quod, si voluntas eligeret medium iudicatum minus bonum, relicto meliori, eligeret malum sub ratione mali, quod repugnat, ut cap. 1. ostensum est. Sequela probatur, nam ut docet Aristoteles 3. physic. cap. 1. & D. Thomas 1. p. q. 50. art. 1. ad 1. medium comparatum ad vnum extremum, videtur alterum extremum; sicut tepidum comparatum calido, videtur frigidum, & comparatum frigido videtur calidum; fuscum comparatum albo videtur nigrum, & comparatum nigro videtur album; item media fidium grauis ad ultimam dicitur, & acuta ad primam. Demum Damascenus lib. 1. de fide cap. 3. docet Angelos dici immateriales & incorporeos quantum ad nos, & comparatos cum Deo dici materiales & corporeos: Sed minus bonum est quasi medium inter maius bonum & malum: Ergo comparatiue ad maius bonum, habet rationem mali; & per consequens, si homo eligeret minus bonum, cognitum ut tale, relicto meliori, eligeret malum sub ratione mali.

Colligitur secundò, quod si voluntati duo media omnino æqualia, seu ad finem obtinendum æqualiter conducentia, proponerentur, neutrum posset eligere, donec intel-

lectus in vno aliquam rationem seu conuenientiam excogitaret, ob quam præmineret & præponderaret alteri. Cum enim voluntas vt dicebamus, sit appetitus rationalis, sequens doctum rationis, & cogitationem intellectus, nunquam potest se determinare ad id quod vt omnino æquale & indifferens, ipsi ab intellectu proponitur. Quod potest confirmari ex eo quod à principio indifferenti, & se habere ad vtrumlibet, non potest procedere actio determinata, nisi prius determinetur ab alio, vt asserit Commentator 2. physic. textu 28. his verbis: *Ab eo quod est ad vtrumlibet non sequitur aliqua actio, nisi ab aliquo alio inclinetur ad vnum.* Idem docet Diuus Thomas 1. p. qu. 19. art. 3. ad 5. 2. physic. lect. 8. & 3. contra Gent. cap. 2. his verbis: *Quid indifferenter se habet ad multa, non magis vnum operatur, quam aliud, vnde à contingenti ad vtrumque non sequitur aliquis effectus, nisi per aliquid quo determinetur ad vnum.* Sed dum voluntati proponuntur duo media omnino æqualia, illa merè indifferenter & indeterminatè se habet ad ipsa: Ergo nisi determinetur ab intellectu, aliquam bonitatem & conuenientiam in vno excogitante, ob quam præmineat & præponderet alteri, neutrum poterit eligere. Vnde D. Thomas hic qu. 13. art. 6. ad 3. totam rationem eligendi vnum præ alio reducit ad diuersam considerationem, qua potest aliquid magis eminare, & flectere voluntatem.

Dices primò: Duobus medijs æqualibus voluntati propositis, illa remanet libera quoad exercitium & specificationem, cum

talia media sint bona particularia & limitata, & voluntas non possit necessitari, nisi à bono in communi, vel ab ipso Deo clarè viso: Ergo cum libertas consistit in vi electiva mediorum, voluntas poterit eligere quodcumque ex illis maluerit.

Respondeo, concessio Antecedente, distinguendo consequens: poterit eligere quodcumque ex illis maluerit, manente iudicio practico æqualitatis mediorum, nego. Mutato tali iudicio, concedo. Solutio patet ex supra dictis, licet enim voluntas sit libera, quia tamen est appetitus rationalis, sequens ductum rationis, & cognitionem intellectus, totaque eius libertas à iudicio rationis tanquam à proxima radice, procedit non potest operari, nec eligere, sine præiudicio rationis, ipsam mouente ac determinante in genere causæ finalis & formalis extrinsecæ, vt cap. 2. Paragrapho primo ostensum est. Vnde sicut voluntas ex sua libertate non habet quod possit ferri in incognitum, ita nec quod possit eligere id quod intellectus per iudicium practicum, vt minus vel æquale bonum ipsi representat.

Addo quod, sicut intentio finis dependet à voluntate, ita & iudicium practicum de convenientiori medio eligendo, descendit ex eius libertate, qua voluit applicare intellectum ad consultandum de medijs; vnde tale iudicium potest cessare, vel quia voluntas potest desistere ab intentione finis, vel etiam quia illa adhuc supposita, potest applicare intellectum ad inquirenda alia media, vel ad excogitandas alias rationes bonitatis & con-

uenientia in medijs quæ minùs vel æqualiter apparebant bona, quibus moueatur ad ea eligenda. Vnde a thuc facta suppositione illa iudicij practici de medio convenientiori, voluntas potest, potentia antecedenti, & in sensu diuiso, alia media eligere, licet non possit simul stare iudicium convenientiori medio eligendo, cum electione minùs boni, vel æqualis; alioquin non esset appetitus rationalis, quia non sequeretur doctum rationis, nec dictamen practicum intellectus.

Dices secundò: Voluntas potest ferri per electionem in illud omne quod habet rationem boni utilis: Sed in medio æquali, aut etiam minùs bono, ratio boni utilis reperitur: Ergo voluntas potest illud eligere.

Respondeo, data Maiori, distinguendo Minorem: in medio æquali, aut minùs bono, ratio boni utilis reperitur, si considerentur secundùm se, seu seorsim, concedo. Si comparentur ad aliud æquè vel magis bonum, nego. Nam medium minùs bonum respectu melioris, induit rationem mali, ut supra ostendimus; æquale verò respectu æqualis, se habet ut indifferens, quia non habet supra illud rationem aut bonitatem; quæ ei anteponatur.

Dices terciò: Si homini proponantur duo bona omni ex parte æqualia, v. g. famelico duo panes vel cibi omnino æquales in quantitate, qualitate, propinquitate, & alijs conditionibus, vel eligit alterum ex illis, vel vtrumque, vel neutrum? Si primum, habetur intentum, tunc enim non determinabitur voluntas ab aliqua maiori bonitate sibi pro-

po-

poſita, quia non datur, vt ſupponimus, ſed præciſe à ſe, & à ſua libertate. Secundum verò non poteſt ſtare, quia ſupponimus quod illi famelico non permittatur vtrumque panem tollere, ſed alterum tantum. Tertium denique videtur omnino improbabile, ridiculum enim videtur quod famelicus ille, ad inſtar Tantalì, malit in ſua fame perire, quam cibum paratum attingere, ſeu eligere: Ergo poteſt homo ex duobus bonis aut medijs æqualibus, vnum eligere.

Reſpondeo quod tunc famelicus ille, ex ſubito quodam motu & naturali impetu, abſq; deliberatione & rigorosa electione, aſſumet vnum ex illis panibus. Quod ſi velit perfectè deliberare, & de melioritate cibi conſulere, voluntas applicabit intellectum ad inueſtigandum in vno ex illis medijs aliquam rationem boni & convenientis, ſeu commodi, qua emineat ſupra aliud, vt docet D. Thomas hic art. 6. ad 3. Si autem poſt iſtam inqueſitionem in neutro inueniat nouam aliquam bonitatem, voluntas determinabitur vel à motibus extrinſecis, ſicut ſunt circumſtantiæ, aut aliæ occaſiones occurrentes, vel experientia propriæ libertatis, quam poterit velle circa vnum potiùs quam circa alterum exercere: & tunc ipſa libertas voluntatis non ſe tenebit ſolùm ex parte principij elicitivi electionis, ſed etiam ex parte obiecti, & habebit rationem motui allicientis, & inclinantis ad eligendum id quod ex ſua intrinſeca bonitate æquale & indiſferens eſt. Quod accuratè obſeruandum eſt, vt varijs inſtantijs occurratur.

Quæres, an ſuppoſita efficaci & absoluta


intentione finis, si vnum tantum occurrat medium, ad illum obtinendum, voluntas ad eius electionem necessitetur? Respondeo affirmatiuè, idque ostendo duplici ratione. Prima sic potest proponi: Sicut se habet notitia principiorum ad notitiam conclusionum, ita se habet intentio finis ad electionem mediorum: Sed impossibile est, posita notitia principiorum, non sequi notitiam conclusionis, quæ cum ipsis habet necessariam connexionem, & cuius veritate non stante, nequit stare veritas principiorum: Ergo etiam impossibile est; stare efficacem intentionem finis, & non sequi electionem vni mediij sine quo non potest acquiri.

Secunda ratio est: Homo non potest (voluntate saltem efficaci) velle impossibilia: Si autem absolutè & efficaciter intenderet finem, & tamen nollet eligere medium quod est vnicum, & sine quo finis obtineri non potest, vellet volitione absoluta & efficaci aliquid impossibile, vt constat: Ergo non potest homo, supposita intentione efficaci finis, rejicere medium vnicum, sed ad illud necessitatur.

Dices, Talis necessitas non potest peti ex fine, cum nullus finis particularis moueat necessariò voluntatem; nec ex ipso medio, quod etiam habet tantum bonitatem finitam & limitatam, quæ non potest necessitare voluntatem: Ergo fictitia est.

Respondeo necessitatem illam neque ex fine neque ex medio solitariè sumptis, sed ex necessaria connexionem mediij cum fine: ortum habere. Sicut quando dicitur, *si Petrus currit,*

necessario mouetur, necessitas huius illationis & consequentiæ, neque ex cursu, neque ex motu Petri, quæ sunt contingentia, prouenit, sed ex connexionē necessaria quæ reperitur inter antecedens & consequens, seu inter motum Petri, & eius cursum.



C A P V T VII.

De vsu.

P Ræter electionem mediorum datur in voluntate nostra actus quo cæteras potentias applicat ad operandum, qui *usus actiue* appellatur: I. a S. Thomas hic qu. 16. art. 1. & 4. & supra in introductione qu. 8. ubi ait tres esse actus quibus voluntas mouetur ad ea quæ sunt in finem, nempe *eligere*, *consentire*, & *vi.*

Ratio etiam suffragatur, actus enim habentes idem obiectum materiale, inspectum sub diuersa ratione formali, essentialiter distinguuntur, vt patet in intentione, fruitione, & simplici complacentia, quæ licet versentur circa finem, quia tamen sub diuersa ratione formali supra explicata illum attingunt, essentialiter distinguuntur: Sed electio, & usus, etsi terminentur ad medium, tendunt tamen in illud sub diuersa ratione formali, nam electio respicit ipsum, vt pertinet ad ordinem intentionis, & est vltimum in eo, & effectus finis; usus verò respicit illud, vt pertinet ad ordinem executionis, & in eo est primum, & causa

sa efficiens finis habiti in re: Ergo distinguuntur essentialiter.

Confirmatur: Intentio quæ est actus efficax circa finem, distinguitur à fruitione eiusdem, quia hæc illum respicit præsentem, illa quasi futurum: Sed pariter electio respicit media quasi futura, usus verò ut præsentia: Ergo sunt actus specie diuersi.

Addo quod, quando noua difficultas se offert, voluntas indiget noua applicatione & conatu, subindeque nouo actu ad illam vincendam: At in executione maior difficultas se offert, quam in sola electione; quia eligere est actus merè internus, in quo voluntas solum certat secum, nec habet aliud impedimentum, aut aliam difficultatem, quam eam quæ se tenet ex parte sui; in exequendo autem non solum certat secum, sed etiam cum alijs potentijs inferioribus, & impedimentis externis, quibus sæpe frangitur animus, nisi virtute constantiæ & persëuerantiæ roboretur. Hinc experientia compertum est, nonnullos summam cum facilitate rectè iudicare, consiliari, & eligere, ac desiderare, qui in executione deficiunt, ut egregiè ac eleganter declarat Bernardus lib. i. de considerat. cap. i. his verbis: *Quoties vis, & in cassum? Quoties moues, nec permoues? Quoties conaris, & non datur ultra? Eniteris, & non obtines; parturis, & non paris; tentas, & abriperis; ubi incipis, ibi desicis; & dum adhuc ordiris, succidunt te. Venerunt filij vsque ad partum (ait Propheta) & vires non habent parturiendi.* Ergo præter actum electionis indiget voluntas nouo actu ad exequendum, seu ad applican-

candum potentias executrices ad opus.

Dices primo: Electio est volitio efficax mediorum: Ergo per seipsam sufficiens est ad eorum executionem, & sic inutilis est vsus actiuus, quo potentia exequentes applicentur ad opus.

Respondeo, concessio Antecedenti, negando consequentiam; electio enim non dicitur efficax volitio mediorum, eò quod ipsa sola, absque alio actu intellectus, & voluntatis, sufficiat vt media executioni mandentur; sed quia ad ipsam infallibiliter sequitur imperium in intellectu, & vsus in voluntate, quo applicantur potentia ad exequendum quod electum est, sicut ad intentionem efficacem sequitur infallibiliter electio mediorum.

Dices secundò: Voluntas per solam electionem mouet & applicat intellectum ad eliciendum actum imperij, qui vsus actiuus præcedit, vt constabit ex dicendis capite sequenti: Ergo pariter supposita electione potest voluntas, absque actu distincto, vti potentijs exequentibus, & ipsas ad operationem applicare.

Respondeo, dato Antecedenti, quod negant aliqui ex nostris Thomistis, negando consequentiam & paritatem. Ratio discriminis est quia in exequendo maior reperitur difficultas quam in imperando: vnde licet voluntas non indigeat actu ab electione distincto, ad applicandum intellectum ad actum imperij, bene tamen ad applicandum potentias executivas ad opus.

CAPVT VIII.

De imperio.

CIrca hunc actum duæ sunt difficultates & controuersæ breuiter hic resoluedæ. Prima est, an detur imperium in homine respectu suarum operationum? Secunda, an tale imperium, supposito quod detur, sit actus intellectus aut voluntatis?

§. I.

Datur in homine actus imperij respectu sui ipsius, suarumque operationum.

PRobatur primò ex D. Augustino, & S. Thoma: Ille enim libro 8. confess. cap. 9. sic ait: *Imperat animus, & mouetur manus, & tanta est facilitas, ut vix a seruitio discernatur imperium*: Iste verò hic qu. 17. art. 3. ad 1. hæc scribit: *Tunc demum voluntas alicuius incipit vti, exequendo imperium rationis; quandoque quidem voluntas alterius cum aliquis imperat alteri, quandoque autem voluntas ipsius imperantis, cum aliquis imperat sibi ipsi.*

Probatur secundò: In principe reperitur imperium, in ordine ad alios homines sibi subditos: Ergo & in quolibet homine, in ordine ad potentias exequentes. Probatur consequentia, tum quia sicut Princeps dominium habet in subditos, ita in quolibet homine ratio, adiuncta voluntate, alijs potentijs domi-

na-

natur. Tum etiam quia sicut in Principe est prudentia politica, cuius obiectum est bonum commune totius regni vel reipublicæ; Ita in vnoquoque homine, operante secundum rectam rationem, est prudentia monastica, cuius obiectum est proprium & particulare bonum. Ergo sicut Princeps per prudentiam politicam imperat alijs quod conuenit bono communi, sic ratio per prudentiam monasticam imperat inferioribus potentijs quod conuenit bono particulari.

Probatur tertio ratione fundamentali. Præter electionem est ponendus in voluntate alius actus, qui dicitur usus actiuus, vt capite præcedenti ostensum est: Ergo pariter, præter iudicium practicum antecedens electionem, ponendus est in intellectu alius actus, qui dicitur imperium, à quo voluntas dirigitur in actu vtendi. Consequentia probatur, cum enim voluntas sit appetitus rationalis, sequens directionem rationis, unicuique actui voluntatis elicitæ, correspondet necessario in intellectu actus dirigens illum.

Dices ad dirigendum actum usus, sufficere iudicium illud practicum quod præcessit electionem, continuatum vsque ad executionem, & sic non requiri actum imperij.

Sed contra primò: Usus distinguitur ab electione, eò quod ista sit de medio futuro, ille verò de medio vt hic & nunc exequendo, vt capite præcedenti declarauimus: Ergo pariter actus dirigens usum distinguitur ab actu dirigente electionem. Probatur consequentia: actus intellectus regulantes actus voluntatis, habent idem obiectum ac actus ab ipsis

ipsis regulari: Ergo sicut in medijs, ut habent rationem eligibilium, & exequendorum, inuenitur diuersa ratio formalis obiectiua utilitatis (scilicet utile ut futurum, & ut præsens) sufficiens ad specificandum & multiplicandum duplicem actus voluntatis; ita non poterit non reperiri in illis diuersa ratio cognoscibilitatis obiectiuae, sufficiens ad multiplicandos duos actus intellectus, scilicet iudicium, & imperium.

Contra secundò: Actus iudicij, ut continuatur post electionem, non proponit voluntati aliquid aliud, quam id quod proponebat ante electionem; aliàs non esset idem actus continuatus, sed diuersus. Sed ante electionem, vel proponebat solùm media ut eligenda, vel si ea proponebat etiam ut exequenda, non proponebat executionem, nisi ut futuram, & veluti distantem: Ergo post electionem non nisi hoc modo eam repræsentabit: Atqui actus intellectus proponens voluntati executionem ut futuram & distantem, non est sufficiens ad dirigendum vsum voluntatis, qui habet pro obiecto medium ut hic & nunc executioni mandandum: Ergo ponendus est alius actus intellectus, qui non potest esse nisi actus imperij.

Contra tertio: Ut executioni mandetur à subditis quod Princeps ab illis fieri debere iudicat, necessarium est præceptum, propter difficultatem quæ est in operis executione: Ergo cùm similis & non minor difficultas sit in eodem homine respectu suarum potenciarum, ut ab his executioni mandetur quod voluntas eligit, & intellectus conueniens esse iudicat,

dicat, constituendus erit in eodem intellectu actus imperij, à consilio, & iudicio antecedente electionem distinctus. Vnde pro tribus illis actibus tres ponuntur virtutes in intellectu: pro consilio enim ponitur eubulia; pro iudicio seu sententia synesis, aut gnomè; pro præcepto verò seu imperio prudentia, ut videri potest apud S. Thomam infra qu. 57. art. 6. & 22. qu. 48. & 51. per totam.

Obijcies primò: Vel imperium deseruit ad mouendas potentias inferiores, vel ad mouendam voluntatem? Sed ad neutrum conducit: Ergo prorsus inutile est. Minor probatur, quia cum voluntas sit potentia cœca, potentiæ verò inferiores non sunt intellectuales, tam illa quam istæ sunt incapaces percipiendi rationis imperium: Ergo illud ad mouendum voluntatem aut potentias inferiores deseruire non potest.

Respondeo imperium deseruire tam ad mouendas potentias inferiores, quam ad mouendam voluntatem, sed mediatè solùm ad mouendas potentias inferiores, immediatè verò ad mouendam voluntatem, ut potentijs inferioribus vtatur, siue illas applicet ad agendum, vnde intimatio imperij fit immediatè ipsi voluntati. Nec obstat quod voluntas sit potentia cœca, & cognitionis expers; nam sicut oculus videt toti corpori, & non solum sibi, ita intellectus intelligit omnibus potentijs; vnde sicut non est necesse quod pes vel manus videat, ut dirigatur ab oculis; ita nec quod voluntas cognoscat, ut dirigatur per actum imperij, ad eliciendum vsum, & applicandum potentias exequentes ad opus, alio-

quin

quin voluntas non solum esset incapax dirigi per actum imperij, sed nec posset regulari per iudicium rationis, & ab intellectu obiectiue moueri, quod est absurdum.

Obijcies secundò: Vel actus imperij mouet voluntatem ad executionem mediorum, quoad specificationem, vel quoad exercitium? Non quoad specificationem, cum enim iudicium præcedens electionem, dicat media non solum esse eligenda, sed etiam exequenda, sufficiens est ad mouendum voluntatem ad executionem mediorum, quoad specificationem nec quoad exercitium, quia cum voluntas, ratione sui sit primum mouens quoad exercitium, non potest ab illo quoad exercitium moueri. Præsertim cum intellectus à voluntate moueatur quantum ad exercitium; alioquin daretur inter illas duas potentias mutua causalitas & dependentia in eodem genere causæ efficientis, quod repugnare videtur.

Respondeo intellectum per actum imperij mouere voluntatem & quoad specificationem & quoad exercitium: licet enim iudicium regulans electionem proponat media vt exequibilia, & hic & nunc eligenda, non tamen proponit ea vt electa, & hic & nunc exequenda; vnde ad hoc secundum requiritur alius actus intellectus, subsequens electionem, & regulans vsum, quem vocamus imperium, vt constet ex dictis in tertia probatione nostræ assertionis. Similiter licet voluntas sit primum mouens quantum ad exercitium, ac proinde mouere quoad exercitium per se primò illi conueniat, hoc tamen non obstat, quin alicui

actui intellectus hoc secundariò ; & ex consequenti , ac per participationem à voluntate , competere possit: sicut à pari ordinatio, quæ est propria intellectus, participatur ab aliquo actu voluntatis , nempe ab electione. Vnde D. Thomas quæst. 22. de verit. art. 25. *Electio (inquit) est actus voluntatis, non absolute, sed in ordine ad rationem, eò quod in electione apparet id quod est proprium rationis, scilicet conferre unum alteri, vel præferre; quod quidem in actu voluntatis inuenitur ex intermissione rationis, in quantum scilicet ipsa ratio proponit voluntati aliquid non ut utile simpliciter, sed ut utilius ad finem.*

Ad id verò quod additur de mutua causalitate & dependentia in eodem genere causæ efficientis, dicendum est, quod licet illa repugnet respectu eiusdem actus vel effectus, non tamen respectu diuersorum, qualis solum reperitur in proposito. Nam voluntas per actum electionis mouet intellectum ad imperandum executionem mediorum: ipse verò intellectus per actum imperij, efficaciam motiuam à præcedenti electione participantem, mouet voluntatem quoad exercitium, non ad ipsam electionem, quæ est causa imperij, sed ad alium actum distinctum, nempe ad vsum actiuum, quo voluntas potentias externas applicat ad executionem mediorum. Si autem quæras, cur voluntas, quæ est primum mouens quantum ad exercitium, ad huiusmodi actum seipsam sine interuentu imperij mouere non possit? Respondebo hoc provenire ex eo quod licet habeat virtutem ad mouendum se & alias potentias ab-

so-

solutè; non tamen per modum ordinationis, hoc enim est proprium intellectus, cuius est ordinare vnum ad aliud, vt patebit ex dicendis §. sequenti.

Obijcies tertio: Homo non potest seipsum orare; Ergo nec sibi imperare. Sed nega consequentiam & paritatem: imperare enim est superioris ad inferiorem; orare è contra est inferioris ad superiorem, vnde cum in homine intellectus sit suprema potentia, quæ nullam habet aliam sibi superiorem, potest quidem per imperium inferiores potentias sibi subijcere, sed non subijci per orationem alteri potentiæ sibi superiori.

§. II.

Imperium est substantialiter actus intellectus, præsupponit tamen necessario actum voluntatis.

Prima pars probatur primò: Imperium est principalis actus prudentiæ, quæ præceptiua est, vt docet Aristoteles 9. Ethic. cap. 9. dicens *prudentia præceptiua est, finis enim ipsius est, quodnam sit agendum præcipere*: Atqui prudentia est in intellectu, cum sit virtus intellectualis, vt docet idem Philosophus 6. Ethic. cap. 4. & D. Thomas infra quæst. 57. art. 4. Ergo imperium est substantialiter actus intellectus.

Probatur secundò eadem pars: Sicut obedire pertinet ad inferiorem, ita imperare ad superiorem, quia correspondent sibi inuicem imperare & obedire: Sed ratio seu intellectus

est id quod in homine superius & præstantius est, iuxta illud Aristotelis 10. Ethic. cap. 7. *Mens est eorum omnium quæ in nobis sunt præstantissima*: Ergo imperare ad intellectum pertinet.

Tertiò siuadetur eadem pars ratione D. Thomæ hic quæst. 17. artic. 1. Imperare alicui est ordinare ipsum ad aliquid, ei intimando & denunciando quid debeat agere, vel omittere: Sed ordinare, intimare, & denunciare, ad rationem pertinent: Ergo imperare est actus rationis. Maior patet, non potest enim superior aliquid velle & imperare, nisi ad hoc agendum hominem ordinet, ei intimando & denunciando vt illud faciat. Minor verò probatur quoad vtramque partem, in primis enim ordinare vnum ad aliud, est vnum cum alio conferre: Sed collatio vnius cum alio ad intellectum practicum spectat, sicut ad speculativum illatio vnius ex alio: Ergo ordinare ad intellectum pertinet. Vnde Aristoteles 2. metaph. cap. 2. ait quod *Sapientis est ordinare*, & D. Thomas quæst. 6. de verit. artic. 1. quod *solius rationis est dirigere & ordinare*. Deinde intimatio & denuntiatio nihil aliud est quam quædam manifestatio, seu declaratio, & locutio: At manifestare & loqui pertinet ad intellectum, qui est veluti os aut lingua substantiæ spiritualis, iuxta illud Psal. 31. *Os iusti meditabitur sapientiam*: Ergo & intimare ac denuntiare.

Quod autem imperium actum voluntatis necessario præsupponat, manifestum est, supponit enim electionem voluntatis, à qualibet libertatem, & efficaciam motiuam, seu vim

mouendi participat, vt §. præcedenti declarauimus . Ex quo fit debilitatem imperij provenire in nobis ex ægitudine & infirmitate voluntatis, quæ interdum non plenè & perfectè vult bonum quod facit , & malum quod non vult agit, vt eleganter declarat Augustinus lib. 8. Confess. cap. 9. his verbis : *Imperat animus, vt velit animus , nec facit tamen. Unde hoc monstrum ? Non ex toto vult, non ergo ex toto imperat; nam in tantum imperat, in quantum vult . Voluntas imperat, non utique plena imperat, ideo non est quod imperat: Non igitur monstrum partim velle, partim nolle, sed ægitudine animi est, quia non totus assurgit, veritate subleuatus, ægitudine pregrauatus.*

Ex his intelliges actum imperij sic posse describi : Imperium est ordinatum , cum motione quadam , intimatio alicuius operis exequendi . Imperium enim , vt patet ex dictis, tria importat , seu ex triplici actu coalescit, nempe ex motione, directione , & intimatio. ne : primum habet à voluntate , quæ est primum mouens quantum ad exercitium; alia verò ab intellectu , ad quem pertinet ordinare, & loqui . Nam illæ dux potentia in suis operationibus se mutuò iuuant , intellectus enim dirigit voluntatem, & illam determinat quantum ad speciem actus , voluntas verò mouet intellectum , illamque determinat quantum ad exercitium . Quod nonnulli egregiè explicant emblemate duorum hominum , quorum vnus est cæcus, & alter claudus; cæcusque claudum gestat humeris, claudus verò cæcum dirigit oculis suis , & vt loquitur Alciatus : *Mutuat ille oculos , mutuat ille pedes.*

Obijcies primò contra primam partem assertionis testimonia D. Augustini, & S. Thomæ, qui interdum insinuare videntur, imperium esse actum voluntatis. Ille enim 8. Confess. cap. 9. ait : *Voluntas est quæ imperat.* Iste verò infrà quæst. 71. art. 6. ad 2. probat quod prima causa peccati est voluntas, quia *ipsa imperat omnes actus voluntarios, in quibus solum inuenitur peccatum.*

Sed facilè respondetur, vel eos loqui de imperio largè & impropriè sumpto, prout significat idem quod mouet in finem, quo pacto charitas actus omnium virtutum imperare dicitur, quatenus ex motione charitatis actus omnium aliarum virtutum ad dilectionem Dei, seu ad Deum summè dilectum ordinantur. Vel si loquantur de imperio stricte sumpto, de quo in præsentī agimus, solum intendunt illud esse à voluntate, non substantialiter & elicitivè, sed causaliter & originativè; quia voluntas ex intentione finis, & electione mediorum, mouet intellectum ad eliciendum actum imperij.

Obijcies secundò: Ad eam potentiam formaliter pertinet imperium, ad quam pertinet dominium, cùm imperare sit proprius actus domini & superioris in subditos: Sed dominium formaliter residet in voluntate, quæ aliarum potentiarum domina seu regina appellatur, non verò in intellectu: Ergo imperium est formaliter actus voluntatis.

Respondeo distinguendo maiorem ad quam pertinet dominium, quoad vim mouendi, nego maiorem: quoad vim denuntiandi, intinendo, & ordinando, concedo maiorem. Si-

militer distinguo minorem : dominium residet formaliter in voluntate, quantum ad vim mouendi & applicandi, concedo minorem. Quantum ad vim denuntiandi, intimando, & ordinando, nego minorem, & consequentiam. Dominium itaque duo dicit, scilicet efficaciam motiuam, & vim denuntiatiuam, ac directiuam : primum ad voluntatem pertinet, quæ idcirco aliarum potentiarum domina & regina appellatur, nam motio earum quantum ad exercitium à voluntate incipit : alterum verò ad intellectum, cuius est ordinare, denuntiare, & intimare; vnde etiam rex aliarum potentiarum dicitur, quia illas regit mediante prudentia. Imperium ergo pertinet substantialiter ad potentiam ad quam pertinet dominium; non quoad vim mouendi, sed quoad vim dirigendi; quia cum pertineat ad imperium rationabiliter procedere, debet non tantum mouere & impellere subditos, sed rationabiliter & moderatè regere, quod fit per prudentiam, & rationis directionem.

Obijcies tertio : Omnis actus intellectus vel est simplex apprehensio, vel iudicium, vel discursus, non enim alia nisi tres illæ mentis operationes à Philosophis assignantur : Sed imperium non est simplex apprehensio, neque iudicium, neque discursus : Ergo non est actus intellectus, sed voluntatis.

Respondent aliqui ex nostris Thomistis, imperium pertinere ad secundam mentis operationem, & esse iudicium practicum subsequens electionem, quod iudicium *practicè practicum* appellant, vt illud distinguant à iudicio regulante electionem, quod practicum simpliciter dicitur.

Sed contra : In omni iudicio intellectus inuenitur veritas vel falsitas : Sed in imperio neque veritas neque falsitas reperitur : Ergo imperium non est iudicium practicum subsequens electionem . Minor probatur , nam quando aliquis imperat alteri *fac hoc* , neque dicit verum , neque falsum , quia non asserit aliquid esse vel non esse ; vnde aliquis non dicitur verè vel falsò alteri imperare , sed benè vel malè .

Meliùs ergo respondetur cum D. Thoma 2. 2. qu. 83. art. 1. ad 3. tres mentis operationes quæ à Philosophis communiter assignantur , pertinere ad intellectum speculatiuum , ad practicum verò pertinere alios actus distinctos , quales sunt oratio & imperium .

Observandum tamen est , quod licet imperium non sit formaliter iudicium , in illo tamen iudicium aliquod virtualiter reperitur ; æquiualeat enim huic iudicio , *hoc tibi faciendum est* , vel *expedit tibi vt hoc facias* , & ideo dicitur iudicium *practicè practicum* , ad distinctionem iudicij antecedentis electionem , quod licet sit *practicè practicum* respectu electionis , efficaciter mouendo hic & nunc voluntatem ad eam eliciendam , est tamen practicum tantum speculatiuè , respectu executionis mediorum ; quia solùm proponit eius conuenientiam per modum simplicis enuntiationis , non verò per modum intimationis impulsivæ .

CAPVT IX.

*De moralitate actuum humanorum
in communi .*

CUm humanorum actuum naturam sciri esse physicum moralitas consequatur, postquam illos in esse physico, & ut ad ordinem naturæ pertinent, considerauimus, consequens est ut de illorum moralitate, seu bonitate & malitia morali, differamus. Verum quia notitia gradus generici non parum iuuat, ut species sub illo contentæ perfectè dignoscantur, de moralitate in communi prius agendum est, & quid illa sit, quidue supra libertatem addat, breuiter explicandum.

Suppono ergo tanquam certum, libertatem esse quidem fundamentum moralitatis actuum humanorum, non tamen ipsam moralitatem formaliter, cum prius intelligatur libertas in actibus humanis, quam moralitas; prius enim concipimus, intellectu proponente aliquod obiectum cum indifferentia, voluntatem in illud cum indifferentia tendere (in quo formaliter consistit libertas) quam habere esse morale in suo actu; imò ex eo tanquam à ratione à priori habet esse morale in suo actu, quod tendat in obiectum cū indifferentia, quia ex eo actus habet quod sit mensurabilis per regulas morum. Addo quod, si nulla esset regula morum, puta nulla lex, adhuc posita indifferentia iudicii in intellectu, intelligeretur libertas in actibus voluntatis, & tamen in tali casu nulla esset in eis moralitas: Ergo mo-

ralitas non est formaliter ipsa libertas. Vnde quando S. Thomas interdum ait, actum voluntatis esse humanum, inquantum est liber, vel in inquantum procedit à liberatione rationis, ly *inquantum*, in sensu causali, non formaliter accipiendum est.

Moralitas ergo actuum humanorum consistit formaliter in relatione actus liberi ad regulas morum: Tum quia ratio moralitatis in actibus humanis pertinet ad genus mensurabile, & regulabilis per regulas morum: mensurabile autem, vt tale, dicit ordinem ad mensuram. Tum etiam, quia de moralibus eodem proportionali modo debemus philosophari, sicut de artificialibus: Sed in artificialibus tota formalis ratio artefacti, sumitur ex ordine ad ideam & regulas artis; quæ sunt in mente artificis: Ergo & in moralibus tota formalis ratio moralitatis debet sumi ex ordine seu relatione quam actus humani dicunt ad suam regulam seu mensuram.

Hæc autem relatio non est rationis, sed realis, cum conueniat actibus humanis independenter ab omni fictione intellectus; nam reuera & à parte rei actus humani sunt moraliter boni vel mali, meritorij vel demeritorij, laudè aut vituperio digni. Non est tamen prædicamentalis, sed solum transcendentalis. Tum quia bonitas moralis habet contrarium, nempe malitiam moralem: relationi autem prædicamentali nihil est contrarium. Tum etiam, quia relatio prædicamentalis respicit terminum, vt purè terminum, habitudo autem ad obiectum vt subditum regulis morum, in qua moralitas actuum humanorum consistit,

fit, non respicit illum vt purum terminum, sed vt specificatum, & causam formalem extrinsecam. Tum denique, quia relatio pradicamentalis dependet ab existentia termini, quo desinente euanescit & moralitas verò non ita, cum possit dari actus complacentiæ de bono præterito bonus; & delectatio morosa de actu præterito malo peruersa.

Ex his intelliges discrimen inter esse morale monetæ v. g. & esse morale actuum humanorum: valor enim monetæ, & pretium rerum venalium, directè & immediatè à voluntate vel intellectu humano sumitur: moralitas autem actuum humanorum, licet leges diuinas & humanas supponat, ab illis tamen immediatè non sumitur, sed ab ordine transcendentali quem huiusmodi actus dicunt ad obiectum vt regulis morum subiectum, qui ordo est realis & illis intrinsecus. Nec obstat quod obiectum interdum non sit reale, vel realiter existens; licet enim ordo pradicamentalis requirat terminum existentem, transcendentalis tamen potest versari circa non-existent, & circa non-entia, vt constat in logica, quæ licet sit scientia realis, versatur tamen circa secundas intentiones, quæ in obiectis nihil reale ponunt. Item dignitates & honores, iurisdictionem, præcedentiam, & alia similia realibus actibus desideramus, & ambimus, & tamen non sunt nisi denominationes & entia rationis.

Dices idem numero actus, sine aliqua reali mutatione, potest fieri de bono malus, imò & de non morali moralis, vt constat in esu carniū continuato à feria quinta in feriam sex-

tam, qui sine reali mutatione, propter extrinsecam mutationem temporis efficitur malus moraliter, & in motu primo, qui si continetur, aduertente ratione, de non morali fit moralis, sicut de non libero liber: Ergo moralitas non est aliquid reale & intrinsecum actibus humanis, sed merum ens rationis, vel denominatio pure extrinseca.


Respondeo negando. Antecedens, quando enim actus mutatur de bono in malum, aut de non morali in moralem, mutatur intrinsece in esse moris, quia tunc suscipit nouum modum realem, seu nouum respectum ad obiectum, qui ordo actibus humanis realiter inhæret, vt de relatione ad finem dicit D. Thomas hic art. 4. ad 2.

Instabis, ille ordo non est prædicamentalis, sed solum transcendentalis, vt supra diximus: Ergo non inhæret. Consequentia patet, ordo enim transcendentalis, cum non distinguatur à fundamento, sicut prædicamentalis, non inhæret subiecto, sicut ille.

Respondeo actus humanos & morales duplicem habitudinem ad obiectum regulis morum subiectum importare; vnā transcendentalem, quæ illud vt specificatiuum & causam formalem extrinsecam respiciunt; aliam prædicamentalem, quæ idem obiectum per modum puri termini & correlatiui attingit. Prima prius in obiecto intelligitur, vnde aliam fundat, quæ actibus humanis realiter inhæret, & de ista loquitur S. Thomas, cum ait quod *relatio in finem inhæret actioni*. Potest hoc explicari exemplo scientiarum, quæ duplicem dicunt habitudinem ad obiectum; vnā tran-

scen-

scendentalem, per quam specificantur; alteram prædicamentalem, quæ est mensurabilis ad mensuram, & ad tertium genus pertinet, ac priorem ut rationem fundandi præsupponit; unde licet prima non inhæreat subiecto, bene tamen secunda.



CAPUT X.

De speciebus moralitatis.

MOrale genus de quo capite præcedenti tractatum est, diuiditur in duas species bonitatem scilicet & malitiam moralem: Bonitas moralis consistit in respectu transcendentali ad obiectum ut consonum regulis morum, ut euidenter colligitur ex principiis capite præcedenti statutis. Cum enim bonitas sit species moralitatis, debet ex parte generis importare idipsum quod importat moralitas, subindeque modum illum habitudinis in quo moralitatis essentiam collocauimus. Ex parte verò differentie, nihil aliud potest addere, nisi quod talis habitudo sit ad obiectum ut consonum regulis morum; tum quia per hoc distinguitur à malitia, quæ respicit obiectum dissonum; tum etiam quia bonitas cuiuslibet rei est conformitas cum sua regula, ac proinde bonitas actus humani, debet esse conformitas cum regula talis actus, quæ est recta ratio.

Confirmatur: Bonitas moralis, cum pertineat ad genus mensurabilis & regulabilis per regulas morum, & mensurabile, ut tale, dicat

dicat ordinem ad mensuram, non potest consistere in modo absoluto, actu humano superaddito, sed solum in aliquo respectu ad ipsius mensuram: Sed talis respectus non est rationis, ut constat ex dictis capite præcedentis; neque prædicamentalis, cum non tendat ad terminum sub ratione puri termini, sed illum per modum specificatiui & causæ formalis extrinsecæ respiciat, & interdum tendat in obiectum non existens, sicut cum quis appetit bonum possibile: Ergo solum potest esse respectu transcendentalis ad obiectum ut consonum regulis morum.

Obijcies: D. Thomas hic quæst. 18. art. 1. explicans essentiam bonitatis moralis, non meminit talis respectus seu habitudinis, sed collocat illam in plenitudine essendi, ut scilicet actioni humanæ nihil deficiat ex his quæ suo esse congruunt, cuiusmodi sunt debitus finis, debita quantitas, debitus locus &c. Ergo non in tali respectu seu habitudine, sed in horum collectione, prædicta bonitas consistit.

Confirmatur: Idem S. Doctor ibidem prædicat bonitatem moralem cum naturali: Sed ad bonitatem & perfectionem in rebus naturalibus, non est necesse aliud ponere quam collectionem omnium eorum quæ ad rei integritatem & plenitudinem requiruntur & debent concurrere, ut constat inductione in quacunque re naturali, ut homine, equo, flore &c. quæ tunc habent bonitatem & perfectionem, cum nihil illis deest ex his quæ ad eorum integritatem & plenitudinem necessaria sunt: Ergo similiter bonitas moralis actuum humanorum consistit in collectione omnium

omnium quæ ad eos requiruntur, sine ordine vel habitudine superaddita.

Ad obiectionem respondeo quod quando S. Thomas dicit bonitatem moralem actuum humanorum consistere in plenitudine essendi, quam constituit in collectione obiecti, finis, & circumstantiarum debitarum, non loquitur in sensu formali, sed causali, & solum intendit quod habitudo ad obiectum consonum rationi in qua bonitas moralis formaliter consistit, necessariò præsupponit in acta morali debitum obiectum, finem, & circumstantias, eaque omnia exigit ad hoc ut in tali actu resultet. Vnde exemplum quod affert de bonitate physica, tenet quantum ad aliquid, non quantum ad omnia. Paritas in eo consistit, quod sicut ad huiusmodi bonitatem requiritur quod res habeat omnes perfectiones & formas sibi debitas secundum exigentiam propriæ naturæ, & qualibet deficiente res ex ea parte dicitur mala & imperfecta; ita ad bonitatem humanæ actionis opus est omnibus quæ recta ratio postulat, & per quemcumque defectum & carentiam illorum, redditur mala & peccaminosa. Ratio autem discriminis est, quia in rebus absolutis, qualis est substantia, regula bonitatis non est aliquid extrinsecum, sed ipsum subiectum, & propterea tota bonitas sumitur ex convenientiâ ad illud, neque est aliud præter ipsas formas quæ subiecto conveniunt. In actionibus verò quarum totum esse est in ordine ad obiectum, tota bonitas est respectiva, & propterea aliud est quod requiritur per modum termini, ut talis bonitas resultet, scilicet obiectum conveniens, finis rectus,

ctus, & circumstantiæ debitæ, & aliud ipsa bonitas quæ ex illorum collectione & concurrentia in actu humano consurgit. Ex quo patet responsio ad confirmationem.

Ex dictis de bonitate morali facilè colligitur quid sit dicendum de malitia morali, quæ est altera species moralitatis illi opposita; supposito enim quod talis malitia consistat inpositiuo (vt magis communiter docent Theologi, & ostendemus in tractatu de peccatis) non potest in alio consistere, quam in habitu dine transcendentali ad obiectum vt dissonum regulis morum, cùm debeat in ratione generica moralitatis conuenire cum bonitate, subindeque secundùm gradum genericum importare habitudinem illam in qua moralitas formaliter consistit; in ratione verò specifica debet constitui per habitudinem ad obiectum, oppositum ei quæ constituit bonitatem moralem: Vnde cùm bonitas moralis constituatur per habitudinem ad obiectum vt consonum regulis morum; malitia moralis debet constitui per ordinem transcendentalem ad obiectum, vt illis dissonum ac disforme. De quo fusius in tractatu de peccatis cap. 8.

Quæres, an actus indifferentes ex obiecto & secundùm suam speciem, vt leuare festucam colligere flores, & similia, sint verè morales, subindeque indifferentia sit aliqua species moralitatis, media inter bonitatem & malitiam?

Respondeo illos posse dici morales initiativè & radicaliter, quatenus ex deliberata voluntate procedunt, & ex fine aut circumstantijs possunt induere moralitatem, & in hoc sensu D. Thomam qu. 2. de malo art. 5. illos

illos appellare morales secundum suam speciem; illos tamen non esse morales formaliter, & completè; quia moralitas formalis & completa sumitur ex subiectione ad leges, quæ sunt regulæ moralitatis actuum humanorum; ut constat ex dictis capite præcedenti: Actus verò ex obiecto & specie indifferentes, non cadunt sub lege positivè, sed tantum negativè, in quantum lex non curat de ipsis, & ab illis suam dispositionem retrahit, quod ad moralitatem non sufficit.

Dices, D. Thomas infra qu. 92. art. 2. ait quod *lex habet tres actus, scilicet prohibere, præcipere, & permittere*. Et addit: *Sunt autem tres differentie actuum humanorum. Quidam sunt actus mali ex genere sicut actus vitiosi, & respectu horum lex habet prohibere. Quidam vero ex genere suo sunt actus indifferentes, & respectu horum lex habet permittere*. Ergo circa actus indifferentes datur aliquis specialis actus legis, scilicet permissio.

Confirmatur: Nihil est in rerum natura, siue malum, siue bonum, siue indifferens, quod non cadat sub lege æterna, quæ est prima regula totius moralitatis: Ergo actus indifferentes sunt subiecti saltem legi æternæ.


Pro solutione huius argumenti sciendum est, permittere dici actum legis positivum & negativum. Dicitur actus positivus, vno tantum modo, quando scilicet lex dispensat in aliquo quod debebat fieri, v. g. in recitatione officij, in ieiunio, & similibus quæ lex præcipit, & in quibus superior ex iuxta & legitima causa dispensat. Dicitur verò actus negativus quadrupliciter. Primo quando lex
non

non præcipit quod melius est: Sic matrimo-
nium dicitur permissum, quia virginitas non
est in præcepto. Secundò quando lex non
prohibet: sic conuolare ad secundas nuptias
dicitur permissum, quia non est prohibitum.
Tertiò quando aliquid non impedit, cum pos-
sit: sic Deus dicitur permittere peccatum, quia
illud non impedit. Quartò quando lex non
punit aliquod malum ad vitandum deterius.
Quando ergo D. Thomas docet permittere
esse actum legis, vel loquitur de permissione
positiua, qua lex dispensat in aliquo quod
erat prohibitum, & non licebat fieri, illudque
permittit, v. g. comedere carnes tempore qua-
dragesimæ, aut nubere cum consanguinea in
secundo gradu, qui actus non sunt indifferen-
tes, sed boni, & non sint conformes legi dispen-
santi, & tollenti ab obiecto deformitatem
quam aliàs haberet. Vel loquitur de actu ne-
gatiuo, qui non sufficit ad moralitatem, cum
ad eam requiratur, vt actus positiuè legi su-
biectus sit.

Ad confirmationem distinguendum est an-
tecedens: Nihil est quod non cadat sub lege
æterna, vt est ratio diuinæ prouidentia, & in
ordine ad Deum, transeat: Quod non cadat
sub lege æterna, prout est regula voluntatis
creatæ, ac proinde in ordine ad nos, negatur.
Enim verò lex æterna potest considerari: vel
vt est ratio diuinæ voluntatis, qua regulantur
actus ipsius Dei in productione & guberna-
tione creaturarum; vel vt medio dictamine
rationis participatur à nobis, & applicatur ad
regulandum actus nostros, prout à nobis libe-
rè exercentur. Primo modo sub illa cadunt
omnia.

omnia quæ sunt in rerum natura , sicut omnia cadunt sub prouidentia & voluntatē diuina. Secundo autem modo ea solum cadunt sub illa quæ cadunt sub hominis potestate , secundum quod de illis ratio dicitur esse ab homine facienda ; & quia de indifferentibus secundum se nihil dicitur, ideò prout sic non cadunt sub prædicta lege , atque adeò ex habitudine ad illam non recipiunt aliquam speciem moralitatis.

Ex his intelliges , indifferentiam non esse aliquam speciem moralitatis , medium inter bonitatem & malitiam, sed moralitatem adæquatē diuidi in bonitatem & malitiam moralem ; obiectum enim actuum humanorum à quo illi moralitatem desumunt , non respicit rationem & regulam , nisi aut ipsam adæquando, aut non adæquando; si eam adæquet, est ipsi conforme , si eam non adæquet disforme : Ergo duplex tantum moralitas obiectiua potest reperiri in obiectis actuum humanorum, nempe conformitas cum lege , quæ specificat bonitatem moralem , & difformitas seu deuiatio à lege , quæ malitiam moralem constituit , & inter illas nullum potest dari medium positium, sed tantum negatiuum , per negationem vtriusque extremi, sicut nec inter par & impar, simile & dissimile , vt docet D. Thomas hic art. 8.



CAPVT XI.

*De principijs moralitatis actuum
humanorum.*

TRia sunt principia moralitatis actuum humanorum, nempe obiectum, circumstantia, & finis, de quibus breuiter hic agendum est.

§. I.

Prima & specifica moralitas actuum humanorum sumitur ex obiecto.

PRobatur ratione D. Thomæ hic art. 2. Sicut in naturalibus prima & specifica bonitas rei naturalis sumitur ex forma quæ dat illi speciem, ita in moralibus prima & specifica bonitas moralis attendi debet ex forma quæ dat speciem actui humano: Sed obiectum se habet vt forma dans speciem actui morali. Ergo ab eo sumitur prima & specifica bonitas moralis in actibus humanis. Maior patet, Minor probatur. Omnis motus & via ad terminum, respicit ipsum tanquam propriam formam, quia comparatur ad eum veluti potentia ad actum, & sicut determinabile ad determinatum: Sed actus est, essentialiter via & tendentia in obiectum: Ergo illud se habet vt forma dans illi speciem.

Confirmatur: Actus humanus, tam in esse moris, quam in esse physico consideratus, est essentialiter respectiuus: Ergo debet sumere pri-

primam suæ moralitatis speciem ab eo quod primariò respicit: Sed primum quod respicit est obiectum, circumstantias enim attingit tantùm secundariò & ex consequenti: Ergo sumit primam suæ moralitatis speciem ab obiecto, non quidem in esse rei, sed in esse moris considerato; cùm diuersi actus voluntatis, quorum vnus est bonus, & alter malus, possint ferri in idem obiectum in esse rei & entitatiuo: nam eadem pecunia potest esse obiectum furti & restitutionis, idem cibus obiectum gulæ & temperantiæ, eadem fœmina matrimonio coniuncta obiectum adulterij & actus coniugij. Quemadmodum in scientijs eadem conclusio, vt attingitur & demonstratur per diuersa media, pertinet ad diuersas scientias. Vnde sicut vnitas scientiarum sumitur ab obiecto, non in esse rei, sed in esse scibilis spectato; ita prima & specifica actuum humanorum moralitas est ex obiecto, non in esse rei, sed in esse moris, & vt consonat vel dissonat rectæ rationi considerato.

Observandum tamen est, quod quando dicimus, primam & specificam actuum humanorum moralitatem desumi ab obiecto, hoc intelligi debet de actibus bonis, aut malis, non verò de indifferentibus quantum ad speciem; nam cùm illi versentur circa obiectum purè indifferens, quod regulis morum non subditur, primam & substantialem moralitatem non desumunt ab obiecto, sed à prima circumstantia, quæ determinat formaliter ipsum obiectum ad rationem boni. vel mali obiectiue; vnde tunc circumstantia non habet rationem puræ circumstantiæ, seu

acci-

accidentis, respectu actus, sed transit quodammodo in rationem obiecti moraliter specificantis.

Obijcies primò : Actus humanus primam suam moralitatis speciem desumit ab eo quod primò respicit : Sed primum quod respicit est finis ; obiectum enim est volitum propter finem , ac proinde finis est prius volitus : Ergo actus humanus primam suam moralitatis speciem , non ab obiecto , sed à fine desumit . Vnde Div. Thomas hic art. 6. & supra quest. 1. docet actus morales sumere speciem ex fine .

Respondeo primum quod actus humanus respicit esse quidem finem operis , qui dicitur finis intrinsecus , & coincidit cum obiecto , non verò finem operantis , qui dicitur extrinsecus , quia tendentia ad hunc vel illum finem operantis accidit actui humano , puta quod eleemosyna v. g. fiat propter vanam gloriam , vel ad satisfaciendum pro peccatis . Vnde quando D. Thomas docet actus humanos sumere speciem à fine , vel non loquitur de prima specie moralitatis , vel loquitur de fine operis , qui convenit cum obiecto , non verò de fine operantis , qui ab illo distinguitur .

Dices , dantur actus boni ex sua specie , qui nullam habent bonitatem ex obiecto , sed solum ex fine ad quem ab operante ordinantur ; nam actus fortitudinis v. g. ex proprio obiecto , quod est tolerantia passionis aut mortis , nullam habet bonitatem , nisi adiungatur finis extrinsecus alicuius virtutis perfectioris , ver. gr. fidei aut iustitiæ , vt docet Sanctus Tho-

Thomas 2. 2. qu. 124. art. 3. Idem patet in actu virginitatis, seu omnimoda abstinencia à venereis, quæ non est actus virtutis, nisi ad cultum Dei, & coelestium contemplationem referatur, ut tradit idem S. Doctor ibidem qu. 152. art. 3. ad 3. Ergo prima & specifica bonitas actuum humanorum, non sumitur ab obiecto, seu à fine operis, sed à fine extrinseco operantis.

Respondeo hos etiam actus primariam bonitatem habere ex obiecto, nam actus fortitudinis ex tolerantia passionum, & virginitas ex omnium venereorum abstinencia commendatur, cum in his gravis sit evincenda difficultas, quam sola superat virtus. Requiritur tamen per modum conditionis, huius extrinsecus operantis, ut habeant omnimodam honestatem & bonitatem moralem, non tamen per modum rationis formalis. Duobus enim modis potest requiri finis bonus operantis ad actum bonum, nempe per modum rationis formalis ex parte obiecti se tenentis; & per modum conditionis seu extrinseci connotati. Tunc requiritur per modum obiecti formalis, quando etiam eo posito obiectum nullam habet bonitatem, præter bonitatem ipsius; ut cum aliquis vult ire in agrum ad acquirendam sanitatem, egressus enim iste in agrum, non aliam habet honestatem, præter eam quæ est in illo fine extrinseco, nempe acquisitione valetudinis. Tunc verò se habet per modum conditionis, seu extrinseci connotati, quando obiectum ex sua natura specialem habet honestatem, præter honestatem finis, quam tamen non haberet
absque

absque tali conditione vel connotato, vt contingit in exemplis adductis.

Obijcies secundò: Hic actus, *volo bene-
fice vivere*, est singularis, & determinatus in
genere moris, & tamen eius obiectum non est
determinatum, sed communissimum: Ergo
moralitas specifica actuum humanorum non
desumitur ab obiecto.

Respondeo quod licet obiectum illud in
esse rei sit commune & genericum, tamen
prout respicitur sub vno motiuo consonantie
ad rationem, est vnum in ratione obiecti, si-
cut obiecta scientiarum, habituum, & po-
tentiarum, quantumuis ampla sint, & late
diffusa: tamen vt substernuntur vni rationi
formali, vnitatem specificam in ratione ob-
iecti pertinent.

§. II.

*Actus humani aliquam bonitatem vel mali-
tiam desumunt à circumstantiis.*

Hanc assertionem probat D. Thomas hic
art. 3. ex analogia rerum moralium ad natu-
rales, in quibus bonitas & perfectio sumitur
non solum à forma, quæ dat speciem, sed
etiam ab accidentibus: v.g. in homine bo-
nitas & pulchritudo sumitur non solum ex
forma, sed etiam ex figura, debita propor-
tione, & alijs accidentibus: cum enim quod-
libet ens creatum sit potentiale, tota pleni-
tudo essendi illius non consistit in essentia,
sicut in Deo, sed etiam in accidentibus es-
sentia superadditis: Ergo pariter in actibus hu-

humanis bonitas non solum sumitur ex obiecto, quod se habet ad modum formæ tribuentis speciem, ut § præcedenti ostensum est, sed etiam à circumstantiis, quæ sunt quædam accidentia ei adiuncta. Ratio verò à priori est, quia tales circumstantiæ possunt importare ordinem conuenientiæ vel disconuenientiæ ad rationem, diuersum ab eo quem importat obiectum: non solum enim est disconueniens rationi furari, sed etiam furari in loco sacro, aut in magna quantitate: Ergo possunt causare in actu bonitatem aut malitiam moralem, diuersam ab ea quæ prouenit ex obiecto.

Dices primò: Omnis circumstantia moralis afficiens obiectum, transit in rationem obiecti, cum nullam afferat actui quem circumstat bonitatem vel malitiam, nisi sit volita; quod autem volitum est, utique est obiectum voluntatis, sicut omne visum est obiectum visus: Ergo perperam distinguimus bonitatem ex circumstantiis, à bonitate petita ex obiecto. Vnde S. Thomas hic qu. 19. art. 2. docet actum interiorem à solo obiecto bonitatem desumere.

Respondeo circumstantias non transire in rationem obiecti, quando non sunt per se primò & immediatè volitæ, sed tantum mediatè, & secundariò, seu per modum accidentis & accessorij superuenientis. Tunc nihilominus habent aliquo modo rationem obiecti, quia intra obiectum saltem secundarium voluntatis continentur. Et in hoc sensu dicit Sanctus Thomas actum interiorem à solo obiecto bonitatem desumere, nomine enim obiecti intelligi non solum id quod voluntas

directè , primariò , & immediatè vult , sed etiam quidquid est ab ea volitum , siue immediate, siue mediatè , siue primariò , siue secundariò , siue directè , siue indirectè , quomodocumque enim aliquid sit volitum , est aliquo modo voluntatis obiectum.

Dices secundò: Circumstantiæ vt plurimum sunt extrinsecæ actui humano , vt pater de loco & tempore : Ergo non possunt illi dare bonitatem vel malitiam intrinsecam. Sed nego consequentiam, quemadmodum enim actus humani desumunt ab obiecto bonitatem vel malitiam moralem intrinsecam, specificam & essentialem; quia licèt illud sit actui extrinsecum , ordo tamen transcendentalis ad ipsum ei intrinsecus est : ita quoque à circumstantijs accipiunt bonitatem vel malitiam moralem intrinsecam, sed accidentalem : quia pariter ordo transcendentalis quem dicit actus humanus ad circumstantias, eis intrinsecus est.

§. III.

Actus humani desumunt etiam bonitatem vel malitiam à fine extrinseco operantis , distinctam ab ea quam habent ex obiecto & fine intrinseco operis .

Ratio est, quia omnis actus humanus dependet à fine, eiusque influxu , iuxta illud Matth. 6. *Lucerna corporis tui est oculus tuus , si oculus tuus fuerit simplex , totum corpus tuum lucidum erit , &c.* Ergo si finis sit bonus , non potest influere bonitatem, si prauus non potest non refundere prauitatem.

Vnde

Vnde opus ex obiecto bonum , in vltiorem finem bonum ordinatum, melius est , magisq; meritorium ; & è contra opus ex obiecto malum , ad vltiorem finem malum relatum, maiorem habet malitiam & deformitatem. Qui enim ieiunat , vel castitatem seruat ex voto , vltra honestatem operis , addit honestatem & meritum religionis ; & qui furatur ad inuendendum, præter peccatum furti, committit peccatum fornicationis vel adulterij .

Hæc sunt certa & indubitata apud omnes, sed difficultas & controuersia est inter Theologos , à quo actus ad finem extrinsecum ordinatus, habeat speciem essentialem bonitatis aut malitiæ , an ab obiecto , vel à fine ? Pro resolutione notandum est , actum ad finem extrinsecum ordinatum , v. g. volitio dandi eleemosynam ad satisfaciendum pro peccatis, dupliciter posse considerari , vel reduplicatiuè, vt imperatur à pœnitentia , & procedit ex virtute & intentione ipsius , quasi medium electum ad satisfaciendum : vel specificatiuè, in quantum est actus misericordiæ , respiciens honestatem sui obiecti , quamuis aliunde imperetur & ordinetur ad alium finem vltiorem. Hoc præsupposito.

Dico primò, actus imperatus , vt talis formaliter & reduplicatiuè, non specificatur ab obiecto; sed à fine operantis.

Probatur breuiter : Actus imperatus , in quantum huiusmodi , respicit essentialiter finem operantis : v. g. volitio dandi eleemosynam , vt imperata à virtute pœnitentiæ , respicit essentialiter honestatem pœnitentiæ , & non sistit in suo obiecto proximo , nempe ho-

nestate misericordiæ : Ergo vt sic specifica-
tur : fine operantis . Consequentia patet, re-
spectiua enim (qualia sunt actus humani tam
in esse physico quam in esse moris considerati)
specificantur ab eo quod per se primò & es-
sentialiter respiciunt . Antecedens verò sic
ostenditur : Actus imperatus , inquantum hu-
iusmodi, respicit essentialiter id quod respicit
virtus à qua imperatur : Sed virtus à qua im-
peratur volitio dandi eleemosynam , ad satis-
faciendum pro peccatis, nimirum poenitentia,
respicit essentialiter finem operantis , nempe
satisfactionem pro peccatis : Ergo & ipsa vo-
litio eleemosynæ, vt imperata à tali virtute.

Confirmatur : Actus imperatus , vt talis
formaliter , est subordinatus actui imperanti,
& quodammodo vnus & idem cum eo , vnde
inquantum huiusmodi habet suam specificatio-
nem essentialem ab eo à quo actus imperans
eam desumit : Sed actus imperans specifica-
tur à fine operantis, quem tanquam proprium
& immediatum obiectum respicit : Ergo &
actus imperatus , formaliter & reduplicatiue
quæ talis , à fine operantis speciem sumit.

Dico secundò, actus imperatus, specificati-
ue sumptus , non à fine operantis , sed ab
obiecto seu fine operis specificatur . Primò
enim & immediatè respicit obiectum , secun-
dariò verò & mediatè finem operantis , vt
constat in exemplo adducto, volitio enim dan-
di eleemosynam , à virtute poenitentia impe-
rata, primò & per se respicit honestatem mi-
sericordiæ , secundariò verò & per accidens
tendit in bonum poenitentia, ad quod ab ope-
rante ordinatur , imò talem finem non respi-
cit,

est, nisi ut terminata ad proprium obiectum, subindeque ut ab eo specificata. Vnde finis operantis est circumstantia actus imperati absolute considerati, quæ vocatur circumstantia *cur*: actus verò humani non specificantur à circumstantijs, nec ab eis bonitatem aut malitiam essentialem, sed duntaxat accidentalem desumunt, ut constat ex dictis §. præcedenti. Addo quod, si actus imperati specificarentur à fine imperantis, omnes actiones iusti, qui se & omnia sua per charitatem retulit in Deum, essent eiusdem speciei essentialiter, nempe charitatis, & sic iustus nunquam exerceret actus aliarum virtutum, subindeque illæ in eo essent otiosæ & superflue, quod est absurdum; sic enim charitas non esset forma, sed expulsio, nec corona, sed ruina aliarum virtutum.

Ex his intelliges, quod facta comparatione inter duas illas species quæ in actu imperato reperiuntur, illa quæ sumitur ex obiecto est essentialis, altera verò quæ ex fine, accidentalis. Ut enim mox dicebamus, ordinatio in finem operantis se habet per modum circumstantiæ, & accidentaliter aduenit actui, potestque adesse vel abesse ab illo: ordo verò ad obiectum inuariabilis est, & nunquam potest ab actu separari.

Dices primò: Aristoteles 5. Ethicorum cap. 2. docet quod ille qui furatur ad moechandum, est magis moechus quam fur: Ergo censet illum actum esse magis in specie moechiæ quam furti, subindeque illam non istam esse essentialem.

Respondeo quod ille qui furatur ut moechetur, non dicitur magis moechus quam fur,


ex eo quod actus furandi speciem sumat à fine luxuriæ, sed quia actus imperans est principalior, & erga luxuriam magis afficitur sic operans, quam circa bonum alienum quod furatur. Addo Philosophum posse intelligi & explicari de actu imperante, in quantum huiusmodi, & ut est talis formaliter & reduplicatiuè; sic enim consideratus non specificatur ab obiecto, sed à fine operantis, ut in prima conclusione ostensum est.

Dices secundò: Plura peccata habent speciem essentialem à solo fine; & non ab obiecto: nam D. Thomas 2. 2. qu. 110. art. 2. ex diuersis finibus distinguit diuersas species mendacij; si quis enim proferat mendacium animo recteandi se vel alium, dicitur mendacium iocosum; si ex intentione iuuandi proximum, mendacium officiosum; si ex intentione illi nocendi, mendacium perniciosum. Similiter si quis verbum iniuriosum proferat animo auferendi honorem proximo, est contumelia; si ex intentione dissoluendi amicitiam, susurratio; si ex intentione confundendi audientem, irrisio: Ergo actus humani habent speciem essentialem à fine operantis, non verò ab obiecto.

Respondeo distinguendo Antecedens: plura peccata habent speciem essentialem à fine, prout habet rationem finis præcisè, nego. Prout redundat in ipsum obiectum, & intrinsecam causat in eo diuersitatem, concedo. Potest enim fieri ut finis qui apparet esse extrinsecus, & operantis, sit reuera intrinsecus, & operis, ut contingit in exemplis adductis: nam quia obiectum & finis intrinsecus men-

da-

clacij est dicere falsum, cum intentione fallendi, vt docet D. Thomas 2. 2. qu. 110. planum est intentionem pertinere ad obiectum mendacij. Vnde dicere falsum cum intentione fallendi in materia iocosa, constituit mendacium iocosum; in materia officiosa, mendacium officiosum; in materia perniciofa, mendacium perniciosum. Idem cum proportione dicendum est de alijs peccatis linguae, vt de detractiōe, susurratiōe, discordia, &c.



CAPVT XII.

An possit idem actus voluntatis simul & eodem tempore, diuersas species moralitatis habere, & esse bonus ex obiecto, & malus ex fine, vel è contra malus ex obiecto, & bonus ex fine?

R Espondeo negatiue cum D. Thoma hic qu. 19. art. 7. ad 2. vbi sic ait: Qui vult dare eleemosynam propter inanem gloriam consequendam, vult id quod de se est bonum sub ratione mali, & ideo prout est volitum ab ipso est malum, vnde voluntas eius est mala. Et in 2. dist. 38. qu. 1 art. 4. ad 4. Cum aliquis vult dare eleemosynam propter inanem gloriam, hic est vnus actus voluntatis, & hic actus totus malus est, licet non ab omni eo quod in eo est malitiam habeat. Ratio etiam id suadet, nam licet obiectum huius actus: volo dare eleemosynam propter inanem gloriam, materialiter & in esse entis sit bonum, formaliter

ter tamen, & in esse obiecti, & vt actum illum terminat ac specificat, non est bonum, sed malum. Tum quia habet rationem mediij ordinati ad malum finem, scilicet vanam gloriam; vnde non est conforme sed difforme dictamini rectæ rationis & prudentiæ; prudentia enim & recta ratio dicunt bonum bene esse faciendum, & bonum fieri malè, seu ex malo motiuo, non esse bonum. Tum etiam, quia tunc circumstantia finis mali transit in rationem obiecti specificantis, vt docet D. Thomas hic art. 5. ad 4. subindeque destruit bonitatem specificam quæ ex obiecto sumenda erat. Vnde hypocrisis, seu appetitus vanæ gloriæ fermento comparatur Lucæ 12. *Nam sicut modicum fermentum totam farinam cui inicitur massam corrumpit, vniuersamque mox consersionem suo sapore commaculat; sic etiam simulatio cuius semel animum imbuerit, tota virtutum sinceritate & veritate fraudabit:* inquit Venerabilis Beda lib. 4. in Lucam c. 52.

Hæ rationes non solum probant aliquem actum non posse simul esse bonum ex obiecto, & malum ex fine, sed neque etiam posse esse malum ex obiecto, & bonum ex fine vt cum quis furatur ad dandam eleemosynam. Si enim malitia desumpta ex fine operantis, vel ex alia circumstantia, inficit totum actum, & eius bonitatem destruit; à fortiori illa quæ deriuatur ex obiecto, quæ est præcipua ac essentialis, idem præstabit, omnemque bonitatem moralem actus pariter destruet. Deinde sicut est contra dictamen prudentiæ eligere aliquod bonum medium ob malum finem, ita & assumere malum medium ad obtinendum bonum

num finem, quia non sunt facienda mala ut
eueniant bona. Item sicut in eo qui dat eleemo-
synam propter vanam gloriam, eleemosy-
na, in quantum est materia & instrumentum
vanæ gloriæ, non est obiectum bonum, sed
malum, vitiatur enim à fine, & ad speciem
eius trahitur. Ita in eo qui furatur ad dan-
dam eleemosynam non est bonus finis, sed
malus; quia est causa furandi, & ratio eli-
gendi malum medium, à quo vitiatur, atque
ad speciem eius trahitur: Ergo sicut primus
actus est omnino malus, non verò mixtus ex bo-
nitate & malitia, ita & secundus. Vnde S.
Thomas hic qu. 19. art. 7. ad 3. *sive voluntas
sit eius quod est secundum se malum, & sub ra-
tione boni; sive sit boni sub ratione mali, semper
voluntas erit mala.*

Obijcies primò: In naturalibus potest idem
subiectum retinere bonitatem quoad aliquid,
& esse malum quoad aliud: v. g. potest idem
homo habere pulchros oculos, & nasum de-
formem, ægrotare pedibus, sed non manibus.
Similiter in artificialibus potest idem opus se-
cundum vnâ partem esse pulchrum, & regu-
lis artis conforme, & secundum aliam defor-
me, distortum, & regulis artis dissonum: pari-
ter ergo eadem actio humana poterit esse
mixta ex bonitate & malitia morali, & simul
esse bona ex obiecto, & mala ex fine operantis,
vel è contra mala ex obiecto, & bona ex fine
operantis. Quare S. Thomas hic art. 4. cum
enumerasset in corp. quadruplicem actus bo-
nitatem, in solut. ad 3. ait: *Nihil prohibet
actionis habenti vnâ prædictarum bonita-
tium, deesse aliam, & secundum hoc contingit*

actionem quæ est bona secundum speciem suam, vel secundum circumstantias ordinari ad finem malum, vel è conuerso; non tamen est actio bona simpliciter, nisi omnes bonitates concurrant. Quibus verbis apertè videtur docere, quod actio humana potest habere vnam bonitatem moralem, puta ex obiecto, & tamen carere alijs quæ desumuntur ex fine, vel circumstantijs, subindeque simul esse bona & mala. Vnde in 2. dist. 36. qu. vnica artic. 5. in fine corporeis ait: Contingit actum habere bonitatem ex materia, & tamen eum malè fieri propter inlebitas circumstantias.

Respondeo, concessio Antecedenti, negando consequentiam & paritatem: Ratio discriminis est, quia in naturalibus & artificialibus malum vnius partis non inficit aut destruit bonitatem alterius; vnde bonitas quæ est ex essentia potest simul stare cum malo accidenti, & bonitas vnius partis cum malo alterius: in moralibus verò malitia quæ est ex fine, vel ex circumstantijs, totum actum inficit, & omne bonum eius destruit, & à fortiori malitia quæ est ex obiecto destruit bonitatem finis; sicque impossibile est, bonitatem ex obiecto stare cum malitia ex fine, vel bonitatem ex fine cum malitia ex obiecto. Vnde quando S. Thomas ait quod actioni habenti vnam bonitatem, puta ex obiecto, contingit deesse aliam, scilicet ex fine; & ob istius defectum reddi peccaminosam, ly *habenti* non facit sensum compositum, quasi actio simul cum tali defectu talem bonitatem conseruet, sed reddit sensum diuisum, & solum significat, quod quantum est de se habiturus erat.

erat actus talem bonitatem, nisi aduenisset malitia ex fine illam impediens. Sicut si diceretur, habenti sanitatem contingit distemperari humores, non esset verum in sensu composito, ita ut cum de facto est distemperies, reuera sit sanitas, sed solum in sensu diuiso, quia scilicet adesset tunc quantum est ex alijs principijs, nisi distemperies accidisset. Eodem modo intelligi & explicari debet alius locus desumptus ex libro 2. sententiarum.

Obijcies secundò. Cum quis instante præcepto subueniendi egeno, in extrema vel graui necessitate constituto, dat eleemosynam, ob inanem gloriam, implet præceptum: Ergo talis actus est bonus ex obiecto. licet sit malus ex fine, subindeque mixtus ex bonitate & malitia morali. Consequentia patet, cum enim præceptum sit de actu bono, impleri nequit nisi per actum bonum, saltem ex obiecto.

Confirmatur: Si talis actus esset malus ex obiecto, haberet duplicem malitiam, vnam ex fine, nempe inanis gloriæ, aliam ex obiecto deprauato, scilicet ex eleemosyna vitiata: Sed hoc dici nequit, alijs qui daret eleemosynam propter vanam gloriam, duplex peccatum committeret, quod videtur absurdum: Ergo talis actus non est malus ex obiecto.

Ad obiectionem respondeo, concessò Antecedenti, negando consequentiam; ad cuius probationem dicendum cum D. Thoma infra qu. 100. art. 9. & 10. leges esse in duplici differentia: quædam dantur de actibus humanis, præcisè quoad substantiam & entitatem physicam, vel, quod idem est, quoad bo-

nitatem obiectiuam materiale, vt quæ præcipiunt succurrere egenti, audire sacrum, & similes; aliæ verò dantur de fine & modo prædictorum actuum, & consequenter de eorum honestate & bonitate formali, cuiusmodi sunt illæ quæ disponunt de interiori rectitudine hominis, ac de his quæ pertinent ad directionem cordis, & ad ipsam iustificationem & munditiam interiorem, vt credere, sperare, diligere, poenitere, non moechari in corde, non concupiscere rem alienam &c. Leges igitur quæ dantur de sola substantia actus (qualis, vt dixi, est illa quæ præcipit succurrere indigenti) adimpleri possunt per actum qui nullam habeat bonitatem formalem, dummodo circa materiam bonam, seu obiectum materialiter bonum versetur. Vnde hoc argumentum solum probat obiectum huius actus: *Volo dare eleemosynam propter inanem gloriam*, esse bonum materialiter & in esse entis, non autem ostendit illud esse bonum formaliter, & in ratione obiecti specificantis.

Ad confirmationem respondeo aliquos existimare in illo actu duplicem esse malitiam, vnā vanæ gloriæ viciantis, & aliam eleemosynæ vitiatæ; tunc enim (inquiunt) non manet vera eleemosyna; sed fit materia vanæ gloriæ, ac instrumentum superbæ. Vnde Augustinus in regula, seu epist. 109. ait quod *superbia insidiatur bonis operibus vt pereant*, & Chrysologus, loquens de hypochrissi, dicit: *Crudeli arte virtutes necat murene virtutum, ieiunium ieiunio perimit, orationem oratione vacuat, misericordiam miseratione prostermit*. Verisimilius tamen & probabilius est, non dupli-

plicari ibi malitiam, nec aliam dari distinctam à superbia, seu vana gloria, quæ totum illum actum vitiat, ad instar fermenti vitiatum, quod totam farinæ cui iniicitur massam corrumpit, vel tinea, quæ totum ex quo nascitur pannum corrodit. Vnde Christus Matt. 6. dicebat: *Si oculus tuus fuerit nequam, totum corpus tuum tenebrosum erit.* Vbi per oculum intelligunt SS. Patres intentionem finis, quæ si sit mala, reddit totam actionem malam & tenebrosam, omnemque bonitatis lucem ab ea excludit. t

Dices, sicut intentio finis, si sit mala, reddit actionem malam, ita si sit bona, reddit illam bonam, quamvis ex obiecto mala sit. Ergo poterit actus malus ex obiecto, esse bonus ex fine. Consequentia patet, Antecedens verò probatur ex varijs Scripturæ SS. Patrum testimonijs, in quibus actus de se mali & peccaminosi, ex bono fine excusantur, ut constat tum de mendacio tum de homicidio. Nam Genes. 20. Abraham dixit de vxore sua quod esset sua soror, & tamen non peccauit, ut dicunt Augustinus lib. 12. contra Faustum cap. 34. & Chrysostomus homil. 52. super Genesim, quia hoc dixit ad saluandam propriam vitam. Iacob mentitus est patri suo dicens se esse primogenitum eius Esau, & tamen solum ob intentionem bonam excusari potest, quia scilicet hoc dixit ad obtinendam patris benedictionem. Iudith in pluribus Holoferni mentita est, & tamen videtur non peccasse, quia id fecit ad saluandum populum suum. Item obstetrices Ægyptiæ mentitæ sunt Pharaoni, quæ tamen non videntur peccasse, quia
id

id fecerunt ad impedienda homicidia par-
tium, unde dicitur Exodi 1. *Bene fecit
Deus obsetricibus* : constat autem Deum non
remunerare peccata. Idem probatur de ho-
micidio: nam Exodi 2. Moyses occidit Ægy-
ptium auctoritate propria, & ex bona inten-
tione liberandi proximum suum excusatur.
Iudicium 16. Sanson seipsum occidit cum
multis Philistæis, columnas templi concu-
tiens; & tamen non peccauit, quia ex zelo
Dei id fecit, ut Philistæos inimicos populi
Dei occideret, unde ab Apostolo inter san-
ctos connumeratur ad Hæbreos 11. Beata
etiam Appollonia, Spiritus Sancti igne suc-
censa, in rogam se proiecit, ut narrat eius hi-
storia. Scribit etiam D. Ambrosius lib. 3. de
Virginibus, Pelagiam Virginem præcipitem
se dedisse in flumen, ne à persequente milite
violaretur. Idemque laudabiliter fecisse tem-
pore persecutionis aliquas sanctas foeminas, ut
inuasores suæ pudicitie effugerent, narrat S.
Augustinus lib. 1. de ciuit. cap. 16.

Respondeo negando. Antecedens, intentio
enim boni finis nunquam excusat malitiam
prauæ electionis, quia non sunt facienda ma-
la ut eueniant bona. Unde non est licitum
mentiri propter aliquem bonum finem, ut ad-
tuendam vitam proximi, vel aliquod graue
damnum vitandum, ut communiter docent
Theologi contra Cassianum, qui collat. 17.
cap. 18. approbare videtur sententiam Abba-
tis Ioseph dicentis: *Quando graue aliquod
imminet de veritatis confessione discrimen, tunc
mendaciorum sunt recipienda perfugia.* Ad
illa verò quæ ex Scriptura afferuntur pro men-
da-

lacio excusando, in primis dico Scripturam multorum mendacia referre, sed non ea approbare, vel excusare; unde quando obstetrices mentitæ sunt Pharaoni, pro illo mendacio non sunt remuneratæ à Deo, sed pro timore quem habuerunt erga Deum, propter quem infantes Hebræorum noluerunt occidere, ut ait D. Thomas 2. 2. quæst. 110. art. 3. ad 2. & patet ex illo Exodi 1. *Quia timuerunt obstetrices Deum, edificauit illis domos.*

Secundò dico, Abraham non fuisse mentitum, cum dixit Saram esse sororem suam, quia soror erat ex parte patris, quamuis non ex parte matris, ut dicitur Genes. 20. Non quòd fuerit genita ex eodem parte proximo, etsi non proxima matre, quasi fuisset soror germana, sed non vterina, ut Caietanus & nonnulli Recentiores existimant; sed quia nata erat ex eodem patre, scilicet Thare, mediante filio eius Aran, patre Saræ, ut rectè obseruauit Cornelius Iansenius Episcopus Iprensis in cap. 20. Genesios. Ex quo infert fuisse quidem licita tempore Abrahæ matrimonia inter auunculum & neptem, sed non inter fratrem & sororem.

De Iacob etiam dicendum est, ipsum non fuisse mentitum, cum dixit Patri: *Ego sum primogenitus tuus Esau*: Tum quia primogenita illius ei de iure debebatur, & sic se appellabat Esau, non in persona, sed in iure; sicut Ioannes dictus est Elias, non in persona, sed in spiritu: Tum etiam quia loquebatur propheticè, & in sensu mystico, ut scilicet designaret quod minor populus, scilicet Gentilium, substituendus erat loco maioris nempe
Iu.

Iudæorum. Vnde ait D. Thomas loco citato in resp. ad 3. quod in Scriptura sacra inducuntur aliquorum gesta, quasi exempla perfecta virtutis, de quibus non est estimandum eos fuisse mentitos: si quæ tamen in eorum dictis appareant quæ mendacia videantur, intelligendum est ea figuratiter & prophetice dicta fuisse.

Iudith quoque in verbis quæ Holoferni dixit, cum magna cautela & prudentia locuta est, & aliquibus amphibologijs, non tamen mendacijs, voluit eum decipere; sicut cum dixit, quod duceret eum per mediam Ierusalem, & ne vnus canis latraret contra illum; nam reuera illum adductura erat per mediam Ierusalem, sed mortuum non viuunt, deferendo caput eius &c. Quod si in aliquo verbo fortassis mentita est, non ex eo laudatur, sed ex charitate & affectu ad salutem populi.

Ad id quod dicitur de homicidio Moyſis respondetur, quod si Moyſes est excusandus in occisione illius Ægyptij, vel id præstitit ex inspiratione Dei, qui ad hoc ei auctoritatem tunc dedit; vel ob iustam proximi defensionem, quia videbat fratrem seu proximum iniuste ab illo Ægyptio affligi & opprimi, & non erat alia via defendendi ipsum, quam inuicem occidendo.

Demum ad id quod additur de Sansone dicendum est, illum Spiritu Sancto instigante id fecisse, atque adeo licite, vt docent S. Augustinus 1. de ciuit. cap. 21. & 26. & D. Thomas 2. 2. qu. 64. art. 5. ad 4. Idem dicit debet de S. Appollonia, cum in rogam se proiecit

fecit & de illis Sanctis foeminis, quæ tempore persecutionis seipsas occiderunt, vel in flumen præcipitarunt, vt inuasores suæ pudicitiae effugerent, vt ibidem tradit S. Doctor.

Quæres, an idem actus possit simul habere duas species bonitatis, vel duas species malitiæ? Respondeo affirmatiuè: bonitas enim & malitia moralis actus sumuntur ex conformitate vel deformitate ad rationem: Sed vnus & idem actus potest esse conformis vel deformis rationi duobus modis inter se diuersis; potest enim habere conformitatem vel deformitatem ad rationem ex parte obiecti quod immediatè respicit, & ex parte finis ad quem ordinatur, nam cùm quis tribuit eleemosynam ad satisfaciendum pro peccatis, in isto actu datur obiectum, scilicet subleuatio alienæ miseriae, quod est ex se rationi consonum; & finis, nempe satisfactio pro peccatis, qui similiter honestus est, & conformis rationi. Similiter cùm quis furatur ad fornicandum, in illo actu duplex reperitur deformitas, vna ex obiecto, scilicet ex re aliena quæ tollitur, altera ex fine ad quem ordinatur, nimirum fornicatione: Ergo idem actus duas species bonitatis, vel duas species malitiæ, simul habere potest.

Confirmatur: Idem actus potest procedere à distinctis virtutibus, nempe ab vna elicitiuè, & ab alia imperatiuè, vt constat in martyrio, quod vt ait D. Thomas 2. 2. q. 124. art. 2. ad 2. *est actus charitatis vt imperantis, fortitudinis autem vt elicientis*: Ergo potest ab vtraque suam specialem bonitatem habere. Consequentia patet, actus enim per-

pertinere non potest ad aliquam virtutem, nisi attingat obiectum sub ratione formali illius, in qua ratione specialis bonitas & honestas necessario imbibitur.

Dices, cum quis vult ieiunare, vel tribuere eleemosynam, ad satisfaciendum pro peccatis, non appetit tale opus propter se, sed tanquam medium ad poenitentiam: Sed medium, quod tale, non habet rationem boni honesti, quæ soli fini conuenit, sed tantum boni utilis: Ergo talis actus non habet honestatem seu bonitatem moralem ab obiecto quod immediate respicit, sed tantum à fine extrinseco ad quem ordinatur, subindeque non duplici, sed vnica tantum bonitate gaudet.

Respondeo negando Antecedens, ieiunium enim, vel eleemosyna, volita vel facta ad satisfaciendum pro peccatis, simul appetitur & propter se proximè & immediatè, ratione propriæ honestatis ac bonitatis moralis, & propter aliud, nempe propter poenitentiam ad quam ab operante ordinatur; vnde non habet rationem puri mediij, nec puri finis, sed finis simul & mediij, seu finis intermediij & est bonum honestum, ratione sui, & bonum utile, ratione ordinationis ad poenitentiam; subindeque duplicem habet speciem bonitatis moralis, vnâ ex obiecto in quod immediatè tendit, alterâ ex fine extrinseco ad quem ordinatur, quarum prima est illi essentialis, altera verò accidentalis, vt capite præcedenti §. 3. ostensum est.

CAPVT XIII.

De indifferentia actuum humanorum ad bonitatem vel malitiam moralem.

Certum est dari actus humanos indifferentes ex sua specie: nam actus humani speciem sumunt ex obiecto, vt supra cap. 11. §. 1. ostensum est, vnde sicut actus illi dicuntur boni ex sua specie, qui tendunt in obiectum de se bonum, mali verò qui respiciunt obiectum malum, & difforme rationi; ita illi indifferentes ex sua specie appellantur, qui versantur circa obiectum ex se ad bonum vel malum indifferens, vtpote secundum se neque consonum neque dissonum rationi: constat autem plures esse actus huiusce rationis, nam ambulare, leuare festucam, ire ad agrum, colligere flores, & huiusmodi, ex obiecto non habent bonitatem aut malitiam, sed ad utramque indifferentes sunt, vnde ex bono fine honestari, & ex malo vitari possunt, iuxta illud Augustini lib. 2. de sermone Domini in morte: *Sunt quedam facta media quæ possunt bono vel malo animo fieri, de quibus iudicare temerarium est.* Solum ergo difficultas & est controuersia inter Theologos, an possit dari actus indifferens, non solum in specie, & per ordinem ad obiectum, sed etiam in indiuiduo, ac pensatis omnibus circumstantiis, & accidentibus, quæ necessariò illum comitantur?

Respondeo negatiuè cum S. Thoma hic art. 9. idque probo primò hac ratione quam addu-

adducit in corp. articuli : Licet aliquis actus non habeat ex sua specie & obiecto quod sit bonus aut malus, quia tamen actuum humanorum bonitas aut malitia moralis non pendet solum ab obiecto, sed etiam à circumstantijs, quæ sunt veluti quædam illorum accidentia, oportet quod quilibet individualis actus habeat aliquam circumstantiam, per quam contrahatur ad bonum vel malum, ad minus ex parte intentionis finis: nam si finis quem operans formaliter aut virtualiter intendit, sit honestus, etiam si obiectum sit indifferens, actus erit bonus moraliter, ut cum quis vadit in agrum honestæ recreationis causa: si verò finis non sit honestus, eo ipso talis actus erit malus moraliter, quia eo ipso quod actus non habet finem bonum & honestum, est malus: *Cum enim* (inquit S. Doctor) *rationis sit ordinare, actus à ratione deliberatiua procedens, si non sit ad debitum finem ordinatus, ex hoc ipso repugnat rationi & habet rationem mali.* Idem docet Augustinus lib. 4. contra Iulian. cap. 3. verbis: *Cum facit homo aliquid in quo peccare non videtur, si non propter hoc facit propter quod facere debet, peccare conuincitur.* Et infra: *Quidquid boni sit ab homine, & non propter hoc sit propter quod fieri debere vera sapientia præcipit, licet officio videatur bonum, ipso non recto sine peccatum est.* Ergo actus ex sua specie, seu ex obiecto indifferens, non potest esse indifferens in indiuiduo, seu in sui exercitio, sed necessario debet esse bonus moraliter, vel malus.

Respondent Aduersarij, hominem non teneri actui indifferenti ex obiecto apponere finem

finem

finem bonum & honestum , sed posse illum exercere, ob solam delectationem , vel naturæ commoditatem ; nimis enim (inquirunt) rigorosum videtur obligare hominem ad hoc vt in omnibus actionibus suis, in his præcipuè quæ ad naturæ commoditatem , & indiuidui conseruationem pertinent , semper rectum & honestum finem apponat ; aliàs continuò peccarent homines, saltē venialiter , cū continuò tales actiones occurrant, & homines non recordentur eas in bonum & honestum finem referre.

Sed contra primò : Quoties homo operatur cum consilio & deliberatione rationis , tenetur operari vt homo, ac proinde iuxta exigentiam & inclinationem naturæ rationalis : Ergo tenetur operari in ordine ad bonum rationis siue honestum , quod est finis talis naturæ ; alioquin non agit vt homo , sed vt animal, & assimilatur iumentis insipientibus quibus non est intellectus . Vnde Propheta Regius Psal. 9. dicebat: *Constitu Domine legislatorem super eos , vt sciant Gentes quoniam homines sunt.* Id est mitte Domine Verbum tuum, & sapientiam de cœlis , vt doceat Gentes & homines peccatores, qui more brutorum viuunt, attendendo solū ad bonum delectabile & sensibile, operari conformiter ad naturam humanam, & sequi regulas rectæ rationis ac prudentiæ, bonumque honestum & rationi consonum prosequi.

Contra secundò : cū operationes non sint propter delectationes, sed è conuerso delectationes propter operationes , vt docet D. Thomas supra qu. 4. art. 2. ad 2. qui eligit operationem
ratio-

rationem propter delectationem, & propter hanc solam operatur, inordinate agit, & peccat, peruertendo ordinem naturæ, vt magis constabit ex infra dicendis: Ergo falsum est, & à principijs moralis Philosophiæ penitus alienum quod Aduersarij dicunt, nempe hominem posse exercere actus ex obiecto indifferentes, propter solam delectationem aut commoditatem naturæ tanquam propter finem. Pars enim sensitiua & animalis, vtpote inferior, debet semper subesse ac subordinari rationi superiori, & ab ipsa dirigi & regulari, subindeque bonum delectabile ad honestum referri. Non requiritur tamen necessariò actualis relatio in bonum honestum, sed sufficit virtualis: vnde quamuis quis accedens ad mensam, non cogitet de conseruatione vitæ, sed solum de cibi delectatione, non propterea peccat, quia talem delectationem, propter operationem vitæ conseruatiuam, saltem virtualiter vult, sicque non inordinate eam appetit. *Nam hoc ipsum quod aliquis agit ordinatè ad sustentationem vel quietem sui corporis, ad bonum virtutis ordinatur in eo, vt ait S. Thomas hic art. 9. ad 3. Ex quo patet eius sententiam non esse nimis rigidam & austeram nec iugum importabile, aut labyrinthum scrupulosi conscientijs inextricabilem, vt causantur Aduersarij.*

Ex his potest magis illustrari & confirmari ratio D. Thomæ, & rursus sub hac forma proponi: Quotiescumque homo operatur cum consilio & deliberatione rationis, intendit aliquem finem: vel ergo talis finis est bonum honestum, aut delectabile; vtile enim quatale,

le, cum non sit appetibile propter se, sed solum propter aliud ad quod deseruit ut medium, non potest habere rationem finis. Si sit bonum honestum, actus erit moraliter bonus & rationi consonus: Si verò sit purè delectabile, actus erit malus & rationi dissonus, quia, ut ostendimus, est intrinsecè malum, & rationi disforme, sistere in bono delectabili tanquam in fine.

Obijcies primò: Sunt aliquæ operationes per se tantum ordinatæ ab oblectandum, ut visio pulchri ad oblectandos oculos, olfactio odoris ad oblectandas nares, musica ad aures recreandas: Ergo saltem istæ poterunt propter solam delectationem licitè exerceri.

Respondeo negando Antecedens, nulla enim operatio ad solam delectationem ut ad ultimum finem ordinatur, sed ultra semper tendit ad finem commodum & utilem naturæ. Ita visio pulchri, auditio suavis concentus, finaliter ordinantur ad excitandos spiritus, qui deseruiunt ad operationes humanas exercendas, Olfactio odoris ordinatur ad cerebrum confortandum, & sic de cæteris.

Obijcies secundò: Nullum est præceptum obligans hominem ad referendum omnes suas actiones in bonum honestum & rationi consonum, quotiescumque cum consilio & deliberatione rationis operatur: Ergo ratio D. Thomæ falso nititur principio. Consequentia patet, Antecedens probatur. Si daretur tale præceptum, vel esset positivum, vel naturale? Non primum, cum ex Scriptura non constet; nec secundum, quia ad nullum ex præceptis Decalogi, ubi naturalia continentur, spectat: Ergo &c.

Ref.

Respondeo negando Antecedens, & ad
 eius probationem dico, tale præceptum esse
 naturale; sicut enim agentia naturalia deter-
 minantur ab Authore naturæ ad proprios
 actus naturali inclinatione, ita agens liberum
 determinatur per leges & præcepta; videmus
 autem quod agentia naturalia recipiunt ab
 Authore naturæ inclinationem ut per omnes
 suos actus tendant ad proprios fines consonos
 suis naturis: Ergo etiam agens rationale &
 liberum debuit habere præceptum & legem,
 ut omnibus suis actibus deliberatis tendat ad
 bonum consonum naturæ rationali, quod est
 bonum honestum. Neque enim minùs spectat
 ad naturæ Authorem dare agentibus liberis
 pro omnibus suis actibus determinationem mo-
 ralem, quæ est per præceptum, quam agentibus
 naturalibus determinationem naturalem,
 quæ est per naturalem inclinationem. Ex quo
 patet tale præceptum esse naturale. Ad quod
 verò ex decem in Decalogo contentis reduca-
 tur, variè opinantur Authores. Quidam exi-
 stimant illud esse reducendum ad præceptum
 dilectionis Dei, nam ratione huius præcepti
 tenemur diligere Deum super omnia, & ha-
 bere illum pro fine ultimo, & consequenter
 referre in ipsum omnes nostras actiones, sal-
 tem mediata, quod fit ordinando eas ad ali-
 quem finem honestum. Aliqui dicunt, quod
 sicut est præceptum naturale non prodigendi
 pecunias, ita & non terendi tempus inaniter,
 & potentias animæ vel corporis, in operibus
 vanis & otiosis inutiliter non occupandi.

Verius tamen aut probabilius existimo,
 quod sicut dantur quedam veritates quæ per
 se

se non pertinent ad obiectum fidei, sed sunt veluti præambulæ ad illam; vt Deum existere, Deum esse vnum, sicut docet D. Thomas 1. p. q. 2. art. 2. ad 1. ita dantur quædam præcepta naturalia, quæ non continentur in præceptis Decalogi, sed sunt quasi præambula ad illa, sicut est præceptum diligendi seipsum, ad quod reducitur præceptum de non operando absque fine rationabili; in quantum homo, quia rationalis est, & viuit vita intellectuali, ac eleuata supra vitam brutorum, debet diligere suam dignitatem, & operari vt homo, non verò assimilari iumentis insipientibus, vt supra ostensum ac ponderatum est.

Obijcies tertio: Datur actus indifferens secundum speciem: Ergo & quoad indiuiduum. Consequentia videtur manifesta, quia nulla est species quæ non habeat vel saltem habere possit aliquod indiuiduum.

Respondeo, concesso Antecedente, negando consequentiam, quia (vt supra annotauimus) actus secundum speciem attenditur solum penes ordinem ad obiectum à quo specificatur, quod cum sæpe neque bonum neque malum per se sit, nullam bonitatem vel malitiam, sed specificam tantum indifferentiam, in obiectum refundit. At verò actus in indiuiduo consideratur vt vestitus omnibus circumstantijs, quarum præcipua est finis, qui si sit honestus, bonitatem moralem causat in actu; si verò honestate careat, malitiam moralem in ipsum inducit. Ad probationem in contrarium dicendum est, quod licet species quæ actui humano absolute conuenit, in aliquo indiuiduo reperiatur, ea tamen quæ illi

competit sub quadam præcisione & statu, quo attingit vel concipitur attingere obiectum sine circumstantijs, non potest ad indiuidua descendere; quia in indiuiduo inueniuntur circumstantiæ, sine quibus indiuiduatio non datur: indifferentia autem ad bonitatem & malitiam actibus humanis absolute non conuenit, sed sub aliqua tantum præcisione & reduplicatione, nempe: prout solum obiectum respiciunt, & à circumstantijs abstrahunt.

Duo corollaria quæ obseruentur dignissima.

EX dictis colligitur primò, falsam esse, & à principijs Philosophiæ moralis penitus alienam Escobarij sententiam tract. 2. exam. 2. num. 102. asserentis, nullum esse peccatum comedere & bibere vsque ad satietatem, ob solam voluptatem, & pro hac sententia referentis Ioannem Sanctum. Constat enim ex supra dictis, delectationes sensuum à creatura rationali non esse per se expetibiles, sed solum ratione boni honesti, cuius sunt illecebra, & veluti condimentum, quod pro uida & sagax natura in operationibus ad conseruationem indiuidui vel speciei necessarijs apposuit, ut bruta quæ non possunt apprehendere bonum honestum, delectabili traherentur. Vnde delectationes sensuum primariò & principaliter, seu tanquam finem intendere, est natura bruti, & vitium hominis, iuxta illud Augustini lib. de peccato origin. cap. 40. *Tantæ excellentiæ est in comparatione pecoris homo, ut vitium hominis natura sit pecoris.* Hinc Tullius in suis de officijs, ac Tus-


culanarum quaestionum libris infert, corporis voluptatem, non satis esse dignam hominis praestantia, & pertinere ad omnem officij quaestionem, semper in promptu habere, quantum natura hominis pecudibus reliquisque bestiis nisi voluptatem sentientibus antecellat. Et Seneca lib. de beata vita cap. 10. quendam Epicuri de grege porcum redarguens, sic ait: *Tu voluptatem complecteris, ego compesco, tu voluptate fruieris, ego vtor.* Et epist. 88. *Temperantia* (inquit) *voluptatibus imperat, alias odit atque abigit, alias dispensat, & ad sanum modum redigit, nec unquam ad illas propter illas venit.* Qualis pudor eò post fidem non peruenisse Theologos, quò ante fidem Philosophi peruenere. Quare Escobario & Sancio illud Augustini ad Iulianum, voluptati sensuali similiter patrocinantem, regerere licet: *Obsecro te non sit honestior Philosophia Gentium, quam nostra Christiana.* Vnde inter propositiones nuper à Sanctissimo Papa nostro Innocentio XI. damnatas, hæc habetur: *Comedere & bibere usque ad satietatem, absque necessitate, ob solam voluptatem, non est peccatum modo non obfit valetudini, quia licitè potest appetitus naturalis suis actibus frui.*

Colligitur secundo, talem esse, & bonis moribus aduersam, aliam Ioannis Sanciij sententiam, qui disput. 23. num. 25. contendit, finem solius delectationis in coniugatis, nec peccatum quidem esse veniale. Si enim peccatum & deordinatio creaturæ rationalis est, actiones ad indiuidui conseruationem spectantes, ob solam delectationem tanquam propter finem elicere, etiam peccatum, saltem veniale,

le, erit in coniugatis actum ad speciei propagationem ordinatum, ob solam delectationem tanquam propter finem exercere. Vnde Augustinus lib. de bono coniugali cap. 6. *Coniugalis concubitus generandi gratia non habet culpam, concupiscentiæ verò satiandæ, tamen cum coniuge, propter fidem thori, venialem habet culpam*. Et cap. 7. *Reddere debitum coniuga nullius est criminis, exigere autem ultra generandi necessitatem, est culpæ venialis*. Item lib. 2. contra Iulian. cap. 10. ait, *coniuges contrahere unde quotidie dicant, dimitte nobis debita nostra, quando modum generationi necessarium, causa solius voluptatis excedunt*. Similia habet Gregorius Magnus lib. 12. moral. cap. 17. alias 20. ubi hæc scribit: *Tunc solum coniuges in admixtione sine culpa sunt, cum non pro explenda libidine, sed pro suscipienda prole miscentur*. Et de cura pastoralis p. 3. admonit. 28. *Admonendi sunt coniuges (inquit) ut si suscipienda prolis se meminerint causa coniunctos, & cum immoderate admixtioni seruiantes, propagationis articulum in usum transferunt voluptatis, perpendunt quod licet extra non exeant, in ipso tamen coniugio, coniugij iura transcendunt. Vnde necesse est ut crebris exhortationibus moneantur, ut defleant quod pulchram copulæ speciem admixtis voluptatibus fœdant*. Demum S. Thomas in 4. dist. 31. quæst. 2. artic. 2. in corp. ait: *Duobus solum modis coniuges absque omni peccato conueniunt, scilicet causa prolis procreandæ, & debiti reddendi, aliàs semper ibi est peccatum ad minus veniale*. Vnde inter sexaginta quinque propositiones, nuper ab Innocentio XI.

pro-

proscriptas, hæc nonum obtinet locum : Opus coniugij, ob solam voluptatem, exercitum, omnino penitus caret culpa & defectu veniali.



CAPUT XIV.

Actus exterior non addit bonitatem vel malitiam moralem intrinsecam supra interiorem, sed gaudet tantum bonitate vel malitia extrinseca ab actu voluntatis imperante desumpta.

Colligitur hæc veritas ex pluribus Scripturæ & SS. Patrum testimonijs, quibus apud Deum voluntas pro facto reputatur, Nam Deus Genes. 22. dixit Abraham non maculanti filium, sed maculare parato : *Quia fecisti hanc rem, & non pepercisti filio tuo unigenito propter me, benedicam tibi.* Vbi Chrysostomus homil. 47. *Quantum ad voluntatem cruentauerat dexteram Patriarcha, perfectumque obtulerat sacrificium, & idcirco Dominus, quasi sacrificio re ipsa consummato, laudat iustum.* Item Marci 12. & Lucæ 21. Christus duo pauperis viduæ minuta, in gazophilacium missa, prætulit magnis diuitum eleemosynis; quia non opus externum, sed puri cordis affectum respexit : *Viduam* (inquit Cyprianus tract. de operib. & eleemos.) *cum videret Dominus, non de patrimonio, sed de animo opus eius examinans, & considerans, non quantum sed ex quanto dedisset, dixit: vidua ista plus omnibus*

misit in dona Dei. Ex quo inferit Gregorius Magnus homil. 5. in Euang. quod ante oculos Dei nunquam vacua est manus à manere, si fuerit arca cordis repleta bona voluntate. Deum idem Saluator Matth. 5. ut innuat consensum internum voluntatis eandem habere malitiam, ac si actus elicitus fuisset, dicit: Omnis qui viderit mulierem ad concupiscendum eam, iam mœchatus est eam in corde suo. Vnde Augustinus de lib. arbitr. cap. 3. Si cui non contingat facultas concumbendi cum coniuge aliena, planum tamen aliquo modo sit id eum cupere & si potestas detur facturum esse, non minus re s est, quam si in ipso facto deprehenderetur.

Ratio etiam suffragatur: Bonitas enim & malitia moralis fundantur in libertate, vnde ibi solum potest esse bonitas vel malitia moralis intrinseca, ubi est libertas intrinseca: Sed in actu exteriori potentia executiua, nulla est libertas intrinseca, sed tantum extrinseca, ut docent Philosophi: Ergo nec bonitas aut malitia moralis intrinseca, sed duntaxat extrinseca, ab actu voluntatis imperante desumpta. Vnde actus exterior, qui est mera executio interioris actus voluntatis, non addit illi bonitatem vel malitiam simpliciter in ordine ad primum vel poenam essentialem, sed solum secundum quid, & in ordine ad primum vel poenam accidentalem, ut expressè docet S. Thomas in 2. dist. 40. qu. 1. art. 3. his verbis: *Actus exterior nihil adiungit ad primum essentiale, tantum enim meretur qui habet perfectam voluntatem aliquid bonum faciendi, quantum si faceret illud; & si facit unum*

unum actum, quantum si faceret multos, voluntate equaliter perfecta manente . Ad primum autem accidentale ordinatur per bonitatem quæ est ipsius actus exterioris secundum se, & ideo actus exterior adiungit aliquid ad primum accidentale . Id clarè patet in actu martyrij ; illi enim qui sola voluntate martyres sunt , possunt mereri æquale & maius primum essenziale , quam qui re ipsa patiuntur pro Christo, si æquales aut feruentiores actus charitatis eliciant ; non gaudent tamen premio accidentali, quod aureola dicitur, quia illa solùm debetur ipsi exteriori passioni, seu actuali tolerantie mortis, in qua est specialis difficultas, cui primum aliquod accidentale corresponderet .

Contra nostram assertionem obijciunt in primis Scoti Discipuli celebre testimonium Augustini , desumptum ex libro 13. de Trinitate, cap. 5. ubi S. Doctor sic ait . *Mala voluntate vel sola quisque miser efficitur . sed inferior potestate qua desiderium male voluntatis impletur* . Quibus verbis fatetur actum exteriorem, adimpletiuum mali desiderij addere supra ipsum desiderium maiorem miseriam, subindeque maiorem malitiam .

Sed facilè respondetur ex principijs iam statutis, quod peccator sit inferior per actum exteriorem , non ex eo quod ex illo noua malitia essentialis accrescat, sed propter accidentalem malitiam , & varia incommoda quæ actus exterior secum adducit , quæ sine dubio miserabiliorem efficiunt peccatorem , quam esset per solam voluntatem peccandi . Ex actu enim exteriori malo magis hebetantur sensus,


& potentia exteriores proniores redduntur ad malum; ex illo etiam multoties generatur scandalum, & incurritur excommunicatio, vel irregularitas, aut obligatio ad restitutionem, quæ per solum actum interiorem non inducuntur.

Obijcies secundò: Actus interior & exterior distinctis præceptis prohibentur, non enim & decimum Decalogi præceptum sunt de actibus interioribus tantum, nempe de concupiscentia uxoris, & rei alienæ; & tamen fornicatio & furtum, quæ sunt actus exteriores illis correspondentes, prohibentur sexto & septimo præcepto: Ergo signum est quod actus exterior addit novam malitiam super actum interiorem. Alioquin non teneremur exprimere in confessione actum externum v. g. homicidium, vel adulterium, sed sufficeret si diceremus nos habuisse internum occidendi vel adulterandi desiderium, quod damnat communis Ecclesiæ consuetudo.

Respondeo, concessio Antecedente, negando consequentiam. Non enim ideò ponuntur diuersa præcepta de actibus interioribus & exterioribus supra dictis, quod in his sit diuersa malitia, vel ad diuersa vitia pertineant; sed quia, cum concupiscentia rei alienæ & venereorum, sit pro isto statu naturæ corruptæ, magis homini connaturalis & frequentior, quam desideria aliorum actuum prohibitorum, conueniens fuit ut speciali præcepto prohiberetur, ut docet D. Thomas 2. 2. qu. 122. art. 6. ad 4. Alioquin potuisset aliquis faciliter sibi suadere, concupiscere rem vel uxorem alienam, dummodo actus non sequatur, non
esse

esse peccatum, sicut quidam hæretici asseruerunt; talemque hæresim regnasse apud Iudæos, ex verbi illis Christi supra adductis colligitur: *Omnis qui viderit mulierem ad concupiscendum eam, iam mæchatus est eam in corde suo.*

Ad id verò quod additur de obligatione exprimendi actum externum in confessione, sequela pariter neganda est; licet enim actus exterior non habeat intrinsecam & formalem malitiam quam addat supra interiorem; quia tamen est complementum substantiale actus interioris, & ex utroque fit vnus actus moralis in certa specie malitiæ, puta furti vel adulterij, debet in confessione declarari, vt completa peccati species explicetur.



C A P V T X V.

De prima regula bonitatis & malitiæ moralis actuum humanorum, scilicet lege æterna, seu voluntate diuina.

DVæ sunt regulæ bonitatis & malitiæ actuum humanorum, vt docet D. Thomas infra qu. 71. art. 9. Prima est proxima & intrinseca, ac in homine existens, nempe dictamen nostræ rationis, seu conscientia, de qua agemus capite sequenti. Altera est remota & extrinseca, in mente diuina existens, scilicet lex æterna, quæ est ipsa ratio Dei dirigens omnes creaturas in suum finem. Hanc legem agnoscit Tullius lib. 1. de legibus, vbi

ficat; Sapientissimorum fuit sententia, legem
neque hominum ingenio fuisse excogitatam,
neque scitum aliquod esse populorum, sed aeter-
num quiddam, quod vniuersum mundum rege-
ret imperandi prohibendi que sapientia. Ad
hanc legem reducitur diuina voluntas, quæ
cum sit ipsa rectitudo, ipsa sanctitas per essen-
tiam, illi conformari debet omnis humana vi-
ta rectitudo, iuxta illud Augustini in Psal.
32. Rectum est habere qui vult quod Deus vult.
Vnde quaerunt hic Theologi, an homo teneatur
se conformare in omnibus voluntati diuinæ?
Pro cuius resolutione.

Notandum est ex D. Thoma qu. 2. de verit.
art. 7. In obiecto voluntatis duo esse conside-
randa: vnum quod est quasi materiale, scilicet
ipsa res volita; aliud quod est quasi formale,
scilicet ratio volendi, quæ est finis sicut in ob-
iecto visus color est quasi materiale, lux vero
quasi formale, quia per eam efficitur color visi-
bilis actui; Et sic ex parte obiecti voluntatis di-
uinæ duplex conformitas inueniri potest; vna
ex parte voliti, ut quando homo vult aliquid
quod Deus vult; alia ex parte rationis volen-
di, siue ex parte finis, ut cum aliquis propter
hoc vult aliquid propter quod Deus &c. Hæc
appellatur conformitas in volito formali, il-
la dicitur conformitas in volito materiali.
Hoc præsupposito.

Dico, hominem teneri se conformare in
omnibus voluntati diuinæ; in volito formali,
non tamen in volito materiali. Ita D. Tho-
mas hic qu. 19. art. 10. & qu. 23. de verit.
art. 8. & Theologi communiter.

Probatur prima pars: Conformari volun-
tati

tati diuinæ in voluto formali, est ipsi conformari in ratione communi & generali propter quam Deus operatur, quæ est bonum commune totius vniuersi, prout tale bonum ad Deum & eius gloriam vt ad finem ordinatur: Sed voluntas humana non potest in hoc honeste, & rationaliter à diuina discrepare, vt patet: Ergo homo tenetur conformari voluntati diuinæ in voluto formali, sicutem negatiuè, hoc est non discordare positiuè ab illa in tali voluto.

Quod verò non teneatur semper ei se conformare in voluto materiali, seu in omni obiecto à Deo voluto, constat ex eo quod Deus voluntate generali primæ causæ, & vniuersalis prouisoris, plura vult quæ non est laudabile nec licitum velle, vt bella, pestes, incendia, mortem parentum, & similia; quia nimirum illa relata ad communem ordinem vniuersi, vel ad ostensionem diuinæ iustitiæ, sunt bona; mala verò respectiuè ad nos, cum ad nos non pertineat communis ordo vniuersi, aut diuinæ iustitiæ. Vnde Augustinus in enchirid. cap. 101. *Aliquando bona voluntate homo vult aliquid quod Deus non vult. Tanquam si bonus filius patrem velit viuere, quem Deus bona voluntate vult mori.*

Confirmatur: Si quis videat patrem suum mori in hæresi, aut in peccato mortali, & per consequens esse damnatum, ex ipso opere videt id esse voluntatem Dei, aliàs non sic eueniret: Sed non est bonum & laudabile, quod filius velit damnationem æternam patris in dolo ex charitate & pietate teneatur ei velle & procurare salutem æternam: Ergo non semper est bonum & laudabile conuenire cum vo-

luntate diuina in voluto materiali.

Dices: Nos petimus in oratione dominicâ, vt fiat voluntas Dei in terra, sicut in cœlo: At in cœlo beati conformantur voluntati diuinâ, non solum in voluto formali, sed etiam in materiali: Ergo id etiam debent viatores in terra præstare.

Respondeo hæc verba orationis dominicæ, *fiat voluntas tua, sicut in cœlo & in terra*, vel esse intelligenda de voluntate præceptiua, & per eam nos petere à Deo, vt in omnibus in terra diuinis obtemperemus præceptis, sicut beati in cœlo semper obediunt Deo in omnibus, vt ex Augustino exponit S. Thomas in catena, super hæc verba, & 2. 2. q. 83. art. 9. ad 1. & 1. p. qu. 19. art. 11. vel si sit sermo de voluntate Dei, respectu cuiuscunque voliti, solum denotare, nos debere conformari diuinæ voluntati in quocunque voluto, non secundum se & absolutè, sed prout stat sub ordine ad finem ad quem Deus illud ordinat, velleque vt ordo diuinæ voluntatis in omnibus impleatur. Quod verò in patria omnes conformentur diuino voluto, etiam materiali, est propter illius status perfectionem, vbi cognita Dei voluntate, operantur solum secundum rationes æternas & superiores, & sub illo motiuo quo Deus vult res illas. Vnde complacent sibi de morte & damnatione parentum, & permissione peccatorum, totaque ferie reprobationis aliorum, sibi à Deo reuelatæ, iuxta illud Psalm. 57. *Lætabitur iustus cum viderit vindictam, manus suas lauabit in sanguine peccatoris*. Sed nobis operantibus iuxta particulares & temporales rationes licitum est velle

velle oppositum, imò ad id sæpe tenemur vt
constat ex supra dictis.



C A P V T. XVI.

*De altera regula bonitatis & malitiæ actuum
humanorum, nimirum conscientia.*

Conscientia, quæ iuxta D. Bernardum est
quasi cordis scientia, sic potest defini-
ri seu describi: Conscientia est actus intellectus
præctici, nempe iudicium dictans de bonitate
& malitia eorum quæ à nobis hic & nunc agen-
da sunt. Dicitur in primis actus, illa enim
non est habitus, vt existimauit Scotus: tum
quia possumus bene agere sine habitu, sed non
sine conscientia: tum etiam, quia conscientia
sæpe deponitur, & mutatur de bona in ma-
lam, vel è contra; potentia autem, cum sint
proprietas animæ, sunt inuariabiles & inse-
parabiles. Addo quod proprietates conscien-
tiæ, quæ sunt testificari, ligare, instigare, ac-
cusare, & remordere, seu reprehendere,
consistunt in actu, & non in habitu: Ergo &
ipsa conscientia. Dicitur secundo, quod con-
scientia sit actus intellectus, & non volunta-
tis, vt opinatur Durandus, cum quia actus memo-
rati pertinent ad intellectum, tum etiam quia
SS. Patres de conscientia ea asserunt quæ non
nisi actui intellectus conuenire possunt. Illa
enim appellatur à Tertulliano naturalis ta-
bula, in qua legit unusquisque opus suum.
A Damascenoq; lex intellectus, quæ voluntati
pro-

promulgatur. Ab Origene *spiritus corrector*,
pedagogus animæ. A Basilio *naturale iudi-*
catorium animæ. A Chrysostomo *iudex incor-*
ruptus, à Gregorio magno *testis fidelissimus*.
 Additur conscientiam esse actum *intellectus*
prædicti, non vero *speculatiui*; quia non sistit
 in contemplatione operis faciendi, sed homi-
 nem instigat ad bonum, vel retrahit à malo,
 & mouet inferiores facultates ad opus. De-
 mum, dicitur quod conscientia sit *iudicium di-*
ctans de bonitate & malitia rerum quæ à nobis
hic & nunc agenda sunt, quia cognitio seu
 consideratio bonitatis & malitiæ moralis
 actuum humanorum in communi, pertinet ad
 scientiam moralem, non verò ad conscientiam.
 Vnde D. Thomas qu. 17. de verit. art. 2. ait:
Conscientia addit supra scientiam, applicatio-
nem scientiæ ad actum particularem. Ex quo
 intelliges, quod scientia & conscientia se ha-
 bent sicut intelligere, & dicere quemadmo-
 dum enim dicere est intelligere cum quodam
 modo, scilicet exprimendo conceptum, seu
 producendo verbum; ita conscientia est scien-
 tia cum quodam modo, nempe applicationis
 ad opus.

Conscientia diuidi solet à Theologis in
 certam, dubiam, probabilem, & erroneam.
 Cuius diuisionis ratio ex ipsa conscientiæ de-
 finitione deducitur; cum enim conscientia sit
 iudicium dictans voluntati quæ agenda sunt,
 tot modis potest accipi conscientia, quot in-
 tellectus in iudicando de operis honestate se
 habet; intellectus verò aliquando certum &
 determinatum iudicium fert de obiecti hone-
 state vel malitia, & tunc est conscientia certa.

Interdum anceps & pendulus, neutri contradictionis parti adhærens, suspendit iudicium, & tunc est conscientia dubia, ad quam reducitur scrupulosa; quia sicut dubia ex apparentibus, ita scrupulosa ex leuissimis & interdum ridiculis rationibus suspendit iudicium. Quandoque determinatiuè de aliqua sententia iudicat, quia sibi verisimilis apparet, formidat tamen de opposita, & tunc est conscientia probabilis seu opinatiua. Demum si intellectus iudicet de obiecto aliter quam se habeat à parte rei, dicendo bonum malum, & malum bonum, tunc est conscientia erronea.

De conscientia bona eleganter differt Hugo Victorinus lib. 2. de anima cap. 9. ubi sic ait: Conscientia bona titulus est religionis, templum Salomonis, ager benedictionis, hortus deliciarum, reclinatorium aureum, gaudium Angelorum, arca fœderis, thesaurus Regis, aula Dei, habitaculum Spiritus Sancti, liber signatus, & clausus, & in die iudicii aperiendus. De illa pariter hæc scribit Bernardus lib. 1. de conscientia: Bona est conscientia, quæ habet in corde puritatem, in ore veritatem, in actione rectitudinem. Munda est, cum nec de præterito in se accusat, nec de præsentibus in se delictatur. Pura est, cum nec deus peccata sua imputat, quia non fecit, nec aliena, quia non approbavit, nec negligentiam, quia non tacuit, nec superbiam, quia in humilitate permansit. Secunda est, quando accusationem non patitur, vel pro corpore boni, vel pro presumptione mali. Recta est, cuiusmodi peccatum displicet, nec aliena peccata dissimulat, & cum corrigit, non insultat. Talis est bona conscientia.

Quæ-

Quæres primò, an voluntas agens contra conscientiam erroneam, non depositam, semper peccet? Respondeo affirmatiuè, ratio est quia voluntas non fertur in obiectum, nisi ut à ratione propositum & iudicatum: Ergo si ex errore obiectum bonum iudicetur malum, & voluntas in illud feratur, proculdubio peccabit. Quare D. Thomas hic qu. 19. art. 5. *In bonum non fertur voluntas, nisi secundum quod à ratione proponitur: unde si à ratione proponatur ut malum, voluntas fertur in hoc ut malum, non quia illud sit malum secundum se, sed quia est malum per accidens ex apprehensione rationis: Et quodlib. 9. art. 5. Error quo creditur esse mortale quod non est mortale, ex conscientia ligat ad peccatum mortale. Idem asseritur in iure Canonico, can. Omnes 28. q. 1. ubi sic habetur: Omne quod contra conscientiam fit, edificas ad gehennam. Et Ambrosius, vel Ambrosiaster, in hæc verba Apostoli: Omne quod non est ex fide, peccatum est, sic ait: Omne quod fit, etsi in se & de se sit bonum, si tamen non sit ex fide, id est contra conscientiam, ut scilicet credamus esse malum peccatum est. Item D. Bernardus lib. de præcep. & dispens. cap. 14. hæc scribit: Sine itaque malum putes bonum quod fortè agis, siue bonum malum quod operaris, utrumque peccatum est.*

Dices primò, ut aliquis actus sit bonus, sufficit ut sit legi æternæ conformis: Ergo licet ex conscientia erronea aliquid credatur esse malum, si tamen sit legi æternæ consentaneum, non est peccatum.

Respondeo negando antecedens, nam lex æterna non derivatur in nos, nec promulga-

tur voluntati, nisi mediante ratione; unde non solum legi æternæ, sed etiam rationi conueniens debet esse voluntatis actus, ut sit bonus.

Dices secundò: Præceptum inferioris non obligat, quando proponit aliquid contra præceptum superioris: Ergo ratio errans, proponens aliquid contra præceptum Dei non obligat.

Respondeo præceptum inferioris non obligare quidem, quando proponit aliquid quod scitur esse contra præceptum superioris; obligare tamen, quando id quod proponit, creditur esse præceptum superioris. Nam ut ait S. Doctor hic art. 1. ad 1. *Si quis crederet præceptum Proconsulis esse præceptum Imperatoris, contemnendo præceptum Proconsulis, contemneret præceptum Imperatoris.*

Quæres secundò, an liceat operari ex conscientia practicè dubitanti de bonitate vel malitia actus? Respondeo negativè, quia qui operatur ex conscientia dubia, exponit se periculo faciendi quod in se malum est & peccatum; unde qui sic operatur, non agit iuxta leges prudentiæ & amicitix, quarum altera dictat non esse operandum ubi de obiecti honestate non constat, altera præscribit ne amicus operetur aliquid quod possit amicum offendere; quare qui sic operatur, apertè conuincitur plus amare opus quod operatur, quam Deum, cuius legis transgressionem sic operando se exponit. Unde S. Thomas quodlib. 8. art. 13. *Ille qui in quandam dubitationem inducitur contrarietate opinionum, si manente dubitatione plures præbendas*
ha-

habet, periculo se committit, & sic procul dubie peccat, utpote magis amans beneficium temporale, quam propriam salutem: Et Caietanus tom. 1. opusculorum tract. ultimo resp. 13. dubio ultimo: Si applicatio (inquit) ad opus fluctuat circa rectum & obliquum moris, scrupulus est conscientiae contra quem illicitè agitur, & obliquitas moralis incurritur.

Dixi non licere operari ex conscientia *practicè dubitanti*, quia potest quis licitè operari cum conscientia speculatiuè dubia, modò illa practicè certa sit de honestate operis quod hic & nunc sibi faciendum proponit; regula enim voluntatis non est notitia speculatiua, quæ in sola obiecti veritate sistit, sed practica, quæ omnium circumstantiarum qualitatem perpendit; & quia potest ex occurssu circumstantiarum, obiectum quod secundùm se & speculatiuè consideratum, apparet dubium, reddi practicè certum, potest quis operari cum conscientia speculatiuè dubia, dummodo practicè certa sit: v. g. si sacerdos ægrotus, considerata qualitate morbi quo laborat, speculatiuè dubitet, num sibi liceat ab horis canonicis cessare, accedente consilio Medici, vel Confessarij, potest fieri practicè certus, id sibi licere, & tuta conscientia, à diuini officij recitatione abstinere.

Quæres tertio, an in rebus dubijs, & opinionum probabilium conflictu, liceat sequi opinionem minùs probabilem, fauentem libertati, in concursu alterius probabilioris, quæ fauet præcepto?

Respondeo negatiue, cum pluribus tum antiquioribus, tum recentioribus Theologis, & Ca-

& Casuistis; pietate ac eruditione clarissimis. Ita enim docent S. Antoninus 1. p. tit. 3. §. 10. regul. 4. Scotus infra referendus. Gabriel in 4. dist. 15. qu. 8. art. 3. dub. 2. in 3. probatione 1. conclusionis. Syluester verbo *Dubium*, qu. 2. Conradus de contractibus tract. 7. quæst. 110. conclus. 1. Corduba in suo *Questionario*, lib. 2. qu. 3. Natarrus in *summa Hispanica* cap. 28. addit ad num. 183. cap. 27. ut citat contrariæ opinionis assertor Sanchez in *Decal.* lib. 1. cap. 9. num. 13. Item ex Patribus Societatis negatiuæ adhærent sententiæ Bellarminus, opusculo ad Episcopum Theanensem nepotem suum, cuius verba infra referemus. Comitulus lib. 5. resp. Moral. ubi de probabiliore ac tutiore opinione sequenda sententiam, Ethicæ Christianæ caput, ad reliquas Christiani officij tractandas, dijudicandasque controuersias per necessarium, merito appellat. Additque oppositam sententiam esse scædam prolapsionem, qua à ratione discedimus, veritatem contemnimus, vel saltem eius agnoscendæ vias obstruimus, æternæ legi contumeliam imponimus, sceleros illos indices imitamur, qui contrarijs testibus auditis, eorum testimonium sequi vellet quod minus verisimile appareret; eorum etiam imprudentiam sequimur, qui quod verisimilius malum est eligunt, bono securo prætermisso. Idem ex eadem Societate luculenter tradunt Michael Elizarda in opere de recta morum doctrina, & Candidatus Philaletus, seu Andreas Blâncus, qui (ut ait Iulius Mercorus, Inquisitor Mantuanus) *huius nostri sæculi libertatem in moralibus, in Italia compescuit primus.*

Ex

Ex Thomistis verò nouissimè contrā aduersam sententiam calamum strinxerunt prædictus Mercorus, in libro de praxi opinionum, vbi plusquam viginti Doctores refert pro nostra sententia. Vincentius Baronius, qui eleganter & acutè illam probat in sua Theologia morali aduersus laxiores probabilistas, & Vincentius Contensonus tom. 5. suæ Theologiæ mentis & cordis, dissert. 6. de nouello probabilistis commento, vbi pluribus peritis, tum ab auctoritate, tum à ratione argumentis, illud euertit. Demum ex Canonistis contra recentiores probabilistas nouissimè scripsit Prosper Fagnanus, exponendo caput, *Ne inuitaris*, vbi totam hanc probabilitatis materiam eruditè & copiosè pertractat, viginti sex pro nostra sententia afferens rationes, & plures pro ea celebres Canonistas referens, quibus adiungi potest Ioannes Cabassutius, Congregationis Oratorij Presbyter, qui lib. 3. de iuris Canonici theoria & praxi cap. 13. ex professo docet nostram sententiam, & pro ea refert plures ex Auctoribus à nobis citatis.

Mulæ pro illa adduci solent rationes, quas in dissertatione de probabilitate fuisè expendimus, tres solùm hic breuiter exponemus.

Prima est: Sicut in controuersijs & difficultatibus moralibus quotidie emergentibus renemur inquirere veritatem, dum latet, & eam sequi, dum nobis perspecta est, iuxta illud Eccl. 32. *Ante omnia verbum verax præcedat te*: ita dum eam attingere & assequi non valemus, amplecti & eligere debemus id quod illi propinquius & vicinius nobis apparet; alioquin Christianismus non esset schola.

veritatis, sed spelunca erroris, si veritatem inquirere, & quantum possumus ad eam accedere non teneremur: At verò quisquis ab ea quam probabiliorē iudicat recedit opinione, ut minus probabilem sectetur, sponte, ac propria electione, recedit ab eo quod iudicat proprius ad veritatem accedere, hoc fine & intentione ut oppositæ parti adhæreat, quam iudicat è vero remotiorem; Ergo perversè agit, & peccat.

Secunda ratio petitur ex discrimine quod reperitur inter illum qui in conflictu opinionum probabilium eligit sententiam quam iudicat probabiliorē, & eum qui sequitur opinionem quam censet minus probabilem. Cum enim ille qui perfectam seu evidentem veritatis notitiam habere nequit, sequendo id quod probabilius, seu veritati conformius aut vicinius sibi apparet, faciat totum quod in se est ad veritatem attingendam, si per accidens ab ea aberrat, error ille inuincibilis & inculpabilis erit, subindeque excusabit à peccato, quia ut ostendemus in tractatu de peccatis, omnis ignorantia inuincibilis, cum tollat rationem voluntarij, sine qua non potest stare peccatum, excusat à peccato. E contra verò, cum ille qui adhæret sententiæ quam minus probabilem, subindeque à veritate remotiorem existimat, non faciat totum quod potest ut veritatem attingat, imò potius eam videatur spernere & fugere, atque ab ea recedere; eò ipso quod recedit ab eo quod iudicat proprius ad illam accedere, non laborat ignorantia inuincibili, sed vincibili, quæ non excusat à peccato.

Tertia ratio, quæ fundamentalis est, & præcipuum Aduersariorum fundamentum euertit, potest sic breuiter proponi: Ille non rectè agit qui prudenter non agit: At qui elegit sententiam minus probabilem, fauentem libertati, vel concupiscentiæ, in concursu alterius, quæ stat pro præcepto, prudenter non agit: Ergo non rectè operatur, sed peccat. Maior est certa apud omnes, cum prudentia sit regula bonitatis & malitiæ actuum humanorum! Minor verò, quam negant Aduersarij, ostenditur primò ratione quam insinuat S. Thomas 2. 2. qu. 43. art. 5. in argum. *Sed contra*, his verbis: *Ad prudentiam pertinet præferre maius bonum minus bono: Ergo desistere à meliori, pertinet ad imprudentiam.* Sicut ergo ex dictamine prudentiæ tenemur emere vestes quæ meliores aut commodiores nobis apparent, & vtiliori pretio venduntur, vel sumere medicinam quam salubriorem existimamus, aut nos committere naui, quam meliorem & tutiorem arbitramur, ita, & multò magis, in moralibus (in quibus, vt ait Lactantius, si quid erratum fuerit, vita omnis euertitur) probabiliore ac tutiore via seu sententia, ex præcepto seu dictamine prudentiæ, sequi debemus.

Hanc rationem disertè expendit Crysostrmus homil. 44. in Matth. vbi sic discurret: *Si vestimenta empturus giras vnum negotiatorem & alterum, & vbi meliores vestes inueneris, & pretio viliori, ab illo comparas, an non oportet populum circuire omnes Doctores, & inquire vbi sincera veritas Christi venundatur, & vbi corrupta, & veriore eligere plusquam vesti-*

stimentum. Vbi licet S. Doctor non loquatur de concursu opinionis probabilis cum probabiliori, sed de concursu prauæ opinionis hæreticorum, cum veritatibus ad fidem & religionem Catholicam pertinentibus, vt ex verbis immediatè præcedentibus liquet; eius tamen discursus valet etiam in materia probabilitatis, de qua nunc agimus; quia cum prudentia debeat præferre maius bonum minus bono, vt ex D. Thoma vidimus, tenemur in concursu plurium opinionum probabilium, vtiorem, aut probabiliorem, seu veritati viciniorem, *eligere plusquam vestimentum*.

Confirmatur & magis illustratur hæc ratio: Qui in rebus temporalibus vel corporalibus, vteretur opinione minùs tuta, minùsque probabili, in concursu alterius tutioris & probabilioris, imprudenter ac stultè omnino ageret: v. g. qui medicamentum reciperet quod minus salubre existimaret, spreto ac reiecto altero quod salubrius & ad recuperandam sanitatem efficacius putaret, vel qui se naui committeret, quam minùs tutam, minùsque securam existimaret, relictà securiori & tutiori: Ergo similiter, & multò magis, imprudenter agunt qui aggrediuntur opus quod probabilius putant esse illicitum, & qui salutem spirituales animæ, opinioni minùs tutæ, minùsque probabili, vt naui probabilius perituræ, committunt; *nec timent* (vt loquitur Hugo Victorinus) *animæ suæ legem dare, quam corpori suo præscribere nolunt*. Vnde Glossa in cap. x. de sentent. excomm. in 6. sic ait: *Stultus & fatuus est qui se d'scrimini committit*. Additque ibidem Ioannes Andreas: *Magis enim*
acce-

accedit ad id quod est falsum, in rebus ad salutem animæ pertinentibus : Cum ergo ille qui in materia morum eligit opinionem minùs probabilem, fauentem libertati, in concursu probabilioris, quæ stat pro præcepto, magis accedat ad id quod est falsum, in rebus ad salutem animæ pertinentibus, vt in prima ratione declarauimus; non sapienter ac prudenter, sed stultè omnino ac imprudenter operatur, iuxta huius celebris Canonistæ sententiam.

Nec valet fidicas, opinionem minùs probabilem, esse omnino tutam & securam, cum tutò incedat qui probabiliter incedit, vt noui Casuistæ passim docent, hoc enim falsum esse, mox ostendemus; & licet non esset falsum, est tamen valde incertum ac dubium, cum de hoc sit quæstio ac controuersia inter Theologos, alijs affirmantibus, alijs negantibus; unde viri prudentis ac sapientis non est, huic baculo arundineo inniti, & principio tam debili ac nutanti, suam salutem committere. *Agitur enim de summa rei, cum de salute æterna tractatur, vt ait Bellarminus infra referendus. Vel vt loquitur Eucherus epist. parænetica ad Valerianum : Non potest vlla compendij causa consistere, si constet animæ interuenire dispendium, & vbi salutis damnum est, ibi utique iam lucrum nullum est.*

Gallici Annales referunt, Henricum IV. recentis & indytx memoriæ Gallorum Regem, cum ex colloquio quod eo postulante habitum est inter Doctores Catholicos, & hæreticæ prauitatis ministros, audisset ab eis qui tunc aderant hæreticis ministris, eos qui Catholicam fidem sequerentur, dummodo

piè & rectè viuerent, in via æternæ salutis ambulare; Catholicis Doctõribus ex aduerso asseuerantibus, eos qui Calvinistarum doctrinam sectarentur, non posse ad æternam felicitatem pertingere: Regem, inquam, sapientissimè dixisse, id prudenti consilio conuenire, vt Catholicam & Romanam potius fidem amplecteretur, quam Calvinianæ sectæ adhærere perseveraret; quippe ex partis vtriusque consensu, se posse Romanæ Ecclesiæ fidem profitendo, futuræ beatitudinis compotem fieri; at secundum Catholicorum doctrinam, si Calvinianam hæresim non abiuraret, æternæ damnationis pœnam deuotare non posse: viri porro prudentis esse, in salutis negotio partem tutiorem sequi.

Hoc sapientissimi & gloriosissimi Regis consilium non sequuntur, qui deserta probabiliore & tutiore sententia, quam omnes Theologi certam, & immunem à periculo confitentur, posse nos minus probabilem amplecti docent; cum plures grauesque Doctores, eam securitate carere existiment, licèt probabili aliquorum iudicio, sit medium quo salutem consequamur. Vnde Cardinalis Bellarminus, non minus pietate quam eruditione insignis, in opusculo ad Episcopum Theanensem, nepotem suum, hæc aurea verba scribit: *Si quis velit in tuto salutem suam collocare, is omnino debet certam veritatem inq̃ irere, & non respicere quid multi hoc tempore dicant aut faciant; & si rei certitudo non possit ad liquidum apparere, debet omnino tutiorem partem sequi, & nulla ratione, nullius imperio, nulla utilitate temporali præposita, ad minus tutam par-*

tem declinare. Agitur enim de summa rei, cum de salute æterna tractatur, & facillimum est, conscientiam erroneam exemplo aliorum induere, & eo modo, conscientia non remordente, ad eum locum descendere, ubi vermis non moritur, & ignis non extinguatur. Quapropter Mutius Vitellescus, Generalis Societatis Iesu sapientissimus, in epistola scripta anno 1617. die 4. Ianuarij ad Superiores eiusdem Societatis, inter septem quæ impensè illis commendat, istud quarto loco reponit: *Præpositi omni studio perificent, ut qui doceant, scribuntque, minimè hac regula & norma in delectu sententiarum utantur: Tueri quis potest. Probabilis est. Auctore non caret. Verùm ad eius sententias accedant, quæ tutiores, quæ grauiorum, maiorisque nominis Doctorum suffragijs sunt frequentatæ, quæ bonis moribus conducunt magis, quæ denique pietatem alere, & prodesse queant, non vastare, non perdere.* Ita referunt CLEMENS SCOTUS de potestate Pontificis in Societatem Iesu folio 365. & MARTINUS DE PRADO Tomo 1. Theologiæ moralis cap. 15. pagina 634.

Potest insuper probari Minor principalis quæ asserit non prudenter operari illum qui eligit sententiam minùs probabilem, fauentem libertati vel concupiscentiæ, in concursu alterius quæ stat pro veritate & præcepto) hoc discursu, quo præcipuum Aduersariorum fundamentum conuellitur. Prudentia, cum sit virtus intellectualis practica, requirit certitudinem saltem moralem in suo objecto: At qui sequitur opinionem minùs probabilem, fauentem libertati, in concursu probabilioris, quæ

quæ stat pro præcepto , non habet certitudinem moralem de honestate & bonitate morali suæ operationis: Ergo prudenter non agit. Maior patet, Minor etiam videtur manifesta: quis enim affirmare audeat se habere moralem certitudinem de honestate & bonitate morali illius operationis , quæ magis mala quam bona sibi apparet , & de qua hoc iudicium seu dictamen habet : probabilius & verosimilius est , hanc actionem esse malam & illicitam? Sed qui operatur ex opinione minùs probabili quæ stat contra præceptum , non potest non habere tale iudicium seu dictamen in intellectu; cum opinio probabilior , fauens præcepto dicet & suadeat probabilius esse & verosimilius, actionem illam esse malam & illicitam: Ergo qui sequitur opinionem minùs probabilem, fauentem libertati , in concursu probabilioris, quæ stat pro præcepto, non habet certitudinem moralem de honestate & bonitate morali suæ operationis .

Respondent Aduersarij, quod licet ille qui operatur ex opinione minùs probabili , quæ fauet libertati, in concursu probabilioris, quæ stat pro præcepto , habeat hoc iudicium speculative , *probabilius & verosimilius est, hanc actionem esse malam & illicitam* , habet tamen simul aliud iudicium practicum & reflexum , certificans conscientiam de rectitudine & bonitate morali suæ operationis, nempe istud : *Qui probabiliter agit , prudenter & securè agit* .

Hæc responsio & doctrina est præcipuum ac ferè vnicum Aduersariorum fundamentum, vnde ad illam tanquam ad tutissimum azylum

semper confugiunt, cum vi argumentorum premuntur, eoque dogmate: *Qui probabiliter agit, prudenter agit*, veluti fortissimo clypeo, omnia quæ in ipsos vibrantur tela, putant se posse repellere. Sed difficile non est eos ab illa arce depellere, & murum hunc arietare, atque clypeum illum stramineum penitus infringere.

In primis enim, esto quod ille qui agit probabiliter, prudenter agat, quando illi non occurrit alia opinio probabilior; imprudenter tamen agit, dum in concursu sententiæ probabilioris, eligit minis probabilem, ut supra ostensum est, *magis enim accedit ad id quod est falsum, in rebus ad salutem pertinentibus*, ut ait Ioannes Andreas supra relatus.

Secundò, si assensus prudens & probabilis sint synonymi: Ergo prudenter aget Medicus probabilia remedia adhibens, tutis & efficacioribus prætermisissis. Ergo excusabitur Iudex, qui reum nec convictum nec confessum, ex probabilibus suspectum, sed ex probabilioribus innocentem, poena capitis multauit: Quod ut erroneum nuper damnauit Innocentius XI. Ergo licitum erit Christianis illas omnes morum corruptelas ad praxim redigere, quas probabiles esse, ac bonis rationibus fultas, nonnulli recentiores Casuistæ passim docent. Certè quis non videat prædictum dogma probabilistarum, *qui probabiliter agit, prudenter & securè agit*, ad omnia flagitiorum genera viam sternere ac manire, & omnem religionis & honestatis euersionem ex eo sequi, omniaque ferè reddi licita, cum iuxta recentiores Casuistas, omnia ferè sint probabi-

bilis, ut disertè declarat Prosper Fagnanus in cap. Ne innitaris, ubi hæc scribit: Nullum est dubium quin omnis regula morum possit exerti ex libertate opinandi, non modo in præceptis humanis, sed etiam in diuinis & naturalibus, dum de ipsis interdum non occurrunt rationes demonstrativæ. Unde his temporibus eò res perducta est, ut nullus fere sit articulus in moralibus, in quo non sit varietas vel contrarietas opinionum, adeò ut in solo opere non ita pridem impresso resolutionum moralium Antequini Dianæ, numerentur in unum collectæ quæstiones supra ter mille, cum opinionibus & Auctoribus pro utraque parte plerumque affirmantibus, aut ambas esse probabiles, aut unam probabilem, & alteram probabiliorem, in quibus serè omnibus agitur de peccato mortali. Quare hæc doctrina probabilitatum videtur fouere veluti quandam libertatem conscientie, ac proinde magnopere indigere dextera Dei, & Beatissimi Romani Pontificis provisione, ne venenum iam plus nimio dilatum, ulterius serpat. Quapropter non immerito Antonius Merenda in suo Tractatu de hac materia, nouissimè impresso, in præfatione p. 7. rotundis verbis affirmat, usum probabilitatum esse commentum Diaboli, ad eneruandam vim præceptorum. Similia habet Crispinus à Borgia in selectis moralibus qu. 9. ubi sic ait: In rebus moralibus vix datur casus in quo non sint duæ opiniones contradietoriæ & probabiles, & hæc punctum ita ad punctum reduxit Caramuel, ut vix sit aliquod præceptum Ecclesiasticum quod eludi non possit si eius doctrinæ quam probabilem putat adheremus, Nam duas opi-

niones contradictorias sequi quemlibet posse, probabile esse contendit: Ex quo fit ut nemo teneri videatur præcepto ieiunandi, audiendi sacrum, recitandi horas canonicas, & alia huiusmodi. Unde inter sexaginta quinque propositiones ab Innocentio XI. feliciter Ecclesiam regente nuper damnatas, hæc tertio loco recensetur. Dum probabilitate, siue intrinseca, siue extrinseca, quantumvis tenui, modo à probabilitatis finibus non exeat, aliquid agimus, semper prudenter agimus.

Tertiò, quæro ab Aduersarijs, an prædictum dogma recentiorum Casuistarum qui agit probabiliter, agit prudenter, sit certum ac demonstrabile, vel duntaxat probabile & opinatiuum. Primum dici nequit, cum nulla ratione euidenti & demonstratiua probari possit, & negetur à pluribus grauissimis Theologis, & Canonistis. Si autem respondeatur illud esse duntaxat probabile & opinatiuum, ut reuera tenentur respondere Aduersarij, manifestum est ex illo non posse deriuari moralem certitudinẽ, quæ omnẽ moralem formidinem & dubietatem à conscientia tollat, eamque de rectitudine operationis omnino certificet, cum opinio (ut ait S. Thomas 1. p. qu. 79. art. 9) significet actum intellectus, qui fertur in vnã partem contradictionis, cum formidine alterius. Addo quod, sicut ex contingenti solum contingens, & ex frigido frigidum; ita non nisi probabile, & fallibile, ex probabili & fallibili sequi potest; & sicut innixa debili & nutanti fundamento ædificatio, non potest certa & secunda consistere.

Dices

Dices fortè, quod licèt tale dogma ab intrinseco, seu à rationibus & motibus intrinsecis, non sit certum & infallibile, sed probabile tantùm & opinabile; ab extrinseco tamen habet moralem certitudinem, nempe & suffragio & autoritate plurium grauium Theologorum & Casuistarum, qui illud certum esse asserunt, & omnimodam securitatem spondent quamcumque opinionem probabilem sequentibus. Verùm omnes illi Theologi & Casuistæ (esto eruditione, sapientiâ, & pietate celebres) non sunt haud dubiè tantæ authoritatis in Ecclesia, quantæ D. Augustinus, Doctorum aquila, humanorum ingeniorum apex, & luminare maius Ecclesiæ, eique sapientiâ, prudentia, eruditione, ac pietate, multò inferiores sunt; & tamen ille S. Doctor ingenuè profitetur, securitatem à se datam nihil valere apud Deum, si à lege diuina dissentiat: *Ecce (inquit) dat tibi securitatem procurator, quid tibi prodest se paterfamilias non acceptet? Procurator sum, seruus sum, vis tibi dicam? uiue quomodo vis, Dominus te non perdet: Securitatem tibi procurator dedit, nihil valet securitas procuratoris: utinam tibi Dominus securitatem daret, & ego te securum facerem: Domini enim securitas valet, etiam si nolim; mea nihil valet, si ille noluerit. Cùm ergo Deus securitatem non promiserit, quamcumque opinionem probabilem sequentibus, nec vllum huius dogmatis, qui probabiliter agit, prudenter & securè agit, in Scriptura aut SS. Patribus extet vestigium, non potest omnimodam securitatem habere, quæ moralem omnem excludat formidinem, à nouorum*

Theologorum suffragio ; præsertim cum illud non possit ultra probabilitatis sphaeram, aliquam sententiam seu dogma euehere . Vnde Lactantius lib. 3. cap. 13. rectè admonet: *Ne irabamur auctoritate cuiusquam sed veritati potius accedamus*. Et subdit: *Nullus hic temeritati locus est: in æternum stultitiæ pœna subeunda est, si aut persona inanis, aut opinio falsa deceperit*.

Addo ex Cabassutio de lib. de iuris Canonici theoria & praxi, supra citato: *Viros pietate, & prudentia eximios, difficilè reperiri in illa Scriptorum caterua, quæ ante annos circiter triginta, ut densissima nubes locustarum sese quaquaversum effudit, criminosaque opinionum portenta disseminavit, quibus eorum Authorum quilibet, magnam & in tuto positam probabilitatem, vel suo unius suffragio auctoritateque se conciliare præsumebat: imò & iactabat sibi genus humanum vinculo amplissimæ beneficentiæ astrictum, ob sublata peccata mundi; quia quæ olim habebantur pro criminibus, sue auctoritatis pendere, reddidisset licita & honesta, viamque illam arctam & arduam quæ ducit in calum in amplissimam aream & planitiem conuertisset, qua utò & indiscriminatim uniuersi absque vlla difficultate in cælum devenirent, solis exceptis qui tantum beneficium non agnoscerent, diuinasque istas probabilitates non exoscularentur, quorum duntaxat est desperata salus, & certissima damnatio*.

Demum prædictum nouorum Casuistarum dogma falsum esse, apertè colligitur ex utroque Doctore Angelico, & Subtili. Ille enim quod lib. 9. art. 15. ait hanc quæstionem, an
li.

licitum sit habere plures præbendas? Periculosè determinari, quia ambigua est, dum Theologi Theologis, & Iurista Iuristis inveniuntur diuersa sentire. Iste verò in 3. dist. 25. c. 1. num. 8. sic ait: Cum habens duas opiniones contrarias perplexus sit, pericolosè se determinaret ad vnā, nisi re diligenter inspecta, illam probabiliorē eligeret. Vbi loquitur de opinionibus in materia morum, non verò de speculatiuis, vt constat ex verbis istis præcedentibus: In moralibus quando sunt altercationes de aliquo peccato &c. At hæc falsa essent, si prædictum dogma, qui probabiliter agit, prudenter & securè agit, verum esset; nullum enim esset periculum in decisione seu determinatione illarum questionum, quamcumque enim sententiam quis eligeret, siue probabiliorē, siue minùs probabilem, dummodo esset probabilis, prudenter & securè ageret, essetque immunis à peccandi periculo: Ergo prædictum dogma principijs doctrinæ D. Thomæ & Scoti apertè repugnat.

Nostram sententiam probant insuper aliqui Recentiores, ex eo quod nulla dari possit ignorantia inuincibilis iuris naturalis, ex quo inferunt nullum probabile falsum, & legi æternæ vel naturali dissonum, excusare à peccato; tamen si falsitas, seu à lege æterna, vel naturali disformitas, inuincibiliter ignoretur. Sed hæc ratio displicet, tum quia supponit verum certum & indubitatum aliquid de quo est lis & controuersia inter Theologos, nempe nullam posse dari ignorantiam inuincibilem, & inculpabilem iuris naturalis, de quo dicemus in tractatu de legibus cap. 3. §. 4. Tum etiam,

quia si hæc ratio valeret, sequeretur non solum eum qui eligit opinionem minus probabilem, in concursu probabilioris, sed illum quoque qui probabiliorē, imò & probabilissimam sectatur, peccare, si contingat talem opinionem esse fallam, & legi naturali dissonam, ut contingere potest, cum falsa interdum sint probabiliora veris, ut ait Aristoteles in libris Topicorum. Ex quo sequeretur incredibilis conscientie perplexitas, imò & peccandi hic & nunc inevitabilis & dura necessitas, ut loco citato fusiùs exponemus.

Soluntur obiectiones.

PRæcipuæ aduersariorum obiectiones iam ferè occupatæ sunt, & solutæ manent ex dictis probando nostram sententiam, constat enim ex tertia ratione friuolum esse argumentum illud quod apud illos palmarium est: Ille rectè operatur qui prudenter operatur. At qui sequitur sententiam minus probabilem, in concursu probabilioris, prudenter operatur, & cum ratione, nam probabilis opinio ea est quam bona ratio fulcit, alioquin probabilis non est: Ergo rectè operatur.

Huic inquam argumento solutio patet ex supra dictis, ostendimus enim in tertia ratione, imprudentissimè agere illum qui in concursu plurium opinionum probabilium minus probabilem & minus tutam, præfert probabiliori ac tutiori. Nec refert quod opinio minus probabilis aliqua ratione fulta sit, cum enim probabilior, meliori ac efficaciori nitatur.

tur fundamento, adueniente seu apparente luce probabilioris sententiæ; lux sententiæ minùs probabilis statim euanescit; sicut apparen- te solè lux stellarum occultatur & dispa- ret.

Potest hoc explicari & magis illustrari ex doctrina quam ex Aristotele tradit D. Tho- mas, r. p. q. 50. art. 1. ad 1. vbi docet quod medium comparatum ad vnum extremum al- terum extremum videtur: v. g. tepidum com- paratum calido, videtur frigidum, & compa- ratum frigido, videtur calidum. Fuscum comparatum ad nigrum, album dicitur; & nigrum, si compareretur ad album. Item me- dia fidium in lyra vel cithara, grauis dicitur comparata ad vltimam, & acuta si compareretur ad primam. Denum crepusculum compara- tiuè ad noctem, appellatur dies; & nox, si com- pararetur ad diem. Cum ergo opinio minùs probabilis mediet inter improbabilem & pro- babiliorē, licet comparatiuè ad improbabilem, probabilis aliquo modo appareat, non tamen in concursu probabilioris, & compara- tiuè ad illam, præsertim si notabiliter proba- bilior sit. Idem cum proportionē dicendum est de ratione minùs bona & minùs efficaci, comparata ad meliorem & efficaciorē.

Solutum etiam manet ex dictis aliud Ad- uersariorum fundamentum, quo probant, il- lum qui eligit sententiam minùs probabilem & minùs tutam, in concursu probabilioris & iutioris excusari à peccato, eò quòd laboret ignorantia inuincibili. Hoc enim falsum es- se constat, cum illi tunc affulgeat sententia quæ sibi ob rationum momenta apparet pro-

babiliior, & ob periculi remotionem tutior est atque securior; & illa spreta minùs probabilem, minùsque tutam, de industria eligat, etiam si stet pro libertate contra legem, pro voluptate contra officium, pro commodo contra honestum, verosimilioribus argumentis communitum. Unde meritò ille cum Poeta exclamare potest: *Idcirco meliora, proboque. Deteriora sequor.*

Obijciunt tertio Aduersarij illud argumentum, quod etiam apud illos præcipuum & fundamentale est: Ilicitum est eligere id quod est minùs bonum & minùs perfectum, relicto meliori & perfectiori: v. g. matrimonium & statum sæcularem, illumque præferre Clericali vel Religioso: Ergo pariter licet eligere sententiam minùs probabilem, quæ fauet libertati, relicta probabiliori, quæ stat pro præcepto.

Sed nego consequentiam & paritatem, nam status matrimonij securus est, etiam in concursu status religiosi vel clericalis, non verò sententia minùs probabilis, in concursu probabilioris, cum non sit regulis prudentiæ consona, ut supra ostendimus.

Dices, cur ille qui eligit sententiam probabiliorem, securus est, & à peccandi periculo immunis, non verò ille qui sequitur sententiam minùs probabilem, cum opinio probabilior non minus possit esse falsa, & legi diuinæ dissona, quam minùs probabilis?

Responden esse notabile inter illos discrimen: ille enim qui eligit probabiliorem sententiam, habet hoc iudicium reflexum & prudentiale: *Qui facit totum quod in se est ad*
in.

Inquirendam veritatem, si fortè illam non attingat, excusatur à peccato, ratione ignorantie inuincibilis: quod iudicium omnino certum est, utpote nixum huic principio: Nemo peccat in eo quod vitare non potest, quod D. Augustinus in libro de duabus animabus c. 11. vsque adeò esse notum & per se manifestum asserit, ut non solum à nemine ignoretur, sed insuper à toto genere humano decantetur & declametur. Nenne (inquit) ista cantant & in montibus Pastores, & in theatris Poetæ, & indocti in circulis, & docti in bibliothecis, & Magistri in Scholis, & Antistites in locis sacris, & in orbe terrarum genus humanum. Ille verò qui sequitur sententiam minùs probabilem, in concursu probabilioris, non potest habere hoc iudicium reflexum (cum laborare nequeat ignorantia inuincibili, ut supra ostensum est) sed solum istud, Qui probabiliter agit, prudenter & securè agit, quod valde dubium & incertum est, & ad summum probabile & opinabile esse potest, ut ex supra dictis constat. Vnde primus firmissimæ columnæ adhæret, alter verò baculo arundineo, seu nutanti ac debili fundamento innititur.

Obijciunt quartò: Eadem videtur esse ratio de probabiliori sententia, ac de tutiori: Sed possumus eligere sententiam minùs tutam, in concursu tutioris, ut docet S. Antoninus 1. p. tit. 3. cap. 10. §. 10. his verbis: *Eligere viam tutiorem, consilij est non præcepti, alias oporteret multos ingredi religionem, in qua tutius viuunt, quam in seculo.* Et 2. p. tit. 1. cap. 16. §. 2. sapienter admonet Confesso-

fessores, his verbis: *Semper tutior via consi-
lenda est, sed non imperanda*: Ergo pariter li-
cèt si qui sententiam minùs probabilem, in
concurſu probabilioris.

Respondeo negando maiorem, opinio enim
dicitur tutior ex eo, quod à peccandi peri-
culo magis recedat, probabilior verò, ex eo
quod sit vel appareat veritati magis consona,
aut vicina: licèt autem teneamur ſequi id
quod veritati conformius aut vicinius nobis
apparet, quando illud fauet præcepto aut vir-
tuti, non tamen id quod à periculo peccandi
magis recedit, si non sit veritati aut pruden-
tiæ consonum, cùm prudentia sit regula
actuum humanorum. Quare Ambrosius in
Psalm. 118. *Sicut non est sapientia sine timore,
ita timor sine sapientia esse non debet*. Vnde
quando aliqui Authores supra citati dicunt,
in materia morum ſequendam eſſe tutiorem
ſententiam, hoc intelligendum eſt de ſenten-
tia tutiori, quæ probabilior eſt, veritati ac
prudentiæ magis consona; non verò de illis
ſententijs quæ minùs probabiles, & pruden-
tiæ regulis minùs conſonæ ſunt. Alioquin
cùm quis dubitaret, an res quam poſſidet eſ-
ſet ſua, vel alterius, teneretur ſtatim eam al-
teri tradere, vel cum eo diuidere, cùm hoc ſit
tutius, & à peccandi periculo remotius, &
vniuerſaliter omnes opiniones quæ docent ali-
quos contractus eſſe illicitos, etſi improbabi-
les, vel minùs probabiles, eſſent ſequendæ,
vtpote tutiores, & à peccandi periculo remo-
tiores; quod eſſet onus intolerabile, & tollens
ferè humana commercia, cum ferè nulla ſit
actio, & nullus contractus, circa quem non
ſit

fit aliqua opinio damnans illum. Quando ergo ex oppositis opinionibus, vna quidem tutior est, sed altera probabilior, licitum est sequi probabiliorē, quæ hoc ipso tuta est & securā: cum enim ad rectè agendum requiratur præcipuè veritas atque erroris fuga, inde fit vt maior probabilitas in re ambigua sit præferenda maiori securitati, quia magis ad scopum veritatis accedit. Vbi tamen alicuius Sacramenti valor, aut alicuius animæ salus periclitaretur, non solum probabilior, sed etiam tutior pars esset eligenda, vt Theologi docent in Tractatu de Sacramentis.

Obijciunt quintò, cum iugum Christi sit suauē, & onus eius leue, vt dicitur Matth. xi. opiniones illæ in materia morum sequendæ sunt, quæ viam cœli planiorem & faciliorem reddunt, quales sunt opiniones probabiles, fauentes libertati. Vnde Caramuel in Theologia regulari disput. 6. ait, *Ecclesiam Catholicam feliciorem dici debere, quod exuberet doctissimis viris, qui introduxerunt benignas opiniones, quia damnarentur plurimi quos sententia probabilitas saluat.* Id ipsum alij Recentiores passim profitentur, asserentes nouorum Casuistarum solertia & industria, viam salutis quotidie planiorem & faciliorem reddi; quia ab ipsis nouæ opiniones probabiles quotidie excogitantur, quæ homines benignius & facilius possunt ad lauream empyreæ promouere.

Confirmant ex lege *benignus ff. de legibus, & cap. finali de transactionibus*, vbi dicitur, quod *opinio benignior & suauior præferri debet.* Et S. Antoninus i. p. tit. 3. cap. 10. §. 10, sic

10. sic ait: Inter duram & benignam circa præcepta sententiam, benigna est potius cæteris paribus interpretatio facienda. Dicitur etiam in Prologo nostrarum Constitutionum litt. I. Tertium (quod impedit salutem animarum) est nimia austeritas in consilijs & opinionibus; terrentur enim homines ex hoc in tantum ut salutem propriam negligant. Quapropter relaxanda est (quantum fieri potest) rigiditas & austeritas in consilijs, ac homines benignè tractandi sunt.

Ad obiectionem respondeo, iugum quidem Christi suave esse, & onus eius leue, sed eius suauitatem & leuitatem oriri ex charitate & gratia Christi, illud emolliente ac mitigante, ut docet D. Thomas 1. 2. qu. 98. art. 1. ad 3. non verò ex usu, seu potius abusu, ac laxitate probabilitatum quas noui Casuistæ in Ecclesiam induxerunt. Vnde absurdum est dicere, illorum solertia & industria, viam salutis quotidie dilatarì. Nam ut rectè ait Sinichius Doctor Louaniensis, in libro de Saule Israeliticæ gentis Protomonarcha, tomo 1. pag. 262. Profectò tam non potest humana solertia ad semitam cæli adicere digitum vnum latitudinis, quam non potest ad staturam hominum adicere cubitum vnum longitudinis. Etenim qui vitæ hominis constituit terminos qui præteriri non poterunt, ipse quoque constituit viam cæli terminos, qui dilatarì non poterunt; ipse quoque constituit viam tartari terminos qui contrahi non poterunt: atque adeò illa permanet arcta, prout ab ipso constituta est, & ista perseverat spatiosa, prout ab ipso constituta est.

Addit Mercurius Inquisitor Mantuanus in libro

libro de praxi opinionum limitata pag. 492. respondens ad prædicta verba Caramuelis: *Si nouæ huic felicitati Ecclesiæ, quæ am supponit hic Author esset plaudendum, quod ab opinatoribus fideles ad lauream empyream promouerentur facilius, esset simul condolendum infelicitati Ecclesiæ seculorum antecedentium, quibus hæc ianua cœli foret clausa. Vnde cum Magno Guigone, Carthusianorum quondam Generali, exclamandum esset: O Apostolorum tempora infeliciissima! O viros illos ignorantie tenebris inuolutos, & omni miseratione dignissimos, qui ut ad vitam pertingerent, propter verba labiorum Dei, tam duras vias custodiebant, & hæc nostra compendia nesciebant!*

Ad confirmationem respondeo quod quando dicitur in iure Canonico, quod opinio benignior & suauior præferri debet, hoc debet intelligi, quando talis opinio est iusta, & intra lineam honesti: opinio verò minus probabilis, fauens libertati, in concursu probabilioris, quæ stat pro præcepto; cum non sit prudentiæ regulis consona, nec iusta est, nec intra lineam honesti. Eodem modo intelligi & explicari debet id quod ex S. Antonino refertur. Similiter cum dicitur in nostris Constitutionibus, *relaxandam esse rigiditatem & austeritatem in consilijs (quantum fieri potest) ac homines benignè tractandos esse*: hoc intelligi debet, quantum fieri potest, iuxta leges prudentiæ, quæ est regula actuum humanorum: leges autem prudentiæ (ut supra ostensum est) prohibent eligere opiniones laxiores & benigniores, minus probabiles, in concursu probabiliorum quæ stant pro præcepto.

Addo

Addo quod, opinio benigna, apud Iurisperitos, non dicitur ea quæ fauet libertati, sed quæ fauet testamento, matrimonio, religioni, aut Sacramento, vt exponit Syluester. Vel, vt alij interpretantur, quæ fauet egenis, orphanis, viduis, & peregrinis.

Obijciunt quintò: Opinio quæ docet nos teneri ad sequendum in rebus moralibus probabiliore sententias, exponit conscientiam multis scrupulis & anxietatibus, à quibus liberantur qui docent licitum esse sequi sententiam minus probabilem, fauentem libertati in concursu probabilioris, quæ stat pro præcepto: Ergo ad quietem & tranquillitatem conscientia, hæc secunda opinio in praxi tenenda est, esto alia speculatiuè sit verior, aut probabilior.

Respondeo negando Antecedens, nam tantum abest, quod sequendo probabiliorem sententiam, scrupulis conscientia exponatur, quin potius ab eis omnino liberetur & eximatur, vt constat ex Clementina *Exini* de verb. signif. vbi Pontifex ait: *In his quæ salutem animæ respiciunt, ad vitandos graues remorsus conscientia, pars securior est tenenda.* Ratio etiam id suadet, nam in sincera solum veritatis inquisitione quies, in sola veritate securitas perfecta esse potest; atque adeò qui partem illam amplectitur, quam minus probabilem & minus tutam, id est falsitati quam veritati, peccato quam virtuti, viciniorem iudicat, angitur scrupulis, & stimulis conscientia pungi ac torqueri necesse est: qui autem sequitur id quod verius, quod tutius, quod probabilius credit, is quietus & tranquillus est, licet om-

nino securus non sit; nam is vnus vera & perfecta securitate fruitur, qui primam & aternam veritatem & secutus, & affecutus est. Vnde Gregorius Magnus lib. 5. moral. cap. 6. *Sancti viri cum mala superant, sua etiam bene gesta formidant, ne cum bona agere appetunt, de actionis imagine fallantur, ne pestiferas tabes putredinis, sub boni specie lateat coloris.* Sciunt enim quia corruptionis pondere grauari, diiudicare bona subtiliter nesciunt, & cum ante oculos extremi examinis regulam deducunt hac ipsa in se nonnumquam & quæ approbant metuunt, & tota quidem mente interna desiderant, sed tamen de incertitudine operum trepidi, quo gradiuntur ignorant. Et rursus capite sequenti: *Iusti in ipsis bonis operibus positi trepidant, ac ne in eisdem oculis aliquo errore displiceant, continuis lamentis vacant.*

Ex quibus liquet, illam conscientiae tranquillitatem, quam spondent noui Casuistæ, minus probabilem sententiam sequentibus, suspectam & periculosam esse, & puluillum illum seu cervical, quod sub tepidorum & negligentium capite ponunt, vt mollius in suis negligentijs dormitent & quiescant, reprobari à Domino per Prophetam dicentem: *Et qui consueunt puluillos sub omni cubito manus, & faciunt cervicalia sub capite vniuersæ terræ, ad capiendas animas.* Quæ verba exponens Gregorius Magnus lib. 18. moral. capite 4. sic ait: *Puluillus ponitur, vt mollius quiescatur.* Quisquis ergo malè agentibus adulatur, puluillum sub capite vel cubito iacentis ponit, vt qui corripere ex culpa debuerat, in ea fultus laudibus, molliter quiescat.

Quæ-

Quæres quartò, quando occurrunt duæ opi-
niones in materia morum æquè probabiles,
seu habentes rationes æquales, quarum vna non
præponderat alteri, quanam ex illis eligenda
ac præferenda sit?

Respondeo tunc eligendam esse tutiorem,
& minus tutæ præferendam: Ratio est, quia
licet in speculatiuis homo possit ex innata li-
bertate se determinare ad sequendam quam-
cumque sententiam probabilem quam volue-
rit, in moralibus tamen & practicis, debet ad
id determinari à prudentia; quæ est regula
a ctuum humanorum, subindeque ad id moueri
debet ex aliquo motiuo prudenti, intrinseco,
vel extrinseco: quâdo autem opiniones sunt æquè
probabiles, nō potest ad id moueri & determi-
nari ex aliquo motiuo intrinseco, seu ex ali-
qua ratione præponderante, cū tunc ratio-
nes in vtramque partem sint æquales: Ergo
tunc debet ad id moueri & determinari ab
aliquo motiuo extrinseco prudenti, quod non
potest esse aliud conuenientius, quam maior
securitas quæ reperitur in vna ex illis senten-
tijs, potius quam in altera. Quare celebris
regula est iuris Canonici, quod *in dubijs tu-
rior pars est eligenda*: vnde cū in concursu
plurium opinionum æquè probabilium homo
dubitet quam ex illis eligat, & sit anceps &
pendulus, & veluti in æquilibrio, nesciens in
quam partem inclinaret, vt prudenter agat, de-
bet in tutiorem partem declinare, & eligere
securiorem sententiam.

Dices: Est alia regula iuris, quæ dicit,
quod *in dubijs melior est conditio possidentis*:
Ergo cū homo sit in possessionem suæ
li-

libertatis, potest in concursu duarum opinionum æquè probabilium, eligere quamcumque maluerit, subindeque non tenetur eligere tutiorem.

Respondeo hanc regulam solùm habere locum in materia iustitiæ, & in foro iudiciali duntaxat, non autem in materia aliarum virtutum: nam in materia iustitiæ possessio in dubio fauet possessori, inquantum facit præsumptionem quod possessor sit verus dominus, quia ut plurimum qui possidet, rem suam & ius suum possidet; quando enim quis rem alienat, solet eam tradere vero domino, in quem per alienationem transfertur dominium: vnde cum aliquis possidet aliquam rem, signum est eam non alienasse, sed ipsius verum habere dominium. At verò in materia aliarum virtutum, cum possessio regulariter non faciat præsumptionem de veritate pro parte quæ possidet, possessio ei minimè favere debet, sed in dubijs in tali materia occurrentibus, regula operandi est inquirere pro qua parte stet præsumptio veritatis, & hæc pars est eligenda: Si autem pro neutra parte stet præsumptio, tutior pars eligi debet, ut pluribus exemplis & regulis iuris probat Prosper Fagnanus super caput, *Neminis*.

Quæres ultimò, an quando post adhibitam diligentem inquisitionem veritatis, in rebus moralibus, & casibus conscienti, si nihil certi, & plenè perspecti (quod frequenter in rebus humanis accidit) compareat, tunc possit quis agere ex opinione probabiliori?

Respondeo affirmatiuè contra Fagnanum in cap. citatum, *de constit.* num. 59. qui in morali quacunque materia negat licitum esse opinari, eò quòd opinio (inquit) versetur circa rem incertam, & ei coniuncta sit formido oppositi. Vnde constanter affirmat necessariam esse in omni actione morali certitudinem, sine qua non potest homo agere nisi cum peccato, ob periculum cui se exponit, quemadmodum & omnis agens cum conscientia dubia.

Nostra tamen resolutio est D. Thomæ quodlib. 8. art. 13. in argum. *Sed contra*, vbi sic ait: *Si aliquis adhibet diligentiam, inquirens an habere plures præbendas sit licitum, nec inuenit aliquid quod ipsum moueat ad hoc quod sit illicitum, videtur quod sine peccato plures possit habere præbendas.* Ratio etiam id suadet, homines enim debent operari modo humano, nec possunt obligari ad hoc quod omnium rerum habeant claram & perfectam notitiam: dum ergo facta sufficienti diligentia, iuxta conditiones rei & personæ, aliud probabilius non apparet, prudenter operatur homo, si conformando conscientiam suam opinioni probabili.

Confirmatur & magis illustratur hæc ratio ex Caietano in summa, verbo *Opinio*, vbi sic habet: *Non exigit Deus ab homine plusquam conditio hominis habet, quia diuina sapientia disponit omnia suauiter:* Sed hominis conditio habet, vt in rebus moralibus non possit assequi omnium euidentiā, nec habere certitudinem mathematicam, seu exactam omnium agibilium: Ergo Deus non exigit ab illo,

lo, ut semper cum euidentia & certitudine mathematica de bonitate morali suæ actionis operetur; subindeque potest sequi sententiam probabilem, dum facta sufficienti diligentia, alia probabilior ei non apparet. Vnde D. Antoninus 1. p. tit. 3. cap. 10. §. 10. *Certitudo* (inquit) *quæ reperitur in materia morali, non est certitudo euidentiae, sed probabilis coniecturæ.*

Ad fundamentum verò Fagnani facile respondetur, eum qui facta sufficienti diligentia ad inquirendam veritatem, agit ex opinione probabili, quando alia probabilior ei non occurrat, non agere cum conscientia practicè dubia, subindeque nulli peccandi periculo se exponere; quia tunc certificatur moraliter per iudicium reflexum quod habet (non quidem illud in quo noui Casuistæ fundantur, nempe: *Qui agit probabiliter prudenter & securè agit*; supra enim ostendimus, tale dogma dubium esse ac incertum, & à pluribus grauissimis Theologis censi erroneum, sed per istud: *Qui facit totum quod in se est ad inquirendam veritatem, & illam attingere, & consequi non valet, excusatur à peccato ratione ignorantiae innvincibilis*: Quod principium est omnino certum, & vnanimifere Theologorum omnium calculo & consensu firmatum, ut in tractatu de peccatis ostendamus.

Ex his intelliges, in hac materia probabilitatis cautè incedendum esse, nec reiiciendam absolutè omnem probabilitatem (ut aliqui ultra modum seueriores faciunt) sed posse hominem agere ex opinione probabili, quando pro-


probabilior ei non occurrit; in conflictu-
men seu concursu plurium opinionum proba-
bilibus, sequendam esse probabilio-
rem, præsertim si notabiliter probabilior sit, ut supra
ostensum est.

Inter hos duos scopulos Scyllæ & Caryb-
dis cautè incedendum est, & vitanda in hac
materia duo extrema opposita, illorum scili-
cet qui omnem probabilitatem abijciunt, &
aliorum qui ex aduerso omnem probabilita-
tem amplectuntur, eamque securam esse mo-
rum regulam asserunt, tamen si illis tunc afful-
geat alia sententia probabilior, subindeque
veritati vicinior. Veritas enim (ut bellè No-
uatianus ait) inter duos errores, ut Christus
inter duos latrones, media pendet. Certè si
hoc medium seruaretur, & opinionum pro-
babilitas, cum prædicto moderamine & tem-
peramento, ab omnibus reciperetur, morum
vniuersitas & puritas inter fideles faciliùs
conseruaretur; *breuique tempore* (inquit Gra-
uina in suo Cherubim Paradisi) *reformaretur*
mundus, qui ex licentia opinandi in præcep-
ruit, latissimam viam ingrediendo, quæ ducit
ad perditionem. Vnde sapienter obseruat Ca-
basutius, in Præfatione libri supra citati: A
,, quibusnam ingenijs ultra modum aut seue-
,, rioribus, aut indulgentioribus, magis pe-
,, riclitetur animarum salus difficilè æstimatu
,, esse. Per indulgentiores quidem deducun-
,, tur animæ per spatiosam & latam viam quæ
,, ducit in æternam perditionem, taliumque
,, directorum obstetricante manu, educitur
,, coluber tortuosus, concipitur, paritur, &
,, & fouetur peccatum. Hinc apud Ezechie-
lem

Iem cap. 13. Dominus indignatur & male-
 dicit consumentibus puluillos sub omni cubi-
 to, & facientibus ceruicalia sub capite vni-
 uersæ ætatis, vt scilicet molliter & blande
 in peccatis suis conquiescant homines sedu-
 cti, sibi que de huiusmodi directoribus com-
 placentes. Hos perstringit Isaias cap. 30.
*Qui dicunt videntibus, nolite videre, & as-
 picientibus, nolite aspicere nobis ea quæ re-
 sta sunt: Loquimini nobis placentia, videte
 nobis errores.*

Cœterùm sicut noxior est largior indul-
 gentia, ita & immoderata in rebus con-
 scientiæ austeritas, quæ hominum imbe-
 cillitatem nihil pensi habens, neque à præ-
 ceptis consilia discernens, dum illos ad
 nimis ardua compellit, viam salutis æter-
 næ quam Christus illis aperuerat præclu-
 dit: saluandos (vt ait D. Bonauentura)
 damnat & conscios propriæ infirmitatis,
 ad desperationem adigit. Accidit enim vt
 miseri homines, hac audita rigidiore do-
 cetrina, credant vel dubitent inesse morta-
 lem culpam vbi nulla est; sed tamen rei
 difficultate victi, ex erronea conscientia
 moraliter peccent & damnentur. Vnde
 D. Ambrosius in Psal. 118. serm. 5. *Sunt
 in nobis qui timorem Dei habent, sed non
 secundum scientiam, statuentes duriora præ-
 cepta quæ non possit humana conditio susti-
 nere. Timor in eo est, quia videntur sibi
 consulere disciplinæ, opus virtutis exigere.
 Sed inscitia in eo est, quia non compatiun-
 tur naturæ, nec æstimant possibilitatem.*
 Rectè ergo ac sapienter D. Bonauentura

3, compend. theolog. verit. 52. Cauenda est
 3, conscientia nimis larga, & nimis stri-
 3, cta: nam prima generat presumptionem,
 3, secunda desperationem: item prima sæpe
 3, dicit malum bonum, secunda è contra bo-
 3, num malum: item prima sæpe saluat dam-
 3, nandum, secunda è contra damnat sal-
 3, uandum.



TRACTATVS IV.

DE

VIRTVTIBVS IN COMMUNI.

Post Tractatum de actibus humanis,
 tam in esse physico, quam in esse moris
 consideratis, agendum est de virtuti-
 bus in communi, quæ sunt principia
 bonorum actuum, & habitus quidam ad illos
 eliciendos ordinati, illarumque natura, subie-
 ctum, species, & proprietates, breuiter hic de-
 claranda sunt. De virtutibus verò in particu-
 lari, tam Theologicis, quam moralibus, tomo
 quinto differemus.

CAPVT I.

De natura virtutis.

Plures circunferuntur virtutis definitiones. Prima traditur ab Aristotele 2. Ethic. c. 4. his verbis : *Virtus est habitus qui bonum facit habentem , & opus eius bonum reddit .* In qua definitione duplex explicatur habitudo virtutis : vna quam dicit ad proprium subiectum, tanquam eius forma, dum dicitur facere bonum habentem ; sola namque virtus bonum facit hominem , vt ostendit Seneca epist. 76. altera quam habet ad operationem tanquam ad proprium effectum , dum additur, *& opus eius bonum reddit.*

Secunda habetur apud eundem Philosophum ibidem, vbi ait quod *virtus est habitus electiuus , in mediocritate consistens , & prout sapiens & prudens dictauerit* Quæ definitio non conuenit virtutibus Theologicis , nec intellectuales , sed solum moralibus ; virtutes enim intellectuales non sunt electiue , cum electio sit solum in voluntate ; virtutes verò Theologica non exigunt propriè mediocritatem, sed solum morales, vt iustitia, temperantia, & similes , quæ versantur circa obiectum medium inter duo extrema , excessum scilicet & defectum , ita tamen quod illud medium non intelligatur secundum rem , sed secundum rationem, iuxta exigentiam personæ, loci, & aliarum circumstantiarum ; aliquando enim cibus v. g. qui est mediocris & temperatus respectu vnius , est excedens & intempera-

tus respectu alterius, & propterea additur :
Prout sapiens & prudens distauerit.

Tercia quæ colligitur ex verbis D. Augustini, præcipue lib. 2. de lib. arbitr. & defenditur à D. Thoma hic qu. 55. art. 4. est huiusmodi : *Virtus est bona qualitas mentis, qua rectè uiuitur, qua nullus malè utitur, & quam Deus in nobis sine nobis operatur.* Vbi primò ponitur *qualitas*, quia qualitas est genus supremum virtutis; esset tamen conuenientior definitio, si loco *qualitatis habitus* poneretur qui est genus propinquum, ut ait D. Thomas loco citato. Additur *bona*, ut explicetur differentia virtutis à vitio, & alijs qualitatibus quæ rem malè disponunt. Per particulam *mentis*, designatur subiectum virtutis, quod est potentia rationalis, vel essentialiter, vel participatiuè, qualis est appetitus sensitivus, qui ut subest rationi, aliquid ex illa participat, & est subiectum virtutis, ut infra dicemus; & per hoc differt virtus ab omnibus qualitatibus corporeis, siue bonis, siue malis. Per particulam, *qua rectè uiuitur*, virtus distinguitur à qualitatibus non operatiuis immediatè, cuiusmodi sunt pulchritudo & sanitas in corporalibus; in spiritualibus verò gratia habitualis, quæ immediatè inhæret substantiæ animæ. *Uy autem uiuitur*, significat in proposito operationem vitalem: Per illam verò particulam, *qua nemo malè utitur*, virtus differt ab illis habitibus & qualitatibus, quæ possunt ad malum vel falsum inclinare, siue quibus aliquis potest benè vel malè uti, cuiusmodi sunt opinio, fides humana, character, & similia. Demum vltimæ particulæ,

nem.

nempe quam Deus in nobis operatur , conueniunt solum virtutibus per se infusis , quæ in eo solum distinguuntur ab acquisitis , quod istæ acquiruntur nobis operantibus , & actiue ad earum acquisitionem concurrentibus ; illæ verò sine nostro actiuo concursu producuntur in nobis , quamuis dispositiue ad earum receptionem per nostros actus Deo cooperemur . Vnde si hæ ultimæ particulæ tollantur , hæc definitio conuenit modo explicato omni virtuti , tam intellectuali , & Theologicæ , quam morali .

Ex his intelliges , virtutem esse habitum operatiuum , & per se primò concurrere ad bonitatem moralem actuum humanorum , & ad eorum facilitatem ac delectabilitatem ; secundariò verò tantùm ad entitatem physicam , substratam bonitati morali actus , eiusque facilitati .

Prima pars patet ex prima & tertja definitione virtutis , & ex D. Thoma hic qu. 55. art. 2. vbi sic concludit: *Et ideò de ratione virtutis humanæ est quod sit habitus operatiuus.* Idem docet Augustinus lib. de bono coniugali , vbi virtutem ait esse *habitum quo aliquid agitur* . Vnde bellè quidam ait virtutem non esse similem liræ quam nemo pullat ; vel gladio qui nunquam è vagina eximatur , aut nauis quæ ad perfectionem adornata , in portu semper consistat , sed potiùs agro fecundo & feraci , quo (vt ait eleganter Ambrosius lib. de Isaac cap. 7.) *nihil pulchrius , cum seges fluctuat , cum poma videntur , vel cum vuarum ferta dependent , aut baccis onusta olea curuescit , vel viridanti gramine , montium verti-*

tes, & vallium humilia vestiuntur?

Secunda verò pars probatur quantum ad singulas partes; Et in primis quod virtus per se primò concurret ad bonitatem moralem actuum humanorum, manifestum est; ad illud enim virtus per se primò concurret, ad quod producendum potentia naturalis ea indiget: Sed potentia naturalis indiget habitu virtutis ad producendum actum moraliter bonum, seu ad causandam in actu bonitatem moralem; potentia enim secundum se est tantum potens producere actum quantum ad substantiam, seu entitatem physicam illius: Ergo talis habitus ad bonitatem moralem actus per se primò concurret.

Quod verò etiam per se primò concurret ad eius facilitatem, constat ex eo quod in hoc differt vis potentiae superior, communicata inferiori per modum transeuntis, ab ea quae communicatur per modum habitus seu formae completæ, constituentis principium perfectum & connaturale actus, quod prima non tollit difficultatem, secunda verò inducit facilitatem & delectabilitatem: Ergo habitus virtutis moralis per se primò concurret ad facilitatem & delectabilitatem, coniunctum bonitati morali actus virtuosus, & per se utramque attingit.

Demum quod per se non efficiat entitatem physicam eiusdem actus, sed solum per accidens & secundariò, in quantum scilicet est substrata illius bonitati morali, eiusque facilitati, patet ex eo quod habitus solum influit per se in id quod vires potentiae excedit: Sed entitas physica actus virtuosus non excedit vires po-

ten-

tentia, vt constat, actus enim v. g. potentia irascibilis aut concupiscibilis, secundum entitatem physicam consideratus, nihil aliud dicit quam passionem appetitus sensitui, vt præscindit ab ordine rationis, quo pacto reperitur in brutis: Ergo habitus virtutis moralis & acquisita, non influit per se in entitatem physicam talis actus, sed per accidens tantum & secundario, in quantum scilicet talis entitas est substrata illius bonitati morali, eiusque facilitati.



C A P V T II.

De subiecto virtutum.

Certum est virtutes, cum sint habitus operatiui, non in ipsa essentia animæ, sed in eius potentijs residere. Constat etiam virtutes nec in membris exterioribus corporis, nec in potentijs vegetatiuis, neque in sensibus externis subiectari posse; quia huiusmodi facultates non sunt indifferentes ad operandum bene vel male, sed omnino determinatæ ad vnum modum operandi, subindeque nullam ex se habent difficultatem in exercendis proprijs operationibus. Docent etiam communiter Theologi cum S. Thoma hic qu. 56. art. 5. in sensibus internis nullas subiectari virtutes, quia cum virtus iuxta Aristotelem, sit dispositio perfecti ad optimum, & perfectio in consummatione consistat, potentia quæ est subiectum virtutis, debet esse consumma-

tiua actus virtuosus, & non tantum præparatiua vel inchoatiua illius; vnde cum cognitio veri, quæ est opus bonum potentiæ cognoscitiuæ, non consummetur in potentijs sensitiuis apprehensiuis, quia illæ sunt solum præparatoriæ & dispositiuæ ad cognitionem intellectus, cuius proprium est attingere verum, virtutes intellectiuæ in illis subiectari nequeunt. Denum exploratum est apud omnes, virtutes intellectuales, nimirum intelligentiam, scientiam, sapientiam, artem, & prudentiam, in intellectu residere: tres quidem primas in intellectu speculatiuo, duas verò posteriores in intellectu practico, vt subest motioni voluntatis, cuius proprium est mouere quoad exercitium intellectum & cœteras potentias ad operandum. Duplex ergo solum restat difficultas & controuersia inter Theologos; breuiter hic resoluenda. Prima est, an virtutes propriè dictæ, in appetitu sensitiuo, prout in homine politicè obedire natus est rationi, subiectari possint? Secunda, vtrum in voluntate ponenda sit virtus moralis, non solum ad attingendum promptè & faciliter bonum alienum; sed etiam in ordine ad bonum connaturale proprii suppositi?

§. I.

Resolutio primæ difficultatis.

DIco primò appetitum sensitiuum hominis, vt natum obedire politicè rationi, esse subiectum virtutis propriè dictæ, puta fortitudinis & temperantiæ. Ita S. Thomas hic

hic qu. 56. art. 4. in corp. & in resp. ad 1.
 vbi sic ait: *Irascibilis & concupiscibilis secundum se considerata, prout sunt partes appetitus sensitivi, communes sunt nobis & brutis. Sed secundum quod sunt rationales per participationem, ut obedientes rationi, sic sunt propriae hominis. Et hoc modo possunt esse subiectum virtutis humane.* Quo nihil clarius & expressius in fauorem nostrae conclusionis dici potest. Fauet etiam Aristoteles 3. Ethic. cap. 3. vbi ait temperantiam & fortitudinem esse partium irrationalium, id est appetitus concupiscibilis & irascibilis, vnde subiectum virtutis vocat *vim concupiscendi*.

Ratio etiam suffragatur, nam ut discursus D. Thomas loco citato, & fusiùs in quaest. de virtutibus artic. 4. Ut aliqua potentia sit capax virtutis, tria requiruntur; primò quod sit apta moueri & regulari à superiori; secundò quod non sit vni operandi modo alligata; tertio quod sit operis perfecti elicitiua. Appetitus autem sensitivus, prout est in homine, habet tres illas conditiones; est enim in primis aptus moueri & dirigi à ratione, vnde viri probi moderantur passionibus appetitus sensitivi, secundum dictamen rationis. Deinde ille non est ad vnum agendi modum determinatus, sed modò iuxta rationem operatur, modò ab illa deuiat & exorbitat. Demum opus elicit morali perfectione consummatum, quando passionibus irascibilis & concupiscibilis, temperantia & fortitudine ad medium redactae sunt: Ergo est capax virtutis, vnde in eo resident virtutes morales, & moderantes timores & audacias in discrimine vitae, & cohibentes delectationes

immoderatas in cibis & venereis.

Confirmatur: Ibi ponenda est virtus, ubi est difficultas ad attingendum illius obiectum: Atqui voluntas nullam habet difficultatem circa moderantiam passionum, cum illa sit bonum rationis, proprium & proportionatum respectu voluntatis, sed tantum appetitus sensitivus: Ergo in illo sunt ponendæ virtutes moderatrices passionum, non verò in voluntate.

Dices: Potentia quæ est subiectum virtutis moralis, debet esse perfectè libera, cum sit principium actus liberi & moralis. Debet etiam posse eligere, cum virtus definiatur habitus electivus. Item debet posse attingere bonum honestum, cum illud sit obiectum virtutis. Demum debet regulari à prudentia, quæ est regula virtutum moralium: At illæ quatuor condiciones non conveniunt appetitui sensitivo, sed duntaxat voluntati: Ergo sola voluntas potest esse subiectum virtutum moralium quæ sunt moderatrices passionum. Maior constat, minor verò probatur quantum ad singulas partes. Et in primis quod prima conditio appetitui sensitivo non competat, videtur manifestum; nam licet ille, ut est in homine, ex coniunctione quam habet cum voluntate, aliquam libertatem participet, illa tamen est imperfecta & secundum quid, quæ non sufficit ad rationem virtutis, cum actus virtutis debeat esse simpliciter liber, sicut est simpliciter bonus & honestus. Constat etiam appetitum sensitivum non posse eligere, cum electio sit actus voluntatis, ut docet D. Thomas supra qu. 13. art. 2. Liqueat pariter illum non posse attingere bonum honestum, cum
eius

eius obiectum adequatum sit bonum sensibile & corporeum. Demum cum talis appetitus per apprehensionem sensus reguletur, non videtur posse dirigi & regulari per prudentiam, quæ non in sensu, sed duntaxat in intellectu residet.

Respondeo, concessa Maiori, negando Minorem, & ad primam illius probationem dico, quod licet appetitus sensitivus hominis, ex vi coniunctionis quam habet cum voluntate, non evadat simpliciter liber, sed solum secundum quid; ex actuali tamen influxu & motione voluntatis, per quam ipsum applicata ad operandum, participat intrinsecè libertatem perfectam, & sufficientem, ut possit esse subiectum virtutis moralis, sicut ratione illius potest esse subiectum vitij & peccati.

Ad secundam dicendum, subiectum virtutum moralium quæ moderantur passiones, debere quidem esse aliquomodo electivum; non tamen simpliciter & perfectè; in eo enim differunt virtutes morales quæ versantur circa passiones & resident in appetitu sensitivo, ab illis quæ non habent moderari passiones, & in voluntate subieciuntur, quod istæ sunt habitus electivi formaliter, directè, & immediatè, quia directè & immediatè efficiunt electionem quæ in voluntate residet; illæ verò sunt habitus electivi solum participatiivè, indirectè, mediatè, & completivè: tum quia eliciunt actum appetitus, in quo electio voluntatis, & ordo rationis participatur: tum etiam quia moderando passiones appetitus, quæ electionem debitam perturbant, indirectè & mediatè ad illam conducunt: tum denique quia

licet ipsam electionem directe non eliciant; efficiunt tamen actum appetitus sensitivi executivum & completivum illius, subindeque habitus electivi executivè & completivè dici possunt. Quam doctrinam & solutionem fuisse expendunt Salmanticenses in tractatu de virtutibus disput. 2. dubio 2. §. 2. eamque varijs D. Thomæ testimonijs illustrant.

Ad tertiam dicatur quod licet appetitus sensitivus non possit attingere bonum honestum vniuersale, tamen, vt actualiter motus à voluntate, per quandam participationem rationis potest attingere bonum honestum singulare, & regulatum per cogitativam; sicut ipsa cogitativa, ex coniunctione quam habet cum intellectu, participat vim discurrendi circa singularia, vt docet D. Thomas 1. p. qu. 78. art. 4.

Ad ultimam similiter respondetur, quod sicut in appetitu sensitivo est quædam libertas participata à voluntate: ita in apprehensione sensitiva, per quam dirigitur, est quædam veluti prudentia imperfecta, ab intellectu participata, quæ plures circumstantias actus ab appetitu elicit potest attingere, subindeque talem actum dirigere & regulare.

§. II.

Resolutio secunda difficultatis.

Dico secundò, voluntas, nulla indiget virtutè superaddita, ad attingendum bonum honestum proprii suppositi; bene tamen ad attingendum bonum alienum, quale est
red-

reddere unicuique quod suum est.

Prima pars, quam negant aliqui Recentiores, expressè docetur à D. Thoma qu. 1. de virtutibus art. 5. vbi hanc rationem insinuat: Nulla potentia eger habitu virtutis ad attingendum obiectum in ordine ad quod est per seipsam completa, determinata, & proportionata; cum habitus ad hoc sit duntaxat ordinatus, vt potentiam vltimò compleat, & determinet ad attingendum obiectum: Sed voluntas per seipsam est completa, & determinata, & proportionata, ad attingendum bonum honestum proprii suppositi; Ergo non indiget habitu virtutis superaddito vt ad illud determinetur. Maior constat, minor verò probatur, tum quia bonum honestum proprii suppositi non excedit proportionem volentis, neque quantum ad speciem, cum sit ordinis naturalis: neque quantum ad indiuiduum, cum non sit alienum, sed proprium suppositi appetentis. Tum etiam, quia sicut voluntas, ex hoc quod est appetitus naturæ rationalis, natura sua inclinatur & propendet in bonum honestum vt sic, ideoque ad illud vt tale attingendum nulla ponitur virtus, ita ex eo quod est appetitus talis hominis inclinatur ex se in bonum honestum talis suppositi: sicut enim differentia indiuidualis contrahit voluntatem vt fit hæc numero, ita & eius inclinationem ad bonum huius suppositi determinat.

Ex hoc probata manet secunda pars conclusionis, nam licet bonum alienum naturale non excedat proportionem voluntatis quantum ad speciem, sicut bonum supernaturale, eam tamen excedit quantum ad indiuiduum; quia
vniuf.

vnus cuiusque voluntas, hoc ipso quod est radicata in hoc numero supposito, determinatur per suam differentiam indiuidualem ad bonum proprii suppositi, iuxta illud Philosophi: *Amabile bonum, vnicuique verò proprium*. Ergo voluntas indiget habitu virtutis ad attingendum bonum alienum, etiam naturale. Vnde in ea ponuntur iustitia, & aliae virtutes ei annexae, & affines, vt non obstante proprii amoris pōdere, in bonum alienum inclinetur.

Obijcies primò contra primam partem conclusionis: *Habitus virtutis requiritur in potentia, quando actus est illi difficilis*: Sed voluntas in prosecutione boni honesti etiam proprii suppositi, interdum patitur non modicam difficultatem, ratione cuius illud deserit, labiturque in oppositum malum. Ergo ad illud attingendum indiget habitu virtutis.

Respondeo distinguendo maiorem: *habitus virtutis requiritur in potentia, quando actus est illi difficilis, per se, & ex obiecto, concedo maiorem*. Per accidens tantum, & ratione alicuius impedimenti extrinseci, nego maiorem. Vnde cum difficultas quam voluntas interdum patitur in prosecutione boni honesti proprii & connaturalis, non proueniat ex superexcedentia obiecti vel actus, sed ex immoderatis passionibus appetitus sensitiui, alijsue impedimentis tenentibus se ex parte corporis, nullus requiritur habitus virtutis in voluntate, ad facile & delectabiliter prosequendum tale bonum, sed si ad hoc aliquis habitus necessarius est, collocari debet in praedicto appetitu, ad moderandas eius passiones, ex quarum immoderantia, illius boni prosecutio difficilis

red.

redditur . Et sic in appetitu irascibili & concupiscibili ponuntur virtutes fortitudinis & temperantiæ, quibus immoderata illius passion- nes cohibentur & temperantur , vt §. præce- denti ostensum est.

Obijcies secundo : habitus acquiritur per actuum repetitionem : Ergo repetitis actibus virtuosis in voluntate circa bonum honestum proprij suppositi , virtus debet generari.

Respondeo antecedens esse verum quando subiectum est capax habitus, non verò quando est incapax illius : lapis enim v. g. quantum- cumque descendat, non acquirit habitum, quia est incapax illius, cum per naturalem gravita- tem sit completè inclinatus ad descensum . Si- militer potentiæ naturales, vt vegetatiua, nu- tritiua, & similes, quantumcumque operen- tur, non acquirunt habitum , quia naturaliter sunt ad agendum determinatæ & completæ. Idem cum proportionem dicendum de volunta- te , respectu boni honesti proprij suppositi, quia ad illud est per seipsam completa & de- terminata, vt supra ostensum est.

Obijcies tertio : Voluntas est capax habi- tus vitiosi circa bonum proprium: Ergo & ha- bitus virtutis , cum contraria debeant versari circa idem subiectum.

Respondent aliqui ex nostris Thomistis, ne- gando Antecedens : Sicut enim (inquirunt) quia lapis habet naturalem inclinationem completam ad descensum, non generatur in eo habitus ad ascendendum sursum, quamuis mil- lies sursum projiciatur : ita nec in voluntate generatur habitus vitiosus circa bonum pro- prium ex pluribus actibus malis repetitis, quia

Voluntas habet naturalem inclinationem completam respectu proprii boni honesti, quæ non minus resistit habitui vitioso inclinanti in contrarium, quam resisteret perfecta virtus acquisita, si adesset. Hæc solutio & doctrina non caret probabilitate.

Meliùs tamen & faciliùs respondetur, dato Antecedenti, negando consequentiam & paritatem: Ratio autem discriminis est, quia voluntas ad actus malos, circa quodcumque obiectum exerceatur, non est ex se inclinata, ideoque requiritur habitus vitij vt ad illos inclinetur: ad actus verò honestos circa bonum proprium, est ex propria natura inclinata, subiadeque non potest ad illos per habitum inclinari.

Ex dictis intelliges discrimen quod inter voluntatem & intellectum reperitur, intellectus enim, cum non sit ex natura sua in actu primo ad cognitionem veri sufficienter instructus, sed sit veluti tabula rasa, indiget speciebus & habitibus ad attingendum quodcumque verum etiam ordinis naturalis; vnde in eo ponitur intelligentia, seu habitus primorum principiorum, ad prima principia cognoscenda. E contra voluntas, cum sit naturaliter inclinata & determinata ad bonum naturale, saltem domesticum, nullo indiget habitu virtutis moralis, ad bonum honestum proprii suppositi prosequendum, sed solum ad attingendum bonum alienum, & ad reddendum unicuique quod suum est.

CAPVT III.

Traditur multiplex diuifio virtutum.

Variæ solent tradi diuisiones virtutum, sed coeteris clarior & compendiosior est quam S. Doctor hic qu. 57. & alijs sequentibus prosequitur, qua scilicet virtus in intellectualem, moralem, & theologicam distribuitur. Virtus intellectualis est illa quæ perficit intellectum in ordine ad cognitionem veri. Virtus moralis est illa quæ voluntatem complet ad prosecutionem boni honesti. Virtus theologica est illa quæ circa Deum immediate versatur.

Virtus intellectualis subdiuiditur in quinque species, quæ vocantur intelligentia, seu habitus primorum principiorum, sapientia, scientia, ars, & prudentia. Ratio verò huius diuisionis hæc est: cum virtus intellectualis perficiat intellectum in ordine ad verum, tot debent esse virtutes intellectuales, quot sunt habitus infallibiliter attingentes verum: Sed habitus infallibiliter attingentes verum sunt tantum quinque enumerati: Ergo illi soli sunt virtutes intellectuales. Maior patet, minor probatur. Verum quod certò & infallibiliter ab intellectu attingi potest, vel est vniuersale, & consequenter necessarium; vel singulare, & contingens? Si vniuersale, vel est attingibile immediate, & ex sola terminorum notitia, vt sunt prima principia, & pro illis ponitur habitus primorum principiorum. Vel est infallibiliter attingibile media-

te,


tè, & per proprias causas, quæ si fuerint particulares, ponitur scientiæ; si verò causæ fuerint altissimæ & vniuersales, ponitur sapientia. Si autem tale verum fuerit singulare, vel illud est factibile? & pro illo attingendo ponitur ars, vel agibile? & ad illud attingendum ponitur prudentia.

Virtutes morales sunt duplicis generis, aliæ sunt circa operationes, in quibus attenditur ratio debiti vel indebiti ad alterum, vt iustitia per quam redditur debitum proximo, religio per quam redditur debitum Deo, pietas per quam redditur debitum parentibus, gratitudo per quam redditur debitum benefactoribus. Aliæ versantur circa passionēs, quas ad debitum rationis ordinem reducunt, vt fortitudo, temperantia, & aliæ quæ appetitus irascibilis vel concupiscibilis affectus & passionēs moderantur.

Inter virtutes morales quatuor sunt principales, nempe prudentia, iustitia, fortitudo, & temperantia, quæ cardinales appellantur; quia vt obseruat S. Thomas quæst. de virtutibus cardinalibus art. 1. super eas voluitur tota conditionis humanæ ratio, eisquæ veluti cardinibus vniuersa vitæ honestæ & politicæ series & moles subnixæ est.

Dei nam præter virtutes intellectuales & morales, dantur aliæ quæ vocantur theologice, quia per illas ad Deum vt finem vltimum ordinamur, & hæ sunt solùm tres, nempe fides, spes, & charitas, quia homo ordinatur in vltimum finem per cognitionem intellectus lumine supernaturali fidei illustrati; & per motum intentionis in ipsum tendentem sicut
ad.

ad id quod est possibile consequi , quod pertinet ad spem ; & quantum ad unionem quandam spirituales , per quam quodammodo transformamur in illum finem , quod fit per charitatem , ut ait S. Thomas hic qu. 62. art. 3.



C A P V T IV.

De virtutibus moralibus infusis.

DE virtutibus theologicis , & moralibus acquisitis , tomo quinto differemus , unde solum hic agendum incumbit de virtutibus moralibus infusis.

Dico igitur , , præter virtutes morales acquisitas , dantur aliæ per se infusæ . Ita communiter Theologi , paucis exceptis , post Concilium Viennense , quod hanc sententiam ut probabiliorem , & dictis Sanctorum Patrum , & Theologorum conformiorem elegit . Eadem veritas aperte traditur à Catechismo Romano parte 2. titulo de baptismo num. 50. ubi numerans effectus baptismi , qui cum gratia tribuuntur , sic ait . *Hic additur nobilissimus omnium virtutum comitatus , quæ cum gratia diuinitus Infunduntur.*

Ratio verò necessitatis huiusmodi virtutum duplex est . Prima sic potest proponi : Homo constitutus per gratiam in esse supernaturali , non minus debet esse perfectus in operando modo supernaturali , quam in ordine naturæ in operando modo naturali , gratiæ enim in suo ordine non minor debetur perfectio , quam

in suo debetur naturæ : Sed in ordinē naturæ perficitur homo non solum circa finem ultimum, quod habet à naturali synderesi, naturalique rectitudine voluntatis, sed etiam circa fines non ultimos, quod habet per virtutes morales acquisitas : Ergo similiter in ordine supernaturali utramque perfectionem habere debet, subindeque ordini gratiæ debentur non solum virtutes theologice, quibus homo perficitur & ordinatur ad beatitudinem supernaturalem, sed etiam virtutes morales infusæ, quibus homo in ordine supernaturali perficiatur in ordine ad media quæ ad illam conducunt.

Nec valet si dicas, ad attingenda media supernaturalia sufficere dona Spiritus Sancti. Nam, ut infra patebit, dona Spiritus Sancti ponuntur solum ad operandum modo extraordinario intra ordinem supernaturalem, ex instinctu scilicet & motione speciali Spiritus Sancti. Vnde præter illa dona admitti debent virtutes morales infusæ, ad operandum modo ordinario intra ordinē supernaturalem.

Secunda ratio fundamentalis insinuat a D. Thoma quæst. unica de virtutibus art. 10. ad 8. Virtutes multiplicantur & diuersificantur penes diuersa obiecta formalia : Sed in materia morali, circa quam versantur virtutes morales, dari potest duplex obiectum formaliter diuersum, vnum naturale & aliud supernaturale : Ergo etiam distinguere debent duo genera virtutum moralium, & præter naturales & acquisitas, admitti alia quæ sint supernaturales & infusæ. Maior constat, minor verò sic ostenditur. Obiectum formale virtutis
mo.

moralis est medium per prudentiam & rectam rationem in passionibus & operationibus humanis constitutum: Sed tale medium potest esse duplex, naturale scilicet, si statuatur per prudentiam moralem & acquisitam; supernaturale verò, si à prudentia supernaturali & infusa constituatur. Vnde D. Thomas loco citato: *Alia ratione quarit medium temperantia infusa, quam temperantia acquisita: nam temperantia infusa exquirat medium secundum rationes legis diuinæ, quæ accipiuntur ex ordine ad vltimum finem: temperantia autem acquisita accipit medium secundum inferiores rationes, in ordine ad bonum præsentis vitæ.* Similiter æqualitas in operationibus, ad alterum, quæ est medium virtutis iustitiæ, vel potest fieri inter homines, vt sunt ciues humanæ ciuitatis huius vniuersi, vita & ratione naturali præditi, inter quos debet seruari humana societas & pax, & hoc modo est mediū naturale: specificans iustitiā acquisitam: Vel potest, fieri inter homines, quatenus sunt ciues sanctorum & domestici Dei, præditi supernaturali lumine, & capaces beatitudinis æternæ, inter quos debet altiori ratione pax & societas conseruari, & hoc modo est medium supernaturale, & obiectum iustitiæ infusæ. Idem cum proportionem de fortitudine dicendum est, nam si habeat firmare appetitum contra mortis pericula in bono naturali, & in ea mensura quam ratio naturalis seruandam esse dicat, constituetur obiectum fortitudinis acquisitæ, vt si quis pro defensione patriæ firmus maneat contra pericula mortis. Si verò firmet in bono supernaturali, vt contingit in martyrio, in quo
pro

pro defensione fidei Christianæ Martyres sustinent mortem, erit obiectum fortitudinis infusæ. Ex quo intelliges, virtutes morales per se infusas, distingui specie ab acquisitis, cum respiciant obiecta formaliter diuina, & distinctio specifica potentiarum & habituum, ex obiecto formali desumatur.


Obijcies primò: Virtus per se infusa, cum sit supernaturalis, debet habere obiectum & motuum intrinsecum supernaturale. Sed obiectum & motuum intrinsecum temperantia v. g. nempe mediocritas in cibo & potu, non excedit ordinem naturæ, sicut nec materia in qua reperitur: Ergo nulla datur virtus temperantiæ per se infusa: sed duntaxat acquisita.

Respondeo, concessa maiori, distinguendo minorem: mediocritas, vt constituta per prudentiam naturalem, & in ordine ad finem naturalem, non excedit ordinem naturæ, concedo minorem. Vt constituta per prudentiam infusam, & in ordinem ad finem supernaturalem, nego minorem, & consequentiam. Solutio patet ex dictis in secunda ratione.

Obijcies secundò: Non potest assignari subiectum virtutum moralium infusarum, quæ circa passionem moderandas occupantur, v. g. temperantiæ aut fortitudinis infusæ: Ergo illæ virtutes fictitiæ sunt. Consequentia patet, Antecedens probatur. Tales virtutes infusæ non subiectantur in voluntate, in qua nec acquisitæ recipiuntur. Nec in appetitu sensitivo, cum enim illæ sint immateriales & spirituales, vtpote supernaturales, & proprietates gratiæ sanctificantis, non possunt recipi in subie-

biecto corporeo: Ergo nullum potest assignari subiectum illarum virtutum.

Respondeo negando Antecedens, & ad illius probationem dico, virtutes illas infusas recipi in appetitu sensitivo, sicut & acquisitas; in ea enim potentia subiectantur virtutes, cuius sunt actus proprii illarum, quia virtutes dantur potentiae operativae ad eliciendos proprios actus: actus verò virtutum moralium infusarum quæ versantur per se primò circa passiones, sunt actus proprii appetitus sensitivi, cum sint passiones moderatae talis appetitus, secundum prudentiam infusam, ut moderata audacia, moderatus timor &c. Ergo illæ subiectantur in appetitu sensitivo. Ad probationem in contrarium dicendum est, virtutes infusas appetitui sensitivo esse formaliter immateriales, & eminenter corporeas. Vnde sicut anima rationalis, etsi immaterialis sit & spiritalis, quia tamen simul est corporea ut quo, & virtualiter, seu eminenter, in corpore recipitur, ita prædictæ virtutes, ob eandem rationem, in appetitu sensitivo subiectari possunt. Nec est inconueniens formam perfectioris ordinis recipi in subiecto inferiori, ut illud euehat, attolat, & perficiat.



CAPVT V.

*Due precipue proprietates virtutum
moralium, mediocritas, &
connexio.*

Prima patet ex definitione virtutis moralis supradadita, in qua dicitur quod virtus est *habitus electiuus, in mediocritate consistens, prout sapiens & prudens dictauerit.* Constat etiam rationem D. Thomæ in 3. sent. dist. 33. qu. 1. art. 3. vbi sic discurre: *Virtutes morales sunt circa passiones & operationes, quas oportet dirigere secundum regulam rationis. In omnibus autem regulatis consistit re-
ctum, secundum quod regulæ æquantur, æqualitas enim media est inter maius & minus; & ideo oportet quod rectum virtutis consistat in medio eius quod superabundat, & eius quod deficit à mensura rationis rectæ.*

Observandum tamen, hoc inter virtutes morales quæ sunt circa passiones, & iustitiam quæ ius alienum respicit, & tribuit unicuique quod suum est, discrimen intercedere, quod illæ consistunt in medio rationis, ista verò non solum medium rationis, sed etiam medium rei obseruat. Medium enim in virtutibus quæ sunt circa passiones, non est taxatum ex natura rei, sed duntaxat per rationem, iuxta vniuscuiusque dispositionem, & attentis omnibus circumstantijs temporis, loci &c. vt patet in temperantia, nam medium temperantiæ non est certa quantitas cibi omnibus accommodata, vt sint temperantes, sed variatur
in

In diuersis, iuxta diuersam complexionem; imò & in eodem pro diuersis temporibus & circumstantijs, Iustitia verò non solùm medium rationis obseruat, reddendo debitum suo tempore, & loco, & secundùm regulas prudentiæ, sed etiam habet facere æqualitatem rei ad rem; cum hoc tamen discrimine, quod iustitia commutatiua facit æqualitatem quantitatis ad quantitatem, si enim centum debeat, centum reddit: distributiua verò obseruat tantùm æqualitatem proportionis ad proportionem; non dat enim omnibus æqualiter, sed unicuique iuxta suam conditionem, vel meritum; ita vt tantùm proportionaliter recipiat miles, quantùm tribunus vt tribunus; vel si habenti meritum vt octo, dentur centum partes boni reipublicæ, habenti meritum vt quatuor, tribuantur tantùm quinquaginta.

Ex his intelliges, hoc reperiri discrimen inter virtutes morales & theologicas, quod illæ in mediocritate consistunt, & fugiunt excessum vel defectum, non verò istæ; neque enim aliquis potest excedere in credendo reuelatis à Deo, vel in sperando beatitudinem quam nobis promisit, vel nimis diligendo infinitam eius bonitatem; nam vt ait D. Bernardus in libro de diligendo Deo, *Modus diligendi Deum est sine modo diligere*. Per accidens tamen, & quantùm ad exercitium, virtutes illæ modum aliquem seu moderamen requirunt, debent enim exerceri secundùm mensuram naturæ, conditionis, ac nostri ingenij & complexionis vires; non verò nimio conatu, adeo vt corpus lædatur, aut nimium debilitetur. Vnde ait idem Sanctus serm. ad

fratres de monte Dei : *Cum nullum finem vel terminum habere debeat deuotio amantis, tamen terminos suos, & fines, & regulas, habere debet actio operantis.*

Quod attinet ad alteram virtutum moralium proprietatem, earum nimirum connexionem & concatenationem, obseruandum est virtutes illas posse & debere considerari, vel in statu perfecto, quando scilicet ita firmiter actuunt subiectum, vt omnibus rectitudinem impredientibus facile possit obistere: Vel in statu imperfecto, quando nimirum sunt in subiecto per modum dispositionis mobilis, nec firmam tribuunt facultatem vincendi impedimenta. Cum ergo dicitur virtutes morales esse ita necessario inter se connexas, vt qui vna caret, nullam perfecte habeat, hoc solum intelligitur de virtutibus illis secundum statum perfectis, non verò de illis prout sunt in statu imperfecto; constat enim experientia, multos non solum ex naturali complexione, sed etiam ex actuum imperfectorum frequentia, in vnam magis quam in aliam virtutem esse procliuēs. Hoc præmissō.

Duplici ratione ostenditur connexio & concatenatio virtutum moralium in esse perfecto. Prima est: Virtus in statu perfecto inclinatur ad promptè & delectabiliter operandum in propria materia, vt docet Aristoteles 4. Ethic. cap. 4. Sed hoc non potest habere, nisi cum alijs virtutibus moralibus connectatur: Ergo virtutes morales in esse perfecto habent inter se necessariam connexionem. Maior est euidentis, minor verò duplici exemplo suadetur. Si enim aliquis haberet
vir-

virtutem iustitiæ v. g. & non liberalitatis; proindeque nimis amaret pecunias, oblata occasione eas obtinendi, facile inferret iniuriam proximò, & nonnisi cum magna difficultate redderet alteri debitum. Similiter mulier casta, sed auara, vel timida, vix poterit seruare castitatem; oblata enim pecunia, vel occurrente mortis periculo, facile? pudicitiae proposito, vel diuitiarum illecebris suasa, vel poenarum metu deterrita, auocabitur.

Secunda ratio sumitur ex D. Thoma hic qu. 65. art. 1. potestque in hunc modum proponi. Non potest esse virtus moralis in esse perfecto, nisi adsit perfecta prudentia, quæ est regula virtutum moralium, & quæ ut ait D. Bernardus 1. de considerat. cap. 8. *Inter voluptates & necessitates media quasi q' adam arbitra sedens, vrinque certis limitibus determinat fines, istis assignans & præbens quod sat est, illis quod nimis demens*: Atqui non potest esse perfecta prudentia sine consortio omnium virtutum moralium: Ergo nec vlla virtus moralis potest esse in statu perfecto, nisi omnes alias virtutes habeat sibi annexas. Maior constat, minor verò suadetur ex eo quod rectum iudicium prudentiæ dependet à rectitudine appetitus, quia vnusquisque prout est affectus ad finem, sic de eo practicè iudicat, iuxta illud commune proloquium: *Qualis vnusquisque est, talis finis videtur ei*: Sed appetitus rectitudo sine consortio omnium virtutum moralium haberi nequit, cum proprius effectus illarum virtutum sit rectificare appetitum circa finem & materiam propriam: Ergo nec rectum iudicium prudentiæ. Vnde

Aristoteles 6. Ethic. cap. 5. ait temperantiam esse conseruatricem prudentiæ, ideoque *σωφροσύνη* appellari. Et rationem ibidem reddit, cum asserit iudicium quidem speculatiuum non peruertere morum deprauatione; iudicium tamen practicum & prudentiale, inde sæpe corrumpi.

Ex his intelliges primò mutuam inter prudentiam & cœteras virtutes morales reperi causâlitatem & dependentiam, in diuerso genere causæ; nam virtutes pendent à prudentia, in genere causæ directiæ, & formalis extrinsecæ: prudentia verò pendet ab alijs virtutibus, in genere causæ dispositiue, quia vt possit rectum & incorruptum de rebus omnibus in singulis negotijs ferre iudicium, opus omnino est, appetitum circa fines virtutum omnium rectè esse dispositum, quod fit per ipsas virtutes morales.

Intelliges secundò, non dari prudentias partiales, quæ singulas virtutes dirigant, vna temperantia v. g. alia fortitudinem, alia iustitiam, vt quidam existimant; sed vnam totalem & perfectam, quæ omnes virtutes dirigit, & omnia agibilia respicit. Vt enim prudentia aliquam virtutem dirigat, debet illi constituere medium, rescindendo extrema quibus per excessum vel defectum potest corrumpi: ad hoc autem non sufficit prudentia partialis, cum enim illa extrema diuagentur per materiam cuiuslibet virtutis (vt constat exemplo mulieris, quæ potest à tuenda castitate, & à medio temperantiæ recedere: vel ob solam delectationem, quæ est materia ipsius temperantiæ; vel metu mortis, quæ est materia fortitudinis;

dinis; vel propter lucrum & amorem pecuniæ, quæ est materia liberalitatis) ad illa rescindenda requiritur prudentia totalis & perfecta, quæ possit illa attingere, ac de illis iudicare.

Obijcies primè: Ecclesia & Patres communiter docent, singulos iustos & sanctos, in quibusdam virtutibus præcellere, & se inuicem superare. Vnde Beda dicit quod *Sancti magis humiliantur de virtutibus quas non habent, quam de virtutibus quas habent gloriantur*: Ergo censent virtutes morales non esse inter se connexas, sed ab inuicem separabiles.

Respondeo ex D. Thoma in 3. dist. 36. quæst. 1. art. 2. ad 1. illud debere intelligi de virtutibus quantum ad vsus, & non quantum ad habitus: diuersi enim sancti diuersimodè excedunt se inuicem in vsibus diuersarum virtutum, secundum quod de quolibet Confessore dictum est, non est inuentus similis illi qui conseruaret legem excelsi. Propter huiusmodi ergo excessum ex parte vsus, tribuimus cuilibet sancto quasdam speciales virtutes, & alias negamus, non quia istis careant, sed quia in illis magis splendent.

Instabis, si homo possit exercere actus vnus virtutis, non exercendo actus aliarum, poterit etiam acquirere vnâ virtutem sine alijs; cùm virtutes non acquirantur nisi per proprios actus, subindeque virtutes omnes non erunt inter se connexæ & concatenatæ.


Respondeo distinguendo Antecedens, poterit acquirere vnâ virtutem sine alijs, quantum ad essentiam, & in esse imperfecto, concedo. In statu perfecto, nego. Status enim

perfectus virtutis non dependet solum ex actibus gignentibus essentiam virtutis, sed etiam ex consortio & comitatu aliarum, à quibus iuvari debet, ut facile & promptè possit in propria materia medium rationis attingere, non solum per recessum ab his quæ in propria materia possunt abducere à tali medio (ad quod sufficit ipsa virtus,) sed etiam per recessum ab his quæ possunt absolutè & in quacumque materia abducere, ut constat in exemplis supra adductis. Vnde D. Gregorius Magnus lib. 22. moral. cap. 1. *Vna virtus sine alijs, aut omnino nulla est, aut imperfecta. Ut enim de primis quatuor virtutibus loquar, prudentia, temperantia, fortitudo, atque iustitia, tanto perfectæ sunt singulæ, quanto vicissim sibi met sunt coniunctæ: disiunctæ autem perfectæ esse nequaquam possunt; quia nec prudentia vera est, quæ iusta, temperans, & fortis non est; nec perfectæ temperantia, quæ fortis, iusta, & prudens non est; nec fortitudo integra, quæ prudens, temperans, & iusta non est; nec vera iustitia, quæ prudens, fortis, & temperans non est.*

Obijcies secundò: In paupere non potest reperiri virtus magnificentia, nec virginitas in coniugato, cum illarum actus ab eis exerceri non possint: Ergo una virtus potest haberi sine alia, subindeque non sunt inter se connexæ.

Respondeo negando. Antecedens, & ad illius probationem dico, ad acquisitionem virtutis non requiri quod actus exterior illius exerceatur, sed sufficere actum internum electionis, absolutum, vel conditionatum: Vnde si pauper eliciat actus internos conditiona-

tos liberalitatis & magnificentiæ, poterit illas virtutes sibi compari; & similiter coniugatus virtutem virginatis, quantum ad formale, quia potest habere in præparatione animi, integritatis conservandæ propositum, si hoc sibi competeret. Addo quod, cum diximus virtutes morales habere inter se necessariam connexionem, hoc intelligi debet de virtutibus moralibus, quarum subiectum est capax, non verò de illis quarum est incapax: coniugatus autem, qui res venereas expertus est, non est capax castitatis virginalis, sed duntaxat coniugalis.



CAPUT VI.

An virtutes morales acquisite possint esse sine charitate, & sine illa veram & essentialem rationem virtutis habeant.

NEgant quidam Recentiores, quos novissimè secutus est Author Theologiæ mentis & cordis tomo 4. pagina 47. affirmant verò communiter nostri Thomistæ, cum quibus

Dico primò, virtutes morales acquisite posse esse sine charitate.

Probaturs primò ex D. Thoma hic qu. 65. art. 2. in corp. ubi sic ait: *Virtutes morales prout sunt operative boni in ordine ad finem qui non excedit facultatem naturalem hominis, possunt per opera humana acquiri, & sic acquisite sine charitate esse possunt, sicut fuerunt in-*

multis gentibus. Quo nihil clarius & expressius in fauorem nostræ cōclusionis dici potest.

Confirmatur: Cūm idem S. Doctor ibidem secundò loco sibi obieciſſet: *Virtutes morales possunt acquiri ex actibus humanis; Sed charitas non habetur nisi ex infusione; Ergo virtutes morales haberi possunt sine charitate*. Sic respondet: *Dicendum quod ratio illa procedit de virtutibus moralibus acquisitis*: Ergo ex D. Thoma licet virtutes morales infusæ non possint esse sine charitate, bene tamen acquiruntur.

Ratio etiam id suadet, Ideo enim virtutes morales infusæ cum charitate. necessariò connexæ sunt, quia sunt proprietates gratiæ sanctificantis, ab illa dimanantes, & ab ea inseparabiles; & quia regulantur prudentia infusa, quæ sine charitate esse non potest, vt docet D. Thomas art. citato: Sed virtutes morales acquisitæ, nec sunt proprietates gratiæ, ab ea dimanantes, cūm sint ordinis naturalis, & actibus nostris acquirantur; nec regulentur prudentia infusa, sed acquisita: Ergo non sunt connexæ cum charitate, sed ab ea separabiles.

Dico secundò, virtutes morales acquisitas, à charitate separatas, esse veras virtutes.

Probatur primò ex D. Thoma 2. 2. qu. 23. art. 7. in corp. vbi sic ait: *Si accipiat vir- tus secundum quod est in ordine ad aliquem finem particularem, sic potest aliqua virtus dici sine charitate, in quantum ordinatur ad aliquod particulare bonum: Sed si illud particulare bonum, non sit verum bonum, sed appa-rens, virtus etiam quæ est in ordine ad hoc bonum*

num, non erit vera virtus, sed falsa; sicut non est vera virtus auarorum prudentia, & auarorum iustitia &c. Si vero illud bonum particulare, sit verum bonum, puta conseruatio ciuitatis, vel aliquid huiusmodi, erit quidem vera virtus, sed imperfecta, nisi referatur ad finale & perfectum bonum. Quibus verbis hanc rationem fundamentalem nostræ conclusionis insinuat: Vt aliquis habitus sit vera virtus, requiritur & sufficit quod tendat & inclinet in bonum quod sit verum & non tantum apparens: Sed virtutes morales acquisite, secundum se, & independentes à charitate, tendunt & inclinant hominem in bonum quod est verum, & non tantum apparens, nempe in bonum honestum & rationi consonum, quod est verum bonum, vtpote ordinabile in vltimum finem. Vnde idem S. Doctor initio eiusdem articuli sic ait: Bonum secundarium & quasi particulare hominis potest esse duplex, vnum quidem quod est verè bonum, vtpote ordinabile quantum est de se ad principale bonum, quod est vltimus finis: aliud autem est bonum apparens & non verum, quia abducit à finali bono: Ergo virtutes morales acquisite, independentes à charitate sunt veræ virtutes.

Probatur secundò conclusio: Ille habitus vera virtus dici potest, qui habet quidquid requiritur ad virtutis essentiam: Sed virtutes morales acquisite, independentes à charitate, habent quidquid requiritur ad illarum essentiam: Ergo independentes ab illa veræ virtutes dici possunt. Maior patet, minor probatur. Si aliquid essentialiter deesse illis virtu-

tribus, vt sunt à charitate separatae: esset ordo in finem supernaturalem, vt dicunt Aduersarij: Atqui talis ordo non est de illarum essentia, sed perfectio quædam accidentalis, eis per accidens superaddita, ex vi imperij charitatis: Ergo &c. Minor probatur primò ex D. Thoma 2. 2. q. 47. art. 6. in corp. vbi sic ait: *Finis virtutum moralium est bonum humanum, bonum autem humane animæ est secundum rationem esse.* Et in resp. ad 1. *Virtutibus moralibus præstatur ut finem rationis naturalis quæ dicitur synderesis.* Item in resp. ad 3. *Virtutes morales tendunt in finem à ratione naturali præstitutum.* Ergo iuxta D. Thomam ordo in finem supernaturalem non est de essentia virtutum moralium acquiritarum, sed duntaxat ordo in finem naturalem, nempe in bonum honestum & rationi consonum. Vnde idem S. Doctor ibidem art. 7. sic discurreit: *Hoc ipsum quod est conformari rationi rectæ est finis proprius cuiuslibet virtutis moralis. Temperantia enim hoc intendit ne propter concupiscentias homo diuertat à ratione. Et similiter fortitudo ne à recto iudicio rationis diuertat propter timorem, vel audaciam; Et hic finis præstitutus est homini secundum naturalem rationem, naturalis enim ratio diffinitur vnicuique ut secundum rationem naturalem operetur.*

Secundò probatur eadem minor ratione manifesta: Ordo in finem supernaturalem non potest esse de essentia habitus entitatiuè naturalis, vel prædicatum essentiale illius: Sed virtutes morales acquirite, sunt habitus entitatiuè naturales, vt de se constat: Ergo ordo in finem supernaturalem non potest esse.

se de illarum essentia, seu prædicatum essentiale illarum, sed duntaxat quædam perfectio eis extrinseca & accidentalis, ex imperio charitatis illis superueniens.

Probatur tertio conclusio destruendo præcipuum fundamentum aduersæ sententiæ: Charitas non est forma intrinseca & essentialis virtutum moralium acquiratarum, sed duntaxat extrinseca & accidentalis: Ergo independenter ab illa veram & essentialem rationem virtutis habent. Consequentia patet; Antecedens probatur ex D. Thoma 2. 2. qu. 23. art. 8. ad 1. ubi sic ait: *Charitas dicitur esse forma aliarum virtutum, non quod idem exemplariter, aut essentialiter, sed magis effectiue, in quantum scilicet omnibus formam imponit: extrinsecam nimirum & accidentalem, nempe ordinem in finem supernaturalem, ex imperio charitatis illi aduenientem.*

Ratio etiam suffragatur, si enim charitas esset forma intrinseca & essentialis omnium virtutum moralium, illæ non distinguerentur specie inter se, quod est plusquam absurdum, & contra S. Thomam hic qu. 60. art. 5. & 6. ubi docet virtutes morales distingui specie inter se secundum diuersa objecta passionum. Sequela patet, illa enim sunt eiusdem speciei, quæ habent eandem formam essentialem & intrinsecam, cum species sumatur à forma essentiali: unde quia duo homines habent formam intrinsecam & essentialem eiusdem speciei, nimirum animam rationalem, non differunt specie inter se: Ergo si charitas esset forma essentialis & intrinseca omnium virtutum moralium, illæ inter se specie non differrent.

Demum potest suaderi conclusio hoc discursu: Habitus elicientes in peccatore actus honestos & moraliter bonos, quales sunt succurrere egenis, honorare parentes, castè vivere, reddere unicuique quod suum est &c. non sunt vitia: Ergo sunt veræ virtutes, subindeque dantur veræ virtutes sine charitate. Consequentia patet, cum omnis habitus, actus humanos & morales eliciens, debeat esse virtus, aut vitium, nec ulli dentur habitus morales medij inter vitium & virtutem. Antecedens verò ex eo liquet, quod habitus vitiosi inclinant solum ad actus peccaminosos, & moraliter malos, seu rationi diffformes: prædicti verò actus à peccatore elicit, non sunt mali nec peccaminosi (vt docent communiter Theologi contra Michaellem Bayum, & ostendimus in tractatu de gratia) sed honesti, & moraliter boni, seu rationi conformes: Ergo habitus elicitini illorum, non sunt vitia, sed virtutes.

Dico tertio: Virtutes morales acquisitæ, quando sunt superatæ à charitate, non sunt perfectæ virtutes.

Probatur primò: Vt aliqua virtus sit perfecta, debet ordinari ad bonum perfectum, quod est ultimus finis: Sed virtutes morales acquisitæ, quando sunt à charitate separatæ, non ordinantur ad ultimum finem, cum ad illum ordinentur per imperium charitatis: Ergo non sunt perfectæ virtutes. Vnde D. Thomas 2. 2. qu. 23. art. 7. *Si bonum particulare (ad quod habitus inclinat voluntatem) sit verum bonum, puta conservatio civitatis, vel aliquid huiusmodi, erit quidem vera vir-*

tus, sed imperfecta, nisi referatur ad finale & perfectum bonum.

Probatur secundò : Virtus perfecta facit habentem simpliciter bonum : Sed hoc præstare nequeunt virtutes morales à charitate separatae, cum homo priuatus gratia & charitate non possit dici simpliciter bonus : Ergo virtutes morales à charitate separatae, non sunt perfectae, quamuis veram & essentialem rationem virtutis participant. Sicut puer est verus homo, sed non perfectus. Vel sicut Theologia quæ est in nobis viatoribus, habet veram rationem scientiæ, licet non sit in statu perfecto & connaturali, eò quòd non sit coniuncta scientiæ beatorum, seu claræ visioni Dei, cui subalternatur, vt tomo 1. qu. proœmiali declarauimus.

Soluantur obiectiones.

Contra primam & secundam conclusionem obijciant in primis Aduersarij varia Patrum testimonia quibus asseritur peccatores & infideles nullam veram virtutem habere: in quo multus præter cæteros est Augustinus 4. contra Iulian. cap. 3. vbi ait non esse veras virtutes, nisi vbi est vera sapientia & charitas Dei, & ideò non fuisse inter Romanos & Græcos qui essent veri sapientes studioque censendi.

Sed ad hæc respondetur, Augustinum, nomine veræ virtutis, intelligere virtutem perfectam, quæ hominem promoueat ad vitam æternam, siue, vt ipse loquitur, *quæ liberandis & beatificandis hominibus deserviat.* Vnde
ibi.

ibidem ait : *Si ad consequendam veram beatitudinem, quam nobis fides per Christum promissit, nihil profunt homini virtutes, non sunt vere virtutes.* Quod verò idem S. Doctor agnoscit in peccatoribus & infidelibus veras virtutes, id est quæ retineant essentiam & quidditatem virtutes, patet ex epistola 130. vbi ait continentiam Polemonis ad huius vitæ honestatem valuisse, hoc est fuisse verè bonam intra gradum virtutis moralis Philosophicæ, & donum Dei illam appellat; negat tamen ad futuram immortalitatem valuisse, quia illi deest charitas & religio in verum Deum.

Ex his explicata manent plura testimonia D. Thomæ quæ nobis obijciuntur. Nam quando S. Doctor varijs in locis asserit sine charitate nullas esse veras virtutes, quia non referuntur in debitum finem, & ex hoc infert in infidelibus & peccatoribus neque esse veram castitatem, neque veram iustitiam, loquitur de virtute vera simpliciter, id est perfectæ, ut constat ex 2. 2. quæst. 23. art. 7. vbi sic ait : *Erit quidem vera virtus, sed imperfecta, nisi referatur ad finale & perfectum bonum, nempe ultimum finem.* Vnde cum hic qu. 65. art. 2. dicit quod *virtutes acquisite sunt secundum quid virtutes, non autem simpliciter*, non intendit ab illis excludere essentiam & quidditatem virtutis, sed duntaxat rationem & statum perfectæ virtutis comparatiuè ad virtutes theologicas, & morales infusas, quæ perfectæ virtutis rationem habent. Vnde statim subdit, *ordinant enim hominem bene respectu finis ultimi in aliquo genere, non autem respectu finis ultimi simpliciter.* Quæ ratio manifestè demonstrat

monstrat, ipsum non loqui de essentia virtutis moralis, sed solum de eius perfectione, quæ attenditur penes ordinem ad bonum perfectum, quod est ultimus finis simpliciter, ut in tertia conclusione declarauimus.

Demum quando idem S. Doctor ait claritatem esse formam virtutum, loquitur de forma extrinseca, & accidentali, non verò de intrinseca, & essentiali; ut constat ex loco supra citato, ubi inquit quod *charitas dicitur esse forma virtutum aliarum, non exemplariter, aut essentialiter*. Alioquin, ut supra arguebamus, virtutes morales species inter se non differrent, quia in eadem forma essentiali, à qua species sumitur, conuenirent. Charitas ergo est duntaxat forma assistens & extrinseca, quæ cæteræ virtutes in suis actibus ad vltimum finem diriguntur, ac veluti formantur, accipiendo perfectionem illam extrinsecam quæ ipsis aduenit ex eo quod referantur in finem hominis supernaturalem, in quem non subueherentur sine charitate. Nihilominus tamen ex suo intrinseco & connaturali fine, qui naturæ septis coercetur, habent honestatem & bonitatem naturalem, supernaturali aduentitiæ substratam, sed quasi informem, eò quod denudentur ornamento illo insigni quod per charitatem posset accedere.

Obijcit secundò quidam Recentior: Virtutes omnes sunt inter se connexæ & concatenatæ, subindeque qui vnâ habet omnes omnino possidet, ut capite præcedenti ostendimus: Sed in infidelibus & peccatoribus non possunt reperiri omnes virtutes morales: Ergo nulla prorsus vera virtus in illis esse potest.

Re-

Respondeo doctrinam de connexione virtutum intelligi debet de virtutibus secundum statum perfectis, non verò de illis quantum ad suam essentiam, & in statu imperfecto consideratis, sic enim una potest esse sine alijs, ut docet D. Thomas hic qu. 65. art. 1. his verbis: *Virtus moralis potest accipi vel perfecta vel imperfecta: imperfecta quidem moralis virtus ut temperantia & fortitudo nihil aliud est quam aliqua inclinatio in homine existens ad opus aliquod de genere bonorum faciendum, & hoc modo accipiendo virtutes morales, non sunt connexæ.* Vnde hoc argumentum solum probat in infidelibus & peccatoribus non reperiri virtutes morales perfectas, non tamen ostendit in eis non esse virtutes veras, seu habentes essentiam, & quidditatem virtutis, quamvis imperfectas, ob defectum ordinationis in ultimum finem, ut conclusione tertia declarauimus.

Instat idem Author: Nulla vera virtus potest reperiri sine prudentia, quæ est omnium virtutum regula & mensura: Sed prudentia sine charitate esse non potest, ut docet D. Thomas hic qu. 65. art. 2. Ergo sine charitate nulla vera virtus reperiri potest.

Respondeo nullam veram virtutem reperiri posse sine prudentia infusa vel acquisita, & hoc intercedere discriminè inter virtutes morales infusas & acquisitas, quod illæ regulantur per prudentiam infusam, quæ supponit charitatem; istæ verò per prudentiam naturalem & acquisitam, quæ charitatem essentialiter non supponit. Vnde D. Thomas 2. 2. qu. 47. art. 6, ad 1, *Virtutibus moralibus præstituit fir-*


nem ratio naturalis quæ dicitur synderesis. Et in resp. ad 2. Virtutes morales tendunt in finem à ratione naturali præsitum.

Obijciunt tertio Aduersarij: Sicut scientiæ dependent à principijs, ita virtutes morales à finibus: Sed impossibile est dari scientiam, intellectu errante circa principia, aut ea ignorante: Ergo etiam impossibile est, veras reperiri virtutes, si appetitus non habeat rectum affectum circa finem: Atqui existens in peccato mortali est auersus à Deo vt ultimo fine, tam naturali, quam supernaturali: Ergo non potest habere veras virtutes.

Respondeo quod vt intellectus habeat veram scientiam de aliquo obiecto, non aliud requiritur, quam quod sit bene dispositus circa propria illius principia, vel ea firmiter credendo, vel euidenter in se cognoscendo, quacumque existente dispositione circa principia communissima, quamuis sine illorum notitia, non sit scientia perfecta, sed habeat potius statum dispositionis quam habitus. Similiter vt vera virtus moralis acquiratur & conseruetur in appetitu, sufficit quod appetitus sit bene affectus ad finem proprium ipsius virtutis, quamuis non sit conuersus ad finem vltimum simpliciter, sine qua conuersione virtus non potest esse perfecta, nec virtus simpliciter dici debet, magisque habet statum dispositionis quam habitus, cum sit in via ad corruptionem.

Ex dictis intelliges, tria esse genera virtutum: aliquæ non sunt veræ, sed tantum apparentes, quia non ordinantur ad verum bonum, sed apparens; sicut auarorum prudentia,

tia, qua excogitant diuerſa genera lucrorum; & auarorum iuſtitia, qua grauium damno-
rum metu contemnunt aliena; & auarorum
temperantia, qua luxuria, quæ ſumptuoſa eſt,
cohibent appetitum; & auarorum fortitudo,
qua vt ait Horatius: *Per mare pauperiem fu-
giunt, per ſaxa, per ignes*. Aliæ ſunt virtutes
veræ, ſed non perfectæ, quia ad verum bo-
num, ſed non perfectum, nempe ad bonum
honestum, quod non habet rationem finis vlti-
mi, ſed tantum intermedij, ordinantur; & hu-
ius generis ſunt virtutes morales acquiſitæ.
Aliæ demum ſunt non ſolum veræ, ſed etiam
perfectæ virtutes quia nimirum ordinantur ad
vltimum finem, qui eſt bonum perfectum, &
tale ſimpliciter; & huiusmodi ſunt virtutes
theologicæ, & morales infuſæ. Virtutes pri-
mi generis non regulantur à vera ſed à falſa
prudentia, quæ prudentia carnis appellatur.
Secundi generis regulantur à prudentia natu-
rali & acquiſita. Tertij generis à prudentia
ſupernaturali & infuſa. Obiectum virtutum
primæ claſſis, cum non ſit verum bonum, ſed
apparens, non eſt ordinabile in Deum vt vl-
timum finem, ſed potius ab illo vt vltimo fine
auertit. Obiectum verò virtutum ſecundæ,
nempe bonum honestum & rationi conſonum;
ex ſe & ex natura ſua tendit in Deum vt fi-
nem vltimum ſecundum quid, nempe vt lu-
minis naturalis, & boni honesti authorem, &
quantum eſt de ſe, per imperium charitatis in
Deum vt vltimum finem ſimpliciter, referibi-
le eſt. Demum obiectum virtutum tertię
claſſis actu refertur in Deum vt vltimum fi-
nem ſimpliciter, vel eſt ipſemet Deus, vt
au-



C A P V T VII.

De donis Spiritus Sancti.

D Ari in nobis Spiritus Sancti dona, seu speciales aliquas dispositiones, à Spiritu Sancto animæ impressas, quibus disponitur ad hoc vt ab ipso bene & facilè ad opera extraordinaria moueatur, constat ex varijs scripturæ locis, vbi fit expressa illorum donorum mentio, & ex hymnis Ecclesiasticis, in quibus Spiritus Sâct is *septiformis munere* appellatur, & sacrum nobis dare septenarium dicitur.

Ratio etiam suffragatur, vt enim discurrit S. Thomas hic qu. 68. art. 2. quod imperfectè habet naturam aliquam, vel formam, aut virtutem, non potest per se operari, nisi ab altero moueatur; sicut luna in qua est imperfectè natura lucis, non illuminat, nisi illuminata à Sole: Sed virtutes theologicæ, & morales infusæ, imperfectè informant animam rationalem: Ergo per illas non ita perficitur homo in ordine ad vltimum finem, quin semper indigeat moueri quodam superiori instinctu Spiritus Sancti, subindeque donis illius, quæ animam ad motionem illam disponant. Ex quo patet dona illa esse habitus, non verò solùm motiones transeuntes; anima enim humana habitualiter disponi debet, & à Spiritu Sancto connaturali er moueatur, sicut per virtutes morales disponitur habitualiter, vt mouea-

creatur connaturaliter à ratione ; ergo sicut illæ virtutes sunt habitus , ita & dona Spiritus Sancti . Vnde S. Thomas qu. citata art. 4. *Dona sunt quidam habitus perficientes hominem , ad hoc quod promptè sequatur instinctum Spiritus Sancti ; sicut virtutes morales perficiunt vires appetitivas ad obediendum rationi .*

Sunt tamen aliqui Theologi qui existimant, talia dona à virtutibus infusis realiter non differre . Sed hæc sententia parùm videtur probabilis, & potest hac ratione confutari : Illi habitus distinguuntur realiter , qui respiciunt distincta formaliter obiecta : Sed virtutes infusæ , & dona , respiciunt obiecta formaliter diversa : illæ enim respiciunt suum obiectum, ut dirigibile per regulas prudentiæ infusæ, modo communi & ordinario , ista verò ut dirigibile modo altiori , nempe per quandam specialem inspirationem & motionem Spiritus Sancti, præter regulas prudentiæ, & præuixæ ad consilium & deliberationem rationis, ut constabit ex infra dicendis : Ergo inter se distinguuntur realiter.

Confirmatur & magis illustratur hæc ratio : Habitus quibus aliquod mobile disponitur ad recipiendam motionem ab aliquo superiori motore, debent inter se distingui, iuxta motorum distinctionem & qualitatem : Sed homo per virtutes acquisitas redditur promptè mobilis à lumine naturæ, per infusas , à lumine gratiæ & fidei ; per dona, à speciali impulsu & instinctu Spiritus Sancti : Ergo dona ab illis virtutibus distingui debent . Minor est certa , maior verò ex eo constat , quod omne mobile debet proportionari suo motori.

Dices, Virtutes theologicæ, & morales infusæ, pariter disponunt animam ad recipiendam motionem Spiritus Sancti; cùm enim homo non possit actus illarum virtutum elicere, nisi Spiritu Sancto mouente, inspirante, & illuminante; eo ipso quod illæ disponunt & complent potentias animæ ad actus supernaturales eliciendos, etiam illas disponunt ad recipiendam motionem, inspirationem, & illustrationem Spiritus Sancti: Ergo prædicta ratio non valet.


Sed contra: licet virtutes theologicæ, & morales infusæ, disponant animam ad recipiendam motionem Spiritus Sancti, diuersimodè tamen à donis; nam dona illam disponunt ad motionem Dei specialem, qua homo à Deo mouetur, non medio consilio & deliberationem, sed diuino instinctu; virtutes autem theologicæ & morales infusæ, illam disponunt ad recipiendam motionem Spiritus Sancti, communem & ordinariam intra ipsum ordinem supernaturalem, per quam scilicet homo natus est moueri supposito consilio & deliberatione rationis. Vnde D. Thomas hic qu. 68. art. 1. ad 4. *Sapientia dicitur intellectus-ualis virtus, secundum quod procedit ex iudicio rationis; dicitur autem donum, secundum quod operatur ex instinctu diuino.*

Septem sunt dona Spiritus Sancti, *Vt enim mundus septem diebus est perfectus, sic & minor mundus septem donis Spiritus perficitur*, vt post Gregorium Magnum ait D. Bonauentura lib. de septem donis cap. 2, Hæc sunt septem radij spirituales, tam splendidi, quam igniti; à sole iustitiæ procedentes, Septem

columnarum, quibus domus quam diuina sapientia sibi ædificauit, innititur. Septem lucernarum de quibus dicitur Exodi 25. *Facies lucernas septem, & pones eas super candelabrum.* Septem stellarum in dextera Christi quas vidit D. Ioannes Apocal. 1. Septem oculi super lapidem vnum, de quibus fit mentio Zachar. 3. Septem crines in quibus fortitudo Sansonis posita erat, vt habetur Iudicum 26. Demum septem filij Iob, qui per singulos dies conuiuium faciebant. *Alium enim diem* (inquit Gregorius lib. 1. moral. cap. 15.) *habet sapientia, alium intellectus, alium consilium, alium fortitudo, alium scientia, alium pietas, alium timor,* Addit quod Spiritus Sanctus septem illis donis contra omnes tentationes vitia animum firmat & protegit. *Contra stultitiam sapientia; contra hebetudinem intellectu; contra præcipationem consilio; contra timorem fortitudinem; contra ignorantiam scientia; contra superbiam timere.*

Si verò quæras, an dona illa sint remansura in patria? Respondeo quod illa, quoad materiam circa quam nunc versantur, ipsa scilicet opera vitæ actiue, non remanebunt in patria, nam opera illa non habent locum in statu gloriæ: remanebunt tamen, & quidem perfectissimè; quantum ad essentiam donorum; quia tunc homo totaliter Deo subditus, Spiritus Sancti motionem perfectissimè sequetur. Habebunt etiam omnia dona actus suos in patria, circa ea quæ pertinent ad vitam contemplatiuam, quæ est vita beata. Vnde Ambrosius lib. 1. de Spiritu Sancto cap. 20. *Ciuitas Dei, illa Ierusalem cælestis, non mea-*

*tu alicuius fluuij terrestris alluitur, sed ex
vitæ fonte procedens Spiritus Sanctus, cuius
nos breui satiamur haustu, in illis cælestibus
spiritibus redundantius videtur affluere, pleno
septem virtutum spiritualium feruens meatu.*




TRACTATUS V.

DE

PECCATIS.

A Gemus in hoc Tractatu in primis
de peccato in genere, eiusque na-
turam; subiectum, & causas expo-
nemus. Deinde de præcipuis eius
speciebus, nempe de peccato originali, quod
ab Adamo per seminalem propagationem in
posteris traducitur; de peccato habituali,
quod remanet in nobis, transacto actu pec-
caminoso, & macula peccati dicitur; de
peccato actuali commissionis, & omissionis,
& demum de peccato tam mortali, quam ve-
niali.



CAPUT I.

De natura peccati in genere.

Dico primò, de ratione omnis peccati est quod sit contra rectam rationem & legem æternam. Ita D. Thomas hic quæst. 71. art. 6. ubi sic discurrit: *Actus humanus habet quod sit malus (moraliter) ex eo quod caret debita commensuratione: omnis autem commensuratio cuiuscumque rei attenditur per comparisonem ad aliquam regulam, à qua si diuertat incommensurata erit. Regula autem voluntatis humanæ est duplex: una propinqua & homogenea, scilicet humana ratio; alia verò est prima regula, scilicet lex æterna, quæ est quasi ratio Dei. Ergo actus moraliter malus, essentialiter importat difformitatem seu disconuenientiam ad rectam rationem & legem æternam. Unde ab Augustino peccatum definitur: *Dictum, vel factum, vel concupitum contra legem æternam, subindeque contra legem naturalem, quæ est quædam participatio legis æternæ in mentibus nostris impressa. Quare Ambrosius lib. 5. de paradiso cap. 14. ait quod talis lex non inscribitur, sed innascitur, nec aliqua lectione percipitur, sed profluo quodam naturæ fonte in singulis exprimitur.**

Dico secundò, est essenziale peccato quod sit iniuria & offensa Dei. Hæc conclusio sequitur ex dictis in præcedenti, si enim peccatum sit contra legem æternam, non potest non esse iniuria seu offensa Dei; qui enim sciens & volens transgreditur legem ab aliquo imposi-

tam.

tāq̃m, verè offendit ipsum legislatōrem, quia eius voluntati contradicit, eique debitam subiectionem & obedientiam denegat. Deinde peccatum non solū Deo vt supremo legislatori contrariatur, sed etiam ipsum offendit vt iustum iudicem, non timendo eius pœnam & supplicium; vt supremum & summum dominum, denegando ei seruitutem debitam; vt amicum & benefactorem, exhibendo se ei inimicum & ingratum, ac abutendo ipsius beneficijs; vt primam causam & primum principium, vtendo ipsius concursu ad peccandum; & denique vt summum bonum & vltimum finem, quia per quodlibet peccatum mortale conuertitur peccans ad bonum creatum tanquam ad finem vltimum, & à Deo vero fine vltimo auertitur, in quo Deus ipse summè offenditur.

Obijcies primò contra primam conclusionem: Mendacium & odium Dei sunt quid intrinsecè malum moraliter, non solū antecedenter ad legem positiuam, & independentē ab illa, sed etiam antecedenter ad legem naturalem, imò & ad legem æternam: nam pro illo priori in quo diuinus intellectus per scientiam simplicis intelligentiæ cognoscit odium Dei præcisè secundum prædicata essentialia, verè cognoscit illud vt oppositum suæ bonitati, & vt auertens ab ea creaturam rationalem, ipsique creaturæ rationali disconueniens & dissonum: idem dicendum de mendacio: Ergo actus secundū se mali, sunt peccata, independentē a lege naturali, & a lege æterna, & antecedenter ad illas, subindeque non est essentialē peccato quod sit le-


gi naturali & æternæ contrarium.

Respondeo mendacium, odium Dei, & alios actus secundum se malos, antecedenter ad legem naturalem, vel ad legem æternam, non esse mala & peccata formaliter, sed initiatiuè tantum & fundamentaliter, quatenus ex se & ab intrinseco sunt determinata, vt a lege æterna, subindeque a lege naturali, quæ est eius participatio, discordent & deuiant, & apta nata vt per illam prohibeantur, post cuius prohibitionem erunt mala & peccata formaliter & completiuè. Si autem quæras, in quo consistat malitia hæc initiatiua & fundamentalis? Respondebo breuiter, ipsam consistere in eo quod actus ab intrinseco mali secundum se repugnent alicui ex diuinis perfectionibus, vt odium Dei summæ bonitati, mendacium primæ veritati, furtum summæ iustitiæ & æquitati; hæc enim contrarietas & repugnantia est ratio & fundamentum, cur Deus per legem æternam & naturalem huiusmodi actus prohibeat: nam sicut Deus est necessario determinatus ad diligendum sua diuina attributa, ita necessario est determinatus ad odio habendum, & prohibendum lege æterna quidquid illis contrariatur.

Obijcies secundo contra secundam conclusionem; Quidquid est essentialiale peccato, prouenit illi ab obiecto a quo specificatur: Sed ab obiecto solum prouenit peccato ratio mali siue defectus moralis, ratio verò offensæ siue iniuriæ prouenit ei ex ordine ad personam offensam, quæ est distincta ab obiecto peccati: Ergo non est essentialiale peccato, quod sit iniuria seu offensa Dei.

Re-

Respondeo , concessa maiori , negando minorem , nam in obiecto peccati virtualiter includitur Deus , vt legislator , & vt vltimus finis ; vt legislator quidem , quia obiectum peccati est moraliter malum , ac proinde a diuina lege positiua aut naturali prohibitum ; vt verò vltimus finis , quia in moralibus obiectum aliquod præcipitur aut prohibetur , in ordine ad Deum vt vltimum finem : vnde ratio iniuriæ seu offensæ contra Deum , vt legislatorem , & vt vltimum finem , virtualiter & implicite includitur in peccato , quatenus est malum morale , & ab eo nequit perfecte præscindi .



C A P V T I I .

Peccatorum multiplex diuisio .

Peccatum primò diuiditur in originale , quod derivatur ab Adamo , & per originem seu generationem , in eius posteros transfunditur ; & personale , quod propria voluntate peccantis committitur & ab alio non derivatur .

Secundò peccatum personale diuiditur in actuale & habituale . Primum est actus malus & difformis regulis morum : Secundum verò consistit in quadam macula , quæ in anima relinquitur ex peccato actuali , & in ea remanet , donec per gratiam sanctificantem auferatur .

Tertio peccatum actuale subdividitur in

P 2

pec-

peccatum commissionis & omissionis . Illud consistit in productione alicuius actus mali & difformis regulis morum . Istud est carentia seu priuatio alicuius actus debiti & lege præcepti . Primum pugnat cum præcepto negatiuo , ponens actum qui iubetur non poni ; secundum cum affirmatiuo , negligens actum qui præcipitur .

Quartò peccata actualia diuiduntur in carnalia & spiritualia . Illa sunt quæ perficiuntur in delectatione carnali, vt gula & luxuria, quæ delectatione ciborum & venereorum consummantur . Ista quæ perficiuntur in delectatione spirituali, vt superbia, inuidia , & similia, quæ in sola apprehensione alicuius rei concupitæ, vel ad votum habitæ, consummantur . Prima plus habent de conuersione, quam de auersione ; secunda è contra plus de auersione quam de conuersione : vnde ista quoad culpam sunt grauiora, illa quoad adhæSIONem maiora . Demum vt ait Gregorius Magnus lib. 33. moral. cap. 11. *Peccata carnalia sunt minoris culpæ, & maioris infamiæ* . Minoris quidem culpæ, quia ad illa impellimur pluribus ac vehementissimis incentiuis . Maioris verò infamiæ ; quia sunt circa delectationes illas quæ sunt nobis & brutis communes . Vnde superbi sæpe in peccata illa carnalia , iusto Dei iudicio prolabantur , vt confundantur, & humiliantur , sicut obseruauit idem S. Pontifex lib. 11. moral. cap. 8. vbi explicans illud Iob. 12. *Balteum Regum dissoluit* , subdit : *Regum itaque Balteum dissoluit , quando propter elationis culpam , castitatis in eis cingulum destruit .*

Quintò peccatorum alia sunt contra Deum, alia contra seipsum, alia contra proximum: triplex enim ordo in homine debet esse, vñum per respectum ad regulam diuinæ legis, aliud per comparisonem ad regulam rationis, tertius per respectum ad alios homines quibus conuiuere debet. Quando ergo à primo ordine defecit, & detrahit Deo amorem vel reuerentiam debitam, dicitur peccare in Deum, vt sacrilegus, hæreticus, blasphemus. Quando deuiat a secundo ordine, & passionem suam ratione non regulat, peccat in seipsum, vt auarus, gulosus, luxuriosus. Quando verò a tertio ordine recedit, nec seruat proximo ius debitum, vel offendit humanam societatem, cui naturaliter alligatur, tunc dicitur peccare in proximum, vt fures, homicidæ, adulteri.

Sextò diuiditur peccatum, in peccatum cordis, oris, & operis, quæ diuisio dupliciter intelligi potest. Primò vt per peccatum cordis illud accipiatur, quod interiùs consummatur, vt hæresis, per peccatum oris illud quod locutione perficitur, vt mendacium; per peccatum operis illud quod opere completur, vt adulterium, vel homicidium. Secundò vt hæc diuisio sit potiùs in diuersos gradus eiusdem peccati, quam in diuersa peccata: iracundus enim v. g. ex hoc quod appetat vindictam, primò perturbatur in corde, secundò in verba contumeliosa erumpit, & tertio procedit vsque ad facta iniuriosa. Idem patet in luxuria, & quolibet alio peccato, in quo est primò conceptus cordis, scilicet cogitatio, deinde est manifestatio & locutio, & vltimo completio externa.

connexa, sed disparata, & aliquando inter se opposita, vt avaritia & prodigalitas vnde vt notat D. Augustinus epist. 29. aliquando vitium vitio tollitur, vt amore laudis, aut voluptatis, amor pecuniæ.

Dices, sicut omnes virtutes conueniunt in vno principio, nempe in amore Dei, ita omnia vitia & peccata vniuntur & conueniunt in philaptia seu amore sui: Ergo sicut virtutes sunt inter se connexæ, ita vitia & peccata.

Respondeo, concesso Antecedente, negando consequentiam, & paritatem, nam vt ait S. Thomas art. citato in resp. ad 3. *Amor Dei est congregatiuus, in quantum affectum hominis à multis ducit in vnum; & ideo virtutes quæ ex amore Dei causantur connexionem habent Sed amor sui disgregat affectum hominis in diuersa, prout scilicet homo se amat, appetendo sibi bona temporalia, quæ sunt varia & diuersa; & ideo vitia & peccata, quæ causantur ex amore sui, non sunt connexa.*

Dico secundò, omnia peccata non esse æqualia in malitia, & grauitate. Est contra Stoicos, qui vt refert D. Thomas qu. citata art. 2. considerantes peccatum solum ex parte priuationis rectitudinis rationis, quam importat, & existimantes nullam priuationem posse suscipere magis & minus, dixerunt omnia peccata esse æqualia. Hoc fundamentum conuellit S. Doctor, notando duplex esse priuationis genus, vna est pura & simplex, quæ consistit quasi in facto seu corrupto esse, sicut mors est priuatio vitæ, & tenebræ, priuatio luminis, & huiusmodi priuatio non suscipit maius aut minus, quia nihil relinquit de forma, vel habitu oppo-

sito ; non enim minùs mortuus est aliquis primo aut secundo die , quam post annum , cùm iam corpus est resolutum ; & similiter non est magis tenebrosa domus , si lucerna sit operta pluribus velaminibus , quam si sit operta vno solo velamine , totum lumen intercludente . Alia est priuatio non pura & non simplex , sed aliquid retinens de forma vel habitu opposito , quæ magis consistit in corrumpi quam in corrupto esse , sicut ægrotudo , quæ ita priuat debita commensuratione humorum , vt tamen eius aliquid in subiecto remaneat ; & talis priuatio suscipit magis & minus , in quantum magis aut minus relinquit de habitu opposito , maior enim est aut minor ægrotudo , secundùm quod magis aut minus tollit de commensuratione humorum . Cùm ergo peccatum (esto de formalidicat priuationem) non sit de primo genere priuationum , sed de secundo ; quia ita priuat debita commensuratione rationis , vt non totaliter ordinem rationis tollat , reperitur inæqualitas inter peccata , quantum ad malitiam & grauitatem .

Aliam rationem habet 3. contra Gent. cap. 139. vbi sic discurret : *In omnibus quorum perfectio & bonum in quadam commensuratione consistit , quanto magis à debita mensuratione receditur , tanto maius erit malum ; sicut sanitas consistit in debita commensuratione humorum , & pulchritudo in debita commensuratione membrorum , veritas autem in debita commensuratione intellectus vel sermonis ad rem . Patet autem quod quanto est maior inæqualitas in humoribus , tanto est maior infirmitas ; & quanto est maior inordinatio in membris , tanto est maior*

ior turpitudine; & quanto magis à veritate receditur, tanto est maior falsitas: bonum autem virtutis in quadam commensuratione consistit, est enim medium secundum debitam limitationem circumstantiarum inter contraria vitia constitutum: quanto igitur magis ab hac harmonia receditur, tanto est maior malitia.

Quæres primò, an non solùm in peccatis quæ iure naturali prohibentur, sed etiam in illis quæ solo iure positivo vetantur, detur inæqualitas in gravitate & malitia? Respondeo affirmatiuè, illa enim possunt diuersas species peccatorum constituere, alterius siquidem speciei est ieiunium violare, & laborare in die festo, tamen si vtrumque sit solùm contra ius positium: At species, cùm se habeant sicut numeri, sunt inter se inæquales: Ergo & peccata quæ solo iure positivo prohibita sunt.

Confirmatur: Gravitas peccati sumitur ex oppositione ad virtutem quam destruit, adeoque, cœteris paribus, illud peccatum est maius quod præstantiori virtuti opponitur: Sed peccata quæ solo iure positivo prohibita sunt, contrariantur multoties diuersis & inæqualibus virtutibus: v. g. comedere carnem die veneris, abstinentiæ; & laborare in die festo, aut celebrare sine vestibus sacris, religioni: Ergo huiusmodi peccata in gravitate & malitia inæqualia sunt.

Nec obstat quod D. Thomas loco citato ex summa contra gentes videatur docere oppositum, ibi enim loquitur de prædictis peccatis, in ordine ad æstimationem humani iudicis, qui solùm considerat materialem & externam præcepti transgressionem, quæ potest in indivisibi-

li consistere, ut constat ex verbis istis quæ ibidem habet: *Huic autem rationi videtur suffragari quod in humanis iudicijs agitur, nam si alicui statuatur limes quem non transgrediatur, nihil refert apud iudicem, siue mulum siue modicum sit transgressus.* Vnde ex hoc testimonio solum potest inferri, aliqua peccata contra ius positivum, consistere in indivisibili ex parte rei prohibita, aut ex parte exterioris transgressionis, quæ in humano iudicio considerantur, non autem absolute, & ex omnibus alijs principijs quæ iudex diuinus attendit.

Quæres secundò, unde in peccatis petatur inæqualitas in gravitate, & malitia? Respondeo inæqualitatem essentialem peccatorum sumi ex obiecto, accidentalem verò ex circumstantijs non mutantibus speciem. Prima pars probatur: Peccatum in ratione peccati seu mali moralis constituitur per ordinem & habitudinem transcendentelem ad obiectum ut dissonum regulis morum, ut capite 8. ostendemus: Ergo cum iuxta Philosophos, idem sit constitutum & distinctivum rei, peccata distinguuntur & diversificantur specie, ex ordine & habitudine quam dicunt ab obiecta specie diversa. Secunda verò pars manifesta est, inæqualitas enim accidentaliter in peccatis sumi debet ex his quæ se habent accidentaliter ad actum in esse moris spectatum, qualiter se habent circumstantiæ non mutantibus speciem.

Ex his inferes primò, peccatum tantò esse gravius, quantò obiectum eius est peius. Vnde peccata contra Deum, sicut idololatria, blasphemia, & alia huiusmodi, sunt omnium gravissima. Deinde peccata contra hominem se-

candum occupant locum, vt homicidium & calumnia . Vltimum ea quæ sunt contra res externas hominis, vt furtum.

Inferes secundò cum D. Thoma hic qu. 73. art. 4. illud peccatum esse grauius simpliciter, & secundum speciem, quod opponitur virtuti præstantiori; tum quia habet obiectum in ratione obiecti peius, & magis rationi repugnans, tum etiam, quia habet corrumpere & destruere maius bonum, nempe medium ipsius virtutis.

Pro pleniori huius corollarij intelligentia, & multorum argumentorum solutione, tria breuiter hic obseruanda sunt, quæ fuisse expendunt Salmaticenses in Tract. de peccatis disp. 9. dubio 4. In primis aduertendum est, quod cum dicimus illud peccatum esse grauius secundum suam speciem, quod opponitur perfectiori virtuti, hoc intelligi debet de oppositione secundum obiectum primum & principale talis virtutis; si enim peccatum opponatur perfectiori virtuti solum quoad obiectum secundarium, non ideò erit grauius, vt patet in odio proximi, quod quia non contrariatur charitati, vt tendit in obiectum primum, nempe Deum, sed vt fertur in obiectum secundarium, scilicet proximum, non est grauius omnium peccatorum. Nam vt docet D. Thomas 2. 2. quæst. 39. art. 2. schisma, quamuis opponatur charitati, est minus peccatum, quam infidelitas.

Secundò aduertendum est, peccatum quod opponitur inferiori virtuti, si includat etiam oppositionem cum superiori virtute, ratione huius inclusionis, posse superare illud, quod

maiori virtuti opponitur. Vnde adulterium quod castitati opponitur, secundum suam speciem grauius est furto quod iustitię opponitur, quamuis hæc sit perfectior virtus quam illa; quia in adulterio simul cum oppositione ad castitatem, clauditur oppositio ad ipsam iustitiam.

Tertiò obseruari debet, quod peccata inter quæ sit comparatio, habere debent eundem modum oppositionis ad virtutem, ita quod aut vtrumq; opponatur illi cōtrariè, aut vtrumq; priuatiuè, subindeq; vtrumq; sit peccatum commissionis, vel vtrumque omissionis: Si autem vnum sit commissionis, quod opponitur contrariè; & aliud omissionis, quod opponitur tantum priuatiuè, valde probabile est, quod etiamsi hoc posterius perfectiori virtuti opponatur, poterit tamen esse minus graue quam illud, quia diuersus iste modus oppositionis non parùm eorum mutat grauitatem. Vnde probabiliter dici potest, peccatum homicidij, quod iustitiæ opponitur, esse grauius secundum suam speciem, omissione sacri, quæ priuatiuè opponitur religioni, quamuis religio sit præstantior virtus quam iustitia.

Quærestertiò, an diuersitas præceptorum inferat distinctionem specificam peccatorum? Respondeo negatiuè, si diuersitas illa se teneat solum ex parte præcipientium, vel prohibentium; secus verò si se teneat ex parte motiui præcipiendi, vel prohibendi.

Prima pars probatur primò ratione D. Thomæ hic qu. 73. art. 6. ad 2. Specifica peccatorum distinctio non sumitur ex termino a quo auersionis, sed ex termino ad quem conuersionis;

nis : At præceptorum diuersitas quæ est solum ex parte præcipientium , vel prohibentium ; non se tenet ex parte termini ad quem conuersionis , sed termini a quo auersionis : Ergo non infert distinctionem specificam peccatorum . Minor videtur certa , terminus enim ad quem conuersionis peccaminosæ , est id ad quod homo peccans conuertitur , id est obiectum quod appetit : At præceptum siue lex non est obiectum quod appetit , sed id à quo obiectum appetendo auertitur : Ergo præceptum , vel præceptorum diuersitas , non se tenet ex parte termini ad quem , sed ex parte termini a quo . Maior autem probatur primò , quia specificatio rei , subindeque eius distinctio ab omnibus alijs , debet attendi secundum illud quod est in ea per se intentum & a natura & ab operante , & non secundum illud quod est in ea per accidens : Sed ea quæ in peccato se tenent ex parte conuersionis , per se a peccante intenduntur ; ea verò quæ se tenent ex parte auersionis , intenduntur solum per accidens , cum nemo intendens ad malum operetur , vt ait Dionysius cap. 4. de diuin. nomin. Ergo &c. Secundò probatur eadem Maior : Motus non specificantur neque distinguuntur ex termino à quo , sed ex termino ad quem , vt docetur in *physica* ; & ideo licet terminus a quo specie differat , si tamen terminus ad quem eiusdem sit rationis , motus sunt eiusdem speciei : Sed ea quæ in peccato se tenent ex parte auersionis , se habent per modum termini a quo ; quæ verò se tenent ex parte conuersionis , per modum termini ad quem , vt patet ; Ergo peccata constituuntur & distinguuntur

guuntur per id quod se tenet ex parte conuersionis, non verò per illud quod se tenet ex parte auersionis.

Secundò probatur eadem pars, & magis adhuc ostenditur, distinctionem specificam peccatorum, non sumi ex diuersitate præceptorum, quando illa se tenet solùm ex parte principij, aut præcipientis, vel prohibentis: Furtum prohibetur de facto a lege ciuili, Ecclesiastica, naturali, & diuina, & tamen non est nisi vnicum specie peccatum. Item in Decalogo furtum & adulterium prohibentur præceptis quæ diuersa sunt ab eis quibus prohibetur interius desiderium furandi & mœchandi; & tamen non idcirco differunt specie desiderium furandi & furtum, neque adulterium & desiderium adulterandi, cum actus, exterior non addat malitiam specie diuersam ab interiori: Ergo diuersitas præceptorum, quæ se tenet solùm ex parte principij, aut præcipientis, vel prohibentis, non inducit distinctionem specificam peccatorum.

Quod verò eam inferat, quando diuersitas præceptorum se tenet ex parte motiui præcipiendi vel prohibendi, manifestum est, quia tunc leges præbent diuersa obiecta formalia, a quibus formalis peccatorum diuersitas proficiscitur. Vnde furtum in Ecclesia diuersæ speciei est a furto alibi perpetrato, quia Ecclesia prohibet furtum in templo, speciali motiuo religionis, sicut etiam dum prohibet Clerici percussionem: mendacium verò in Ecclesia prolatum, non inficitur malitia sacrilegij, quia religionis motiuo non interdicitur.

Obijcies primò contra primam partem huius resolutionis: D. Thomas qu. 2. de malo art. 6. dicit quod *si aliqua essent peccata, solum quia prohibita, in his rationabile esset ut secundum differentiam præceptorum specie peccata differrent*: Ergo censet distinctionem specificam peccatorum quæ sunt contra ius positivum, non sumi ex obiectis in quæ tendunt, sed ex præceptis quibus opponuntur.

Respondeo S. Doctorem ibi loqui de præceptis quæ sunt diuersa, non solum ex parte principij, aut præcipientis, sed etiam ex parte rei præceptæ, vel finis aut motui præcipiendi. Vnde hoc testimonium non militat contra primam partem nostræ resolutionis, sed secundam statuit & confirmat.

Obijcies secundò: Quando peccatum opponitur diuersis legibus, violantur diuersæ obligationes; cum vnaquæque lex suam obligationem imponat, & omnes per tale peccatum violentur: Ergo dantur in illo plures malitiæ, malitia enim nihil aliud est quam violatio legis.

Respondeo negando Antecedens; nam quando leges differunt solum ex parte principij, non inducunt plures nec diuersas obligationes, sed tantum, & eandem, quam prima lex de nouo imponit, & aliæ confirmant.

Obijcies tertio: Peccatum ex eo est moraliter malum, quia dicit difformitatem ad leges quæ sunt regulæ morum: Ergo cum dicit difformitatem ad leges specie diuersas, erit in diuersis speciebus malitiæ moralis.

Respondeo, concessio Antecedente, distin-

guen-

guendo consequens : cūm dicit difformitatem ad leges specie diuersas , erit in diuersis speciebus malitiæ : Si distinctio legum seu præceptorum sit formalis, concedo . Si sit solum materialis , nego . Quando autem diuersitas legum se tenet solum ex parte legislatoris, & non ex parte rei præceptæ, vel finis aut motui præcipiendi , non est formalis, sed duntaxat materialis , cūm conueniant in vna & eadem ratione formali præcipiendi vel prohibendi, nempe in eodem motiui.

Dices : Lex diuina, naturalis , & humana, semper habent motiua seu fines specie diuersos : Ergo semper sunt diuersæ speciei formaliter . Consequentia patet ex dictis, Antecedens verò probatur ex eo quod finis legis diuinæ est rectificare voluntatem creatam , in ordine ad beatitudinem supernaturalem ; finis legis naturalis est ipsa naturalis homini rectitudo, in ordine ad beatitudinem naturalem : finis legis humanæ est rectificare homines politicè , hoc est in ordine ad pacem & quietem reipublicæ vel communitalis .

Respondeo negando Antecedens , & ad illius probationem dico fines illos esse tantum extrinsecos, potiusque dicendos esse fines legislatoris , quam ipsarum legum : vt autem leges seu præcepta distinguantur formaliter, non sufficit diuersitas motiui extrinseci & remoti , sed requiritur diuersum motiuum proximum & intrinsecum , quod dicitur motiuum præcepti & operis .

Obijcies quartò contra secundam partem nostræ resolutionis : Peccatum aliquod potest prohiberi ex motiui specie diuersis, & tamen

Vnicam tantum habere malitiam : Ergo diuersitas motiui in præceptis non inducit diuersitatem specificam in peccatis . Consequentia manifesta est, Antecedens verò probatur duplici exemplo : Ieiunium enim quadragesimale præcipitur ab Ecclesia , ex motiui religionis , & tamen nemo dicet fractionem quadragesimalis ieiunij , duas malitias specie distinctas habere . Item audire sacrum in die dominico, in quo incidit festum alicuius Sancti , præcipitur ab Ecclesia duplici motiui; nam in die dominico præcipitur ex motiui latræ, per quam Deo cultum exhibemus; in Sanctorum verò solemnitatibus præcipitur ex motiui dulæ, per quam Sanctis veneratio exhibetur ; & tamen omissio sacri die dominico , in quo incidit festum alicuius Sancti non est in duplici specie peccati .

Respondeo negando Antecedens, & ad primam eius probationem, seu ad primum exemplum dico, motiui religionis esse remotum, & finem extrinsecum Ecclesiæ præcipientis ieiunium quadragesimale, non verò motiui proximum, & operis: vt verò diuersitas motiui inferat diuersitatem specificam in præceptis, motiui debet esse proximum & intrinsecum, vt diximus in solutione præcedentis obiectionis .

Ad secundam probationem , seu exemplum, aliqui respondent cum Nauarro concedendo omissionem sacri die dominica, in qua incidit festum alicuius Sancti , duplicem habere malitiam specie distinctam, ob rationem in obiectione adductam : Sicut (inquit) blasphemia in Sanctos, & in Deum , est pec-

catum cum duplici malitia specifica ; quia blasphemia in Sanctos opponitur dulix , ex qua illos honorare tenemur ; blasphemia verò in Deum aduersatur latriæ , per quam Deo debitum honorem exhibemus . Verius tamen videtur , tam in festis Sanctorum , quam diebus dominicis , ex eadem virtute , nempe latriæ , præcipi auditionem sacri , & consequenter in casu proposito vnicum committi peccatum . Nam sicut in Missa , etsi celebretur in Sanctorum solemnij , non tamen Sanctis , sed Deo , sacrificium offertur ; ita præceptum auditionis sacri in Sanctorum solemnij , non est proximè ex motiuo honoris Sanctis debiti , ratione sui , sed ex motiuo honoris quem exhibemus Sanctis , ratione Dei in illis habitantis , ac proinde non audire sacrum in festis Sanctorum , non est contra duliam , sed contra latriam .



C A P V T IV.

De subiecto peccatorum.

Certum est , voluntatem simpliciter & absolutè esse subiectum peccati , sicut & illius causam ; cum omne peccatum voluntarium sit , vnde Augustinus lib. 7. retract. c. 9. *Voluntas est ex qua peccatur , & rectè vinetur* . Solùm ergo difficultas esse potest , an illud in appetitu sensitivo , in intellectu , & in membris ac sensibus externis , vt voluntatis motioni subiectis , quantum ad malitiam forma-

malem quam importat, residere possit: Pro resolutione.

Dico breuiter, peccatum, quantum ad malitiam formalem, subiectari posse intrinsecè in appetitu sensitiuo, & in intellectu, non verò in membris corporis, aut in sensibus externis.

Prima pars, quam negant Aluarez & Curiel, asserentes malitiam moralem in solis actibus voluntatis intrinsecè reperiri, probatur autoritate & duplici ratione D. Thomæ. Primam habet hic qu. 74. art. 4. potestque sic breuiter proponi: Eiusdem potentia est actus & habitus, præsertim si actus sit immanens, qui in ea potentia recipitur, a qua efficitur: Atqui in appetitu sensitiuo recipiuntur habitus vitiorum, puta intemperantia, pusillanimitatis, & alij similes; sicut in eo subiectantur temperantia, fortitudo, & alia virtutes moderatrices passionum, vt ostendimus in Tractatu de virtutibus: Ergo & actus vitiorum.

Secundam insinuat in 2. dist. 21. qu. 1. art. 2. ad 5. vbi ait: *Appetitus concupiscibilis habet quandam libertatem in homine, secundum quam potest obedire imperio rationis, & sic in concupiscibili potest esse peccatum.* Vnde sic arguo: Quod est capax libertatis, potest esse subiectum peccati. Sed appetitus sensitiuus, prout est in homine, ex coniunctione quam habet cum voluntate libertatem aliquam intrinsecam ab ea participat: Ergo potest esse subiectum peccati. Maior constat, minor verò sic ostenditur. Cogitativa, ex coniunctione quam habet cum intellectu, participat vim
dis-

discurrendi circa singularia, vt docet D. Thomas 1. p. qu. 78. art. 4. in corp. & ad 5. Ergo similiter appetitus sensitivus, ex coniunctione quam habet cum voluntate, libertatem quandam imperfectam participat. Consequentia patet ex paritate rationis, neque enim quantum ad hoc potest inter appetitum & cogitativum aliqua disparitatis ratio assignari, cum eodem plane modo, quantum ad coniunctionem & radicationem in eodem principio, se habeat appetitus ad voluntatem, quo cogitativa ad intellectum; subindeque si ratione huius coniunctionis & radicationis, ista ab intellectu vim aliquam imperfectam iudicandi & discurrendi participet, non est cur in appetitu sensitivo, ex coniunctione quam habet cum voluntate, aliqua imperfecta libertas non deriuetur. Ratio autem à priori horum est, quia generale est in causis & viribus subordinatè unitis, vt inferior ex coniunctione ad superiorem, aliquid eius participet, quo eleuetur & perficiatur, & media hac eleuatione, modum agendi ipsius superioris, vtcumque attingat. Si coelum, ex coniunctione ad intelligentiam motricem, participat in se virtutem ad producenda aliqua viuentia, licet imperfecta & vilia, quæ secundum se, vtpote vitæ experts, nequaquam produceret. Sic etiam phantasma, ex coniunctione cum intellectu agente, accipit vim quam ex se non habebat, ad producendam speciem intelligibilem in intellectu possibili. Quid ergo mirum, si appetitus sensitivus in homine, ex coniunctione ad voluntatem, aliquem libertatis radium consequatur, ratione cuius possit esse subie-

subiectum peccati venialis, non tamen mortalis, ad quod requiritur perfecta libertas, & deordinatio ab ultimo fine? Vnde Magister sententiarum in 2. dist. 25. *Si peccati illecebra in solo sensualitatis motu tenetur, veniale ac leuissimum est.*

Ex his probata manet secunda pars, quæ asserit, peccatum, quantum ad malitiam moralem quam importat, posse residere in intellectu; tum quia vitia imprudentiæ, infidelitatis, & similia sunt in intellectu, in quo resident prudentia & fides; tum etiam, quia in actu imperij ab intellectu elicitio, reperitur aliqua libertas intrinseca, a præcedenti motionem voluntatis participata, ut in Tractatu de actibus humanis ostensum est.

Tertia quoque pars, quæ affirmat in membris, & in sensibus externis, malitiam moralem formaliter non residere, probata manet ex dictis: Nam in eo subiecto non potest intrinsecè & formaliter residere malitia peccati, quod non est aliquo modo intrinsecè liberum: Sed membra corporis non sunt intrinsecè libera, sicut nec sensus externi: Ergo malitia peccati in ipsis residere non potest. Vnde S. Thomas supra qu. 20. art. 3. docet actus exteriores non habere distinctam bonitatem vel malitiam formalem ab ea quæ est in actu voluntatis. Vbi nomine *actus exterioris*, non intelligit quemcumque actum à voluntate imperatum (ut Curiel & Alvarez existimant) sed solùm actus membrorum externorum, ut constat ex primo argumento illius articuli, ubi ait quod *actus exterioris principium est potentia exequens motum*, idque non negat, sed ad-

admittit in eiusdem argumenti solutione : potentia autem exequens motum est in membris corporis exterioribus .

Obijcies primò contra primam partem conclusionis : Veritas & falsitas formalis in solo intellectu formaliter resident : Ergo pariter bonitas & malitia moralis in sola voluntate subiectantur . Antecedens supponitur vt certum ex Metaphysica . Consequentia verò probatur ex paritate rationis .

Respondeo veritatem & falsitatem formalem, primò & per se esse in intellectu, secundario tamen & per participationem esse in cogitativa formaliter ; quia hæc ex coniunctione quam habet cum intellectu , participat vim iudicandi & discurrendi circa singularia, vt docet D. Thomas supra citatus : in vocibus autem & rebus solùm esse veritatem extrinsecam denominatione . Idem est de bonitate & malitia , primò enim & per se vtraque est in actu voluntatis , secundario & per participationem in actu appetitus sensitivi ; in actibus verò membrorum exteriorum solùm extrinsecam denominatione .

Obijcies secundò : Proprium subiectum malitiæ moralis est potentia libera : Sed appetitus sensitivus in homine non habet libertatem intrinsecam : Ergo non potest esse subiectum malitiæ moralis . Maior constat, minor verò suadetur primò, quia potentiæ liberæ debet proponi obiectum cum indifferentia ad vtrumlibet : Sed appetitui sensitivo non proponitur obiectum cum hac indifferentia, cùm illi proponatur per imaginationem vel cogitativam, aut alium sensum internum; sensus

sus verò interni cùm non cognoscant rationes vniuersales, sicut intellectus, non possunt obiectum cum indifferentia proponere : Ergo appetitus sensitivus in homine non habet libertatem intrinsecam. Secundò, si appetitui sensitivo hominis concedatur aliqua libertas intrinseca, sufficiens ad peccandum venialiter, iam talis appetitus poterit hoc modo delinquere, vtendo illa sua libertate, quantumcumque voluntas ei resistat, vel impedita sit, quod videtur absurdum . Tertiò si in appetitu sensitivo libertas aliqua admittatur, nullus erit motus sensualitatis, quantumvis primò primus, qui non sit peccatum veniale, quia in omnibus appetitus vtetur illa sua libertate, quam dicimus ad veniale sufficere : Consequense est falsum, & erroneum, vt docent communiter Theologi, & constat ex Augustino 1. de ciuit. cap. 25. vbi sic ait : *Illà concupiscentialis inobedientia, quantò magis absque culpa sit in corpore non consentientis, se absque culpa est in corpore dormientis ?* Ergo, &c.

Respondeo, concessa Maiori, negando minorem : cùm enim modus diuinæ prouidentiae sit rerum ordines ita inter se coniungere, vt supremum infimi attingat infimum supremi, appetitus ordinis inferioris, nempe sensitivi, debet in homine participare aliquid de perfectione & libertate voluntatis, quæ est appetitus ordinis superioris, scilicet rationalis . Ad primam probationem in contrarium responderi potest cum Gregorio de Martinez, cogitativam prout est in homine, ratione coniunctionis quam habet cum intellectu, participi-

icipare aliquid de eius virtute & perfectione, quo eleuatur ad formandum iudicium quoddam indifferens, sicut ex coniunctione cum ratione participat vim aliquam discurrendi imperfectè & conferendi media cum fine, vt docet D. Thomas loco supra citato. Vel dici potest cum Salmanticensibus, non esse necessarium, quod indifferentia ratione cuius appetitus sensitius agit liberè, resplendeat in propositione immediata sui obiecti, quæ fit per cogitatiuam, vel alium sensum internum, sed sufficere quod resplendeat in propositione obiecti voluntatis, quæ fit per intellectum; quia ad libertatem illam imperfectam, quæ in appetitu sensitiuo ex coniunctione cum voluntate deriuatur, non requiritur quod ipse appetitus possit a sua operatione retrahere (hoc enim proprium est solius potentie primariæ & quasi per essentiam liberæ, qualis est voluntas) sed sufficit quod operetur cum respectu & subordinatione ad principium per quod retrahi possit, quod est voluntas; nam eo ipso verificatur quod operatur liberè, non libertate primaria, & quasi per essentiam, sed secundaria, & participata; quia cum talis respectus sit ad principium liberum vt liberum, nequit actum in quo est a linea necessarij non extrahere, & liberum non reddere.

Ad secundam probationem minoris, nego sequelam, contradicente enim voluntate non est prædicta libertas in appetitu sensitiuo, quia illa ipsi communicatur ex coniunctione & subordinatione ad voluntatem: iste autem influxus ex resistentia & actu contrario voluntatis impeditur.

Ad

Ad tertiam nego pariter sequelam, libertas enim imperfecta conueniens appetitui sensitui, necessariò exigit vt possint eius motus a ratione reprimi, ita quod si rationi aut voluntati desit hæc potestas eo ipso deficiat in appetitu sensitui libertas: motus autem primò-primi, quos ratio nullo modo aduertit, non possunt ab ea reprimi, & ideò non gaudent libertate illa imperfecta, quam appetitus sensituius a voluntate participat, subindeque peccata venialia esse nequeunt.

Ex hoc intelliges, falsum esse quod ait Author Theologiæ mentis & cordis tom. 4. pag. 757. nos non loqui consequenter ad nostra principia, dum ex vna parte docemus contra Aluarez, peccatum veniale posse esse in appetitu & sensualitate, etiam absque actuali motione & imperio rationis & voluntatis; & ex alia contra Caluinum, & alios huius temporis hæreticos, asserimus motus primò-primos concupiscentiæ non esse peccata venialia, sed tantum primò-secundos. Patet inquam, hoc esse falsum: cum enim (vt diximus) libertas illa imperfecta quæ conuenit appetitui sensitui, exigat vt eius motus possint à ratione reprimi, & hoc non conueniat motibus primò-primis, manifestum est hæc duo rectè inter se coherere, nimirum quod motus primò-primi concupiscentiæ non sint peccata venialia, & quod nihilominus possit esse in appetitu, & sensualitate peccatum veniale, etiam, absque actuali motione & imperio voluntatis, dummodo eius motus possint a ratione cohiberi & reprimi, vt docent Martinez, Salmanticensis, & plures alij ex nostris Thomistis,

icipare aliquid de eius virtute & perfectione, quo eleuatur ad formandum iudicium quoddam indifferens, sicut ex coniunctione cum ratione participat vim aliquam discurrendi imperfectè & conferendi media cum fine, vt docet D. Thomas loco supra citato. Vel dici potest cum Salmanticensibus, non esse necessarium, quod indifferentia ratione cuius appetitus sensitius agit liberè, resplendeat in propositione immediata sui obiecti, quæ sit per cogitatiuam, vel alium sensum internum, sed sufficere quod resplendeat in propositione obiecti voluntatis, quæ sit per intellectum; quia ad libertatem illam imperfectam, quæ in appetitu sensitiuo ex coniunctione cum voluntate deriuatur, non requiritur quod ipse appetitus possit a sua operatione retrahere (hoc enim proprium est solius potentiae primariæ & quasi per essentiam liberæ, qualis est voluntas) sed sufficit quod operetur cum respectu & subordinatione ad principium per quod retrahi possit, quod est voluntas; nam eo ipso verificatur quod operatur liberè, non libertate primaria, & quasi per essentiam, sed secundaria, & participata; quia cum talis respectus sit ad principium liberum vt liberum, nequit actum in quo est a linea necessarij non extrahere, & liberum non reddere.

Ad secundam probationem minoris, nego sequelam, contradicente enim voluntate non est prædicta libertas in appetitu sensitiuo, quia illa ipsi communicatur ex coniunctione & subordinatione ad voluntatem: iste autem influxus ex resistantia & actu contrario voluntatis impeditur.

Ad

Ad tertiam nego pariter sequelam, libertas enim imperfecta conueniens appetitui sensitui, necessariò exigit vt possint eius motus a ratione reprimi, ita quod si rationi aut voluntati desit hæc potestas eo ipso deficiat in appetitu sensitui libertas: motus autem primò-primi, quos ratio nullo modo aduertit, non possunt ab ea reprimi, & ideò non gaudent libertate illa imperfecta, quam appetitus sensituius a voluntate participat, subindeque peccata venialia esse nequeunt.

Ex hoc intelliges, falsum esse quod ait Author Theologiæ mentis & cordis tom. 4. pag. 57. nos non loqui consequenter ad nostra principia, dum ex vna parte docemus contra Aluarez, peccatum veniale posse esse in appetitu & sensualitate, etiam absque actuali motione & imperio rationis & voluntatis; & ex alia contra Calvinum, & alios huius temporis hæreticos, asserimus motus primò-primos concupiscentiæ non esse peccata venialia, sed tantùm primò-secundos. Patet inquam, hoc esse falsum: cùm enim (vt diximus) libertas illa imperfecta quæ conuenit appetitui sensitui, exigit vt eius motus possint à ratione reprimi, & hoc non conueniat motibus primò-primis, manifestum est hæc duo rectè inter se cohærere, nimirum quod motus primò-primi concupiscentiæ non sint peccata venialia, & quod nihilominus possit esse in appetitu, & sensualitate peccatum veniale, etiam, absque actuali motione & imperio voluntatis, immo eius motus possint a ratione cohereri & reprimi, vt docent Martinez, Salamancaenses, & plures alij ex nostris Thomistis,

idque expressè tradere videtur S. Thomas qu. 7. de malo art. 6. his verbis : *Sensualitas quandoque mouetur absque imperio rationis & voluntatis , & tunc peccatum dicitur esse in sensualitate , sed tamen peccatum non potest esse mortale , sed veniale tantum .* Idem docet hic qu. 74. art. 3. ad 3. & pluribus alijs in locis. Nec valet si dicas, D. Thomam excludere solum consensum voluntatis formalem & directum, non autem virtuales, indirectum, & interpretatiuum. Nam quæst. 25. de verit. art. 5. ad 5. hæc scribit : *Non dicitur esse peccatum in sensualitate, propter interpretatiuum consensum rationis: Quando enim motus sensualitatis præuenit iudicium rationis , non est consensus, nec interpretatiuus, nec expressus; sed ex hoc ipso quod sensualitas est subijcibilis rationi, actus eius, quamuis rationem præueniat, habet rationem peccati.* Quo nihil clariùs & expressius dici potest. Vide Salmanticensis disp. 10. dubio 2. ubi questionem hanc fusè ac eruditè suo more pertractant, in hoc enim nec vacat nec expedit diutius immorari.



C A P V T V.

De causis internis peccati.

Causæ internæ peccati tres sunt, scilicet ignorantia ex parte intellectus, concupiscentia ex parte appetitus, & malitia ex parte voluntatis. De duabus posterioribus nulla est difficultas & controuersia inter Theo-

Theologos, sed circa primam duæ celebres sunt difficultates, breuiter hic resoluendæ.

§ I.

An, & quæ ignorantia sit causa peccati, & quanam ab illo excuset?

DIco primò, ignorantiam posse esse causam peccati. Ita D. Thomas hic qu. 76. art. 1. ubi sic discurret: *Secundum Philosophum causa mouens est duplex, una per se, & alia per accidens. Per se quidem est quæ propria virtute mouet, sicut generans est causa mouens grauiæ & leuiæ. Per accidens autem sicut remouens prohibens, vel sicut ipsa remouit prohibentis; & hoc modo ignorantia potest esse causa actus peccati, est enim priuatio scientiæ perficientis rationem, quæ prohibet actum peccati, in quantum dirigit actus humanos.*

Hanc veritatem multis Scripturæ testimonijs demonstrat S. Bernardus epist. ad Hugonem de S. Victore cap. 5. ubi Anonimum quendam, asserentem nunquam posse peccari per ignorantiam, sic impugnat: *Iam contra assertionem tertiam non multum nobis arbitrari laborandum, quod manifestam præferat falsitatem Verendum tamen, ne si vel breuiter respondetur stulto iuxta stultitiam suam, putans fore sapientiam, securius spargat seminarium recordiæ in auribus insipientium, & ita iam insipientiæ eius non sit numerus. Veritatis proinde testimonijs paucis & manifestis, manifestum mendacium confutetur. Is forsitan qui asserit nunquam posse peccari per ignorantiam,*

nunquam pro suis ignorantibus deprecatur, sed potius Prophetam irridet deprecantem & dicentem: Delicta iuventutis meae, & ignorantias meas ne memineris. Forſitan & reprehendet Deum exigentem pro peccato ignorantiae ſatisfactionem. Et adductis varijs testimonijs Scripturae; de oblatione Pontificis pro ſua & populi ignorantia; de Paulo qui dicit ſe miſericordiam conſecutum, quia ignorans fecit, de Chriſto orante pro ſuis crucifixoribus, neſcientibus quid facerent; & de occiſoribus Apoſtolorum, qui arbitrat i ſunt obſequium ſe præſtare Deo, demum concludit: Nunquid ex his ſatis apparet, in quantis iacet ignorantiae tenebris, qui ignorat peccari poſſe interdum per ignorantiam.

Hanc veritatem hauſerat Bernardus ex Auguſtino, qui lib. 7. de peccat. merit. cap. 36. ſic habet: *An nullum eſt ignorantiae malum, & ideo nec purgandum? Et quid ait illa vox, delicta iuventutis & ignorantias meas ne memineris? Eſt enim damnabiliora peccata ſunt quae a ſcientibus committuntur, tamen ſi ignorantiae peccata nulla eſſent, id non legeremus quod commemoravi delicta iuventutis meae & ignorantias meas ne memineris.*

Dico ſecundò, ignorantia vincibilis eſt cauſa peccati. Patet hæc conſuſio, tum quia ignorantia vincibilis remouet ſcientiam, quae ſi ad eſſet, impediret peccatum; vnde eſt cauſa per accidens peccati; ſicut qui remouet columnam ſuſtentantem lapidem, eſt cauſa per accidens motus lapidis. Tum etiam, quia cum talis ignorantia ſit volita directè, vel indirectè, non impedit quin actus ex illa conſe-

quens

quens sit voluntarius , subindeque culpabilis .
Vnde Bernardus epist. 77. *Multa scienda ne-
sciuntur , aut sciendi incuria , aut sciendi desi-
dia , aut verecundia inquirendi , & eiusmodi
ignorantia non habet excusationem .* Et D.
Thomas hic qu. 76. art. 2. *Ignorantia vincibili-
lis est peccatum , si sit eorum quæ aliquis scire
tenetur , non autem si sit eorum quæ quis scire
non tenetur .*

Dico tertio, ignorantia inuincibilis , siue
sit iuris positiui , siue naturalis (si ista dari
possit , de quo in tract. de legibus cap. 3. §.
4.) non causat peccatum , sed ab illo excusat.
Est contra Iansenium lib. 2. de statu naturæ
lapsæ cap. 2. & sequentibus , vbi duplicem
ignorantiam distinguit , vnâ iuris naturalis,
& alteram iuris positiui , & docet hanc a pec-
cato excusare , non verò illam , quia (inquit)
ignorantia iuris naturalis , a peccato originali
profluxit , & in Adamo nobis voluntaria fuit
(quod ad peccatum actuale sufficere existi-
mat) non verò ignorantia iuris positiui , no-
stram tamen conclusionem communiter do-
cent Scholastici cum magistro in 2. dist. 22.
& cum D. Thoma hic quæst. 76. art. 3. Vn-
de Lutherus in cap. 12. Genesis : Scholastici
(inquit) dicunt ignorantiam inuincibilem red-
dere excusabiles : tanta est cæcitas in Papæ
Scholis & Ecclesijs . Et Hieronymus Zanchius
Luthero-Caluinista lib. 1. tractat. Theolog.
cap. 12. thesi 1. *Falluntur Scholastici , cum
ignorantiam quam inuincibilem vocant , idè a
peccato excusant , quia inuincibilis est ut lo-
quuntur . Quamquam euincere possumus ,
eam non esse simpliciter inuincibilem , cum vo-*

luntarium Adæ peccatum sit consecuta.

Probatur primò conclusio ex Augustino, lib. 3. de lib. arbitr. cap. 19. ubi sic ait: *Non tibi deputatur ad culpam quod inuitus ignoras, sed quod negligis quærere quod ignoras.* Quibus verbis apertè docet, ignorantiam inuitam & inuoluntariam, qualis est ignorantia inuincibilis, non imputari ad culpam, sed duntaxat ignorantiam quæ oritur ex negligentia addiscendi, quæ vincibilis est, & culpabilis, vtpote indirectè & in sua causa volita. Vnde S. Thomas qu. 7. de potentia art. 7. ad 3. Dicendum (inquit) quod ignorantia quæ est omnino inuoluntaria, non est peccatum. Et hoc est quod Augustinus dicit: *Non tibi imputatur ad culpam, si inuitus ignores: per hoc autem quod addit, sed si scire neglexeris, dat intelligere quod ignorantia habet, quod sit peccatum ex negligentia præcedente.* Vnde idem Augustinus tract. 89. hæc verba Ioan. 15. exponens: *Si non venissem, & locutus eis fuissetem, peccatum non haberent, ait, illos ad quos Christus non venit, & quibus non est locutus, excusationem habere, non de omni peccato suo, sed de illo quo in Christum non crediderunt.* Similia habet Bernardus epist. 77. dicens: *Si locutus fuisset, sed non eis, inobedientiæ culpam ignorantia excusaret.* Demum Augustinus in libro de quæstionibus veteris testamenti, relatus a Gratiano in decreto dist. 27. sic ait: *Ille ignorans potest excusari à pæna, qui à quo disceret non inuenit.* Vbi Glossa hæc verba: *Potest excusari à pæna*, sic interpretatur: *Id est à peccato, pro quo debetur pæna, vel à pæna aterna.*

Pro-

Probatur secundò ex D. Thoma, qui etiam manifestè docet nostram conclusionem, nam hic qu. 74. art. 1. ad 2. sic ait: *Si defectus apprehensivæ virtutis nullo modo subiaceat voluntati, non est peccatum, nec in voluntate, nec in apprehensiva virtute, sicut in his qui habent ignorantiam invincibilem.* Et qu. 76. art. 1. Ad finem corporis articuli dicit quod *nulla ignorantia invincibilis est peccatum.* Quæ particula *nulla*, omnem prorsus ignorantiam invincibilem, siue sit iuris positiui, siue naturalis, a ratione peccati excludit. Item art. 1. eiusdem quæstionis, ad calcem etiam corporis articuli, hæc scribit: *Si sit talis ignorantia quæ omnino sit involuntaria, siue quia est invincibilis, siue quia est eius quod quis scire non tenetur, talis ignorantia omnino à peccato excusat.* Quibus verbis S. Doctor duo requirit ut ignorantia sit peccatum, alterum ut sit acquirendæ scientiæ obligatio, alterum quod sit ignorantia depellendæ potestas; quia si non sit debitum scientiæ, ignorantia non privationis sed meræ negationis, & nescientiæ naturalis rationem habet: Si verò desit sciendi potestas, non potest culpæ accusari voluntas, quia ad impossibile nemo tenetur. Vnde.

Probatur insuper conclusio duplici ratione fundamentali. Prima est: Si ignorantia invincibilis non excusaret a peccato, Deus hominibus impossibilia præciperet, quod est erroneum, & à Tridentino damnatum. Sequela patet, cum enim voluntas nostra sit potentia cæca, id duntaxat censetur esse in nostra potestate, quod fit à voluntate, cum ple-

na aduertentia rationis, subindeque ignorantia qua aliquid penitus nescitur, impedit quominus illud sit in nostra potestate: Ergo si homo teneretur ad aliquid quod inuincibiliter ignorat, obligaretur ad impossibile. Vnde Medina hic qu. 75. art. 2. rectè obseruat, idcirco ignorantiam inuincibilem non imputari homini ad peccatum, quòd nemo obligetur ad impossibile.

Altera ratio fundamentalis sic potest breuiter proponi: Illud excusat a peccato quod tollit ab actu rationem voluntarij, redditque illum simpliciter inuoluntarium: Sed omnis ignorantia inuincibilis hoc præstat: Ergo omnis ignorantia inuincibilis a peccato excusat. Maior est certa: Tum quia, vt ait Augustinus lib. de vera relig. cap. 14. *Vsq̃ue adeò peccatum voluntarium est, vt nullo modo sit peccatum, si non sit voluntarium.* Et hoc ita manifestum est, vt nulla Doct̃orum paucitas, nulla indoct̃orum turba dissentiat. Tum etiam, quia peccatum est actus moralis & humani est quod sit voluntarius & liberatus, vt docet D. Thomas in hac parte supra qu. 1. art. 1. Ergo & de ratione peccati. Minor etiam non est minùs euidens, & expressè docetur ab eodem Doct̃ore Angelico supra qu. 6. art. 8. vbi loquens de ignorantia antecedenti & inuincibili, ait *talis ignorantia causat inuoluntarium simpliciter.* Idque patet ex definitione voluntarij, quod sic describitur: *Voluntarium est id quod est à principio intrinseco, cum cognitione:* Vnde sicut illud causatur ex duplici principio, scilicet ex appetitu operante, qui est principium intrinsecum, &

ex cognitione dirigente , & voluntati faciem præferente: ita oportet, quod oppositum eius, scilicet inuoluntarium , causetur ex oppositis principijs , & proueniat vel ex eo quod operatio est a principio extrinseco (vt contingit in his quæ ex violentia aut metu fiunt) aut quia tollitur , vel ligatur , aut turbatur cognitio , sicut fit per ignorantiam , & passionem, vt in tractatu de voluntario & inuoluntario fusè expendimus .

Respondet Iansenius, ignorantiam iuris naturalis , per culpam primi parentis in hominum mentes inuectam esse ; si enim felicissimus innocentiae status perseverasset , homines in eo nihil ignorassent eorum quæ ad ius naturale pertinent : vnde cum culpa Adami sit hominibus voluntaria , quia omnium hominum voluntates , in voluntate Adami , vt capitis totius generis humani , quodammodo continebantur , ignorantia inuincibilis iuris naturalis, ex ea fluens & proueniens, ipsis voluntaria censetur ; subindeque mala & culpabilis ; secus verò ignorantia inuincibilis iuris positivi , cum ista non proueniat ex peccato originali, sicut illa ; nam quod feratur lex positiva, diuina, vel humana , pendet a libera voluntate legislatoris humani vel diuini subindeque eius scientia non est humanæ naturæ connaturalis , sicut cognitio iuris naturalis .

Hæc solutio totam medullam , seu potius radicem Iansenianæ doctrinæ continet, vnde diligenter confutanda est, nam vt ait Augustinus: *Radicem effodere atque extirpare, compendium est.*

In primis ergo fallum est quod ait Iansenius, ad hoc ut ignorantia inuincibilis iuris naturalis, mala & culpabilis sit, sufficere quod sit voluntaria voluntate capitis totius naturæ humanæ; licet enim ad culpam originalem sufficiat quod sit voluntaria in capite, scilicet in Adamo, non tamen ad peccatum actuale, seu personale, ut expressè docet S. Thomas in 2. dist. 30. qu. 1. art. 2. ubi sic discurret: *Oportet quod secundum quod aliquid rationem culpæ habet, secundum hoc ratio voluntarij in eo reperiatur. Sicut autem est quoddam bonum quod respicit naturam, & quoddam quod respicit personam; ita etiam est quoddam culpa naturæ, & quoddam personæ. Unde ad culpam personæ requiritur voluntas personæ, sicut patet in culpa actuali, quæ per actum personæ committitur; ad culpam verò naturæ (id est originale peccatum) non requiritur nisi voluntas in natura illa. Hoc est in capite illius naturæ. Idem docet Augustinus in libro de duabus animabus cap. 11. ubi sic ait: *Nec peccatum nec rectè factum imputari cuiquam iuste potest, qui nihil fecerit propria voluntate. Quibus ultimis verbis apertè declarat, ad rationem peccati personalis requiri actum, a propria voluntate peccantis elicatum.**

Secundò, si vera esset hæc doctrina Iansenij, sequeretur motus concupiscentiæ, præuenientes consensum voluntatis, imò & ipsi repugnantes, esse verè & propriè peccata homini imputabilia; cum fomes concupiscentiæ seu rebellio appetitus sensitiui, ex peccato originali proueniat. Hoc autem repugnat


Tridentino sess. 5. cap. 5. dicenti , *concupiscentiam nocere non posse non consentientibus.* Et Augustinus lib. 1. de ciuit. cap. 25. vbi sic ait : *Illā concupiscentialis inobedientia , sē absque culpa est in corpore dormientis , quāto magis est in corpore non consentientis .*

Tertiò ex hoc sequeretur , infidelitatem negatiuam esse peccatum , cū illa pariter ex peccato originali proueniat : hoc autem falsum esse ac erroneum , constat primò ex Bulla Pij V. & Gregorij XIII. contra Baium in qua damnatur hæc propositio : *Infidelitas purè negatiua , in his quibus Christus non est prædicatus , peccatum est .* Constat secundò ex Augustino epist. 105. vbi sic ait : *Ipsa ignorantia in his qui intelligere noluerunt , sine dubitatione peccatum est , in eis autem qui non potuerunt , pœna peccati .* Constat tertiò ex D. Thoma 2. 2. qu. 10. art. 1. vbi expressè docet , quod si infidelitas accipiatur secundum negationem puram , sicut in illis qui nihil audierunt de fide , non habet rationem peccati , sed magis pœnæ , quia talis ignorantia ex peccato primi Parentis consecuta est .

Quartò ex eadem doctrina Iansenij sequeretur , quidquid faciunt insani & phrenetici esse peccatum , & culpabiliter agere cœcum a natiuitate , qui volens v. g. baculo canem abigere , hominem percutit , ignorans inuincibiliter eum adesse . Nam phrenesis , insania , & cœcitas corporalis , aliaque generis humani miseriæ , sunt effectus & pœnæ peccati originalis , & ab eo vt riuuli a fonte promanant , vt ipse Iansenius docet lib. 3. de statu naturæ puræ capit. 11. 14. & 15. Hoc autem ab-

surdissimum esse quis non videat ?

Demum probari potest nostra conclusio, & magis impugnari sententia Iansenij ex alio absurdo & inconuenienti quod ex illa sequitur : Si enim ignorantia inuincibilis nunquam excusaret a peccato, sequeretur quod ille qui in conflictu seu concursu plurium opinionum probabilium, non solum probabilem, sed etiam probabiliorem, imò & probabilissimam eligeret, peccaret, si fortè contingeret illam esse falsam, & legi æternæ vel naturali dissonam; quia tunc, iuxta Iansenium, non excusaretur a peccato ratione ignorantiae inuincibilis : Ad hoc videtur non solum absurdissimum, sed etiam durissimum, ac prorsus intolerabile. Ex hoc enim sequeretur incredibilis conscientiae perplexitas, imò & peccandi dura & fatalis necessitas, quotiescumque aliquis probabiliter & bona fide iudicat aliquid sibi agendum esse, neque posse omitti sine peccato, & tamen illud naturali iure illicitum est. Peccabit enim faciendo, iuxta doctrinam Iansenij, cum iuxta illum, nulla ignorantia inuincibilis iuris naturalis, excuset a peccato. Peccabit etiam non agendo, quia aget contra conscientiam, quæ ipsi dictat hoc esse agendum : peccabit igitur quocumque se vertat, & siue hoc faciat, siue non faciat : necessario ergo peccabit. De quo fusius in Tractatu de legibus cap. 3. §. 4.



§. II.

Soluantur obiectiones.

O Bijcies primò cùm Iansenio : Nonnulla facta ex ignorantia inuincibili, in Scriptura Sacra appellantur peccata : Ergo ignorantia inuincibilis non excusat à peccato. Consequentia patet, Antecedens verò probatur ex varijs Scripturæ testimonijs, nam Genes. 20. actio Regis Abimelech accipientis in vxorem Saram, quam inuincibiliter ignorabat esse coniugem Abraham, peccatum dicitur. Et Leuit. 5. Statuuntur sacrificia offerenda pro illis qui peccauerint ex ignorantia. Vnde ad Hebr. 9. Apostolus ait quod semel in anno solus Pontifex intrabat in tabernaculo, quod *Sancta Sanctorum* dicebatur, non sine sanguine quem offerebat, *pro sua & populi ignorantia*. Item David Psalm 24. inter peccata sua commemorat ignorantias, sic orans : *Delicta iuuentutis meæ, & ignorantias meas ne memineris*, Demum Lucæ 12. dicitur quod seruus, *qui non cognouit* (voluntatem Domini sui) *& fecit digna plagis, vapulabit paucis*.

Respondeo negando Antecedens, & ad primam eius probationem dico, actionem Regis Abimelech vxorem Abraham ignoranter accipere volentis ad coniugium, vocari peccatum materialiter, quia erat illicita ex natura rei, non verò formaliter, quia ob defectum cognitionis & scientiæ, non erat culpabilis. Vel secundò dici potest, ignorantiam illam fuisse vincibilem, vt docet Henricus de Gandauo quod-

quodlib. 12. qu. 25. his verbis: *Abimelech reuera peccasset, si cognouisset Saram, etiam ipsa accepta in uxorem; quia non sufficienter inquisiuit, an fuisset uxor Abraham. Illud ipsum ijsdem ferè verbis tradit Hugo Cardinalis in cap. 20. Genesis.*

Ad secundam & tertiam similiter dico, in veteri lege statui offerenda esse sacrificia pro illis qui peccauerant ex ignorantia vincibili & culpabili. Vnde Summus Sacerdos semel in vno in tabernaculo, quod *Sancta Sanctorum* dicebatur, intrabat, vt offerret sanguinem pro sui & populi ignorantijs, aliquo modo voluntarijs & vincibilibus, de quibus etiam loquitur Profeta, cum ait: *Delicta iuuentutis mee, & ignorantias meas ne memineris.*

In vltimo loco sermo est de seruo non penitus ignorante præceptum domini, sed ad illud ex negligentia non aduertente, seu ex ignorantia vincibili & culpabili illud ignorante, vt exponunt Magister in 2. dist. 22. & D. Thomas in catena in Lucam cap. 12. vbi hæc verba Theophylacti refert: *Hic obijciunt aliqui: merito punitur qui sciens voluntatem Domini non prosequitur. Sed cur punitur ignorans? quia cum ipse scire potuisset, noluit, sed pigritans ipse fuit ignorantiae suae causa.*

Obijcies secundo: Augustinus de gratia & lib. arbit. cap. 3. sic ait: *Illam ignorantiam quæ non est eorum qui scire nolunt, sed eorum qui tanquam simpliciter nesciunt, neminem sic excusat, vt sempiterno igne non ardeat, si propterea non credidit quia non audiuit omnino quod crederet, sed fortassis vt mirius ardeat: non enim sine causa dictum est, effunde iram*

iram tuam in gentes quæ te non nouerunt.

Respondeo Augustinum ibi loqui de ignorantia vincibili legis euangelicæ, quam docet non excusare a peccato infidelitatis. Ita ipsum intelligit & interpretatur Magister sententiarum in 2. dist. 22. vbi sic ait: *Est autem ignorantia triplex, eorum scilicet qui scire nolunt, cum possint, quæ non excusat, quia & ipsa peccatum est; & eorum qui quasi simpliciter nesciunt, non reuuentes, vel proponentes scire, quæ neminem plenè excusat, sed sic fortasse ut minùs puniatur. Unde Augustinus ad Valentinum (lib. de gratia & lib. arbitr. cap. 3.) ignorantia quæ non est eorum qui scire nolunt, sed qui tanquam simpliciter nesciunt, nullum sic excusat, ut æterno igne non ardeat, sed fortasse ut mitius ardeat.*

Hanc interpretationem plurima confirmant. Primò quia non ait S. Augustinus illam ignorantiam esse eorum qui simpliciter nesciunt, sed qui TANQVAM simpliciter nesciunt: hæc autem particula tanquam, satis indicat sermonem non esse de ignorantia prorsus inuincibili. Secundò statuit hanc ignorantiam, neminem sic excusare, ut sempiterno igne non ardeat, sed FORTASSE ut mitius ardeat: Si verò de ignorantia inuincibili loqueretur, non adiecisset fortasse, nihil enim certius, illum minùs saltem puniendum, qui ex ignorantia inuincibili peccauit, quam qui peccauit ex malitia, vel ex ignorantia vincibili & culpabili. Sed idcirco vocem illam inseruit, ut innueret se loqui de ignorantia vincibili, non affectata, sed neglecta; aliquando enim negligentia ex qua procedit,

po-

potest esse tam modica, quod si contingat ex illa aliquid mali agi, possit actus ille aliquatim excusari, subindeque minus puniri. Tertiò id confirmat exemplum serui nescientis voluntatem domini &c. quod Augustinus ante verba recitata adducit; nam vt obseruat Theodoretus supra relatus: *Ille punitur ignorans, quia cum scire potuisset, noluit, sed pigritans ipse fuit ignorantia sua causa.*

Obijcies tertiò: In Concilio Diospolitano, præsente Pelagio, recitata fuerunt quædam capitula, de libro Celestij hæretici excerpta, quorum vnum erat: *Oblivio & ignorantia non subiacent peccato, quoniam non secundum naturam eueniunt, sed secundum necessitatem.* Atque finita recitatione, Sacra Synodus dixit: *Quid ad hæc quæ lecta sunt capitula dicit præsens Pelagius Monachus? Hæc enim reprobatur. S. Synodus, & Sancta Dei Ecclesia Catholica.* Ita refert Augustinus lib. de gestis Palestinis cap. 19. Ergo iuxta mentem illius Synodi, ignorantia subiacet peccato, seu peccatum est, non solum quando euenit secundum voluntatem, & vincibilis ac voluntaria est, sed etiam quando euenit secundum necessitatem, & est inuoluntaria ac inuincibilis.

Respondeo Patres illius Synodi, cum ignorantiam quæ est secundum necessitatem, subiacere peccato, seu peccatum esse, docuerunt, voluisse solum, talem ignorantiam dici peccatum, eò quod materialiter peccatum sit, seu peccati effectus; sicut concupiscentia dicitur peccatum ab Apostolo, quia materialiter peccatum est, & in peccati poenam inflicta, vt ex Augustino docet Tridentinum sess. 5,

can. 5. Vnde S. Thomas q. 1. 3. de malo art.
7. *Ignorantia (inquit) & fomes sunt materia-*
lia in peccato originali , sicut conuersio ad bo-
num commutabile in peccato actuali . Quod
verò hæc interpretatio legitima sit , & ad
mentem Patrum huius Concilij , constat ex eo
quod cum Pelagiani negarent peccatum ori-
ginale ab Adamo in posteros per generatio-
nem traduci , consequenter etiam negabant,
concupiscentiam & ignorantiam ab eo deri-
uari , & dicebant eas esse naturales defectus ,
& non peccati supplicia , vt testatur Augusti-
nus de bono perseuer. cap. 11. his verbis : Di-
cunt Pelagiani ignorantiam & difficultatem
(id est concupiscentiam ex qua oritur diffi-
cultas ad bonum honestum) sine quibus nullus
homo nascitur , primordia non supplicia esse
naturæ . Vt ergo hunc errorem Patres prædi-
ctæ Synodi penitus excluderent ; dixerunt
ignorantiam subiacere peccato , imò & esse
peccatum , quia materialiter peccatum est , &
effectus originalis peccati , cum in pœnam il-
lius irrogetur . Vnde Augustinus lib. 3. de li-
bero arbitr. cap. 19. Illud quod ignorans quis-
que non rectè facit , & quod rectè volens face-
re non potest , ideo dicuntur peccata , quia de
peccato illo liberæ voluntatis (nempe Adami)
originem ducunt ; illud enim precedens meruit
ista sequentia . Nam sicut linguam dicimus
non solum membrum quod mouemus in ore ,
dum loquimur , sed etiam illud quod huius
membri motum consequitur , id est formam teno-
remque verborum , secundum quem alia dicitur
lingua græca , alia lingua latina : Sic non so-
lum peccatum illud dicimus , quod propriè vo-

catur peccatum, libera enim voluntate, & a
 sciente committitur, sed etiam illud quod iam
 de huius supplicio consequatur necesse est.

§. III.

*Nullum unquam contingit in voluntate pecca-
 tum, absque prævio intellectu defectu.*

Ratio fundamentalis est; quia voluntas
 est potentia cœca, ex natura sua deter-
 minata ad sequendum ductum intellectus;
 obiectum enim specificatum illius est bo-
 num verum vel apparens, sibi ab intellectu
 propositum: unde sicut si esset aliquis cœcus,
 ex natura sua determinatus ad sequendum du-
 ctum alterius, non posset deficere, & a via
 aberrare, nisi deficiente & aberrante ductore;
 ita nec voluntas potest in ordine morali defi-
 cere, nisi in intellectu aliquis defectus erroris
 vel inconsiderationis præcedat. Unde Pro-
 verb. 22. dicitur: *Errant omnes qui operan-
 tur iniquitatem.*

Confirmatur: In omni peccato quædam im-
 prudentia reperitur, unde Prouerb. 1. pecca-
 tores stulti & imprudentes appellantur, &
 Gregorius lib. 15. moral. cap. 23. *Omnis pec-
 cator (inquit) stultus fuit in culpa:* Ergo cum
 prudentiæ sit dirigere rationem practicam in
 ordine ad agibilia in homine; sicut ars illam
 dirigit in ordine ad factibilia, oportet quod
 in omni peccato aliquis defectus rationis pra-
 cticæ, subindeque aliquis error practicus, vel
 saltem aliqua consideratio reperiatur.

*Dixi error practicus, quia non est necesse
 quod*

quod quando homo peccat, aliquis error speculatiuus in eius intellectu præcedat; alioquin omnis peccator esset hæreticus, & quoties homo incideret in peccatum, toties laberetur in heresim, quod est absurdum. Vnde D. Thomas 2. 2. qu. 23. art. 2. *Ille qui fornicatur, eligendo fornicationem ut bonum sibi ut nunc, habet corruptam estimationem in particulari, cum tamen retineat vniuersalem estimationem veram secundum fidem, scilicet quod fornicatio sit mortale peccatum.* Si autem quæras, in quo consistat error ille practicus, qui in quolibet peccato reperitur? Respondeo illum consistere in iudicio quo peccator practice iudicat, hic & nunc bonum aliquod utile aut delectabile esse bono honesto ac obseruationi legis diuinæ præferendum; in tali enim iudicio error practicus manifestè reperitur, cum recta ratio & prudentia dicent oppositum.

Dixi etiam debere præcedere in intellectu peccantis, *defectum erroris, vel inconsiderationis*; quia si peccet eligendo aliquid de se bonum, sed non cum ordine debito, non est necesse quod habeat errorem practicum in intellectu, sed sufficit quod in eo sit aliqua inaduertentia, aut inconsideratio, ut contingit in primo peccato Angelorum. Vnde D. Thomas 1. p. qu. 63. art. 1. ad 4. *Peccatum mortale in actu liberi arbitrij contingit esse dupliciter? uno modo ex hoc quod aliquod malum eligitur, sicut homo peccat eligendo adulterium quod secundum se est malum, & tale peccatum semper procedit ex aliqua ignorantia, vel errore, alioquin id quod est malum non eligeretur*

ut bonum : Alio modo contingit peccare per liberum arbitrium , eligendo aliquod quod secundum se est bonum , sed non cum ordine debite mensuræ aut regulæ , sicut si aliquis eligeret orare , non attendens ad ordinem ab Ecclesiâ institutum , & huiusmodi peccatum , non præexigit ignorantiam , sed absentiam solum considerationis eorum quæ considerari debent ; & hoc modo peccavit Angelus , convertendo se per liberum arbitrium ad proprium bonum , absque ordine ad regulam divinæ voluntatis .

Dices , si quotiescumque homo peccat , præcederet aliquis defectus erroris , vel inconsiderationis ex parte intellectus , nullum daretur peccatum ex pura malitia , sed quodlibet ex ignorantia procederet : At hoc non est dicendum , cum Theologi communiter diuidant peccata in tria genera , nimirum in peccata ex infirmitate , ex ignorantia , & ex pura malitia : Ergo nec illud .

Respondeo negando sequelam : licet enim in omni peccato reperiatur aliquis defectus erroris , vel inconsiderationis ex parte intellectus , sufficienter tamen distinguitur peccatum ex infirmitate , vel ex malitia , a peccato ex ignorantia , ex diuersa scilicet dispositione praua , quæ est causa formandi iudicium illud erroneum in intellectu ; & prauam electionem in voluntate ; nam in peccatis ex ignorantia , ignorantia vincibilis & culpabilis , est causa formandi tale iudicium , & prauam electionem ; in peccatis ex infirmitate , vel passione , passio vehemens obscurans intellectum , & ad se trahens voluntatem ; in peccatis verò ex pura malitia , sola inordinatio , & malitia voluntatis .

Agens

Agendum hic esset de causis externis peccatorum, & primò explicandum, quomodo Deus non sit causa peccati, tametsi totum actum peccati, quoad entitatem & materiale producat, atque ad ipsum in sententia Thomistarum voluntatem prædeterminet? Secundò quomodo diabolus possit esse causa peccati, & alios ad peccatum inducere? Tertiò quomodo vnus homo, vt principium generationis possit culpam simul cum natura traducere, & per seminalem propagationem in posteros transfundere? Verum de primo fusè egimus in tractatu de voluntate Dei cap. 4. §. 5. vbi concordiam sanctitatis diuinæ cum decreto prædeterminante, & physica prædeterminatione ad materiale peccati, fusè exposuimus. De secundò nulla est ferè difficultas & controuersia inter Theologos, certum enim est, Diabolum, indirectè solùm & per accidens, esse causam peccati, primò per modum proponentis obiectum malum, secundò per modum suadentis & allicientis, quando vna cum obiecti propositione excitat & mouet appetitum sensitium, per passiones; aut phantasiam, quibus obiectum reddit valde conueniens & optabile, subindeque voluntatem ad peccandum trahit, non tamen eam necessitat, quia nullum bonum creatum, & delectabile, quantumuis conuenienter voluntati propositum, potest ei necessitatem inferre, cum non possit eam perfectè implere, seu plene satiare, iuxta illud Bernardi: *Animam capacem Dei quid quid minus fuerit non implebit.* De tertio, quod spectat ad peccatum originale, capite sequenti dicemus.

CAPVT VI.

De peccato originali.

ITa difficile est peccati originalis naturam comprehendere, ut ipse Augustinus Doctorum aquila, cuius acies perspicacissima, secretiora diuinæ gratiæ arcana penetrauit, ad huius difficultatis aspectum caligare videatur, & se eius pondere ita premi, ut libro de moribus Ecclesiæ cap. 22. se illam superare non posse fateatur: *Nihil enim (inquit) hoc peccato anti quo est ad prædicandum notius, nihil est ad intelligendum secretius.* Eius tamen inhærendo vestigijs, peccati originalis existentiam, essentiam, subiectum, & causas hic explanare conabimur.

§. I.

Existentia peccati originalis contra Pelagianos defenditur.

CAtholicæ fidei veritas de peccati originalis existentia, quam impiè olim negarunt Pelagius, & eius Discipuli Celestius, & Iulianus, Augustino tanti momenti visa est, ut libro de peccato originali cap. 24. sic loquatur: *In causa duorum hominum, quorum per unum venundati sumus sub peccato, per alterum redimimur à peccatis, propriè fides Christiana consistit.* Et lib. 5. contra Iulianum cap. 2. asserat, quod adeo necessaria est peccati originalis notitia, ut qui illud negant, ipsa

ipsa fidei fundamenta nitantur subvertere.

Hanc fundamentalem fidei Christianæ veritatem, pluribus scripturæ testimonijs conantur Theologi statuere, sed præcipuum est illud Apostoli ad Roman. 5. quo frequenter utitur Augustinus contra Pelagianos: *Per unum hominum peccatum in hunc mundum intrauit, & per peccatum mors, & ita in omnes homines mors pertransiit, in quo omnes peccaverunt.* Ex quibus verbis hoc potest argumentum deduci: Per unum hominem in hunc mundum intrauit quoddam peccatum, quod omnes homines fecit peccatores, & morti obnoxios: At huiusmodi peccatum non potest esse actuale, id est actuali voluntate commissum, cum etiam infantes morti sint obnoxij, & sepe moriantur, antequam quidquam boni vel mali propria voluntate egerint: igitur est originale.

Tam clarum & apertum Apostoli testimonium conabantur eludere Pelagiani, illud interpretando de transitu peccati Adæ in posteros, non per originem, sed per imitationem. Sed hunc evasioni tripliciter aditum præcludit Augustinus in libro de peccatorum meritis & remissione: Primò quidem, quia sic potius in diabolo nos peccasse diceremur; prius quippe ipse peccavit, & peccandi exemplum nobis præbuit. Secundò, quia pueri in conceptione, antequam Adamum imitari possint, in iniquitatibus sordere dicuntur. Terriò, quia Apostolus docet ita peccatum Adæ derivari ad posteros, sicut iustitiam Christi ad regeneratos: At hæc non per solam imitationem, sed per vera in illo regenerationem, redun-

dundat in homines : Ergo peccatum Adæ non transit in posteros , per solam illius imitationem , sed per originem & propagationem .

Non desunt etiam rationes Theologicæ ad errorem Pelagij refellendum : Prima sumitur ex generali Christi redemptione : Christus enim est redemptor omnium hominum , nec solum adultorum , sed etiam paruulorum ; cum mortuus sit non solum pro adultis , sed etiam pro paruulis , iuxta illud Pauli 2. ad Corint. 5. *Christus pro omnibus mortuus est* ; redemptio autem supponit seruitutem peccati , sicut medicina morbum : Ergo non solum adulti , sed etiam paruuli , adstricti sunt seruitute peccati , non actualis , vt constat : Ergo originalis . Secunda petitur ex necessitate baptismi , qui institutus est in remedium peccati , & adhibetur paruulis , iuxta communem Ecclesiæ consuetudinem : Ergo in illis inuenitur peccatum , non actuale , cum illius ante usum rationis capaces non sint : Ergo originale . Tertia ex necessitate moriendi , & innumeris calamitatibus & miserijs , quas ab ipsis etiam incunabulis homines experiuntur , iuxta illud Eccl. 40. *Graue iugum super filios Adæ à die exitus de ventre matris eorum , usque in diem sepulture* . Illæ enim miseriæ & calamitates , certissima sunt peccati originalis , indicia , cum communis pena communem ostendat præcessisse culpam , & cum Deus creauerit hominem immortalem , & inexterminabilem , vt dicitur Sap. 2. & in statu innocentiae fuerit immunis ab omni dolore & tristitia , vt ostendimus prima parte tract. 8. agendo de statibus naturæ humanæ . Vnde

Augustinus lib. 5. contra Julian. ait quod durissimi huius inglorius nascens Tullius, hominem dixit, non ut à matre, sed tanquam à nouerca natura editum in vitam corpore & nudo & fragili, & infirmo; animo autem anxio ad molestias, humili ad timores, molli ad labores, prono ad libidines. Rem vidit (subdit S. Doctor) sed causam nesciuit: cum enim sacris litteris eruditus non esset, ignorabat originale peccatum.

Obijciebant in primis Augustino Pelagiani illud Chrysostomi homil. ad Neophitos: Infantulos baptizamus, quamuis non sint iniquiati peccato, ut eis addatur sanctitas, adoptio, & fraternitas Christi. Sed respondebat Augustinus locis supra citatis, hoc intelligendum esse de peccato proprio, & personali actu contracto, non verò de alieno, & originali, additque Chrysostomum de hoc sensu exprimendo non fuisse sollicitum; quia disputans in Catholica Ecclesia, non se aliter intelligi arbitrabatur, tali questione nullus pulsabatur, vobis (nempe Pelagianis) nondum litigantibus, securius loquebatur.

Secundò sic discurrebant Pelagius & Iulianus apud Augustinum lib. 2. de nuptijs & concupiscentia cap. 18. & lib. 3. contra Julian. cap. 24. Non peccat iste qui nascitur, non peccat iste qui genuit, non peccat ille qui condidit: per quas igitur rimas, inter tot praesidia, peccatum fingis ingressum? Cui argumento lepidè & egregiè respondet S. Doctor ibidem: Quid querit latentem rimam, cum habeat apertissimam ianuam? Per unum hominem, ait Apostolus; per unius delictum, ait

Apostolus ; per unius inobedientiam , ait Apostolus . Quid querit amplius , quid querit apertius , quid querit inculcatius ?

Tertiò Julianus apud Augustinum lib. 2. contra ipsum in principio, & lib. 3. de peccatorum meritis cap. 3. sic arguebat : *Si in baptismo peccata omnia remittuntur , non possunt nati de renatis trahere originale peccatum : non possunt enim parentes quod non habent in filios transfundere .*

Huic argumento respondet S. Doctor serm. 14. de verbis Apostoli , his verbis : *Miraris quare peccator nascatur de semine iusti , non te delectat mirari , quare oleaster nascatur de semine oliuæ . Accipe aliam similitudinem : non attendis , quia de grano purgato frumentum cum palea nascitur , sine qua seminatur . Ideo de baptizato non iustus nascitur , quia non eum generat unde regeneratus est , sed unde generatus est .*

Quartò sic ratiocinabatur : Deus est causa corporum , sexuum , coniunctionum : Ergo ex generatione prolis non sequitur peccatum , alioquin Deo tribueretur . Cui respondet D. Augustinus lib. 3. quem scripsit contra illum cap. 9. *Sicut de prole adulterorum , si ego dicerem : tot mala , id est lasciuia , turpitudinis , criminis , bonus fructus esse non potuit : rectè mihi responderes , hominè qui de adulteris natus est , non esse fructum lasciuia , turpitudinis , criminis , quorum maiorum author est Diabolus ; sed corporum , sexuum , coniunctionum , quorum bonorum author est Deus . Sic ego tibi rectissime dico , malum quo nascitur homo , non esse fructum corporum , sexuum , coniunctionum ,*
que-

*quorum bonorum author est Deus, sed primæ
prævaricationis, cuius author est diabolus.*

§. II.

*Soluitur aliud argumentum difficile, & ex-
plicatur quomodo peccatum originale
voluntarium sit.*

POtest hoc argumentum breuiter in hunc
modum proponi: Omne peccatum est
voluntarium, vt constat ex Augustino lib. de
libero arbit. asserente quod peccatum adeo est
voluntarium, quod si non fuerit voluntarium
non erit peccatum: Sed peccatum originale
in infantibus voluntarium esse nequit: Ergo
nec peccatum. Maior constat, minor verò
probat. primò, quia voluntarium est illud
quod est a principio intrinseco cum cogniti-
one: Sed peccatum originale non est in par-
uulis a principio intrinseco, sed ab extrinse-
co, scilicet Adamo, imò & absque vlla cog-
nitione, cum vsu rationis careant: Ergo non est
ipsis voluntarium. Secundò, voluntarium li-
berum, de quo in præsentì loquimur, debet
esse in potestate voluntatis illius cui volunta-
rium dicitur, vt sit vel non sit: At peccatum
originale non est in potestate paruulorum vt
sit vel non sit: Ergo non est ipsis voluntarium
seu liberum. Tertiò, vt illud quod sit volun-
tate alterius, sit mihi voluntarium, necesse est
vt ego voluntatem meam, & vices meas illi
commiserim: Sed posteri Adami in ipsum
propriam voluntatem non transtulerunt, quo-
ad conseruationem vel amissionem iustitiæ

originalis, cum non essent quando Adam fuit creatus: Ergo priuatio iustitiæ originalis, in qua peccatum originale consistit, ipsis voluntaria non est.

Quidam difficultate huius argumenti oppressi, eaq̃ victi, dixerunt olim peccatum originale non esse verè & propriè peccatum, cum non sit verè & propriè voluntarium. Sed hæc sententia manifestè repugnat scripturæ, peccatum originale simpliciter vocanti peccatum, & asserenti per illud homines constitui peccatores, vt constat Ioan. 1. *Ecce agnus Dei, ecce qui tollit peccatum mundi.* Ad Roman. 5. *Per unum hominem peccatum in hunc mundum intrauit.* Et paulò post: *Sicut per inobedientiam vnius hominis peccatores constituti sunt multi.* Repugnat etiam Tridentino sess. 5. can. 5. anathema dicenti ei qui asseruerit, per baptisma non tolli totum id quod veram & propriam rationem peccati habet. Nec obstat quod Augustinus lib. 16. de ciuit. cap. 27. ait quod *paruuli nascuntur non propriè sed originaliter peccatores.* Et lib. 3. de lib. arbit. cap. 19. insinuat peccatum originale non esse propriè peccatum. Nam per peccatum propriè, intelligit propria voluntate commissum, & personale, quod solum est reprehensibile, & per poenitentiam retractabile. Vnde idem S. Doctor lib. 1. retract. cap. 13. explicans quod aliquando dixerat, requiri scilicet voluntarium ad peccatum, & nullo modo esse peccatum, si non sit voluntarium; ait hoc esse verum de peccato originali. Quod vt clariùs percipiatur, duò breuiter hic præmittenda sunt.

Primum est aliquid posse dici alteri voluntarium dupliciter; physicè scilicet, & in ordine ad propriam ipsius voluntatem; & moraliter, in ordine ad voluntatem alterius, in quo propria voluntas moraliter continetur: sic voluntas curatoris vel tutoris, moraliter censetur esse voluntas pupilli aut minoris, ut constat ex l. *cum plures* §. *quæ bona fide ff. de admînist. & peric. tutor.* Item voluntas filiorum impuberum censentur in iure contineri moraliter in voluntate patris, adeo ut is possit pro eis testari, non tantùm in bonis quæ ab ipso testatore accipiunt, sed in omnibus quæ aliunde acquisiverint l. *sed si p ures* §. *ad substitutos ff. de vulg. & pupill. substit.*

Secundum est, triplex esse genus peccati, actuale nempe, habituale personale, & habituale originale, quæ non eodem modo, sed valde diuè so, voluntaria sunt. Peccatum enim actuale petit actualiter procedere a voluntate; personale autem habituale, non petit actualem voluntatis influxum, sed sufficit quod ab illa per actum proprium & personalem aliquando processerit, & talis actus non fuerit sufficienter retractatus. Ad originale verò, cùm non sit propria voluntate commissum, non exigitur quod sit voluntarium paruulis; taliter quod ab illis per actum propriæ voluntatis processerit, sed sufficit quod competat illis ex vi actus voluntatis alienæ, capitis nempe, quæ tamen voluntas illorum aliquo modo reputetur. Vnde.

Ad argumentum initio propositum respondeo negando Minorem, & ad primam eius probationem dico, peccatum originale eo modo

do quo est voluntarium, esse a principio intrinseco cum cognitione: cum autem non sit nobis voluntarium physicè, & per actum propriæ voluntatis, sed moraliter tantum, per ordinem ad voluntatem Adami, non est necessarium ut procedat ex principio intrinseco proprio, & ex propria cognitione, sed satis est ut procedat a principio intrinseco Adæ, quod etiam est quodammodo intrinsecum nobis, eò quod Adam sit principium naturæ humanæ, & caput nostrum, non solum naturale, sed etiam morale.

Ad secundam dicendum est, voluntarium personale debere esse in potestate voluntatis propriæ illius cuius voluntarium dicitur; voluntarium verò capitale solum debere esse in potestate voluntatis capitis continentis moraliter membrorum voluntatem: quare cum peccatum originale non sit paruulis voluntarium voluntate personæ, sed duntaxat voluntate capitis naturæ humanæ, non requiritur quod sit in potestate illorum hunc defectum habere vel non habere, sed sufficit quod fuerit in potestate Adami peccare vel non peccare. Solutio est D. Thomæ in 2. dist. 30. qu. 1. art. 2. ad 1. ubi sic ait: *Peccatum originale, cum non sit vitium personæ ut persona est, sed quasi per accidens, in quantum persona habet talem naturam, ideo non oportet quod sit in potestate huiusmodi personæ, hunc defectum habere, vel non habere, sed sufficit quod sit in potestate aliquius qui est caput in natura illa.*

Ad tertium dicatur quod ut peccatum originale sit hominibus voluntarium voluntate capitis, non requiritur quod ipsi voluntatem
& con-

& consensum suum, quoad conseruationem vel amissionem iustitiæ originalis, in Adamum transtulerint; sed sufficit quod Deus constituens illum caput nostrum naturale & morale, posuerit in illo omnium nostrum voluntates; nam cum sit rerum omniumstrarum supremus dominus, & gubernator, magisque habeat in sua potestate voluntates nostras, quam nos ipsi, iure suo, absque nostro consensu, statuere potuit, ut voluntas Adæ esset voluntas nostra quoad conseruationem vel amissionem iustitiæ originalis; non quidem quatenus personæ singulares sumus, sed quatenus sumus partes & membra totius multitudinis hominum, a primo parente humanam naturam accipientium. Nam si in humanis & ciuilibus princeps & legislator potest voluntates plurium in vnam alicuius transferre, ita ut quidquid ab isto factum fuerit, ab illis etiam fieri & approbari censeatur, ut patet in pupillis & minoribus, quorum voluntates, ex iussu Principis, & legum dispositione, in voluntatem curatoris vel tutoris transferuntur, etiam illorum consensu inexpectato. Quanto magis eadem inuenitur potestas in Deo supremo Principe & legislatore, qui maius & excellentius habetstrarum voluntatum dominium, quam quælibet humana potestas, & quam nos ipsi.

Ex dictis colligitur, admittendum esse in Deo aliquod decretum, quo statuit voluntatem Adæ esse habendam pro voluntate posterorum, quantum ad conseruationem vel amissionem iustitiæ originalis, quia ut peccatum originale sit nobis voluntarium, voluntate

Adami, non sufficit vt ille sit caput naturale, sed requiritur etiam vt sit caput morale: ad hoc autem necessarium fuit prædictum decretum, quia esse caput morale non habuit Adam ipso iure naturæ, sed diuina institutione, quæ tale decretum includit. Fuit etiam necessarium ex parte Adami, vt illud decretum ipsi manifestaretur, alioquin inuincibiliter ignorasset, se operari vt caput morale omnium hominum, subindeque non potuisset vt caput naturæ delinquere, sed solum vt particularis persona. Ex quo inferes, pactum inter Deum & Adamum intercessisse, vt si obediret, non tantum ipse iustitia originali potiretur, sed ex ipso ad omnes eius posteros transfiret; si verò peccaret talem pro se, & pro tota posteritate iustitiam amitteret. Nam ordinatio illa Dei de transfundenda aut non transfundenda iustitia originali, ex conditione adimplentionis diuini præcepti, cognita ab Adamo, & ab ipso acceptata, habet rationem pacti, vnde in Scriptura eo nomine appellatur, vt patet ex illo *Osee 6. Ipsi sicut Adam transgressi sunt pactum ibi præuaricati sunt omnes.* Quæ verba de prædicto pacto, quod in paradiso cum Adamo transgressi sumus intelligunt Hieronymus, Cyrillus, Prosper, & alij. Idque sonant verba illa, *ibi præuaricati sunt omnes*, scilicet in paradiso, vbi Adam præuaricatus est. Huius mirabilis pacti Dei cum Adamo meminit Augustinus lib. 6. de ciuit. cap. 29. vbi exponens illud. *Genes. 37. Delebitur anima illa* (nempe cuius caro non fuerit circumcisa) *quia pactum meum irritum fecit,* sic loquitur: *Omnes in illo vno testamentum Dei*

Dei dissipaverunt, in quo omnes peccaverunt.

§. III.

*Quomodo peccatum originale per generationem
in posteros Adæ traducatur?*

Certum est peccatum originale per generationem, & seminalem propagationem, ab Adamo traduci in posteros, ut indicat Tridentinum sess. 6. cap. 3. his verbis, *homines nisi ex semine Adæ propagati nascerentur, non nascerentur iniusti, cum ea propagatione, per ipsum dum concipiuntur, propriam iniustitiam contrahant.* Id etiam docet S. Thomas hic qu. 81. art. 1. ad 2. ubi sic ait: *Per virtutem seminis traducitur humana natura à parente in prolem, & simul cum natura naturæ infectio: ex hoc enim fit iste qui nascitur consors culpæ primi parentis, quod naturam ab eo sortitur per quandam generativam motionem.* Verùm gravissima difficultas est, quomodo mediante semine, quod est substantiæ quædam corporea, peccatum originale ab Adamo traduci possit in posteros, & productio gratiæ seu iustitiæ originalis impediri?

Quidam antiqui, ut ab hac difficultate se expedirent, dixerunt in semine humano esse qualitatem aliquam morbidam, in eo permanentem existentem, & virtualiter continentem peccatum originale, illudque causantem; sicut in semine leprosi est quædam corruptio, quæ est principium & causa lepræ. Ita Gregorius, Richardus, Henricus, Almainus; & alij, qui talem qualitatem, non ex peccato Adami,

sed ex serpentis sibilu venenoso fuisse deriu-
tam asserunt. Verum hæc sententia, seu po-
tius delirium, a Theologis communiter reijci-
tur: Tum quia talis qualitas videtur omnino
fictitia. Tum etiam, quia dato quod sibilus
venenosus serpentis illam potuisset causare,
eam solum produxisset in Eua, cum qua ser-
pens colloquium miscuit, non verò in Ada-
mo, cum quo sermonem non habuit. Et
dato quod in ipso qualitatem illam causa-
set, vnde quæso potuisset tam fortes & validas
radices obtinere, vt tot annorum curriculis
firma perseverasset, nisi Deo speciali concur-
su illam conseruante? quod nefas videtur
diuinæ prouidentiae attribuere. Vt ergo ve-
ra sententia explicetur.

Obseruandum est cum Ferrariensi 4. con-
tra Gent. cap. 50. & pluribus alijs Thomistis,
quod quia Adamo data fuit iustitia origina-
lis, non pro se tantum, sed sub eo pacto, vt si
in innocentia permaneret, in omnes posteros,
qui per seminalem propagationem ab eo de-
scenderent, simul cum natura, & per ipsum
generationis actum, illam propagaret; con-
sequenter in semine eius fuit virtus instru-
mentalís, iustitiæ originalis causatiua, quæ
per primum Adæ peccatum, ab ipso fuit ab-
lata, vt docet S. Thomas qu. 4. de malo art.
1. ad 9. cuius verba infra referemus. Vnde
sicut in statu innocentiae duplex consideranda
esset ratio in semine Adam, vna naturalis &
quasi propria, secundum quam esset instru-
mentum generantis in ordine ad naturam se-
cundum se communicandam; alia supernatu-
ralis, seu diuinitus superaddita, secundum
quam

quam se haberet vt instrumentum Dei in ordine ad propagandam cum natura iustitiam originalem. Ita post peccatum, in eodem semine Adami, & posterorū ab ipso descendentium, duplex ratio seu manus reperitur, vnum naturale quatenus habet esse instrumentum generationis, & propagationis naturæ, hæc enim ratio seu perfectio, sicut & alia naturalia, non est amissa per peccatum; aliud accidentale & extrinsecum, quatenus est instrumentum Adami peccantis, & communicandum defectum originalis iustitiæ, in quo, vt infra dicemus, peccatum originale consistit. Primum ei conuenit, ratione suæ naturalis & positivæ perfectionis; secundū verò habet ex priuatione supra dicti vigoris, productiui iustitiæ originalis, causata ex peccato ipsius primi parentis. Quæ doctrina desumpta est a D. Thoma quæst. citata de malo, vbi hæc scribit: *Ex peccato primi parentis destituta est caro eius illa virtute, vt ex ea posset decidi semen, per quod originalis iustitia in alios propagaretur. Et sic in semine defectus huius virtutis est defectus moralis corruptionis, & quædam intentio eius; sicut dicimus intentionem coloris esse in aere, & intentionem animæ esse in semine. Et ex hoc etiam est ibi virtus ad similem imperfectionem, sicut est ibi virtus ad productionem humane naturæ in prole generata.* Quibus verbis S. Doctor tria docet: Primum est, in semine hominis fuisse in statu innocentie virtutem instrumentariam productiuam iustitiæ originalis, qua in poenam peccati primi Parentis, priuatum & destitutum fuit. Secundum in statu naturæ corruptæ semen, vt

tali virtute destitutum, esse instrumentum quo Adam transfundit peccatum originale in posteros. Tertium, priuationem virtutis productiuam naturæ cum iustitia originali, esse corruptionem & infectionem seminis, & veluti quandam virtutem intentionalem, productiuam peccati originalis, quod consistit in priuatione iustitiæ originalis. Vnde iuxta hanc doctrinam D. Thomæ, probabiliter dici potest, semen humanum, vt descendens primordialiter ab Adamo, vt carens prædicto vigore, seu virtute instrumentali productiuam iustitiæ originalis, esse quodammodo causam instrumentalem physicam peccati originalis, vt docent Salmanticenses hic disp. 14. dubio 3. §. 3. Quia semen defectuosum, ratione talis priuationis, continet peccatum originale; eo proportionali modo, quo ratione naturalis virtutis, continet naturam humanam, & sicut ratione prædicti vigoris contineret virtualiter iustitiam originalem. Cum enim peccatum originale sit quid priuatiuum, & in priuatione iustitiæ originalis consistat; vt §. 5. dicemus, sufficit ad illius efficientiam, vis vt ita dicam priuatiua; nam si virtus positiva causæ continet perfectionem positivam effectus, non est cur priuatio virtutis causæ; non contineat defectum priuatiuum qui reperitur in effectu; cum vbi affirmatio est causa affirmationis, negatio sit causa negationis.

Nec obstat huic causalitati instrumentali, & conuenientiae virtuali peccati originalis, quod semen sit quid corporeum & materiale, nam licet tale peccatum non possit esse in re materiali & corporea, tanquam in subiecto;

aut

aut tanquam in causa effectiua principali , bene tamen virtualiter , sicut in causa instrumentali , quomodo ipsa iustitia originalis in semine Adami ante peccatum continebatur . Vnde D. Thomas hic quæst. 81. art. 1. ad 1. *Et si culpa non sit actu in semine , est tamen ibi virtute humane naturæ , quam comitatur talis culpa .* Et in 1. dist. 30. qu. 1. art. 2. ad 4. *Licet semen non habeat in se infectionem culpæ in actu , habet tamen in virtute ; sicut etiam patet quod ex semine leprosi generatur filius leprosus , quamvis in ipso semine non sit lepra in actu ; est enim in semine virtus aliqua deficiens , per cuius defectum contingit defectus lepræ in prole .* Similiter ex hoc ipso quod in semine est talis dispositio qua privatur illa impassibilitate & ordinabilitate ad animam , quam in primo statu corpus humanum habebat , sequitur quod in prole , quæ est susceptiva originalis peccati , efficiatur originale peccatum in actu .

§. IV.

Corollaria præcedentis doctrinæ .

SVpposita existentia & transfusione peccati originalis , plura occurrunt dubia ex dictis facile resoluenda . Colligitur ergo primo ex dictis , nullum aliud peccatum primi parentis , præter primum , derivari ad posteros per originem . Nam illud solum Adæ peccatum derivatur ad posteros , quod fuit capitale : At solum primum eius peccatum fuit capitale , quia illud solum corrumpit naturam ,
eam .

eamque spoliavit iustitia originali, cætera enim Adæ peccata illam supponebant destructam: Ergo solum primum. Adæ peccatum derivatur ad posteros. Et hoc est quod vult D. Thomas hic art. 2. dum ait ideo solum primum peccatum Adæ, non posteriora, traduci in posteros, quia primum erat *peccatum nature*, alia verò peccata erant *privè personalia*; id est in primo peccato Adamus gerebat vices totius naturæ, eratque veluti totius humani generis procurator, in alijs verò peccatis vices suas duntaxat agebat, & privatarum rerum satagebat. Ex quo sequitur, peccatum Adami quod in posteros transfunditur, fuisse transgressionem illius præcepti Genes. 2. *De ligno scientiæ boni & mali non comeder*, quia peccatum illud fuit primum quo violavit mandatum divinum, cuius transgressioni mortem, & iustitiæ originalis privationem in omnes posteros transfundendam Deus comminatus est. An verò si Adam præceptum illud minimè violasset, & in aliud peccatum primò lapsus fuisset, illud pariter transfunderetur in posteros, res est dubia & valde incerta apud Theologos, alijs affirmantibus, alijs negantibus. Nihilominus sententia affirmans præferenda videtur, ob auctoritatem D. Thomæ, qui eam apertissimè tradit in 2. dist. 33. in fine expositionis litteræ ad secundum argumentum, & 2. 2. q. 163. art. 3. ad 2. & pluribus alijs locis. Ratio etiam suffragatur: Idcirco enim peccatum transgressionis præcepti de non comedendo de ligno vetito, traducitur in Adæ posteros, quia per illud amisit iustitiam originalem: Sed per quodcumque
aliud

aliud peccatum mortale, si fuisset primum, illam amisisset; nam iustitia originalis, utpote includens ipsam gratiam sanctificantem erat impossibilis cum quocumque peccato mortali: Ergo quodcumque peccatum mortale ab Adamo commissum, si fuisset primum, fuisset in posteros traductum, subindeque fuisset causa peccati originalis.

Nec valet si dicas, quod Adamus per quodcumque peccatum mortale, si fuisset primum, amisisset quidem pro se iustitiam originalem, non tamen pro posteris. Nam eo ipso quod Adamus per primum peccatum amisisset iustitiam originalem, amisisset etiam vigorem ad eam communicandam posteris, quia, ut supra ostendimus, talis vigor quasi dimanabat ab ipsa iustitia, & erat illi annexus. Ergo non solum pro se, sed etiam pro posteris, per primum peccatum iustitiam originalem amisisset. Consequentia manifesta est, amittere enim iustitiam originalem pro posteris, est amittere vim ad eam posteris communicandam.

Colligitur secundò, quod si Adam non peccasset, peccante Cain, filij eius non contraherent peccatum originale; quia tale peccatum non fuisset capitale, sed personale, cum solus Adam fuerit a Deo constitutus caput suæ posteritatis.

Colligitur tertio, quod si Adam non peccasset, Eva tamen peccante, posterij peccatum originale non contraherent, quia Eva non fuit constituta caput generis humani, sicut Adam.

Colligitur quarto, quod si Adam genuisset filios ante peccatum, & postea peccasset, filij illi

illi in innocentia progeniti, peccatum originale non contraxissent. Nam illi soli contrahunt originale peccatum, qui ratione virtutis seminalis erant contenti in Adamo, quando actu peccavit.

Colligitur quintò, quod si aliquis miraculose formaretur ex humana carne, sicut Eva ex costa Adæ, peccatum originale non contraheret, quia non descenderet ex Adamo per seminalem propagationem, unde Adamus non esset caput illius naturale, nec per consequens morale; cum iuxta ordinem rerum de facto statutum a Deo, Adamus solum sit caput morale illorum, quorum est caput naturale.

§. V.

Peccatum originale formaliter & essentialiter consistit in privatione iustitiæ originalis, quantum ad primum eius effectum, et est voluntaria nobis voluntate Adam.

Ita D. Anselmus lib. de conceptu vîrg. cap. 26. ubi ait: Peccatum originale aliud intelligere nequeo in ipsis infansibus per inobedientiam Adæ, nisi nuditatem iustitiæ. Ita etiam D. Thomas varijs in locis, nam hic qu. 82. art. 3. ait quod privatio originalis iustitiæ, per quam voluntas subdebatur Deo, est formale in peccato originali. Et deinde sic concludit: Peccatum originale materialiter quidem est concupiscentia, formaliter vero est defectus originalis iustitiæ. Similia habet qu. 3. de

3. de malo art. 7. dicens : *In peccato originali est aliquid formale, scilicet carentia originalis iustitiæ*, quod etiam reperit qu. 4. art. 2. in corp. & ad 10. & pluribus alijs in locis quæ breuitatis causa prætermitto.

Multiplex etiam ratio id suadet : Prima est, peccatum originale formaliter & essentialiter consistit in eo quod per se primò tollitur per baptismum, cum hoc sacramentum ad delendam culpam originalem sit institutum : sed per baptismum per se primò tollitur priuatio iustitiæ originalis, quantum ad effectum primum, cum per illud per se primò confertur gratia habitualis, mentem Deo coniungens : Ergo peccatum originale consistit formaliter in priuatione iustitiæ originalis, ut aufert effectum ipsius primum, communem tali iustitiæ & gratiæ sanctificanti, qui est rectificare animam, & ipsam Deo ut ultimo fini coniungere.

Secunda est : Illud in vnaquaque re se habet ut ratio constitutiva, a quo tanquam a radice & fonte, cætera ad illam pertinentia dimanant & consequuntur : sed a priuatione iustitiæ originalis, quantum ad primum eius effectum, coniunctionem scilicet mentis ad Deum, dimanant aliæ deordinationes, ex peccato Adami ad nos transfusæ per generationem, nimirum fomes seu concupiscentia, & rebellio appetitus inferioris contra superiorem, pœnalitates corporeæ, ut morbi, dolores, defatigatio corporis, necessitas moriendi, aliæque miseriæ quas quotidie experimur; & quæ vulnera naturæ appellari solent; nam cum iustitia originalis, mentem Deo subiungens,

ciens, esset veluti fraxum aureum, quo vires inferiores continebantur, ea sublata, consequens fuit ut deperiret perfecta subiectio inferiorum virium ad rationem, & corporis ad animam: Ergo priuatio iustitiæ originalis, quantum ad primum eius effectum, est ratio constitutiua peccati originalis.

Tertia est: Peccatum originale non consistit formaliter in positiuo, ut constabit ex infra dicendis: Ergo debet consistere in priuatione: Sed illa non potest esse alia quam priuatio iustitiæ originalis, quantum ad effectum eius primum: Ergo in tali priuatione formaliter consistit. Minor probatur primò: In illius formæ priuatione peccatum originale debet consistere, per cuius introductionem expelli possit formaliter: At nulla alia forma potest expellere formaliter culpam originalem, nisi iustitia originalis: Ergo in nullius alterius priuatione potest consistere. Secundò probatur eadem minor: cum peccatum originale sit peccatum naturæ, in illa priuatione consistere debet, quæ prius & immediatius ipsam naturam afficit: hæc autem est priuatio iustitiæ originalis, secundum effectum primum; sicut enim iste effectus erat immediatè in essentia animæ, quæ est propria hominis natura, ita eius priuatio immediatè, & primariò eandem naturam afficit: ipsa ergo erit propria & formalis ratio talis peccati constitutiua, reliquæ verò quæ sunt in voluntate, & alijs potentijs, pertinebunt ad illud secundariò & ex consequenti, sicut ipsæ potentiæ pertinent ad naturam.

Dices cum Curiele, ex peccato Adami de-

ri-

riuari in posteros priuationem habitualemente conformitatis ad legem quam transgressus est, hancque priuationem videri aptiorem omnibus alijs ad peccatum originale constituendum ; quia cum de ratione peccati sit contrarietas & oppositio ad legem , omne peccatum debet constitui per auersionem ab illa ; ita quidem vt si sit peccatum actuale , constituatur per auersionem actualem , quæ est priuatio conformitatis in ipso actu ; si verò sit habituale , sicut est originale , constituatur per habitualemente auersionem , quæ est priuatio conformitatis habitualis debitæ haberi a supposito .

Sed contra : Sicut in nobis habitualis conformitas ad legem , non est aliqua forma vel habitus distinctus a gratia & virtutibus , quæ manent in eo qui legem adimplet , & per quas est habitualiter dispositus , atque in præparatione animi ad eam seruandam ; ita nec in Adamo , si legem obseruasset , habitualis conformitas ad ipsam , fuisset alia forma vel habitus , quam ipsa iustitia originalis , & perfectiones ac virtutes in ea inclusæ , per quas ad legis obseruationem fuisset habitualiter dispositus : Ergo priuatio habitualis conformitatis ad legem , nec in Adamo , nec in eius posteris , aliud esse potest quam priuatio iustitiæ originalis .

Quarta ratio potest sic breuiter proponi : Defectus iustitiæ originalis in paruulis habet veram rationem peccati : Ergo cum personale esse non possit , fateri debemus esse originale . Antecedens , in quo est difficultas , sic ostenditur : Talis defectus non est sola negatio , sed priuatio iustitiæ debitæ inesse , cum
eam

eam Adamus acceperit non sibi sibi, sed transfundendum in posteros, ex voluntate & pacto Dei, si in obseruantia legis perseuerasset. Ille etiam est disconueniens rationali naturæ, cum tollat ab illa bonum ei conueniens & consonum. Demum talis defectus voluntarius est voluntate primi parentis, in quo omnes nostræ voluntates vt in capite continebantur: Ergo habet omnia requisita ad rationem peccati.

Obijcies primò, si peccatum originale in priuatione iustitiæ originalis consisteret, non tolleretur per baptismum, cum per illum non restitueretur nobis iustitia originalis: Sed hoc dici nequit, cum hoc sacramentum ad tollendum originale peccatum institutum sit: Ergo nec illud.

Respondeo cum S. Thoma qu. 4. de malo art. 2. ad 2. *quod iustitia originalis restituitur in baptismo quantum ad hoc quod superior pars animæ coniungitur Deo, per cuius priuationem inerat reatus culpæ, sed non quantum ad hoc quod rationi subiiciuntur inferiores vires, ex huiusmodi enim defectus est concupiscentia, quæ manet post baptismum.*

Obijcies secundò: Priuatio iustitiæ originalis est poena peccati originalis: Ergo in illa nequit essentia culpæ originalis consistere. Antecedens expressè docetur a S. Thoma hic qu. 85 art. 5. vbi sic ait: *Subtractio originalis iustitiæ, habet rationem pænæ, sicut etiam subtractio gratiæ.* Ratio etiam id suadet, nihil enim est magis commune & decantatum, quam quod iustitia originalis Adamo eius posteris ablata sit in poenam peccati.

Con-

Consequentia verò probatur: Poenam supponit in subiecto culpam, cum idcirco poena inducatur, quia subiectum est illa dignum ratione culpæ: Ergo si priuatio iustitiæ originalis sit poena peccati originalis, non potest esse ipsa culpa originalis formaliter, seu ratio formalis constitutiva illius.

Respondeo priuationem iustitiæ originalis, quantum ad primarium eius effectum, qui est subijcere mentem Deo vt vltimo fini, non esse poenam peccati originalis, sed potius rationem formalem constitutiuam illius; quantum verò ad effectus secundarios, qui sunt subiectio corporis ad animam, & appetitus inferioris ad superiorem, esse illius poenam; ex priuatione enim horum effectuum iustitiæ originalis, oriuntur in homine concupiscentia, fomes peccati, necessitas moriendi, & aliæ huius vitæ poenalitates, quæ sunt poenæ peccati originalis, & effectus illius.

Obijcies tertio: Peccatum nostrum originale debet esse eiusdem rationis, eiusdemque speciei, cum peccato Adami; idem enim saltem specie peccatum quod ille commisit, in nos transfundit: Sed peccatum Adami non in priuatione, sed in positiuo consistebat; fuit enim peccatum commissionis contra præceptum negatiuum non edendi de ligno vetito, peccatum verò commissionis, vt infra dicemus, in positiuo consistit: Ergo peccatum nostrum originale, non in priuatione iustitiæ originalis, sed in aliquo positiuo consistit.

Respondeo distinguendo maiorem: peccatum nostrum originale debet esse eiusdem speciei cum peccato Adami, habituali, con-
do:

do: actuali, nego. Similiter distinguo minorem: peccatum Adami consistebat in aliquo positiuo: peccatum actuale, concedo minorem; habituale nego minorem & consequentiam. Igitur in Adamo duplex fuit peccatum, vnum actuale, a quo Adamus dictus est peccans, & nos, prout eramus in illo tanquam membra in capite, dicimur in illo peccasse. Aliud verò habituale, quod fuit terminus talis actus, denominauitque Adamum peccatorem. Primum quidem fuit positiuum, sicut cœtera peccata actualia commissionis; secundum verò non fuit pro formali, nisi priuatio gratiæ vel originalis iustitiæ, vt constabit ex dicendis capite sequenti, vbi ostendemus peccatum habituale in priuatione gratiæ sanctificantis consistere. Cum ergo peccatum originale in nos transfusum, non sit actuale, sed habituale, neque ab eo dicamur peccantes, sed peccatores, æquiparari & assimilari debet potius peccato habituali Adami, consistenti in priuatione, quam peccato eius actuali, importanti de formali aliquid positiuum.

§. VI.

Corollaria præcedentis doctrinæ.

EX dictis colligitur primò, essentiam peccati originalis non consistere formaliter in concupiscentia seu fomite inclinante ad peccatum, vt docent Lutherus & Calvinus: Nam per baptismum tollitur in nobis quidquid habet veram & propriam rationem peccati, vt definitur in Tridentino sess. 5. can. 5. &

5. & constat ex verbis illis Apostoli ad Roman. 8. *Nihil damnationis est in his qui sunt renati in Christo Iesu* : At concupiscentia non tollitur per baptismum, sed ad agonē in renatis relinquitur, vt ibidem Sancta Synodus docet : Ergo essentia peccati originalis nequit formaliter in concupiscentia consistere. Vnde quando Apostolus ad Roman. 7. illam appellat peccatum, hoc debet intelligi in sensu causali, non formali, quia nimirum ex peccato est, & ad peccatum inclinatur, vt loco citato idem Concilium docet, post Augustinum lib. 1. de nuptijs cap. 23. vbi ait concupiscentiam vocari peccatum, quia peccato facta est, sicut vocatur lingua locutio quam facit lingua, & manus scriptura quam facit manus, & sicut vocatur frigus pigrum, non quod a pigris fiat, sed quod pigros faciat.

Colligitur secundò erroneam esse sententiam Pighij & Catharini, qui nihil intrinsecum in paruulis agnoscunt in quo essentia peccati originalis consistat, vnde illud constituent in peccato actuali Adami, prout extrinsecè denominat paruulos peccatores, indeque colligunt peccatum originale, non multiplex, sed vnicum numero in omnibus paruulis esse. Nam Tridentinum sess. 5. can. 3. docet peccatum originale per propagationem ab Adamo transfundi in posteros, omnibus inesse, esseque omnibus proprium. Et sess. 6. cap. 3. ait quod homines *dum concipiuntur, propriam iniustitiam contrahunt*: Sed peccatum quod fuit in Adamo, nihil horum habet, neque enim inest eius posteris, aut eos afficit intrinsecè, sed solum extrinsecè & mo-

raliter; neque est vniuscuiusque proprium peccatum, sed vnum commune omnibus; neque est aliquid traductum per generationem tanquam per causam: Ergo iuxta Tridentinum aliquid distinctum a peccato Adami debet admitti in quo essentia peccati originalis consistat.

Confirmatur: Idem Concilium ibidem comparat peccatum & iniustitiam quam ex Adamo per generationem accipimus, cum iustitia & sanctitate, quam a Christo Domino per baptismi regenerationem recipimus: Sed hæc est nobis intrinseca, inest enim unicuique iustificato sua propria sanctitas, distincta a sanctitate ipsius Christi: Ergo similiter in vnoquoque ex his qui ex Adamo propagantur, debet esse sua propria iniustitia, & peccatum intrinsecum, distinctum a peccato ipsius Adami. Neque obest illud Apostoli ad Roman. 5. *Per inobedientiam vnus peccatores constituti sunt multi*, hoc enim debet intelligi in sensu causali, non formali, vt constet ex verbis sequentibus: *Ita per vnus obedientiam iusti constituuntur multi*. Nam per obedientiam Christi non constituimur iusti formaliter, sed tantum effectiue, quatenus Christi obedientia est causa meritoria nostræ iustificationis.

Colligitur tertio, contra Durandum, Rosensem, & alios, essentiam peccati originalis in reatu poenæ non consistere, nam obligatio ad poenam, vel condignitas poenæ, est aliquid consequens culpam, non verò ipsa culpa; sicut condignitas meriti non est ipsa bonitas moralis actus boni & honesti, sed aliquid eam con-

sequens. Vnde quando Augustinus lib. 1. de nuptijs cap. 25. & 26. in reatu poenæ essentialiter peccati originalis constituere videtur, non accipit reatum formaliter, pro obligatione ad poenam, sed radicaliter & fundamentaliter, pro radice scilicet & fundamento talis obligationis, quod est priuatio iustitiæ originalis. Addo quod in Scriptura sacra, interdum reatus nomine, culpa intelligitur, vt patet ex illo Exodi 32. *Percussit Deus populum pro reatu vituli*, id est pro culpa adorationis vituli.

Colligitur quartò, peccatum originale non consistere formaliter in habitu inclinante animam in bonum commutabile vt in vltimum finem, vt docent aliqui ex nostris Thomistis.

Probatur primò ex D. Thoma, qui nihil aliud in peccato originali agnoscit, nisi pro materiali concupiscentiam, & pro formali priuationem originalis iustitiæ, ait enim hic qu. 81. art. 3. *Peccatum originale materialiter est concupiscentia, formaliter verò defectus originalis iustitiæ*: Ergo censet peccatum originale non consistere formaliter in habitu inclinante animam in bonum commutabile. Vnde qu. 5. de malo art. 2. dicit quod in peccato originali non est conuersio, sed sola auersio, vel aliquid auersioni respondens, scilicet destitutio animæ à iustitiâ originali, & ideo peccato originali non debetur poena sensus, sed solum poena damni, scilicet carentia visionis diuinæ. Quibus verbis hanc rationem contra prædictam sententiam insinuat: Si peccatum originale consisteret in conuersione habituali ad creaturam vt ad vltimum finem, deberetur

paruulis poena sensus pro culpa originali; consequens, est falsum, ut §. sequenti ostendemus: Ergo & antecedens. Probatur sequela, poena sensus debetur peccato ratione conuersionis ad creaturam, ut passim docet D. Thomas, & constabit ex infra dicendis: Ergo si in paruulis detur ratione peccati originalis positiua conuersio ad creaturam ut ad vltimum finem, erit illis debita poena sensus, ratione eiusdem peccati.

Probatur secundò: Peccatum Adami non existit modò: Ergo nequit causare habitum ad bonum commutabile inclinantem. Nec valet si dicas, quod licet non existat in se formaliter, existit tamen virtualiter in semine corrupto, quod est instrumentum ad producendum huiusmodi habitum. Nam ex peccato Adami nihil physicum potest produci in semine, per quod in ratione instrumenti ad producendum illum habitum constituatur: vel enim illud esset qualitas morbida, permanenter ipsi inhærens, vel qualitas fluida & citò transiens, seu motio intentionalis, semen subordinans peccato Adami ut causæ principalis? Sed neutrum dici potest, ut constat ex dictis §. præcedenti: Ergo semen non potest concurrere ut instrumentum physicum ad productionem illius habitus ad bonum commutabile inclinantis.

Dices ex hac ratione sequi, quod etiam iuxta nostram sententiam, constituentem peccatum originale in priuatione iustitiæ originalis, semen non possit per modum instrumenti physici ad eius productionem concurrere, cuius oppositum §. præcedenti docuimus. Sed

ne-

negatur sequela, nam iuxta sententiam constituentem peccatum originale in priuatione iustitiæ originalis, non requiritur ad eius efficientiam superadditio alicuius virtutis positivæ in semine, sicut necessaria est iuxta opinionem constituentem illud in habitu inclinante ad bonum commutabile, sed sufficit vis quædam priuatiua, seu defectus vigoris ad communicandum iustitiam originalem, quo pollebat in statu innocentie, ut ibidem declarauimus.


Probatur tertio: Eodem modo philosophari debemus de peccato habituali originali, ac de peccato habituali personali, cum eadem sit ratio vtriusque, & plura non requirantur pro constituendo originali peccato, ex peccato personali Adami resultante, quam pro constituendo habituali peccato personali, quod causatur ex peccato actuali aliorum hominum peccantium: Atqui peccatum habituale personale non consistit in habitu inclinante voluntatem in bonum commutabile ut in vltimum finem, sed in priuatione gratiæ sanctificantis, ut voluntaria voluntate propria eius qui peccat, ut capite sequenti ostendemus: Ergo pariter peccatum habituale originale non consistit formaliter in tali habitu, sed in priuatione iustitiæ originalis, ut voluntaria voluntate capitis. Argumenta in contrarium, capite sequenti proponentur & soluentur.

Colligitur quinto, animam esse subiectum immediatum peccati originalis: Nam idem est subiectum priuationis & formæ qua priuat, v. g. cœcitas est in oculo, in quo subie-

statum potentia visiva : Sed anima est immediatum subiectum formæ qua prius peccatum originale , nempe iustitiæ originalis , quæ cum non distingueretur a gratia sanctificante (vt ostendimus cum egimus de statu innocentia) residebat immediatè in essentia animæ , sicut & ipsa gratia sanctificans : Ergo est immediatum subiectum peccati originalis .

Dices , Anima non est capax culpæ , nisi mediante voluntate : Ergo culpa originalis non recipitur immediatè in essentia animæ . Consequentia patet , Antecedens probatur , Peccatum essentialiter est voluntarium : At omne voluntarium inest animæ ratione voluntatis : Ergo anima non est capax culpæ , nisi mediante voluntate .

Respondeo negando Antecedens , loquendo de culpa habituali , & ad probationem eius dico , peccatum habituale esse voluntarium per modum termini , non per modum actus : licet autem voluntarium etiam per modum termini , debeat animæ competere media voluntate per modum causæ efficientis , non tamen necessarium est , quod eidem competat media voluntate per modum subiecti ; unde culpa originalis potest in anima tanquam in subiecto recipi immediatè .



§. VII.

*Paruuli cum originali decedentes , carebunt
quidem visione beata , sed nullam pœnam
sensus patientur ; imò nec ullam ex
pœna damni tristitiam : non
erunt tamen beati beatitu-
dine naturali .*

Prima pars est certa de fide , vt constat ex illo Ioan. 3. *Nisi quis renatus fuerit ex aqua & Spiritus Sancto , non potest introire in regnum Dei .*

Secunda verò , quæ est contra Gregorium Ariminensem , Driedonem , & Florentium Conrium Minoritam , probatur primò ex Innocentio III. c. *Maiores x. de baptismo & eius effectû*, vbi ait quod *pœna originalis peccati est carentia visionis Dei , actualis verò pœna peccati est gehennæ perpetua cruciatus* . Prior autem pars videtur omnino intelligenda de carentia visionis Dei , cum exclusionem cruciatus gehennæ , aliàs eadem pœnæ corresponderent peccato originali quæ actuali : Ergo &c.

Probatur secundò ex SS. Patribus : Nazianzenus enim oratione in Sanctum laucarum , loquens de paruulis in originali decedentibus , expressè dicit , quod illi *nec celesti gloria , nec supplicis à iusto iudice afficiuntur* . Ambrosius lib. de Abraham cap. ultimo asserit illos habituros *pœnæ immunitatem , sed non regni celestis honorem* . Nyssenus in oratione de infantibus qui immatura morte abripiuntur ,

ait illos neque in doloribus neque in mœstitia futuros esse. Demum Augustinus lib. 5. contra Iulian. cap. 8. aliàs 11. *Quis dubitauerit (inquit) paruulos non baptizatos , in damnatione omnium leuissima futuros : qualis , & quanta eris , quamuis definire non possim , non tamen audeo dicere quod eis ut nulli essent , quam ut ibi essent , potius expediret .* Quibus verbis in primis docet eos in damnatione omnium leuissima esse futuros , quod non esset verum , si aliquam poenam sensus sustinerent ; mitior enim procul dubio & tolerabilior erit eorum damnatio , si ab omni poena sensus immunes sint , & solam poenam damni patiantur . Deinde innuit hanc de proditore Iuda sententiam , *melius erat illi si natus non fuisset* , non posse paruulis illis accommodari ; quod falsum esset , si illi poena ignis torquerentur : nam licet non esse secundum se non sit appetibile , utpote pura boni priuatio , bene tamen in quantum est ablatium cruciatus & poenæ , ut docet D. Thomas in supplem. qu. 98. art. 3.

Addo quod idem Augustinus lib. 3. de libero arbitrio cap. 23. agens de iisdem paruulis ait : *Metuendum non est , ne cum vita esse potuerit media inter rectè factum & peccatum , etiam sententia Iudicis media esse non possit inter præmium atque supplicium .* At si paruuli paterentur poenam damni & sensus , illorum sententia non esset media inter præmium & supplicium , ut de se patet : Ergo ex mente Augustini paruuli in peccato originali decedentes , sola poena damni puniuntur .

Nec valet si dicas , sententia paruulorum
ideò

ideò ab Augustino mediam inter primum & supplicium constitui , quia mitiori pœna quam adulti puniuntur. Non valet, inquam, nam etiam inter adultos vnus mitius alio punitur , & homines mitiori pœna quam Dæmones regulariter loquendo sunt puniendi; & tamen nemo dicet, adultum mitiori pœna puniendum , habiturum vel auditurum mediam sententiam inter primum & supplicium: Ergo si paruuli pœnam sensus & damni paterentur , malè Augustinus assereret, mediam esse inter primum & supplicium paruulorum sententiam .

Probatur tertio eadem pars hoc discursu: Pœna debet proportionari culpæ: Sed pœna sensus non est proportionata culpæ originali: Ergo culpa originalis non punitur pœna sensus. Maior constat , minor verò ostenditur primò: Pœna sensus contingit per passionem huius particularis personæ , peccatum autem originale non est per voluntatem personæ , sed per voluntatem naturæ: Atqui puniri per passionem personalem , non est proportionatum cum hoc quod est peccasse non per propriam voluntatem, sed per voluntatem alienam: Ergo pœna sensus non est proportionata cum peccato originali. Secundò: Peccatum originale non est propria voluntate contractum; Sed pœna sensus debetur peccato, ratione propriæ voluntatis , iuxta illud Bernardi serm. 3. de resurrectione: *Tolle propriam voluntatem , & infernus non erit. Nihil ardebit in inferno , præter propriam voluntatem*: Ergo pœna sensus non est proportionata nec debita peccato originali. Ter-

tiò : Acerbitas poenæ sensibilis responderet delectationi culpæ, vt constat ex illo Apocal. 18. *Quantum glorificauit se & in delitijs fuit, tantum date illi tormentorum & luctus* : Sed in peccato originali nulla delectatio reperitur ; delectatio enim operationem consequitur, peccatum autem originale non consistit in operatione : Ergo poena sensus non respondet originali peccato, nec proportionem habet cum illo. Demum Ecclesia in imponenda poena peccatis debita, imitatur ordinem & modum præscriptum a diuina iustitia in punitione peccatorum : Sed Ecclesia nullam poenam positiuam imponit pro peccato originali : Ergo censet poenam sensibilem non esse proportionatam tali peccato, nec infligi pro illo a diuina iustitia.

Tertia pars nostræ assertionis, nempe quod paruuli in originali decedentes, nullam patiantur ex poena damni tristitiam, probata manet contra Bellarminum, Valentiam, & alios Recentiores, ex dictis in probatione præcedentis : Gregorius enim Nyssenus supra relatus ait quod illi paruuli, neque in doloribus erunt, neque in moestitia; & Augustinus loco supra citato dicit quod poena illorum erit mitissima, quod falsum esset, si ratione beatitudinis amissæ, dolorem & tristitiam interioriorem sentirent, cum dolor quem damnati sentiunt, ob amissam beatitudinem, grauissimus sit, ac maior dolore sensibili ab igne inferni causato, vt docet Chrys. ho. 24. in Mat. & hom. 47. ac populum Antiochenum, his verbis : *Ego autem illius gloriæ amissionem, gehenna multo amariorem esse dico.* Demum

Augustinus profitetur se non audere asserere, paruulos sine baptismo morientes, tanta poena esse plectendos, vt eis non esse natos potius expediret: Si autem illi ex amissione beatitudinis dolorem & moerorē interiore sentirent, melius ipsis esset omnino non esse, cum talis dolor, vt diximus, grauissimus sit, & maior dolore sensibili per poenam sensus incusso: Ergo illi paruuli nullam patiuntur tristitiam ex amissione beatitudinis, & poena damni. Id etiam ostendit ratio principalis pro priori parte adducta: Ideo enim illi paruuli non puniuntur poena positina sensus, quia peccatum originale delectationem non infert, nec est propria sed aliena voluntate commissum: Sed hac ratio pari efficacia militat contra tristitiam & dolorem interiore ortum ex carentia beatitudinis: Ergo illi paruuli nullum de tali carentia moerorem & tristitiam interiore concipiunt. Addo quod ex hac sententia sequitur, paruulos esse torquendos verme conscientiae, quod est absurdum. Sequela probatur: Si paruuli tristarentur de beatitudine amissa, etiam tristarentur & dolerent de culpa originali, etsi aliena voluntate causata, sine spe remissionis illius: Sed in hoc vermis conscientiae damnatorum consistit: Ergo si admittatur tristitia & afflictio interior in paruulis de amissa beatitudine, debet consequenter in illis admitti vermis conscientiae, sicut in alijs damnatis.

Quarta demum pars, quae denegat illis paruulis naturalem beatitudinem, probatur contra Catharinum, asserentem paruulos cum

originali decedentes, post diem iudicii, non solum carituros omni dolore tum interno tum externo, sed etiam fore beatos ac felices, & in quodam veluti paradiso terrestri perpetuò vitam acturos, plenos sapientia & virtutibus, sua sorte optimè contentos, Deum toto corde diligentes & laudantes, Angelorum denique colloquio & reuelationibus sæpè fruenter: Probatur inquam hæc quarta pars nostræ assertionis, & hæc Catharini sententia confutatur in primis, quia beatitudo naturalis non est compossibilis cum auersione a Deo authore naturæ, sicut nec supernaturalis cum auersione a Deo vt authore supernaturali: Sed paruuli ratione culpæ originalis sunt auersi a Deo, nedum vt authore gratiæ, sed etiam vt naturæ conditore; cum peccatum originale vtramque auersionem contineat, & iuxta communiorum Theologorum sententiam, vna auersio non possit stare sine alia, supposita eleuatione naturæ humanæ in finem supernaturalem: Ergo non sunt beati beatitudine naturali.

Deinde impugnatur eadem sententia, hoc discursu: Paruuli in originali decedentes, in infernum, seu in lymbum descendunt, ibi perpetuò in tenebroso & caliginoso loco mansuri: At cum huius loci habitatione non potest stare naturalis felicitas: Ergo illi non erunt beati beatitudine naturali. Minor constat, maior verò probatur primò ex Augustino ser. 14. de verbis Apostoli, vbi expressè docet, non esse locum medium inter regnum & infernum: Sed paruuli post iudicium non erunt in loco regni, scilicet in cœlo empyreo: Er-

go erunt in inferno, seu in lyngo, qui nomine inferni in Scriptura designatur, vt constat ex illo Genes. 37. vbi Iacob, mortem filij sui Ioseph deplorans, dixit: *Descendam ad filium meum lugens in infernum*. Secundò probatur eadem maior ex eo quod, iuxta communem Theologorum sententiam, iudicium particulare cuiuslibet, & iudicium vniuersale, eandem continent sententiam: Sed animæ paruulorum cum peccato originali decedentium in particulari iudicio destinantur ad lymbum: Ergo post vniuersale iudicium in eodem loco manebunt. Tertiò eadem maior suaderi potest ex communi doctrina Theologorum, asserentium quod post vniuersale iudicium omnia elementa suum situm naturalem possidebunt, ita vt ignis supra aerem, aer supra aquam, & hæc supra terram, terraque aquis omnino cooperta sit. Cum enim (inquiunt) aqua initio mundi totam ambiret terram, vt natura eius postulare videbatur, ac deinde iussu Dei in locum vnum congregata fuerit, vt superesset locus in terra generationi animalium & plantarum, generatione ista cessante cum motu corporum coelestium, ratio ipsa natura rerum postulat, vt aqua ad locum pristinum reuertatur, totamque cooperiat superficiem terræ: Ergo infantes post vniuersale iudicium non habitabunt super faciem terræ, vt docet Catharinus (nisi aquis ad instar piscium natare dicantur, quod ridiculum est) sed in lyngo, loco subterraneo & tenebroso, inclusi manebunt.

Obijcies primò contra secundam partem asserutionis: Paruulis in extremo iudicio dice-

cur Matth. 25. *Itē maledicti in ignem æternum, qui paratus est Diabolo & Angelis eius:* Sed nomine ignis æterni, Diabolo & Angelis eius parati, intelligitur æterna pœna sensus: Ergo illam paruuli sustinebunt. Maior probatur, nam verba illa Christi ad omnes referuntur qui in sinistra sunt collocandi, scilicet ad omnes reprobos: Sed paruuli non erunt in dextra, sed in sinistra: Ergo sententia illa Christi, non solum ad adultos, sed etiam ad paruulos est dirigenda. Vnde Augustinus serm. 14. de verbis Apostoli & lib. de fide & operibus cap. 3. affirmat paruulos sine baptismo decedentes, ituros in ignem æternum. Et Gregorius lib. 8. moral. dicit quod *licet illi ex proprio nihil egerint, tamen illuc ad tormenta perueniunt.* Item Fulgentius de fide ad Petrum cap. 17. *Firmissimè tene, & nullatenus dubites, non solum homines iam ratione utentes, verum etiam paruulos, si sine Sacramento baptismatis de hoc sæculo transeunt, ignis æterni supplicio puniendos, quia etsi peccatum propriæ actionis non habuerunt, originalis tamen peccati damnationem carnali conceptione traxerunt.*

Respondeo concessa maiori, negando minorem, nempe quod nomine ignis æterni pœna sensus determinatè intelligatur, nam iuxta phrasim Scripturæ, nomine ignis, quælibet pœna designatur, vt docet Augustinus qu. 9. in Iosue, & pater ex illo Psalmi 65. *Transiimus per ignem & aquam, & eduxisti nos in refrigerium.* Vnde hoc nomine Christus pœnam damni pro paruulis, & sensus pro adultis significauit, Eodem modo intelligendi &

interpretandi sunt Augustinus & Fulgentius, dum docent pueros sine baptismo decedentes igne torqueri; loquuntur enim metaphoricè, & nomine ignis pœnam damni significant. Ita docent S. Thomas qu. 5. de malo art. 2. ad 1. & in 2. dist. 33. qu. 2. art. 1. ad 1. D. Bonaventura ibidem art. 1. ad 1. & Glossa in cap. *Nulla* de consecrat. dist. 4. Quod verò hæc interpretatio legitima sit, constat primò, quia intentum Augustini erat contra Pelagianos suadere, paruulos non esse felicitate æterna donandos: At hoc sufficienter conuincitur, nomine ignis accipiendo æternum supplicium, nempe æternam pœnam damni, cum qua æterna felicitas nequit coniungi: Ergo sic accipiendus est. Secundò, quia Fulgentius asserit pertinere ad fidem, quod paruuli in originali decedentes, ignis æterni supplicio puniantur: Nullus autem sine manifesto errore asserere potest, dogma fidei esse quod illi paruuli æternum cruciabuntur pœna sensus, sed solum quod sint damnati, & æternum puniendi pœna damni: Ergo Fulgentius nomine ignis pœnam damni significare voluit. Vnde Glossa supra citata sic ait: *Carentia visionis Dei est pœna ignis, de qua intelligendus est canon firmissimè, desumptus ex Fulgentio*. Tertiò, si D. Augustinus in rigore accipiatur, secum conciliari non poterit, nam alijs locis supra relatis, apertè docet paruulos nullam pœnam sensus sustinere.

Ex his intelliges, quod quando idem Sanctus Doctor serm. 14. de verbis Apostoli ait; *Dominus iudicaturus, duas partes factu-*

rus, dextram & sinistram, sinistris dicturus est, Ite in ignem eternum: dextris, Venite benedicti &c. Nullus relictus est locus medius, ubi ponere queat infantes: Explicandus est, cum S. Thoma supra citato, de loco medium ad sensum Pelagianorum, qui volebant tales paruulos alicubi habituros felicitatem extra regnum coelorum.

Obijcies secundò, cum parvuli in hac vita corporales ærumnas & dolores sustineant, si post mortem ab omni pœna sensus sint immunes, sequitur illos esse melioris conditionis post mortem, quam ante mortem: At hoc videtur absurdum: Ergo & illud.

Respondeo negando sequelam maioris, melius enim est omnes sustinere misérias, cum aptitudine ad videndum Deum, quam omni pœna sensus carere, sine huiusmodi aptitudine.

Obijcies tertio: Veniale peccatum, quod leuius est originali, in altera vita puniatur pœna sensus: Ergo multò magis originale eadem pœna punietur. Sed nego consequentiam & paritatem: nam peccatum veniale, quamvis sit leuius originali, est tamen voluntarium voluntate propria, & habet aliquam conversionem & delectationem inordinatam, secus autem peccatum originale: Vnde cum pœna sensus correspondeat propriæ voluntati, & conversioni ac delectationi inordinatæ, non mirum si illud in altera vita pœna sensus puniatur, istud verò sola pœna damni.

Obijcies quartò contra tertiam partem assertionis: Omnis adultus damnatus tristabitur,

tur, sentietque maximum dolorem & afflictionem interiorem, ob amissam beatitudinem, quia talis amissio seu carentia est maximum ipsorum malum, utpote eos priuans maximo bono, nempe visione beatifica: Ergo similiter ob eandem rationem amissio seu carentia beatitudinis, tristitiam & afflictionem causabit in paruulis.

Respondeo, concessio Antecedente, negando consequentiam & paritatem: Rationem discriminis assignat D. Thomas in 2. dist. 33. q. 2. art. 2. his verbis: *Quia omnis homo usum libe i arbitrij habens proportionatus est ad vitam eternam consequendam, quia potest se ad gratiam preparare, per quam vitam eternam merebitur, idcirco si ab hoc deficiat, maximus erit dolor, quia amittet illud quod suum esse possibile fuit. Pueri autem nunquam fuerunt proportionati ad hoc quod vitam eternam haberent, quia neque eis debebat rex principis natura, cum omnem naturalem facultatem excedat, nec actus proprios habere potuerunt, quibus tantum bonum consequerentur, & ideo nihil omnino dolebunt de carentia visionis diuinae, imò magis gaudebunt de hoc quod participabunt multum de diuina bonitate, & perfectionibus naturalibus.*

Dices, Etsi beatitudo non fuerit in potestate paruulorum, ratione voluntatis propriae, fuit tamen illis possibilis voluntate capitis: Sed hoc sufficit ut rationabiliter doleant de illius amissione: Ergo dolorem habebunt de amissa beatitudine. Probatum Minor: Si quis patrimonio priuetur, ob parentis delictum, non minus dolet quam si propria culpa exha-

redetur, & tamen tunc patrimonium non fuit in illius potestate, sicut nec culpa parentis: Ergo amissio boni non existentis in subiecti potestate, dolorem rationabilem causat.

Respondeo negando minorem, & ad eius probationem, concessio Antecedente, nego consequentiam & paritatem. Ratio autem discriminis est, quia ad proprium patrimonium quilibet est ordinatus ab intrinseco, habetque naturale ius ad illud; & ideo siue aliena siue propria culpa aliquis exhæredetur, rationabiliter dolet: ad gloriam autem habendam nullum ius præcessit in paruulis, vel si præcessit, dependet omnino ab extrinseco, & ideo ob amissam beatitudinem non possunt tristari rationabiliter; quemadmodum nullus sapiens homo affligitur de hoc quod non possit volare sicut avis, vel quia non ei debitum.

Obijcies quintò contra ultimam partem assertionis: Paruuli ob peccatum originale nulla priuantur perfectione sibi naturaliter debita, ut constat ex communi Theologorum axiomate, asserente naturalia post peccatum integra remansisse: Sed beatitudo naturalis est perfectio homini debita: Ergo illa paruuli non priuantur ob culpam originalem. Vnde D. Thomas qu. 5. de malo art. 2. ait. *Per peccatum originale priuari hominem iure ad beatitudinem supernaturalem, quod iustitia originatis præstabat, non autem iure ad bona naturalia.*

Confirmatur: Deus in resurrectione generali, non obstante culpa originali, concedet
in;

infantibus in originali decessis , plura dona gratuita ; vt immortalitatem , impassibilitatem , & quantitatem seu magnitudinem quam habituri essent , si ad adultam ætatem peruenissent : Ergo multò minus denegabit illis beatitudinem naturalem .

Respondeo, concessa maiori , negando minorem: nam licet naturalis beatitudo sit entitatiuè naturalis , non tamen est naturalis possessiuè ex principijs naturæ humanæ debitis; vnde in statu naturæ puræ homo illam non consequeretur , nisi ex speciali auxilio Dei conditoris naturæ, vt diximus agendo de statu naturæ puræ , & magis constabit ex dicendis in tractatu de gratia . Ex quo patet ad testimonium D. Thomæ , nam S. Doctor cum ait per peccatum originale non priuari hominem *iure ad bona naturalia* , loquitur de bonis naturalibus entitatiuè , & possessiuè , id est quæ ex principijs naturæ humanæ debitis possidentur , de quibus etiam intelligendum est commune illud Theologorum effatum : *naturalia post peccatum integra remanserunt* .


Ad confirmationem, concessio Antecedente, neganda est consequentia & paritas, nam dona illa non sunt cum peccato originali impossibilia ; naturalis autem beatitudo cum illo stare non potest , quia , vt supra dicebamus, beatitudo naturalis importat conuersionem in Deum vt authorem naturæ , peccatum verò originale , a Deo nedum vt authore gratiæ , sed etiam vt conditore naturæ auertit .

Obijcies vltimò : Si paruuli ex hac vita cum peccato originali migrantes , manerent
post

post diem iudicii perpetuò inclusi in lympo, eique alligati, pœnam sensus paterentur per alligationem ad talem locum; sicut Dæmones, & animæ separatæ, in inferno vel purgatorio existentes, torquentur pœna sensus, per alligationem ad ignem corporeum. Sed negatur sequela, & paritas, etsi enim illi paruuli debeant perpetuò includi in lympo, eique alligari, quia tamen non apprehendunt illum locum, & talem detentionem & alligationem, vt sibi disconuenientem & nociuam, subindeque ex illa non tristantur, nec ei reluctant, nullam pœnam sensus ex ea patiuntur. E contra verò, cùm Dæmones & animæ in inferno vel purgatorio existentes, apprehendant alligationem ad ignem corporeum, vt nociuam, & ipsorum libertati contrariam ac disconuenientem, subindeque ex ea valde tristantur & affligantur, talis alligatio in illis, pœnæ sensus rationem habet. Solutio est D. Thomæ qu. 26. de verit. art. 1. ad 5.

Ex dictis perfectè intelliges statum paruulorum in peccato originali decedentium. Illi enim nulla pœna positiua puniuntur, sed tantùm pœnis priuatiuis, nimirum carentia gloriæ, & naturalis beatitudinis, absque eo quod ex hoc aliquem moerorem seu tristitiam concipiant. Erunt post diem iudicii, quoad corpora, integri, nulloque membro carebunt; eiusdemque quantitatis seu magnitudinis, quam habituri essent, si ad adultam peruenissent ætatem; eò quod Dei opera perfecta sint, & resurrectio corporum sit opus diuinæ virtutis. Quoad animas verò, illæ aliqua obiecta naturalia cognoscent, per species a Deo

Deo infusas in statu separationis; nam omnem cognitionem ipsis denegare , improbable censet D. Thomas in 2. dist. 33. qu. 2. art. 2. Dei etiam conditoris naturæ aliquam cognitionem habebunt, non tamen vndequaq; perfectam, quæ ad beatificandum illos beatitudinem naturali sufficiat. Demum Deum auctorem naturæ diligent dilectione naturali, non quidem amabili, efficaci, & perfecta (hæc enim stare non potest cum auersione a Deo conditore naturæ , quæ in peccato originali includitur) sed dilectione imperfecta , quæ fertur in Deum prout est essendi naturale principium , vt docet D. Thomas loco mox citato , in resp. ad vltimum argumentum.



C A P V T VII.

De peccato habituali personali .

Peccatum habituale aliud est originale, quod per generationem transfunditur , & resultat in nobis ex peccato actuali Adami, quo Dei præceptum in paradiso terrestri violauit, de quo egimus capite præcedenti: aliud personale, quod resultat ex peccato actuali a nobis commissio , & in nobis remanet , donec per contritionem & infusionem gratiæ auferatur, vocaturque a D. Thoma, & alijs antiquis Theologis, *macula peccati* , ad similitudinem maculæ in rebus corporalibus . Nam sicut aliquod corpus maculari dicitur , quando ex
con-

Contactu & commixtione alterius, natiuum
 amittit splendorem seu nitorem, vt vestis,
 cum inficitur luto vel oleo, ita anima macu-
 lam spiritualem contrahit, dum inordinate
 voluntatis affectu, qui est veluti quidam ani-
 mæ tactus, creaturæ adhærens, perdit nito-
 rem seu splendorem quem habet ex refulgen-
 tia luminis diuinæ sapientiæ, & gratiæ san-
 ctificantis. Vnaquæque enim res, sicut vnio-
 ne ad nobiliora perficitur, ita permixtione
 cum inferioribus deturpatur & vilescit; non
 enim dicimus argentum esse impurum ex per-
 mixtione auri, quo melius & pretiosius eu-
 dit, sed ex permixtione plumbi vel stanni,
 quo inficitur & vitatur. Vnde D. Thomas,
 post Augustinum, opusc. 61. rectè ait, *Ani-*
nam mediam inter Deum & creaturas, conuer-
sione ad Deum illuminari, meliorari, & perfici,
& conuersione ad creaturas obtenebrari, dete-
riorari, & corrumpi. Difficultas ergo est, in
 quo consistat hæc macula peccati, quæ a Theo-
 logis recentioribus *peccatum habituale* appel-
 latur, non quod semper supponat habitum vi-
 tij productum, sed quia permanet & tandiu
 durat, quandiu non est per veram poeniten-
 tiam retractatum, vt constabit ex infra di-
 cendis.

Dico ergo primò, maculam peccati, seu
 peccatum habituale personale, non esse habi-
 tum inclinantem voluntatem ad bonum com-
 mutabile, vt ad vltimum finem. Est contra
 illos Thomistas qui docent peccatum habitua-
 le originale consistere in conuersione habitua-
 li ad creaturam, eodem enim modo de pecca-
 to habituali personali philosophandum exi-
 stimant.

Pro-

Probatur primò conclusio ex D. Thoma in 4. dist. 18. qu. 1. art. 2. in *sed contra*, ubi sic discurre: *Ex peccato non remanet positivè aliquid in anima, nisi dispositio vel habitus, quæ consequuntur peccatum ex parte actus ex quo aliquid ponit: Sed macula non est dispositio ex actu causata, nec habitus, quod patet ex hoc quod dispositio & habitus possunt sine gratia destrui per contrariam consuetudinem; macula autem sine gratia non auferitur: Ergo macula non ponit aliquid positivè in anima.*

Confirmatur: Per iustificationem tollitur omnino macula peccati, & tamen non tolluntur omnino pravae dispositiones & habitus vitiosi: Ergo macula peccati non est prava aliqua dispositio vel habitus.

Probatur secundò: Finis ultimus peccatoris est bonum proprium & privatum ipsius, ut infra ostendemus, cum agemus de peccato mortali: At circa bonum proprium & privatum, nullus constituitur habitus, cum voluntas, utpote inclinatio totius suppositi, sit circa tale bonum per se ipsam sufficienter disposita, ut in tractatu de virtutibus in communi ostensum est: Ergo macula peccati, seu peccatum habituale, non consistit in habitu inclinante voluntate ad bonum commutabile ut ad ultimum finem.

Probatur tertio: Habitus non generantur, nec destruuntur, nisi per plures actus repetitos, ut communiter docent Philosophi: Sed macula peccati per unicum actum peccaminosum causatur in anima, & per unicum charitatis & contritionis actum deletur: Ergo non est habitus.

Dico secundò, maculam peccati mortalis, seu peccatum habituale, quatenus est mortale, esse priuationem nitoris gratiæ sanctificantis, cum respectu ad actum peccati præcedentem, a quo causatur.

Probatur primò ex D. Thoma hic qu. 86. art. 1. ad 3. ubi sic ait: *Macula non est aliquid positivè in anima, nec significat priuationem solam, sed significat priuationem quandam nitoris animæ in ordine ad suam causam, quæ est peccatum.* Quo nihil clarius & expressius in fauorem nostræ conclusionis dici potest.

Probatur secundò: Id quod primò & per se excluditur per iustificationem, est macula peccati, seu peccatum habituale, cum iustificatio impij sit remissio peccatorum, vt ostendit D. Thomas infra quæst. 113. art. 1. Sed quod primò & per se excluditur per iustificationem, est priuatio gratiæ, cum eius infusio sit terminus ad quem iustificationis, vt Theologi docent in Tractatu de gratia. Vnde S. Doctor ibidem art. 2. ait quod *non posset intelligi remissio culpæ, si non adesset infusio gratiæ*: Ergo macula peccati, seu peccatum habituale, in priuatione nitoris gratiæ sanctificantis consistit.

Probatur tertio: Per illud homo constitui debet peccator & iniustus habitualiter, cuius oppositum constituit illum habitualiter sanctum & iustum, cum denominationes oppositæ a formis seu rationibus oppositis petendæ sint: Sed gratia sanctificans immediatè constituit hominem sanctum & iustum habitualiter: Ergo eius priuatio immediatè illum de-

nomine & constituit peccatorem & iniustum habitualiter, & per consequens in tali priuatione ipsum peccatum habituale formaliter & immediatè consistit.

Dixi verò peccatum habituale, *quatenus est mortale*, consistere in priuatione gratiæ sanctificantis, quia si loquamur de peccato habituali secundum se, & abstrahendo a mortali, consistit in priuatione conformitatis ad legem, seu rectitudinis rationis; talis enim priuatio ex quocumque peccato in anima relinquitur, ex solo autem peccato mortali priuatio gratiæ sanctificantis. Vnde S. Thomas hic art. 1. vtriusque priuationis meminit, dum ait: *Anima hominis duplicem habet nitorem* (quo priuatur per peccatum) *vnum quidem ex refulgentia luminis naturalis rationis, per quam dirigitur in suis actibus; alium verò ex refulgentia diuini luminis, scilicet sapientiæ & gratiæ, per quam etiam homo perficitur ad bene & decenter agendum.*

Dixi etiam maculam peccati mortalis esse priuationem nitoris gratiæ, *ut dicit respectum ad actum peccati præcedentem, à quo causatur*; quia ut macula illa habeat rationem culpæ & peccati habitualis, debet esse moralis & voluntaria; subindeque connotare actum voluntatis a quo fuit causata. Ex quo facilè intelligitur, quomodo licet priuatio gratiæ non sit nisi vna in vnoquoque peccatore, sunt tamen in eo maculæ speciei diuersæ, secundum diuersitatem specificam peccatorum ex quibus resultat, ut docet D. Thomas loco citato, *& est simile* (inquit) *de vmbra, quæ est priuatio luminis ex obiecto alicuius corporis, & se-*
sun-

secundum diuersitatem corporum obiectorum diuersificantur umbræ. Ex quo solum manet præcipuum aduersæ sententiæ fundamentum, inde petatum, quod cum priuatio gratiæ vnica sit, & eiusdem speciei in quolibet peccatore, si in illa essentialiter consisteret macula peccati, seu peccatum habituale, illud non esset nisi vnum specie, etiam post multa peccata diuersæ speciei ab illo commissa: quod fundamentum, vt constat ex dictis: ruinosum est. Vnde idem S. Doctor in 2. dist. 32. qu. 1. art. 1. ad 2. Cum omnium peccatorum mortalium genera hoc commune habeant quod gratiam tollunt, non tamen omnium est vna macula, sed diuersa, secundum quod defectus gratiæ ad diuersas causas refertur: vnde defectus gratiæ ex actu luxuriæ proueniens, est macula illius peccati, & sic de alijs.

Obijcies primò contra primam conclusionem: Homo transacto actu peccati, non solum manet habitualiter auersus a Deo, sed etiam conuersus habitualiter ad creaturam, seu ad bonum proprium & priuatum, tanquam in vltimum finem: Sed hæc conuersio fieri nequit nisi per habitum posituum moraliter malum: Ergo in peccatore, transacto actu peccati, remanet habitus aliquis moraliter malus, inclinans eius voluntatem ad bonum proprium & priuatum, tanquam in vltimum finem, in quo peccatum habituale consistit.

Confirmatur: Peccatum actuale consistit in positua tendentia ad obiectum dissonum regulis morum, seu in actuali conuersione ad bonum commutabile vt ad vltimum finem,

vt capite sequenti ostendemus : Ergo peccatum habituale ex actuali relictum & causatum, in simili tendentia seu conuersione habituali debet consistere.

Ad obiectionem concessa maiori, nego minorem : cum enim ad rationem communem boni proprii & priuati, voluntas per seipsam sit sufficienter determinata & inclinata, sicut quælibet alia potentia ad rationem communem sui obiecti, non indiget habitu eam determinante & inclinante ad tale bonum, neque est capax illius, ipsa quippe inclinatio essentialis præstat eminentius quidquid præstare posset habitus.

Ad confirmationem, concessio Antecedente, nego consequentiam, & paritatem : Ideò enim peccatum actuale in tendentia ad obiectum dissonum regulis morum consistit, quia primum quod in illo intelligitur, est positua tendentia in obiectum prohibitum; priuatio verò gratiæ, aut rectitudinis actus debitiæ, consequenter tantum & secundariò ad illud se habet : primum autem quod intelligitur in peccatore remansens, transacto actu peccati, non est habitualis tendentia in obiectum prohibitum, seu conuersio habitualis ad bonum commutabile, sed priuatio gratiæ & charitatis, ex qua oritur tota perversitas quæ in habituali conuersione ad bonum proprium & priuatum reperitur.

Obijcies secundò contra secundam conclusionem : Si quis in puris naturalibus seu in statu naturæ puræ positus, grauiter peccaret; ex tali peccato maculam contraheret: At non haberet priuationem gratiæ, sed solameius

negationem, cùm in tali statu natura humana ad ordinem gratiæ non esset eleuata: Ergo macula peccati, seu peccatum habituale, non consistit formaliter in gratiæ priuatione.

Respondeo peccatum habituale in statu naturæ puræ fore alterius rationis quam modò est, ac proinde habiturum aliud constitutum, nempe priuationem subiectionis seu conuersionis in Deum vt vltimum finem naturalem.

Hanc responsionem improbat Author Theologiæ mentis & cordis tomo 4. pagina 846. vbi ait id nequaquam dici posse: Tum quia essentia peccati mortalis, quæ mortalis, est læsio diuinæ gratiæ, amicitiae, & charitatis: Ergo macula ex illo peccato confurgens, est priuatio illius gratiæ, amicitiae, & charitatis. Tum etiam, quia in statu naturæ puræ, per peccatum mortale homo eam maculam contraheret, quæ in sola posset iustificatione abstergi, cùm iustificatio sit remissio peccatorum: non posset verò tunc iustificari, nisi per gratiæ infusionem, quia non est assignabilis alia iustificationis forma: Ergo &c.

Verùm hæc friuola sunt, & multo sudore non indigent vt soluantur. Ad primum enim respondetur, quod licet in statu naturæ eleuata ad ordinem supernaturalem, per gratiam & charitatem, peccatum mortale, quæ tale, sit læsio diuinæ gratiæ & charitatis, atque amicitiae Dei supernaturalis, secùs tamen in statu naturæ puræ, cum in eo, nec esset gratia, nec charitas, nec amicitia Dei superna-
tu-

turalis, sed solum amor Dei ut authoris naturæ, & conuersio in illum ut finem naturalem; unde in illo statu peccatum mortale, quia tale, solum talem dilectionem & conuersionem excluderet.

Ad secundum nego quod in statu naturæ puræ, remissio peccati, & iustificatio hominis, non posset fieri sine infusione gratiæ habitualis cum enim peccatum habituale hominis, in statu naturæ puræ constituti, & ad finem supernaturalem non eleuati, non esset priuatio gratiæ aut rectitudinis supernaturalis, sed tantum conuersionis in Deum ut finem naturalem, per huiusmodi conuersionem posset tolli, cum priuatio tollatur per formam ipsi directè oppositam, subindeq; posset tunc peccator iustificari per actum dilectionis efficacis Dei ut authoris naturæ, adiuncto fauore Dei extrinseco, condonantis rationem offensæ. Alioquin, si in statu naturæ puræ, ad remissionem & expulsionem peccati, necessaria esset infusio gratiæ habitualis, vel alterius doni supernaturalis, sequeretur impossibilem esse remissionem peccatorum, manente homine in illo statu; cum per infusionem gratiæ habitualis, vel alterius doni supernaturalis, educeretur homo a statu naturæ puræ, & constitueretur in statu gratiæ. Vnde si vera esset huius Authoris sententia, homo manens in statu naturæ puræ, necessario esset miser, quippe qui semel lapsus in peccatum, nullum haberet remedium, quo posset iustificari, & beatitudinem naturalem, ad quam esset ordinatus, consequi. Ex quo ulterius sequeretur, statum naturæ puræ esse impossibilem, &


diuinæ prouidentia repugnantem, cum diuinæ prouidentia suauitati repugnet, hominem, in aliquo statu condere, in quò necessariò sit miser, & suum vltimum finem ac beatitudinem naturalē consequi nō valeat. Quare idem Author ac ratione ductus, tomo 5. pag. 23. negat statum naturæ puræ esse possibilem. Cur ergo hic in vanum laborat in assignanda ratione formali, per quam peccatum habituale in statu illo constitueretur, & forma per quam homo lapsus in peccatum mortale iustificaretur? Debat conformiter ad sua principia respondere ad argumentum propositum, maiorem esse de subiecto non supponente, cum status naturæ puræ impossibilis sit.

Ex dictis confutata manet sententia Scoti & Nominalium, asserentium maculam peccati, seu peccatum habituale, consistere in reatu seu condignitate poenæ, ex actu peccati consecuta. Etenim non ideò aliquis est peccato sordidus & maculatus, quia dignus est poena, sed idcirco poena dignus est, quia peccati macula inficitur.

Exclusa etiam manet ex dictis opinio Vasquez, existimantis peccatum habituale, seu maculam, esse duntaxat denominationem extrinsecam, a præterito actu peccati, donec per poenitentiam retractetur, perseverante, petitam. Macula enim est quid intrinsecum, sicut nitor gratiæ quo priuat; vade sicut esse sanctum & mundum oritur a forma aliqua intrinseca & permanente, nempe gratia habituali animæ inhaerente, vt de fide certum est; ita esse maculatum, immundum, & peccatorem, non est sola denominatio extrinseca pe-

cita ab actu peccati , sed priuatio intrinsecè suo modo afficiens animam , sicut tenebræ afficiunt aerem , & mors corpus . Addo quod eadem est ratio de peccato habituali personali , ac de originali : ostendimus autem capite præcedenti contra Pighium , & Catharinum , peccatum habituale originale esse aliquid nobis intrinsecum , & distinctum a peccato actuali Adami , atque ab eo deriuatum : Ergo similiter peccatum habituale personale erit aliquid nobis intrinsecum , distinctum a peccato actuali præterito , & non sola denominatio extrinseca ab illo petita .

Ex dictis etiam facile colligi potest , in quo consistat macula peccati venialis : consistit enim in priuatione feruoris charitatis ex peccatis venialibus causatas quæ non tollit formam ex qua oritur animæ decor & pulchritudo , nimirum gratiam & charitatem , sed eam obnubilat , & quasi regit , vt minùs reluceat & splendescat in actibus ; habetque se ad animam existentem in gratia , sicut ad faciem venustam puluis , qua nonnihil sordescit , nec tamen eius pulchritudo destruitur . Quo sensu dixit S. Leo Papa serm. 4. quadragesimæ : *Dum per varias actiones vitæ huius sollicitudo distenditur , necesse est de mundano pulvere etiam religiosa corda sordescere .*



CAPVT VIII.

De peccato commissionis.

Considerato peccato habituali, tam originali, quam personali, consequens est vt de peccatis actualibus differamus, & primò quidem de peccato commissionis, secundo de peccato omissionis, tertio de peccato mortali, vltimò de veniali.

§. I.

Peccatum commissionis, in ratione mali moralis, non constituitur per priuationem, sed per aliquid positium.

Probatur primò ex tribus principijs doctrinæ D. Thomæ, ex quibus huius assertionis veritas manifesta relinquitur. Primum habetur hic quæst. 72. art. 1. vbi docet peccata distingui specificè, non ex priuatione, sed ex ordine positiuo ad obiectum dissonum legi & rationi: vnde cum idem sit constitutum & distinctum rei, manifestum est, iuxta doctrinam D. Thomæ, rationem constitutiuam peccati non esse priuationem, sed ordinem positiuum ad obiectum dissonum legi & rationi. Nec valet, si dicas, D. Thomam ibi non loqui de distinctione specifica peccatorum pro formali, sed duntaxat pro materiali malitiæ. Etenim S. Doctor quæstione citata tractat de specificatione & distinctione peccatorum, vt sunt formaliter pec-
ca-

cata, & in genere moris , nam de actibus humanis in esse physico consideratis egit supra a quaestione 8. usque ad 18. quæ est de bonitate & malitia morali actuum humanorum: Ergo non rectè exponitur de specificatione & distinctione peccatorum in esse physico , & pro materiali malitiæ . Vnde ibidem art. 6. sic ait : *Dicendum quod in peccatis inuenitur duplex differentia, una materialis, alia formalis. Materialis quidem attenditur secundum naturalem speciem actuum peccati; formalis autem secundum ordinem ad unum finem proprium, quod est obiectum proprium. Quid clarius ut constet D. Thomam loqui omnino formaliter de peccato, & de eius specificatione & distinctione, cum asserit eam desumi ex ordine ad obiectum? Et certè valde diminutus fuisset, si explicando principia ex quibus sumitur distinctio specifica peccatorum, ageret solum de distinctione illorum pro materiali, & non pro formali.*

Secundum principium doctrinæ D. Thomæ est, hoc inter malum simpliciter, & malum morale reperiri discrimen, quod primum per priuationem, secundum per positium constituitur. Ita docet 1. p. qu. 48. art. 1. ad 2. tertio- contra Gen. cap. 9. de malo qu. 1. art. 1. ad 4. & hic q. 72. art. 9. ad 1. ubi sic ait, *Malum in quantum huiusmodi priuatio est, & ideo diuersificatur specie secundum ea quæ priuantur. Sed peccatum non sortitur speciem ex parte priuationis vel auersionis, sed ex conuersione ad obiectum. Nec dici potest D. Thomam locis illis loqui de malo pro materiali in quo fundatur, nam iuxta hanc interpretationem*

nem non potest subsistere discrimen illud quod statuit inter malum simpliciter & malum morale; cum enim malum simpliciter in bono fundetur, & necessariò supponat entitatem aliquam a qua sustentetur, aliquid positivum pro materiali importat.

Tertium principium doctrinæ D. Thomæ habetur locis citatis, ubi docet malum prout in moralibus contrariè opponi bono: At si peccatum & malitia moralis formaliter esset pura privatio, bonum & malum morale, privatiuè & non contrariè opponerentur, cum forma & privatio non gaudeant oppositione contraria, sed privatiua: Ergo iuxta principia doctrinæ D. Thomæ, malitia moralis peccati non est pura privatio.

Nec responderi potest, D. Thomam loqui de malo morali, non pro formali, sed pro materiali malitiæ, qua ratione aliquid positivum est, & contrariè bono morali oppositum: Nam loco citato ex qu. 1. de malo sic ait: *Actus voluntatis, in quantum fertur in malum, contrariatur proprio bono, & hæc contrarietas ex actibus in habitum transit, in quantum actus & habitus assimilantur.* At voluntatis actus, in quantum fertur in malum, non dicit materiale, sed formale malitiæ. Item habitus vitiosus, in quantum talis formaliter, contrariè opponitur virtuti, ut docet idem S. Doctor hic qu. 73. art. 1. Ergo loquitur de contrarietate inter bonum & malum morale, prout sunt talia formaliter.

Probatur secundò assertio ratione fundamentali: Ante privationem rectitudinis intelligitur in peccato commissionis tendentia

positiua ad obiectum dissonum legi & rationi: Attendentia ista, pro priori ad priuationem, est mala moraliter: Ergo pro priori ad priuationem peccatum commissionis intelligitur constitutum in ratione mali moralis, subindeque non per priuationem, sed per aliquid positium, in ratione talis constituitur. Maior est certa, ideò enim in actu peccaminoso intelligitur priuatio rectitudinis, quia talis actus tendit in obiectum malum & disforme regulis morum: Ergo prius in eo concipitur tendentia positiua ad obiectum dissonum legi & rationi, quam priuatio rectitudinis. Maior verò probatur primò: Omnis tendentia specificatur a suo termino, sumitque suam rationem specificam ab eo in quod tendit, atque adeo tendentia in obiectum dissonum legi & rationi, non potest non accipere ab illo speciem disconuenientiae & dissonantiae eidem rationi & legi: Sed hæc est moralis malitia: Ergo tendentia positiua ad obiectum dissonum legi & rationi, pro priori ad priuationem rectitudinis ex ea dimanantem, intelligitur mala moraliter. Secundò probatur eadem minor: Tendentia illa, prout antecedit priuationem quam causat, est formaliter in genere moris, cum oriatur a voluntate liberè & cum subiectione ad regulas morum operante, subindeque ut ab agente morali, respiciatque obiectum a lege prohibitum, atque adeò ut stans sub regulis morum: Ergo sub aliqua moralitatis specie continetur; Sed non est in specie boni moralis, ut per se notum est: Ergo est mala moraliter.

Dices, tendentiam istam, prout antecedit

privationem rectitudinis, non esse malam formaliter, sed tantum materialiter seu fundamentaliter, quia non terminatur ad obiectum reduplicatiue ut malum, sed solum ut malum materialiter & specificatiue; illud enim respicit ut bonum quoddam utile, aut delectabile, aliis prohibitum, non autem formaliter ut dissonum legi & rationi, cum nemo respiciens ad malum qua malum operetur.

Sed contra: Actus voluntatis terminatus ad fundamentum privationis, quæ iuxta Adversarios malitiam moralem formaliter constituit, non terminatur ad illud reduplicatiue ut fundamentum est obiectiue malum; sicut enim nemo intendens ad malum sub ratione mali operatur, ita nemo intendens fundamentum malitiæ, prout est fundamentum illius; & tamen tendentia voluntatis ad fundamentum, accipit ab illo esse fundamentum malitiæ formalis, pro priori ad privationem in ipso fundatam: Ergo pari ratione, quamuis non terminetur ad obiectum reduplicatiue ut malum obiectiue, seu ut dissonum legi & rationi, habebit tamen ab illo esse mala moraliter malitia formali, pro priori ad privationem, ad prædictam tendentiam secutam; quia scilicet, quamuis voluntas directe & formaliter dissonantiam seu malitiam obiectiuam quæ reperitur in obiecto non attingat, eam tamen indirecte & interpretatiue attingere & velle censetur, eo ipso quod attingit & vult illius causam & fundamentum, a quo inseparabilis est.

Confirmatur: Tendentia habitus vitiosi ad
obie-

obiectum legi dissonum, est mala moraliter, & tamen non terminatur ad obiectum duplicatiuè vt malum, & regulis morum disforme: Ergo pariter tendentia actus vitiosi & mali ad obiectum dissonum legi & rationi, erit mala moraliter, etsi non attingat formaliter & directè dissonantiam seu malitiam obiectiuam, nec ab illa moueatur, sed a ratione boni utilis & delectabilis, quæ reperitur in obiecto regulis morum disformi.

Ex his intelliges rationem formalem constitutiui peccati commissionis, non constari ex positiuo & priuatione, vt aliqui existimant, sed illam adæquatè in positiuo consistere, nimirum in prædicta tendentia actus humani ad obiectum vt legi & rationi dissonum, quia illa, vt natura & ratione antecedens priuationem, est dissona & disformis regulis morum, vt iam ostendimus.

§. II.

Soluantur obiectiones.

Objiciunt in primis Aduersarij plura Sanctorum Patrum testimonia, quibus asserunt peccatum nihil aliud esse quam boni priuationem; ait enim Augustinus in Enchir. cap. 11. *Quid aliud est quod malum dicitur, nisi boni priuatio?* Et cap. 24. *Peccatum (inquit) est primum creaturæ rationalis malum, id est prima priuatio boni.* Damascenus lib. 2. fidei cap. 4. *Neque aliud est malum, quam boni priuatio.* Eadem verba habet Fulgentius de fide ad Petrum cap. 21. & Basilijus hom. 9.

Respondeo SS. Patres illis locis, vel loqui de malo simpliciter & absolutè, quod in pura priuatione consistit. Aut si loquantur de malo morali, quale est peccatum, explicari posse vel de peccato habituali, quod in sola priuatione gratiæ sanctificantis consistit, ut capite præcedenti ostendimus; vel de peccato actuali, quod est priuatio, non formaliter & in se, sed causaliter & consecutiue, quia ad tendentiam positiuam actus ad obiectum dissonum legi & rationi, consequitur priuatio rectitudinis debitæ, & si peccatum sit mortale, priuatio gratiæ. Vbi verò sunt SS. Patres nomine priuationis, ad explicandam essentiam peccati, quia priuatio in ratione mali notior est nobis quam entitas moralis. Porro Augustinum agnouisse in peccato malitiam positiuam, constat ex lib. de perfectione iustitiæ in principio, ubi sic ait: *Quærat ergo quod eidem vitio nomen imponat, utrum rem velit dicere, an actum an rei potius qualitatem, qua deformis actus consistit.* Vbi, ut clarè constat, deformitatem actus in positua qualitate constituit. Constat etiam ex hac definitione peccati tradita ab Augustino per contrarietatem ad legem *peccatum est factum, vel dictum, vel concupitum contra æternam legem:* contrarietas enim fit per aliquid positiuum, non per nudam priuationem, quæ priuatiue solum & non contrariè opponitur formæ quam a subiecto excludit.

Obijciunt secundò, SS. Patres asserere peccatum esse nihil: Ita Origenes tr. 2. in Ioan. Augustinus tract. 2. in eundem, explicans illa verba: *Ei sine ipso factum est nihil,* quæ

intelligit de peccato, & subdit: *Peccatum nihil est, & nihil fiunt homines cum peccant.* Vnde idem S. Doctor ibidem, & alij SS. Patres, vt se expediant a graui illa difficultate, quomodo Deus, cum sit vniuersalis causa omnium, non sit author & causa peccati? non aliter respondent, quam dicendo, peccatum nihil esse, subindeque a Deo non causari, licet sit causa vniuersalis totius entis.

Respondeo primò quod quando Augustinus & alij SS. Patres dicunt peccatum esse nihil solum intendunt illud non esse aliquid substantiale, seu naturam substantialem; quia agunt contra Manichæos asserentes esse aliquas naturas malas, a bono Deo nullatenus factas. Id apertè colligitur ex ipso Augustino de natura & gratia cap. 64. vbi Pelagio alleganti, *Ioannes Constantinopolitanus Episcopus dicit peccatum non esse substantiam, sed actum malignum.* Respondet Augustinus, *quis hoc negat?* Ex quibus patet Chrysostomum & Augustinum, solum negare peccatum commissionis esse substantiam, non verò negare, sed asserere, esse actum positium. Idem constat ex libro de perfect. iustitiæ ratiocin. 4. vbi sic ait: *Iterum quarendum est, quid est peccatum, actus, an res? respondemus, peccatum quidem actum dici & esse, non rem.* Vbi dum rem opponit actui, pro re intelligit naturam subsistentem.

Respondeo secundò, peccatum ab Augustino & alijs SS. Patribus appellari nihil, quia nihil est ad terminandam rectam electionem moralem; quoad hoc enim positium illud in quo essentiam peccati commissionis posui-

mus.

mus, nihil est, quia rectam electionem moralem terminare non potest. Et hoc intento Patrum sufficebat, nempe ut explicarent quomodo illud causalitatem Dei non terminaret. Quod enim terminare nequit rectam electionem moralem, Dei causalitatem terminare non potest. Dici etiam potest, peccatum vocari nihil a SS. Patribus, & peccatores dici redigi in nihilum, quando peccant; quia per peccatum mortale expellitur gratia, quæ est veluti esse substantiale ordinis supernaturalis, cum in tali ordine teneat locum substantiæ, & se habeat sicut substantia in ordine naturali: in quo sensu dicebat Propheta, *Ecce ad nihilum redactus sum, & nesciui*, & Apostolus: *Si charitatem non habuero, nihil sum*.

Obijciunt tertio Aduersarij plura D. Thomæ testimonia, quibus passim docet malum consistere in carentia, priuatione, seu absentia boni. Verum hæc intelligi & explicari debent, sicut testimonia SS. Patrum supra adducta, nempe vel de malo simpliciter, seu de peccato ut est in hoc genere mali; vel de carentia & priuatione causaliter & fundamentaliter, malum enim morale consistit in forma positiua, quæ fundamentum est & causa priuationis. Cum verò ait hic quæst. 85. art. 4. quod ordinatio actus est quoddam bonum, & subdit: *Et huius priuatio est essentialiter ipsum peccatum*, non loquitur de peccato commissionis, de quo solum agimus in præsentia, sed omissionis, quod essentialiter consistit in carentia seu priuatione actus debiti & ordinati, ut rectè obseruarunt Salmanticenses, & constat

stat ex verbis antecedentibus , quæ sic se habent : *Est etiam quoddam bonum quod est ipse actus ordinatus* , quod etiam habet suum modum , speciem , & ordinem ; & huius (scilicet actus) *privatio est essentialiter ipsum peccatum* . Item cum afferit supra quæst. 18. art. 1. actum esse malum , *inquantum aliquid ei deficit de plenitudine essendi* . Et cum hic quæst. 71. art. 6. ait quod *actus humanus habet quod sit malus ex eo quod caret debita commensuratione* . Dicendum est , ipsum non loqui in sensu formali , sed illatio solùm , ita ut velit , infallibiliter verificari actum esse malum , si habeat carentiam alicuius debiti , aut debite commensurationis ; quod verissimum est , etsi carentia illa non sit ratio formalis constitutiva peccati . Demum cum idem S. Doctor 2. 2. quæst. 118. art. 5. & quæst. 162. art. 6. & 3. p. quæst. 86. art. 4. ad 1. docet auersionem , aut privationem , & corruptionem boni , habere se formaliter in peccato , conuersionem verò ad bonum commutabile materialiter ; non intendit quod privatio sit ratio primaria & constitutiva peccati , sed quod sit ratio vltima & completiva , quæ proinde veluti formalizat conuersionem , & alias rationes in eo repertas , propter quod potest dici formalis . Sicut in hac parte supra quæst. 18. art. 6. speciem bonitatis vel malitiæ quam actus habet ex obiecto , quæ est ei essentialis , appellat *materialem* ; eam verò quam habet ex fine operantis , quæ absolute est accidentalis est , dicit esse *formalem* . Et quæst. 13. art. 1. ait quod *si aliquis actum fortitudinis exerceat propter Dei amorem , actus ille materia-*

rialliter est fortitudinis, formaliter charitatis;
 & tamen in isto actu bonitas specifica & essentialis est bonitas fortitudinis, bonitas verò charitatis absolutè est accidentalis. Quidni ergo pariter, quamuis sola malitia positiua, quæ in peccato commissionis reperitur, sit essentialis & constitutiua peccati; priuatiua verò absolutè sit extra essentiam, poterit hæc dici formalis respectu illius?

Obijcies quartò: Peccatum continetur sub ratione mali simpliciter, vnde summum & maximum omnium malorum a SS. Patribus appellatur: Sed malum simpliciter est priuatio & non ens, vt docet D. Thomas 1. p. quæst. 48. art. 1. Ergo peccatum non est aliquid positium, sed mera priuatio bonitatis & rectitudinis.

Respondeo in peccato duo reperiri, nempe rationem formalem per quam constituitur, & priuationem rectitudinis, quæ se habet quasi proprietas consequens ad illam: ratione primi non continetur sub ratione mali simpliciter & absolutè, sed tantum sub ratione mali respectiue & secundum quid; non enim est malum simpliciter, sed huic naturæ, scilicet rationali, cui est disconueniens; sicut calor non est absolutè in se malus, sed tantum respectu aquæ, quam naturali frigiditate priuat: ratione verò secundi sub malo simpliciter & absolutè continetur: quia priuatio, cum sit non ens, seu carentia entis, nullam rationem boni implicare & inuoluere potest.

Dices: Id quod taliter est malum & disconueniens homini, quod nulli alteri est conueniens & bonum, est omnibus modis malum,

Ium, & per consequens est malum simpliciter : Sed peccatum in ratione peccati est malum rationali naturæ, & nulli alteri naturæ, est conueniens & bonum : Ergo in ratione peccati est malum simpliciter .

Respondeo primò negando maiorem , tristitia enim & error speculatiuus , taliter sunt disconuenientia homini, quod nulli alteri naturæ conueniunt ; non enim Deo, cui omnino repugnant , nec naturæ irrationali, ad quam nullam habitudinem dicunt ; quia tamen in seipsis bonitate transcendentali gaudent, id est, quia nihil illis deest ex requisitis ad sui integritatem , non sunt mala simpliciter . Sic in præsentī, quamuis peccatum in ratione peccati , nulli alteri naturæ conueniens sit & bonum, quia tamen in seipso integrum est , non est malum simpliciter , seu absolutè, sed solùm respectiue ad naturam rationalem .

Secundò dici potest , quod vt peccatum in ratione peccati esset malum simpliciter , taliter deberet esse disconueniens homini ; quod nec explicaret nec implicaret conuenientiam ad aliam naturam , nec ad ipsum hominem, sub aliqua consideratione : peccatum autem, etsi sub explicita ratione deformitatis , nullam conuenientiam dicat, sub implicita tamen ratione entitatis & actualitatis , sub qua a Deo causatur, conueniens est naturæ rationali, non quidem conuenientia morali, sed physica , aut metaphysica , quatenus est vltima eius actualitas, non explicans sub illo conceptu rationem deordinationis vel deformitatis , & idcirco non est malum simpliciter,

er, sed malum respectiue.

Obijcies quintò, si peccatum commissionis consistat in positiuo, causabitur a Deo, cum nullum ens reale & positiuum possit subterfugere diuinam causalitatem: Sed hoc repugnat diuinæ sanctitati: Ergo &c.

Respondeo primo, hoc argumentum soluendum esse ab Aduersarijs, nam fundamentum priuationis rectitudinis, reduplicatiue vt tale, aliquid positiuum est: Ergo si necesse sit quod Deus causet omne positiuum in peccato commissionis repertum, oportebit quòd causet fundamentum priuationis rectitudinis, reduplicatiue vt tale, subindeque ipsam priuationem rectitudinis; cum illa per se primò & directè causari non possit, sed per accidens & secundariò resultet ad positionem fundamenti. Consequentia manifesta est, Antecedens verò sic ostenditur. Fundamentum priuationis non consistit in mera negatione, quia priuatio supra meram negationem fundari non potest; nec in alia priuatione, aliàs istius priuationis alia priuatio pro fundamento assignari deberet, & sic daretur processus in infinitum: Ergo fundamentum priuationis rectitudinis, reduplicatiue vt tale, aliquid positiuum est.

Respondeò secundò, distinguendo maiorem: peccatum causabitur a Deo, sub ratione positiuæ entitatis, concedo. Sub ratione deformitatis, nego. Hoc autem non repugnat diuinæ sanctitati, quia ex hoc non sequitur Deum esse causam peccati, vt peccatum est, sed solum quatenus est ens actus. Vnde D. Thomas hic quaest. 79, artic. 2, sic ait:

Pec-

Peccatum nominat ens & actionem , cum quodam defectu : defectus autem ille est ex causa creata, scilicet libero arbitrio , in quantum deficit ab ordine primi agentis, scilicet Dei . Unde defectus iste non reducitur in Deum tanquam in causam, sed in liberum arbitrium ; sicut defectus claudicationis reducit in tibiam curuam sicut in causam , non tamen in virtutem motiuam, à qua tamen causatur quidquid est motionis in claudicatione ; & secundum hoc Deus est causa actus peccati, non est tamen causa peccati, quia non est causa huius quod actus sit cum defectu .

Dices, diuina causalitas, utpote ad ens terminata , non per nostram considerationem, sed ut est à parte rei, non potest ad vnam formalitatem terminari , & præscindere ab alijs cum ea identificatis : Sed positiua deformitas est realiter , imò & transcendentaliter , cum entitate identificata : Ergo diuina causalitas terminata ad entitatem, non potest à deformitate positiua præscindere .

Confirmatur : Multò magis præcisius est intellectus humanus , quam causalitas diuina : Sed intellectus humanus non potest per intellectionem entitatem peccati præscindere ab eius deformitate, cum in illa intimè , & transcendentaliter imbibatur : Ergo a fortiori id præstare nequit diuina causalitas .

Ad instantiam respondeo maiorem esse veram, quando formalitas cum entitate identificata, continetur sub obiecto causalitatis & efficientiæ diuinæ , secùs verò quando sub illo non continetur : deformitas autem peccati non continetur intra obiectum causalitatis


Dei

Dei, sicut eius entitas; quia obiectum adæquatum diuinæ omnipotentiae est id solum quod est reducibile in Deum tanquam in ultimum finem; deformitas verò peccati, cum auertat a Deo ut fine ultimo, non est in ipsum ut ultimum finem referibilis; subindeque potest Deus sua causalitate entitatem peccati attingere, præscindendo ab eius deformitate, quamuis ista realiter, imò & transcendentaliter, cum entitate identificetur. Sicut anima mouendo applicando tibiam curuam ad gressum, ita causat motum illum, quatenus est physicus & vitalis, ut tamen illum non efficiat, quatenus est obliquus & defectuosus; quia nimirum obliquitas illa, quamuis cum vitalitate identificata, vel saltem cum illa intimè & inseparabiliter connexa, non continetur intra obiectum adæquatum potentiae loco motiuae, sed in tibiam curuam & deficientem reducitur. Quo exemplo utitur D. Thomas loco supra relato.

Ex hoc patet responsio ad confirmationem: idè enim intellectus noster concipiens entitatem, non potest a deformitate præscindere, quia non solum entitas, sed etiam deformitas, continentur sub obiecto intellectus nostri. Sicut etiam ob eandem rationem intellectus Dei non potest entitatem intelligere, & a deformitate præscindere, bene tamen Dei voluntas potest entitatem amare, non amata deformitate entitatem includente, quia in ordine ad intellectum continetur intra sphoeram diuinæ intelligibilitatis, non autem continetur intra sphoeram amabilitatis Dei. Quidni ergo poterit similiter diuina omnipotentia suo

con-

concurſu & cauſalitate attingere entitatem peccati, non attingendo eius deformitatem, cum ſimiliter entitas contineatur intra ſphœram diuinæ cauſalitatis, non verò deformitas. Sed de hoc ſuſius in Tractatu de voluntate Dei cap. 4. §. 5. explicando concordiam ſanctitatis Dei cum decreto prædeterminante, & phyſica prædeterminatione ad materiale peccati.



CAPVT IX.

De peccato omiſſionis.

Explicato peccato commiſſionis, & ratione formali per quam conſtituitur, conſequens eſt, vt agamus de peccato omiſſionis, & aliquas difficultates quæ circa illud occurrunt, & inter Theologos agitari ſolent, breuiter hic reſoluamus, & explicemus.

§. I.

Non poteſt dari omiſſio culpabilis, ſine actu præcedente, aut concomitante, qui ſit cauſa vel occaſio omittendi.

Ita videtur docere D. Thomas hic qu. 71. art. 5. vbi ſic ait: Si in peccato omiſſionis conſideretur id quod per ſe pertinet ad rationem peccati, ſic aliquando eſt omiſſio abſque omni actu tam exteriori quam interiori. Si vero in peccato omiſſionis intelligantur etiam cauſæ
vel

vel occasiones omittendi, sic non est omissio absque aliquo actu. Quibus verbis clarè docet, quod licet omissio culpabilis secundùm suam propriam & essentialem rationem non exigat actum, quia essentialiter consistit in carentia actus præcepti, seu in priuatione illius; vt tamen in indiuiduo consideratur, & prout hic & nunc exercetur, requirit actum, qui sit causa vel occasio illius. Vnde quando articulum illum his verbis concludit: *Verius dici potest quod aliquod peccatum (nempe omissionis) possit esse absque omni actu,* solum excludit actum qui sit de illius essentia, vel qui directè & per se ad illam terminetur, non verò actum qui sit causa vel occasio omittendi, alioquin sibi apertè contradiceret, & in eodem articulo pugnantia scriberet ac doceret.

Nec valet si dicas, D. Thomam ibi loqui de eo quod regulariter & ordinariè contingit, non verò de eo quod absolutè fieri potest. Nam ibi impugnat sententiam aliquorum, qui negabant ad peccatum omissionis semper requiri actum per modum causæ: illi autem non poterant negare, regulariter & de lege ordinaria, talem actum requiri, cùm hoc contra euidentem experientiam pugnet, sed solum de lege extraordinaria, & in aliquo casu metaphysico. Ergo D. Thomas non solum de necessitate morali, sed etiam de physica aut metaphysica loquitur. Vnde supra qu. 6. art. 3. ad 3. sic ait: *Eo modo requiritur ad voluntarium actus cognitionis, sicut & actus voluntatis:* Sed ad omissionem voluntariam & culpabilem, necessarius est actus intellectus, non solum necessitate morali, sed etiam physica,
aut

aut metaphysica, cùm repugnet sine cognitio-
ne aliquid esse voluntarium, vt ex definitio-
ne voluntarij constat: Ergo & actus volun-
tatis .

Non desunt etiam efficaces rationes quibus
assertionis nostræ veritas suaderi potest, sed
præcipua ac fundamentalis sumitur ex ratione
voluntarij, quæ ad omissionem culpabilem
necessariò requiritur. Vnde sic arguo: Vt
omissio aliqua culpabilis sit & peccaminosa,
debet esse voluntaria non solum in actu pri-
mo, sed etiam in actu secundo: At secluso
omni actu voluntatis, eam antecedente, vel
concomitante, non potest esse voluntaria in
actu secundo, sed solum in potentia & actu
primo, cùm voluntarium in actu secundo di-
cat actum, vt ex terminis constat, & aliquam
voluntatis causalitatem & influxum actuale
requirat: Ergo ommissio, secluso quocumque
actu voluntatis, eam antecedente, vel con-
comitante, culpabilis & peccaminosa esse
nequit.

Nec valet communis responsio Aduersario-
rum, qui dicunt quod vt ommissio aliquo sit cul-
pabilis, sufficit quod sit voluntaria in actu se-
cundo moraliter & interpretatiuè, id est iux-
ta viri prudentis æstimationem & interpreta-
tionem, ad quod non requiritur positius ali-
quis voluntatis influxus, sed sufficit quod ho-
mo possit, & teneatur aliquid facere, & non
faciat. Non valet in quantum hæc responsio,
primò quia cùm peccatum essentialiter sit vo-
luntarium, eo modo quo aliquid habet ratio-
nem culpæ, debet habere rationem volunta-
rij: Sed ommissio culpabilis, de qua agimus,
non

non tantum secundum prudentis æstimationem, vel interpretationem, sed verè & reipsa, independenter ab huius vel illius æstimatione, habet esse peccaminosa, & continet veram & realem malitiam, quamvis priuatiuam, per quam in ratione peccati constituitur: Ergo reipsa, & independenter ab hominum existimatione & interpretatione, subindeque physicè & realiter, & non solum moraliter & interpretatiuè, debet esse voluntaria. Secundò, id a quo omissio denominatur voluntaria in actu secundo, debet esse aliquid a parte rei in ipso omittente: Sed volitio interpretatiua nihil est in omittente a parte rei, sed in solo intellectu interpretantis: Ergo ab ea omissio culpabilis non potest denominari voluntaria in actu secundo, sed solum ab actu physico & reali voluntatis, eam antecedente vel concomitante.

Dices, omissionem non denominari voluntariam ab ipsa formali interpretatione quæ est in alieno intellectu, sed a fundamento ad ita interpretandum, quod est in voluntate, quoties adest potentia & debitum operandi, cum negatione operationis.

Sed contra: Ex his tribus quæ referuntur, scilicet potentia, debito, & carentia operationis, tertium, cum sit ipsa omissio, non potest habere rationem fundamenti ex quo illa denominetur voluntaria, vt de se manifestum est, duo verò priora non sufficiunt ad rationem fundamenti proximi; quia fundamentum debet esse tale, quod non separetur ab omissione, sed infallibiliter eam inferat: potentia autem & debitum separentur ab illa, &

tam

tam in eo qui omittit quam in eo qui non omittit reperiuntur : Ergo præter illa tria debet dari actus, qui sit causâ omittendi, ad hoc vt omissio denominetur voluntaria in actu secundo, subindeque culpabilis.

Secunda ratio præcedenti affinis, potest sic proponi : Non potest dari peccatum sine exercitio libertatis : Sed libertas per puram omissionem actus exerceri nequit : Ergo pura omissio secluso, quocumque actu voluntatis, eam antecedente, vel concomitante, nequit esse peccatum. Maior constat, minor verò sic ostenditur. Exercitium voluntatis, vt liberæ, debet esse vitale : Sed pura negatio nequit esse vitalis : Ergo libertas per puram negationem aut omissionem actus exerceri nequit. Minor certa videtur, nam viuere in actu secundo est se mouere ab intrinseco : Sed voluntas non se mouet per negationem actionis & motus : Ergo negatio actionis non est vita, sed negatio vitæ. Maior verò suadetur primò : Voluntas, vt libera, est potentia vitalis : Ergo exercitium illius vt liberæ, est exercitium vitæ, & consequenter vitale. Secundò, voluntas carens omni actu est veluti mortua, vel saltem dormiens : Ergo pura negatio actus nequit esse vitalis. Tertiò, libertas in actu secundo est modus vitæ actualis, vel species illius : Ergo omne exercitium libertatis in actu secundo, debet esse vitale; non enim potest dari species sine genere, nec modus sine substantia rei cuius est modus. Demum non datur duplex vita in actu secundo, altera in negatione motus, altera in motu consistens : Ergo nec duplex libertas in actu

secundo, altera consistens in actu secundo, altera consistens in negatione seu omissione illius.

Huic rationi respondent Aversarij eodem modo quo præcedenti, nimirum voluntatem actu peccantem peccato omissionis, non vivere in actu secundo, physicè, & formaliter, bene tamen moraliter, & æquivalenter; quia omissio pura actus, quoad hoc quod est peccare, æquivalet actui physico, supposito quod homo possit, teneatur, & non faciat. Verùm, præterquam quod difficile intelligi potest, quomodo voluntas actu peccans peccato omissionis, physicè mortua vel dormiens sit, & tamen sit vivens moraliter formaliter, & physicè æquivalenter: hæc solutio confutata manet ex dictis contra responsionem ad præcedentem rationem; cum enim omne liberum voluntarium sit, si ut aliqua ommissio culpabilis sit, non sufficiat quod sit voluntaria moraliter & interpretatiuè, non sufficiet etiam quod sit libera moraliter, & interpretatiuè, seu æquivalenter.

Obijcies primò: Ut aliqua ommissio sit voluntaria, subindeque culpabilis & peccaminosa, sufficit quod aliquis possit, teneatur, & non faciat, ut docet D. Thomas supra qu. 6. art. 2. unde Iacobi 4. dicitur: *Scienti bonum, & non facienti, peccatum est illi*: Ergo ommissio, absque omni actu eam antecedente, vel concomitante, potest esse voluntaria & culpabilis. Quare idem S. Doctor hic qu. 71. art. 5. ad 2. ait quod *aliquid dicitur voluntarium, non solum quia cadit super ipsum actum voluntatis; sed quia in potestate nostra est, ut fiat, vel non fiat.*

Re-

Respondeo quod quando D. Thomas, & alij Theologi cum ipso, docent quod vt omis-
 sio sit voluntaria, sufficit quod homo possit,
 teneatur, & non faciat, ly *non facere*, non su-
 mitur purè negatiuè, & prout omnem suspen-
 sionem & negationem actus importat, sed
 priuatiuè & moraliter, secundùm quod talis
 negatio cau satur a voluntate; quare cùm vo-
 luntas non possit illam cau lare, nisi aliquem
 actum eam antecedentem vel concomitantem
 habeat, per ly *non facere*, non excluditur, sed
 subintelligitur actus voluntatis, omissionem
 concomitans, vel antecedens. Vnde quando
 Iacobi 4. dicitur: *Scienti bonum, & non fa-
 cienti, peccatum est illi*, ly *non facienti* intelli-
 gi debet de negatione voluntaria & libera in
 actu secundo, ad quam requiritur exercitium
 libertatis, vt supra ostendimus. Similiter
 quando S. Thomas ait, *aliquid dici volunta-
 rium, quia est in potestate nostra vt fiat vel non
 fiat*: Vel solum loquitur de voluntario in
 actu primo, vel intendit aliquid posse dici
 voluntarium in actu secundo, sine actu dire-
 cto, & immediatè ad ipsum terminato, quo-
 modo non negamus omissionem posse esse vo-
 luntariam & culpabilem, vt constat in eo qui
 vult studium, ludum, aut venationem, eo
 tempore quo tenetur interesse missæ sacri-
 ficio.

Obijcies secundò: Si Deus, instante obli-
 gatione alicuius præcepti affirmatiui, v. g. di-
 lectionis Dei, denegaret voluntati concursum
 suum ad omnem actum positium, cum huius
 præcepti adimplerione impossibilem, in ta-
 li casu posset non diligere Deum, subindeque

peccare peccato omissionis; & tamen tunc nullum actum cum huiusmodi præcepti impletione impossibilem eliceret, cum repugnet voluntatem sine concursu Dei operari: Ergo metaphysicè loquendo, & de potentia absoluta, non repugnat dari omissionem culpabilem, absque omni actu physico eam antecedente vel concomitante.

Respondeo, concessio Antecedente, negando consequentiam, licet enim in illo casu voluntas posset non diligere Deum, non posset tamen peccare peccato omissionis; quia cum exercitium libertatis debeat ab actu positivo incipere, & in casu posito nullus actus positivus in voluntate existeret, negatio amoris non esset in actu secundo libera & voluntaria, sed solum in actu primo, subindeque non esset moralis & imputabilis ad culpam, sed purè naturalis & physica.

§. II.

*Aliæ difficultates circa peccatum omissionis
breviter resolvuntur.*

QUæres primò, utrum omne opus de se incompatible cum observantia præcepti affirmativi, vitietur ex malitia omissionis?

Respondeo, si talis actus in omissionem influat per modum causæ vel occasionis, ex illa vitari, & esse peccatum; secùs verò si in illam nullo modo influat, sed ad eam merè per accidens & concomitanter se habeat.

Utraque pars manifesta est, nam actus qui

ter-

terminatur ad aliquid influens in omissionem per modum causæ vel occasionis, consequenter terminatur & influit in ipsam omissionem: Ergo ex illa vitiatur. E contra verò actus qui ad illam merè per accidens & concomitanter se habet, nullatenus ad eam terminatur, nec in illam influit, & per consequens, ex illa vitari nequit. Vtrumque explicari potest hoc exemplo: Si aliquis propter desiderium & aviditatem studendi omittat missam, studium illud est malum; quia quamvis de se bonum, est ratio & causa volendi aliquid malum, nimirum missæ omissionem. Si verò postquam homo ob pigritiam, vel laborem itineris, aut consimilem causam, decrevit non interesse sacro, & eo tempore quo vrget præceptum audiendi missam, studio vacet, studium illud ex omissione missæ non vitiatur; quia nullo modo in eam influit, sed ad eam merè per accidens & concomitanter se habet. Vnde hæc regula generalis statui potest, ad dignoscendum quando nam actus qui coniunctus est cum omissione, sit causa vel occasio illius, & quando ad illam merè per accidens & concomitanter se habeat. Si opera cum observantia præcepti impossibilia, supponant in voluntate firmum & efficax decretum seu propositum non observandi præceptum, tunc merè per accidens & concomitanter ad eius omissionem se habent; quia cum supponant causam sufficientem omissionis, prædictum scilicet voluntatis propositum, in eam de facto non influunt. Si verò tale propositum non supponant, in omissionem influunt, ut causæ vel occasiones illius.

Aduerte tamen, vt opera illa non censeantur influere in omissionem; requiri quod nulla sit spes mutandi propositum, sed illud moraliter perseueraturum sit; si enim sit spes reuocandi propositum, & verisimile sit quod illud mutabitur, opera cum adimpletione præcepti impossibilia, censetur influere in eius omissionem. Ex quo intelliges, eum qui propè horam duodecimam, in qua instabat præceptum audiendi sacrum, se somno dedit, post firmum omittendi propositum, non peccare se somnotradendo, quia in tam breui tempore nulla est spes mutandi propositum. E contra verò clericum nauigantem, & post firmum propositum non recitandi horas canonicas in tota nauigatione, proijcientem breuiarium in mare, peccare mortaliter illud proijciendo; quia in tam longa temporis mora qua nauigatio durare debet, posset retractare propositum, & verisimile est quod illud mutaret; pro projectionem verò breuiarij necessitatur ad omissionem præcepti, quamuis mutet propositum, & per consequens huiusmodi projectio est causa omissionis.

Quæres secundò, an actus qui est causa omissionis duplicem habeat malitiam specie diuersam, vnâ ex omissione quam causat, & alteram oppositam illi virtuti a qua procederet, si malam omissionem non causaret: v. g. vtrum studium causans omissionem sacri, sit non solum contra religionem, qua præcipitur auditio missæ, sed etiam contra virtutem studiositatis, quæ inordinatum studendi amorem regulare & moderari debet?

Respondeo illum vnâ tantum specie ma-
li.

litiam moralem habere , sumptam ex omissione quam causat . Qui enim omittit sacrum propter studium , non magis peccat , quam peccaret , si manendo otiosus absque tali actu ipsum omitteret , ut videtur per se notum : At si omitteret sacrum absque tali actu , per solam otiositatem , committeret vnicum peccatum , scilicet contra virtutem religionis : Ergo & qui omittit sacrum propter studium , solum contra virtutem religionis peccat , non verò contra virtutem studiositatis .

Dices : Omittens sacrum propter studium , hoc facit ex nimio affectu studendi : Sed ad virtutem studiositatis pertinet nimietatem in affectu studendi corrigere & moderari : Ergo qui omittit sacrum propter studium , facit contra virtutem studiositatis , & non solum contra virtutem religionis .

Respondeo nimietatem in affectu studendi duplicem esse : vna est intra propriam materiam , quando scilicet quis studet res prohibitas , vel inanes , aut quæ propriam facultatem superant : altera intra propriam materiam non est , sed ad aliam transfertur , ut quando quis studet , & a studio impeditur obseruantia præcepti spectantis ad materiam alterius virtutis . Prima constituit vitium curiositatis , & per virtutem studiositatis corrigitur ; secunda verò non a studiositate , sed ab illa virtute , cuius præceptum per studium impeditur , corrigi debet ; & huius conditionis est nimietas affectus studendi , impediens sacri auditionem , quando instat præceptum , quare non per studiositatem , sed per religionem corrigitur .

Quæres tertio, an omissio culpabilis in somno vel ebrietate contingens, sit in seipfa formaliter peccatum, vel solum peccati effectus?

Respondeo illam esse verè in se peccatum. Ratio est, quia vt aliquid verè sit & dicatur peccatum, & non solum effectus peccati, sufficit quod sit voluntarium indirectè & in sua causa: At omissio sacri contingens in somno, indirectè & in sua causa voluntaria est, cum supponamus emittentem, quando se somno dedit, illam prauidisse: Ergo illa in se formaliter peccatum est. Minor constat, maior verò triplici exemplo declaratur, & suadetur. In primis enim pollutio nocturna in somno contingens, licet non sit in se formaliter libera & voluntaria, quia tamen est libera & voluntaria in sua causa, puta in turpi cogitatione, vel in actu impudico, aut alio consimili actu, peccatum est, vt docet S. Thomas 3. p. qu. 80. art. 7. Item si quis voluntariè se inebriet, aut somno committat, prauidens quod in ebrietate, vel in somno, seruum occidet, non solum peccat quando dat causam, sed etiam quando de facto occidit, quamuis tunc nullam habeat libertatem formalem; quia nimirum talis occisio in sua causa libera & voluntaria est; vnde si tunc occidat Clericum, manet excommunicatus, vt docent Syluester, Paludanus, & alij. Demum quando aliquis peccat ex ignorantia vincibili, actus peccati est solum indirectè voluntarius & in causa, nempe ignorantia: Ergo ad peccatum sufficit voluntarium indirectum & in causa.

Confirmatur: Non plus voluntarij requiritur

tur ad peccandum, quam ad merendum, vel recipiendum validè aliquod Sacramentum: Sed ad merendum vel recipiendum validè aliquod Sacramentum, sufficit voluntarium indirectum & in causa: Ergo & ad peccandum. Maior videtur certa, minor etiam constat exemplo illius qui in vigilia habens propositum martyrij, vel baptismatis, nocte vel baptizaretur in somno, vel pro Christo occideretur; ille enim verè & baptismatis gratiam & martyrij aureolam, in hoc felici somno consequeretur, vt communiter docent Theologi. Cur ergo similiter omissio in somno vel ebrietate contingens, non poterit esse in se formaliter mala & peccaminosa, ratione actus voluntarij qui illam præcessit, in quo indirectè & tanquam in causa volita est. Nam vt talis actus influat de facto in omissionem euenientem in somnis, sufficit quod existat moraliter eo tempore quo contingit omissio: Atqui eo ipso quod non est retractatus, censetur existeret moraliter eo tempore quo contingit omissio: Ergo verè in illam influit moraliter, eique confert libertatem & moralitatem sufficientem, vt verè & formaliter sit in se mala & peccaminosa, quamvis in somno vel ebrietate contingat.


Dices, ex hac ratione & doctrina sequitur quod sacerdos ebrius aut dormiens poterit Sacramentum Eucharistiæ conficere, si ante somnum vel ebrietatem habuerit intentionem consecrandi, & faciendi quod facit Ecclesia, quia similiter talis consecratio erit libera & voluntaria indirectè & in causa. Sed nego sequelam, tum quia licet Christus prolatio-

nem verborum voluntarium solum in causa, ad dignitatem sacramenti eleuare potuerit, id tamen noluit, ob reuerentiam debitam sacramentis. Tum etiam, quia oportet sacramenta confici a ministro, cum morali certitudine materiæ debitæ: in somno autem aut in ebrietate talis certitudo esse nequit, quamuis enim ante somnum panem & vinum pro conficienda Eucharistia prope se relinqueret, postea in somno existens, aliam posset materiam applicare, & verba supra illam proferre. Ad id quod verba in somno vel ebrietate prolata, non sunt formaliter verba, defectu actualis significationis, sed duntaxat materialiter, sicut verba prolata a pica, vel a psittaco; subindeque non sunt idonea, nec sufficientia, ad conficiendum Eucharistiæ sacramentum.

Quæres quartò, an peccata commissionis & omissionis, ex eodem motiuo procedentia, sint eiusdem speciei?

Respondeo quod licet illa in esse physico considerata distinguantur specie, & plusquam specie (habent enim se in hoc genere sicut affirmatio & negatio, & sicut ens & non ens, inter quæ nulla datur conuenientia) si tamen considerentur in esse moris, sunt eiusdem speciei. Ita D. Thomas hic qu. 72. art. 6. ubi sic ait: *Si loquamur de specie peccati commissionis & omissionis formaliter, sic non differunt specie, quia ad idem ordinantur, & ex eodem motiuo procedunt: avarus enim ad congregandam pecuniam & rapit & non dat quæ dare debet, & similiter gulosus ad satisfaciendum gula, & superflua comedit, & ieiunia debita præ-*


prætermittit. Quibus verbis hanc rationem fundamentalem nostræ resolutionis insinuat: Actus humani & peccata habent speciem ex fine: Ergo si omissio & commissio ad idem ordinentur, & ex eodem motivo procedant, erunt eiusdem speciei in esse moris. Porro cum duplex sit finis actionum humanarum, alius qui dicitur finis operis, qui actui humano intrinsecus est & essentialis; alius qui vocatur finis operantis, qui tali actui accidentalis & aduentitiuus est; quando omissio & commissio ordinabuntur ad eundem finem operis, erunt eiusdem speciei essentialis in esse moris, & in ratione peccati, ut contingit quando ad idem vitium spectant; quando verò ordinabuntur ad eundem finem operantis, erunt eiusdem speciei accidentalis in esse moris, & in ratione peccati, ut patet, si quis omissionem audiendi sacrum, & commissionem furti, ordinet ad mœchiam, vel homicidium.



C A P V T X.

De peccato mortali & veniali.

Plures & graues circa peccatum mortale & veniale occurrunt difficultates, quas breuiter hic expediemus & resoluemus.



§. I.

Præcipua inter peccatum mortale & veniale discrimina.

S Vppono primò tanquam certum, peccatum veniale distingui natura sua a mortali, & non solùm ex parte subiecti seu peccantis, cui omnia sint mortalia, si sit infidelis, aut reprobus, omnia venialia, si fidelis, aut prædestinatus, vt volunt Vnicles, Lutherus, Caluinus, alijque hæretici. Neque ex sola Dei misericordia, quædam nolentis punire morte æterna, licet de se omnia sint ea iustè punibilia, vt olim docuerunt Gerson & Almainus.

Probatum primò ex scriptura: Christus enim Luca 9. vocat quædam peccata festucas in oculo, alia trabes: At festucæ non possunt per se excæcare oculum in quo sunt: Ergo leuia quædam sunt peccata, quæ non tantùm actu non extinguunt gratiam, quæ est animæ lumen, sed quæ nec eam extinguere possunt, subindeque de se & ex natura ac leuitate intrinseca, venialia sunt. Item Paulus 1. ad Corinth. 3. quædam peccata quæ iusti committunt, retinendo tamen adhesionem viuam ad Christum, vt fundamentum suum, comparat fæno ac stipulæ superimpositis fundamento, vt explicant Cyprianus in ep. ad Antonianum, Ambrosius serm. 2. in psal. 138. & Augustinus lib. 21. de ciuit. cap. 26. Sed fænum & stipula non possunt ex se destruere fundamentum: Ergo nec illa peccata, ex se &

ex

ex natura sua, sunt capacia destruendi gratiam & charitatem, per quam Christo ut fundamento unimur.

Probatur secundò ratione quam insinuat S. Thomas hic qu. 88. art. 1. Peccatum est quædam animæ infirmitas, unde sicut inter infirmitates corporis quædam sunt graues, quæ mortem inducunt, auferendo principium vitæ; quædam verò leues, quæ in eo periculo non constituunt, quamuis ad id disponant; ita & inter peccata, aliqua de se & ex natura sua sunt graua, quæ mortem spirituales animæ inferunt, eam priuando gratia & charitate; alia leuia, quæ licet ad talem effectum disponant, de se tamen illum producere non valent.

Addo quod Gersonis sententia reprobata videtur a Pio V. & Gregorio XIII. qui hanc Michaelis Baij p oppositionem damnarunt: *Nullum est peccatum nature sua veniale, sed omne peccatum meretur penam æternam.* Unde post hanc censuram talis opinio ad minus temeraria censenda est.

Dices, offensa infinita meretur de se & ab intrinseco penam æternam, & secundum durationem infinitam: Sed peccatum veniale, cum sit offensa Dei, qui est infinitus, est offensa infinita: Ergo de se & ab intrinseco penam æternam meretur, subindeque non habet ex leuitate sua intrinseca quod veniale sit, sed tantum ex diuina lege & misericordia, quæ puniens illud citra condignum, talem penam ei non imputat. Unde Augustinus varijs in locis asserit, neminem fore saluum, si absque misericordia iudicetur a Deo.

Respondeo, concessa maiori, negando minorem, licet enim peccatum veniale sit offensa Dei insigniti, non est tamen offensa infinita, sicut peccatum mortale; quia non offendit illum simpliciter, tollendo ab eo rationem ultimi finis secundum affectum, sicut culpa mortalis, sed tantum secundum quid, diuertendo hominem ab illo, quatenus diligit aliquod obiectum creatum præter ordinem ultimi finis, ut magis infra declarabitur.

Ad Augustinum verò dicendum, ipsum solum velle, neminem re ipsa consecuturum vitam æternam sine misericordia, quatenus venialia etiam debent remitti ut quis saluus fiat, & ingrediatur regnum cælorum, in quod nihil immundum & coinquinatum intrare potest. Quod autem in hoc sensu loquatur patet ex lib. 9. confess. cap. ultimo, ubi rogat lectores, ut orent pro matre sua defuncta, ut (inquit) consequatur Dei misericordiam: Atqui defunctis non remittuntur peccata mortalia, sed venialia tantum: Ergo istorum remissio est misericordia quædam, necessaria cuique ut recipiatur in vitam æternam.

Suppono secundò, discrimen quod ex natura rei inter peccatum mortale & veniale reperitur, non consistere in eo quod mortale sit contra præceptum, veniale verò contra consilium, ut docent Scotus, Gabriel, & alij: Nam sicut consilium ad nullum peccatum obligat, ita nec contra illud agere vllum est peccatum: unde Apostolus 1. Corinth. 7. *De virginibus præceptum Domini non habeo, consilium autem do*, Et paulò post: *Si nupserit virgo, non pec-*

peccauit . Ratio verò quare consilium ad nullum obliget peccatum , est quia non tenetur homo in suis actionibus sequi quod perfectius est .

Dices , vouere vel proponere facere contra consilia , peccatum est : Ergo & agere contra illa . Respondeo ideò votum contra consilia esse peccatum , quia vanum , cum careat debita materia melioris boni , in qua omne votum , vt obliget , fundari debet . Propositum verò agendi contra consilia , nequaquam peccatum est ; si enim (teste Apostolo) virgo non peccat , si nubat , a fortiori non peccabit , quando nubendi propositum concipiet .

His præmissis breuiter hic declaranda sunt præcipua inter peccatum veniale & mortale discrimina . Primum ac præcipuum est , quod peccatum mortale includat saltem virtualiter magnum Dei contemptum , in eo consistentem , vt homo præferat amorem creaturæ amori Creatoris , & præ amore illius non curet dissoluere amicitiam & coniunctionem cum Deo ultimo fine . Veniale verò , hoc ipso quod amicitiam & coniunctionem cum Deo ultimo fine non dissoluit , virtualement hunc contemptum Dei ultimi finis non includit .

Ex hoc discrimine , quod magis infra declarabitur , oritur aliud assignatum a D. Thoma qu. 7. de malo art. 1. his verbis , *Si charitas excludatur est peccatum mortale , si autem sit talis defectus rectitudinis qui charitatem non excludat , erit peccatum veniale* . Ab hoc enim contemptu habet peccatum mortale quod

• quod charitatem excludat, non autem veniale, in quo talis contemptus non includitur. Hinc desumitur denominatio illa mortalis & venialis in peccato, cum enim charitas, qua anima Deo coniungitur, sit veluti forma qua vivit vita supernaturali peccatum quod illam destruit, rectè mortale dicitur, utpote causans mortem spirituales in anima; illud verò quod eam relinquit in subiecto, veniale appellatur; quia non excludit principium veniæ, sed relinquit in subiecto aliquid per quod eam obtinere potest, nempe charitatem.

Ex hoc sequitur tertium discrimen, in eo situm, quod peccatum mortale importat defectum ordinis ad ultimum finem, seu aversionem & deordinationem ab ultimo fine; veniale verò habet solum deordinationem circa ea quæ sunt ad finem, conservato ordine ad ultimum. Cum enim charitas sit quæ convertit seu ordinat hominem in ultimum finem, consequens est ut peccatum quod charitatem excludit, auertat & deordinet ab ultimo fine; illud verò quod eam non expellit, talem aversionem & deordinationem non causet.

Ex hoc discrimine aliud oritur, nempe quod mortale inordinationem irreparabilem inducat, non autem veniale. Nam ut discursit D. Thomas hic qu. 88, art. 1. ultimus finis in moralibus est sicut primum principium in speculativis, unde sicut error circa prima principia est incorrigibilis seu irreparabilis; ita peccatum quod inducit aversionem ab ultimo fine, reparari nequit per ali-

quod

quod principium intrinsecum, sed solum per virtutem diuinam; è contra verò illud quod non importat inordinationem a fine, sed tantum a medijs, reparari potest per aliquod principium intrinsecum, scilicet per rectam intentionem finis, sicut error circa conclusiones corrigi potest ex recta cognitione principij. Ex quo nascitur quintum discrimen, consistens in eo quod peccatum mortale inducit reatum poenae aeternae, veniale autem poenam solum temporale meretur. Nam vt ratiocinatur D. Thomas hic. qu. 87. art. 3. peccatum ex hoc inducit reatum poenae quod peruertit ordinem diuinæ iustitiæ, vnde illud poenam aeternam meretur, quod inordinationem quantum est de se irreparabilem, subindeque aeternam importat; illud verò meretur poenam temporalem, quod dicit inordinationem ab intrinseco reparabilem, subindeque de se transitoriam & temporalem.

Vltimum discrimen consistit in eo quod peccatum mortale est contra legem, peccatum autem veniale non est propriè contra legem, sed præter vel extra legem. Nam ait S. Thomas hic qu. 88. art. 1. ad 1. *Venialiter peccans non facit quod lex prohibet, nec prætermittit id ad quod lex per præceptum obligat, sed facit præter legem, quia non obseruat modum rationis quem lex intendit.* Et qu. 7. de malo art. 1. ad 1. *Communiter dicitur quod peccatum veniale non est contra legem, sed præter legem, quia si in aliquo recedit ab ordine legis, non tamen ipsum corrumpit, quia non corrumpit dilectionem, quæ est plenitudo legis.*

Confirmatur: Triplex est genus peccati venialis, aliud est veniale ex genere suo, quod semper manet veniale, & intra propriam materiam nunquam fit mortale, vt verbum otiosum; aliud est veniale ex imperfecta deliberatione, vt turpis cogitatio, vel motus infidelitatis, iudicium ante vertens; aliud demum est veniale ex leuitate materiæ, vt furtum pomi: nullum autem ex his venialibus est contra legem, non quidem primum, quia actus otiosus est de se indifferens, & caret solum ordine ad bonum finem; nec secundum, vel tertium, quia lex cum agentibus liberis imponatur, ab ijs solum violatur qui liberè & deliberatè operantur; & cum bonum commune intendat, non violatur simpliciter illis actibus, qui ob paruitatem materiæ, nullum notabile nocumentum inferunt.

Ex dictis inferes primò, malitiam peccati mortalis, & malitiam venialis, essentialiter & specie inter se differre; nam, vt supra ostendimus, inordinatio & malitia peccati mortalis, pertingit vsque ad finem, & ipsum destruit; inordinatio autem seu malitia peccati venialis, non pertingit vsque ad finem, sed sistit in ipsis medijs, quæ peccans non refert actualiter ad finem, sed duntaxat habitualiter, vt infra dicemus: Sed inordinatio & malitia pertingens ad finem, essentialiter & specie differt ab illa quæ sistit in medijs, & quæ vsque ad finem non pertingit: Ergo malitia peccati mortalis essentialiter & specie differt a malitia peccati venialis.

Dices: Illa peccata sunt eiusdem speciei, quorum obiecta specie non differunt: Sed obie-

cta

Et a peccati mortalis & peccati venialis interdum non differunt specie , vt pater in obiecto furti ; nam eiusdem speciei est res aliena, siue sit in parua, siue in magna quantitate : Ergo peccatum mortale & veniale sunt eiusdem speciei in ratione peccati .

Respondeo distinguendo Maiorem: quorum obiecta specie non differunt , formaliter & in esse obiecti, concedo maiorem : materialiter tantum & in esse rei , nego maiorem . Similiter distinguo minorem : Obiecta peccati mortalis & venialis interdum non differunt specie, materialiter & in esse entis , concedo minorem : formaliter & in esse obiecti , nego minorem ; nam sub hac ratione attenditur eorum differentia penes habitudinem improprietatis ad vltimum finem , quæ est diuersæ rationis & speciei in obiecto mortaliter & venialiter tantum peccaminoso, cum primum dicat improprietatem auersiuam & destructiuam ipsius finis, non verò alterum ; quæ diuersa improprio constituit obiecta formaliter diuersa in ratione obiectorum , & refundit in actus ad illa terminatos distinctionem essentialem in ratione peccati seu mali moralis .

Inferes secundò , peccatum veniale disponere quidem ad mortale , nunquam tamen ita posse aggrauari, vt transeat in mortale, vel ex pluribus venalibus possit fieri vñum mortale. Ita D. Thomas hic qu. 88. art. 3. 4. & 5. Pater hoc corollarium quantum ad singulas partes . In primis enim quod peccatum veniale disponat ad mortale, manifestum est, quia homo negligendo venialia paulatim & sensim
assue-

Assuescit contemptui & transgressioni legis, quò fit vt tandem in maiora peccata incidat, iuxta illud Proverb. *Qui spernit modica, paulatim decidet*. Vnde Chrysostomus homil. 87. in Matth. hoc mirabile paradoxum docet, nimirum maiori sollicitudine aliquo modo cauendum esse a venialibus, quàm a mortalibus: *Solet mihi (inquit) nonnunquam non tanto studio magna videri peccata esse vitanda, quam parua & viliora: illa enim vt auersemur, ipsa peccati natura efficit; hæc autem ipsa re, quia parua sunt, desides reddunt, & dum contemnuntur, non potest ad expulsionem eorum animus generosè insurgere, vnde citò ex paruis magna fiunt, negligentia nostra.*

Quod verò peccatum veniale nunquam possit ita augeri & aggrauari, vt transeat in mortale, non minùs euidentis est: nam ea quæ sunt ordinis inferioris, quantumcumque intra propriam speciem augeantur, nunquam possunt pertingere ad ea quæ sunt ordinis superioris: Sed malitia peccati venialis est inferioris ordinis, & diuersæ speciei a malitia mortalis, cùm ista sit auersua ab vltimo fine, & destructiua ipsius, non verò illa, vt ex supra dictis patet: Ergo &c.

Ex hoc probata manet tertia pars corollarij, nam peccata venialia, quantumcumque multiplicentur, non possunt auertere ab vltimo fine, nec reatum poenæ æternæ inducere: Ergo non possunt facere vnum mortale per integritatem, sicut nec ex multis punctis simul iunctis potest linea consurgere.

Dices, plura furta leuia multiplicata, constituunt tandem vnum peccatum mortale: Er-

ergo ex multis venialibus vnum mortale potest effici.

Responden negando Antecedens, nam quando aliquis committit plura furta leuia, ex illis simul iunctis & collectis, vnum peccatum mortale non resultat, sed vltimum furtum, quo peruenitur ad magnam materiæ quantitatem, est peccatum mortale; quia licet furtum sit rei secundum se leuis, ex connotatione tamen furtorum præcedentium, cum quibus moraliter coniungitur, redditur furtum rei grauis, & graue damnum infertur proximo.

§. II.

Qui mortaliter peccat, vltimum finem in creatura, virtualiter saltem & interpretatiuè, constituit.

ITa communiter docent Theologi contra Adrianum; Ratio est, quia omnis qui mortaliter peccat, plus appetitiuè diligit creaturam quam Deum, siquidem eius voluntatem & præceptum propter illam contemnit, iuxta illud Ioan. 12. *Dilexerunt gloriam hominum plusquam Dei*: Sed finis est id quod maximè diligitur: Ergo qui mortaliter peccat, vltimum finem in creatura constituit.

Confirmatur ex Augustino lib. 83. quæstionum qu. 30. vbi totam peruersitatem humanæ vitæ collocat in hoc quod homo fruatur vtendis, & vtatur fruendis; Ar ex eodem S. Doctore lib. 10. de ciuit. cap. 10. & lib. 1. de doctrina Christiana cap. 4. & 5. frui non est aliud

aliud quam alicui tanquam vltimo fini adhærere: Ergo qui mortaliter peccat, & aliquam creaturam inordinatè & contra Dei præceptum diligit, illi vt fini vltimo adhæreret. Vnde ad Ephes. 5. avaritia idolorum seruitus appellatur, quia vt ibidem lect. 3. obseruat S. Thomas: *Idolatria est quando honor soli Deo debitus impenditur creaturæ: Deo autem duplex honor debetur, scilicet vt in eo finem nostrum constituamus, & vt in eo fiduciam nostram finaliter ponamus: Ergo qui hoc in creaturis ponit, reus est idolatriæ. Hoc autem facit auarus, qui finem suum in re creata ponit, & etiam totam suam fiduciam.*

Dices: Si peccans moraliter vltimum finem in creatura constitueret, homo posset simul habere plures vltimos fines, cum possit plura peccata, habentia diuersa obiecta disperata, committere: Sed hoc implicat contradictionem, vt in tractatu de vltimo fine cap. 1. §. 3. ostensum est: Ergo & illud.

Huic obiectioni, quam Caietanus *argumentum Nouitiorum* appellat, respondeo negando sequelam maioris, & ad illius probationem dico, creaturam in qua mortaliter peccans finem vltimum constituit, non esse illam quæ est obiectum peccati mortalis (hæc enim est tantum finis proximus & intermedius) sed bonum proprium & priuatum ipsius peccatoris, non præcisè secundum se consideratum, sed vt connotans priuationem gratiæ & charitatis. Ita Caietanus supra quæst. 1. art. 5. vbi hæc scribit: *Peccator nec in gulæ nec in iniustitiæ apparenti bono, seorsum constituit vltimum finem, cuius signum est, quia neu-*
trum

trum sibi sufficit, sed omnia commutabilia bona ad quæ peccator conuertitur, referuntur ad unum communem finem, qui est simpliciter ultimus sibi, scilicet ipsemet, quoniam omnia appetit ut conferentia ad bonum proprium, ita quod huiusmodi bona non appetentur ut fines ultimi simpliciter, sed ut fines ultimi partiales, ut scilicet partes boni proprii, quod est simpliciter finis ultimus illius, & intentum in omni peccato mortali. Quam doctrinam desumpsit ex S. Thoma in 2. dist. 42. qu. 2. art. 1. ubi sic ait: *Finis ultimus in amore commutabilium bonorum est ipse homo, propter quem alia quærit, & ideo si radix peccatorum accipitur ex parte ipsius peccantis, erit una; si autem sumatur ex parte eorum quæ propter seipsum peccans quærit, erunt plures.* Ratio etiam huic doctrinæ & solutioni suffragatur: Illud enim est finis ultimus peccatori, propter quod & sub cuius ratione appetit omnia bona particularia quæ prosequitur: Sed quidquid peccator appetit, appetit sibi ipsi, & sub ratione boni proprii & priuati: Ergo illud est finis ultimus peccatoris. Maior patet, minor probatur. Cum amor sit quædam inclinatio fundata in aliqua natura, & in ipsa ut ita dicam radicata, semper tendit bonum ipsi naturæ coniunctum & conueniens; aliàs non corresponderet suo principio radicali, nec principium & terminus illius inclinationis inter se proportionem haberent. Vnde cum charitas radicetur in gratia sanctificante, quæ est diuinæ naturæ participatio, & ut sic loquar quædam natura deifica, semper inclinat iustum in bonum ipsius Dei, & omnes eius

actus

actus bono diuino subiecit & subordinat; quare Apostolus ait quod *charitas non querit quæ sua sunt*. E contra verò philantia seu amor inordinatus sui, qui charitati opponitur, cum dimanet a natura corrupta & vitiosa, & in ea radicetur, semper tendit & inclinat peccatorem in bonum proprium & priuatum, iuxta illud eiusdem Apostoli: *Omnes quæ sua sunt querunt*. Vnde Aristoteles 9. Ethic. cap. 8. prauos seu peccatores vocat *philantos*, seu amatores sui. Et Augustinus 14. de ciuit. cap. 28. docet quod sicut amor Dei, vsque ad contemptum sui, ædificat ciuitatem Ierusalem, seu iustorum, sic amor sui, vsque ad contemptum Dei, ædificat ciuitatem Babylonis, seu peccati.

Dixi finem vltimum peccantis mortaliter esse bonum proprium & priuatum, non præcisè & secundum se consideratum, sed vt connotans priuationem gratiæ; nam vltimus finis peccantis mortaliter, est irreferibilis in Deum, & ipsi oppositus: bonum autem proprium, secundum se non importat talem oppositionem & irreferibilitatem, sed abstrahit a relatione vel exclusionem relationis in finem supernaturalem; connotando tamen gratiæ priuationem, quæ est in quolibet peccante mortaliter, efficitur omnino irreferibile in Deum, & ipsi oppositum. Ex quo intelliges, omnes actus existentis in peccato mortali, non esse malos & peccaminosos, nec per omnes peccatorem, vltimum finem in creatura constituere; nam licet omnes sistant in bono proprio, & nullus ad supernaturalem ordinem transeat; non tamen sistunt in tali bono priuati-

uatiuè, excludendo gratiam & charitatem, per quam bonum proprium ad bonum supernaturale, & in Deum vt vltimum finem potest referri. Vnde existens in peccato mortali potest elicere aliquos actus honestos, & moraliter bonos, sicut colere parentes, subuenire egenis diligere amicos &c. vt dicemus in tractatu de gratia.

§. III.

Quem finem vltimum actu intendat ille qui venialiter peccat?

Ratio dubitandi est, quia ille qui peccat venialiter, non potest habere Deum pro vltimo fine talis cum peccatum veniale non sit in Deum, vt vltimum finem ordinabile; nec etiam creaturam, alioquin non venialiter, sed mortaliter peccaret, cum sit peccatum mortale, vltimum finem in creatura constituere.

Aliqui, vt ab hac graui difficultate facile se expediant, dicunt peccantem venialiter nullum habere finem vltimum in particulari, sed solum in communi, scilicet bonum satiatuum appetitus, seu beatitudinem in communi, in quam omnes actiones siue bonæ siue malæ possunt actu referri, iuxta illud Boetij lib. 2. de consolat. prosa 2. *Omnis mortalium cura, quam in triplicium studiorum labor exercet, diuerso calle procedit, sed ad unam beatitudinis finem nititur pervenire.* Ita P. Contensonus tomo 3. pagina 162. Verum hæc sententia communiter a nostris Thomistis

reijcitur, ex eo quod in omni operatione humana homo agit propter aliquem finem ultimum materiale, seu in particulari, verum vel apparentem, ut ostendimus in tractatu de beatitudine cap. 1. §. 2. Sed peccatum veniale, quando fit cum deliberatione, est verè & propriè actio humana, ut constat: Ergo habet aliquem finem ultimum, nō solum formalem & in communi, scilicet rationem boni ut sic, sed etiam materiale & in particulari, seu rationem illam boni ut sic, ut determinatam, & contractam ad aliquod bonum particulare, verum, vel apparens, subindeque vel ad Deum, vel ad creaturam.

Alij existimant peccantem venialiter habere pro fine negativè ultimo sui actus, creaturam illam quam inordinatè diligit, & quæ est obiectum peccati venialis. Ita Suarez, Vasquez, & alij Recentiores communiter. Sed hic etiam modus dicendi displicet nostris Thomistis, quia finis ultimus negativè dicitur ille qui ad finem ulteriolem non ordinatur, ut illi Authores dicunt: Sed creatura illa quam peccans venialiter, inordinatè diligit, & quæ est obiectum peccati venialis, sæpe ordinatur ad finem ulteriolem, ut patet in eo qui furatur assem ad dandam eleemosynam, vel qui dicit mendacium leve ad salvandam vitam proximi; imò semper venialiter peccans, refert obiectum peccati venialis ad bonum proprium & priuatum, cum omnis inclinatio tendat ad bonum proprium & perfectum illius naturæ a qua dimanat, & in qua radicatur, seu illius suppositi in quo talis natura existit; Ergo creatura illa quæ est obiectum

ctum peccati venialis, non est, nec esse potest, finis ultimus, etiam negatiuè, peccantis venialiter.

Dico igitur, iustum venialiter peccantem, respicere bonum proprium & priuatum, vt ultimum finem, non simpliciter & absolutè, sed secundum quid & cum additò, nempe in ratione finis præcisè actualis.

Prima pars patet ex supra dictis, cum enim actus qui in homine iusto non imperantur a charitate, non habeant aliud principium in quo actualiter radicentur & fundentur, quam propriam operantis naturam, non possunt habere alium finem in quem actualiter referantur, quam bonum proprium & perfecti iustum talis naturæ, seu suppositi in quo illa existit; aliàs inclinatio non corresponderet suo principio radicali, seu principium & terminus inclinationis non haberent inter se proportionem, vt §. præcedenti dicebamus.

Secunda verò pars, nempe quod tale bonum non sit finis simpliciter & absolutè ultimus peccantis venialiter, ex eo constat quod finis simpliciter & absolutè ultimus, omnem relationem tam habitualement quam actualem ad ulteriorem finem excludit: Sed bonum proprium & priuatum in iusto peccante venialiter, per habitum charitatis est habitualiter relatum in Deum: Ergo non potest dici nec esse finis absolutè & simpliciter ultimus illius, sed cum addito tantum diminuyente, nempe in ratione finis præcisè actualis, seu per exclusionem duntaxat relationis actualis in Deum, non exclusa habituali, quod est esse finem ultimum solum secundum quid.

Sed quæres quid dicendum sit de illo qui est in statu peccati mortalis, & venialiter peccat, in illo enim per habitum charitatis bonum proprium & priuatum non est habitualiter relatum in Deum: Ergo habebit rationem vltimi finis simpliciter.

Respondeo quod iste, etiam dum venialiter peccat, non habet bonum priuatum pro vltimo fine simpliciter, sed tantum secundum quid, quia vt §. præcedenti dicebamus, de ratione finis vltimi simpliciter, est quod non solum præscindat ab ordine ad finem vltiorem, sed etiam quod talem relationem posituè excludat: licet autem ille qui non est in statu gratiæ, per peccatum mortale tendat in bonum priuatum, excludendo relationem eius in Deum vt vltimum finem; tamen quando peccat venialiter, tendit in bonum proprium, præscindendo solum a tali relatione, non verò posituè excludendo illam, vt ibidem declarauimus. Vnde licet peccans mortaliter, constituat in bono proprio & priuato vltimum finem simpliciter, non tamen ille qui solum venialiter peccat.

Dices, peccans venialiter non vtitur creatura illa circa quam peccat, & quæ est obiectum peccati venialis, quia vti creaturis nullam dicit inordinationem: Ergo illa fruitur, cum non detur medium inter fruitionem & vsum, iuxta illud Augustini: *Omnis qui amat aliquid, aut amat vtens, aut fruens*: Sed fruito est tantum respectu vltimi finis, vt docet D. Thomas supra q. 11. art. 5. Ergo peccans venialiter constituit vltimum finem in illa creatura quam inordinate diligit, & quæ est

est obiectum peccati venialis .

Respondeo, dato Antecedenti, negando consequentiam, & ad eius probationem dico, inter fruitionem & bonum vsum dari aliquid medium, nempe vsum malum & illicitum, qui propriè dicitur abusus, in quo veniale peccatum consistit, vt docet S. Bonaventura in 2. dist. 42. art. 2. quæst. 1. his verbis: *Si quæras quid sit peccatum veniale, vtrum sit vsum vel fruitio? dicendum quod neque est vsum, neque fruitio, sed abusus. Vnde cum Augustinus dicit, omnis qui amat aliquid, aut amat vtens, aut fruens, accipit largè vsum & fruitionem, vsum pro omni amore relato siue directè vel indirectè, fruitionem pro amore non relato. Quæ doctrina ex ipso Augustino desumpta est lib. de doctrina Christiana cap. 4. vbi præter fruitionem, & licitum vsum, ponit vsum illicitum eumque abusum appellat.*

§. IV.

Peccatum mortale, in ratione offensæ, continet malitiam & gravitatem in esse moris simpliciter infinitam.

Probatur hæc assertio triplici ratione. Prima & fundamentalis est: Gravitatis offensæ crescit iuxta mensuram dignitatis personæ cui irrogatur: Sed persona offensa per peccatum mortale, scilicet Deus, est dignitatis infinitæ simpliciter: Ergo peccatum mortale, in ratione offensæ, est gravitatis simpliciter infinitæ. Minor & consequentia patent.

Maior verò passim docetur ab Aristotele & D. Thoma, & exemplis conuincitur. Iniuria enim irrogata plebeio, minor est illa quæ irrogatur militi; illa quæ militi infertur, minor ea quæ infertur equi; & hæc minor illa qua offenditur Princeps; quia Princeps equitem, eques militem, miles plebeium excedit in dignitate. Hanc rationem insinuat Saluianus lib. 6. de prouid. cap. 7. his verbis: *Semper per dignitatem iniuriam perferentis, crescit culpa facientis, quia necesse est, quantò maior est persona eius qui contumelia patitur, tantò maior sit noxa eius qui facit. Et hinc est quod legimus in lege, etiam eos qui videntur contra mandatum sacrum leuia fecisse, seuerissimè tamen esse punitos, ut intelligeremus scilicet, nihil ad Deum pertinens, leue esse dicendum; qui etiam quod videbatur exiguum esse culpa, grande hoc faciebat diuinitatis iniuria.*

Communis huius argumenti solutio est, offensam non crescere arithmeticè, hoc est ad æqualitatem, ex dignitate personæ cui irrogatur, sed solum geometricè, hoc est secundum proportionem. Vnde ex hoc quod Deus per peccatum offensus, sit dignitatis infinitæ simpliciter, non sequitur quod peccatum, in ratione offensæ, sit grauitatis simpliciter infinitæ, sed solum quod excedat offensas omnes irrogatas creaturis, & sit superioris ordinis ad illas.

Sed contra: Ideò Deus offensus communicat offensæ contra ipsum commissæ grauitatem ordinis superioris, quia ipse superioris ordinis est: At non solum est dignitatis ordinis

superioris , sed etiam dignitatis simpliciter infinitæ : Ergo offensæ contra ipsum commissæ communicat grauitatem simpliciter infinitam .

Confirmatur & magis illustratur hæc ratio : Deus per peccatum offensus non est minus ex se potens dare infinitatem simpliciter , quam superioritatem ordinis , offensæ sibi irrogatæ ; & aliàs ex parte offensæ , non est assignabilis ratio cur vnum & non aliud participet : Ergo grauitas offensæ Deo illatæ , non solum est ordinis superioris ad offensas omnes irrogatas creaturis , sed etiam infinita simpliciter .

Dices , personam infinitam impediri ne communicet infinitam grauitatem offensæ ex limitatione conatus peccatis : sicut enim obiectum infinitum , si finito modo attingatur , actui infinitam illi perfectionem non confert , vt constat in visione beatifica , & in actu charitatis ; ita maiestas diuina , quamuis sit infinita , quia tamen attingitur a peccante , per actum limitatum & finitum , non transfundit malitiam & grauitatem infinitam in offensam quam illi irrogat .

Sed contra : Licet limitatio conatus & moditendendi in obiectum , impediat ne actus infinitam bonitatem vel malitiam in esse physico , ab obiecto vel persona in quam tendit desumat , vt patet in exemplis adductis , non obstat tamen quin ab illis accipiat infinitum valorem aut malitiam in esse moris , vt constat in actibus meritorijs & satisfactorijs Christi : licet enim in ordine physico , & in genere entis , finiti & limitati essent , vt pote

procedentes ab anima & potentijs eius, quæ in ordine physico finitæ & limitatæ perfectionis erant, nihilominus limitatio illa physica non obstabat, quin a persona Verbi traherent dignitatem & valorem infinitum moraliter, vt præter Scotum omnes ferè Theologi docent in tractatu de incarnatione: Ergo pariter limitatio conatus, & modi tendendi actus in personam offensam, non impedit, quin a persona offensa infinitæ dignitatis, actus offensiuus trahat gravitatem & malitiam in genere moris infinitam.

Confirmatur: Conatus peccantis, seu modus tendendi in Deum, actu offensiuo conueniens, non solum est finitus, sed etiam inferioris ordinis ad personam offensam: Atqui talis inferioritas ordinis non obstat quin persona offensa, quia superioris ordinis est, tribuat offensæ gravitatem ordinis superioris: Ergo nec etiam obstare poterit, quin persona infinita, quia infinita est, prauitatem infinitam illi communicet.

Secunda ratio sumitur ex D. Thoma in 2. sent. dist. 42. q. 1. art. 5. in corp vbi hæc habet: *Dicendum quod ratio quare mortale peccatum ad eternam pœnam obligat, potest sumi ex tribus. Primò ex parte eius in quem peccatur, qui est infinitè magnus, scilicet Deus, unde & offensa illius infinita pœna digna est, quia quantò est dignior in quem peccatur, tantò peccatum magis puniatur. Et in resp. ad 2. Ex hoc (inquit) quod contra infinitum peccat, debetur sibi pœna infinita; non autem potest esse infinita acerbitate, quia in creatura finita non potest esse qualitas infinita; sed compensatur per*
du-

durationem infinitam. Ex qua doctrina hoc argumentum pro nostra sententia desumo: Sicut causa efficiens continens effectum moraliter infinitum, non potest non esse infinita in genere moris, alioquin effectus suam causam principalem excederet in eo genere in quo est causa: Atqui peccatum mortale, in ratione offensæ, efficienter moraliter continet infinitum effectum, cum mereatur poenam infinite acerbam, ut constat ex verbis D. Thomæ iam relatis: Ergo inquantum est offensæ Dei, est infinitum moraliter, seu continet gravitatem & malitiam in esse moris simpliciter infinitam.

Confirmatur: Ex eo colligunt Theologi in Tractatu de Incarnatione contra Scotum, satisfactionem Christi continere valorem simpliciter infinitum in esse moris, quia gaudet vi satisfactoria sufficiente pro culpis sine categorematicè infinitis: Ergo vis meritoria poenarum sine categorematicè infinitarum, arguit in peccato mortali infinitatem simpliciter in ratione offensæ.

Tertia ratio pro nostra assertionem sumitur ex doctrina quam tradunt communiter Theologi in tractatu de Incarnatione, agendo de Christi satisfactione, ibi enim docent satisfactionis valorem ita crescere ad incrementum personæ satisfaciens, ut quando hæc est infinitæ dignitatis, communicet actui satisfactorio valorem infinitum simpliciter, ex quo inferunt satisfactionem Christi fuisse valoris simpliciter infiniti: Atqui similiter gravitas offensæ crescit ad incrementum dignitatis personæ offensæ, ut prima ratione ostendimus,

mus, & varijs exemplis declarauimus: Ergo ex persona infinitæ dignitatis, qualis est Deus, per peccatum offensus, accipiet grauitatem simpliciter infinitam in esse moris.

Respondent Aduersarij negando paritatem, hoc enim (inquiunt) inter satisfactionem & offensam reperitur discrimen, quod persona satisfaciens comparatur ad satisfactionem, non vt obiectum, sed vt subiectum, quod inducit rationem formæ moralis, subindeque seipsa illam dignificat formaliter & valorem satisfactorium influit ipsi æqualem, atque adeò infinitum, si talis persona infinita sit. E contra verò persona offensa comparatur ad iniuriam ipsi illatam, non vt subiectum, sed solum vt obiectum; vnde non induit rationem formæ moralis respectu illius, nec se ipsa grauitat offensam, & per consequens illa non constituitur infinitè grauis ex infinita dignitate personæ offensæ.

In hoc discrimine tota contrariæ sententiæ probabilitas consistit. Verum illud falso nititur fundamento, nimirum quod persona offensa comparetur solum per modum obiecti, ad iniuriam ipsi latam, quod falsum esse ostendo tripliciter. Primò ex vulgari illo proloquio: *Honor est in honorante, iniuria autem in persona offensa*. Secundò ex differentia quæ inter peccatum in ratione malitiæ, & in ratione offensæ reperitur. nam sub priori consideratione dicitur & est malum peccantis, sub posteriori non ipsius peccantis, sed Dei offensi malum dicitur: Ergo in ratione offensæ, Deum vt subiectum morale respicit. Tertiò ex communi modo loquendi, non enim
offen-

offendens , sed persona offensa , dicitur pati
offensam : Sed ille dicitur offensam patiens,
qui offensæ subiectum est : Ergo persona of-
fensa est mortale subiectum offensæ . Ex quo
intelliges, quod sicut persona Verbi , quia su-
biectum est actuum qui ab humanitate Chri-
sti eliciuntur , est in genere moris forma tales
actus dignificans, & infinito modo meritorios
& satisfactorios. constituens : Ita quia Deus
est subiectum morale offensæ in peccato mor-
tali repertæ , habet rationem formæ moralis
talem offensam gratificantis, subindeque in
eam influentis malitiam & gravitatem in esse
moris infinitam simpliciter .

Nec obstat quod D. Thomas 3. p. qu. 1.
art. 2. ad 2. dicit peccatum habere quandam
infinitatem ex infinitate diuinæ maiestatis .
Ideò enim hanc particulam diminutivam ad-
didit, vt denotaret peccatum non esse infini-
tum physicè & in genere entis , sed duntaxat
moraliter, seu in genere moris ; illudque ad-
huc in hoc genere non esse infinitum secun-
dum omnem rationem moralitatis quæ in ipso
reperitur ; non enim habet malitiam simplici-
ter infinitam, in quantum est malum hominis,
sed solum quatenus est malum Dei , & prout
habet rationem offensæ ..

Nō obest pariter si dicas, ex solutione & do-
ctrina tradita sequi, non solum peccatum mor-
tale, sed etiam veniale, esse in ratione offen-
sæ gravitatis infinitæ simpliciter ; cum istud
non minus quam illud, Deum vt subiectum
morale respiciat, subindeque ab illo vt a for-
ma gravitatem & infinitatem accipiat . Res-
pondetur enim, quod licet peccatum veniale

in ratione offensæ subiectetur in Deo, non tamen recipit ab illo infinitatem simpliciter; quia cum sit levis offensæ, est incapax recipiendi infinitatem: forma enim subiecto incapaci vnita, non præbet illi effectum quem de se præstare potest; sicut substantia Verbi vnita naturæ irrationali, illam non sanctificaret, nec personam constitueret, quia talis natura non est capax illorum effectuum.

Demum non refert si obijcias, ex nostra sententia sequi, vnum peccatum in ratione offensæ alio maius non esse quod videtur absurdum & error Stoicorum supra cap. 3. impugnans: Sequela Maioris videtur manifesta, nam vnum infinitum non est maius alio in eo genere, in quo est infinitum: Ergo si peccatum mortale in ratione offensæ sit infinitum simpliciter, vnum in hoc genere alio maius esse non potest, sed omnia in ratione offensæ æqualia erunt.

Dupliciter enim huic instantiæ responderi potest, primò negando absolutè sequelam Maioris, ad cuius probationem dici potest quòd licet infinitum per essentiam & in genere entis petat quod a nullo possit excedi, infinitum tamen determinati generis potest materialiter excedi ab alio: sicut in sententia illorum qui admittunt posse dari infinitum secundum quantitatem, aut multitudinem, corpus infinitum materialiter excederet superficiem infinitam, & superficies infinita lineam infinitam; & si daretur multitudo infinita hominum materialiter excederetur a numero digitorum, vel capillorum: Vnde cum peccatum mortale in ratione offensæ, sit infi-

nitum tantum in genere determinato scilicet in genere moris, vnum peccatum in ratione offensæ, alio maius esse potest. Quam solutionem & doctrinam insinuare videtur Sanctus Thomas 3. p. qu. 10. art. 3. ad 3.


Secundò responderi potest quod sicut in actionibus Christi meritorijs duplex distinguitur valor a Theologis; vnius obiectiuius, desumptus ex obiecto & circumstantijs, alijsque capitibus, & iste inæqualis est, iuxta obiectorum & circumstantiarum inæqualitatem; alter personalis, desumptus a persona diuina, infinitè dignificante, & vt ita loquar valorante omnes Christi actiones Theandricas, & supra personam Verbi diuini reflexiuas; & hic erat æqualis in omnibus Christi actionibus satisfactorijs & meritorijs, vt docent Theologi in Tract. de Incarnatione. Ita similiter in peccato mortali duplex distingui potest grauitas seu malitia offensæ, vna sumpta ex obiecto, intentione & alijs capitibus; alia petita ex dignitate infinita personæ quæ offenditur; & licet ista in omnibus peccatis mortalibus æqualis sit, vt pote desumpta ex persona infinita, infinitè grauificante quodlibet peccatum mortale; illa tamen inæqualis est, iuxta obiectorum & circumstantiarum inæqualitatem. Vnde nostra sententia longè distat ab errore Stoicorum, cum iuxta illam verum sit absolute peccata esse inæqualia, eò quod secundum suas essentias específicas inæqualia sint, etsi in ratione offensæ consecuta ad rationem malitiæ in grauitate personali modo explicato adæquantur.

Dices; Deus magis offenditur vno pecca-

to quàm alio v. g. peccato odij, aut blasphemiae, quam peccato furti, aut luxuriæ: Ergo vni maiorem quam alteri gravitatem communicat, & consequenter gravitas sumpta ex persona offensa, maior est in vno peccato, quam in alio.

Respondeo distinguendo Antecedens: Deus magis off. nditur vno peccato quàm alio: extensivè concedo Antecedens: intensivè, nego Antecedens & consequentiam. Solutio patet ex suprâ dictis, omnia enim peccata vt diximus sunt intensivè æqualia in malicia desumpta ex parte personæ infinitæ quæ off. nditur, quamvis ex parte obiecti & circumstantiarum inæqualia sint.

Ex quo facilè intelligitur ratio, cur bonitas infinita Dei, actui charitatis quem terminat, infinitam dignitatem non conferat; Dei tamen infinita maiestas det off. nsæ gravitatem infinitam simpliciter: quia nimirum bonitas infinita Dei ad actum charitatis comparatur vt obiectum, persona autem offensa comparatur ad iniuriam, vt illius subiectum morale: in hoc autem subiectum morale ab obiecto distinguitur, quod illud totum quod ex se potest communicat actui, istud verò non influit, nisi per commensurationem ad conatum actus, & influxum principij operativi.



§. V.

Verum peccatum mortale, per se, & ex malitia sua intrinseca, reatum pœnæ æternæ inducat?

Suppono primò, quodlibet peccatum per se condignè mereri pœnam sibi proportionatam, vt enim discurret D. Thomas hic quæst. 87. art. 1. Quicumque peccat, erigit se contra aliquem ordinem præscriptum, sub quo ipse continetur: iustum autem est, vt qui contra præscriptum ordinem insurgit, tantùm a principe illius ordinis deprimatur, quantum se supra talem ordinem erexit, quod est pœnam pati. Triplex autem est ordo, humanus, naturalis, diuinus. Primum transgreditur creatura violando legem humanam, secundum violando naturalem, tertium frangendo diuinam: vnde triplicem pœnam incurrit peccatum, vnã taxatam a lege humana, aliam a naturali, quæ est morsus conscientiæ, tertiam a diuina.

Suppono secundò vt de fide certum, peccatum mortale in hac vita per baptismum vel pœnitentiam non dimissum, lege diuina, in futura, æterna pœna esse puniendum. Hoc enim Scriptura varijs in locis declarat, præsertim Isaïæ 66. vbi de damnatis dicitur: *Vermis eorum non morietur, & ignis eorum non exstinguetur.* Et Apocal. 14. *Cruciantur igne & sulphure in sæcula sæculorum.* In huius rei typum ignis fornacis Babylonicæ, quadraginta nouem cubitis supra fornacem ascen-

ascendebat, sed nunquam ad quinquagesimum, qui erat annus Iubilæi, perueniebat, ut per hoc significaretur (ut recte obseruauit P. Ludouicus Granatensis) ignis tartarei combustionem fore perpetuam, & damnatos nunquam indulgentiam, seu veniam peccatorum, conseruuros. Vnde Psalm. 48. de illis dicitur: *Sicut oues in inferno positi sunt, mors depascet eos.* Quæ verba expendens Bernardus serm. 2. de verbis Apostoli: *Quam benè (inquit) sicut oues, quia detractò vellere mundialium diuitiarum, durè presseque detrusi, sempiternis nudi deputabuntur incendijs. Mors depascet eos, quia semper morientur ad vitam, & semper viuunt ad mortem.* Non enim mors eradicabit eos, vitam ex toto auferendo, sed depascet, conseruando radicem vitæ, ut iterum pullulent, iterum & iterum, atque in æternum depascendi.

Per hoc excluditur error Origenis, qui lib. 1. Periarchon capit. 6. asseruit pœnas damnatorum non esse in æternum duraturas, sed per Dei misericordiam tandem aliquando finiendas. Qui error (ut ait S. Thomas 3. contra Gentes cap. 144.) *ortum habuisse videtur à positione quorundam Philosophorum, qui dicebant omnes pœnas purgatorias esse, & ita quandoque terminandas.* Quin imò, illum a Diabolo fuisse excogitatum, ut peccatores a pœnitentia retraheret, annotauit Gregorius Magnus lib. 34. moral. cap. 16. ad illa verba Iob 41. *Æstimabit abyssum quasi senescentem, &c.* Sic enim ait: *Ienianathan æstimabit abyssum quasi senescentem, quia reproborum corda sic infatuat, ut suspicionem eis de venturo indu-*
di-

*dicio, quod quasi finiatur, infundat . Abyssum
namque senescere existimat , qui terminari
quandoque in supplicijs supernam animaduer-
sionem putat .*

His præmissis difficultas est , an peccatum mortale, de se , & ex malitia sua intrinseca, exigat pœnam æternam , vel solum hoc ei conueniat per accidens, propter legem a Deo latam, qua illud æterna pœna punire voluit. Ratio dubitandi est , quia pœna debet esse proportionata culpæ : pœna autem æterna nullam videtur habere proportionem cum culpa mortali , quæ breuissimo tempore , & ferè in momento committitur .

Dico tamen, peccatum mortale, ex se , & ex malitia sua intrinseca, reatum pœnæ æternæ inducere .

Probatum primò ex fundamentis §. præcedenti statutis : peccatum enim continens malitiam & grauitatem in esse moris simpliciter infinitam , ex se & ex sua malitia intrinseca, meretur pœnam infinitam , cum debeat proportionari culpæ : Sed peccatum mortale, in quantum est offensæ Dei , continet malitiam & grauitatem in esse moris simpliciter infinitam, vt ibidem ostensum est : Ergo ex se , & ex sua malitia intrinseca, meretur pœnam infinitam, saltem duratione, siue æternam. Hanc rationem insinuat D. Thomas in 4. dist. 46. quæst. 1. art. 3. his verbis *Potest & alia ratio assignari , quare pœna peccati mortalis sit æterna, quia per illud contra Deum qui est infinitus peccatur ; vnde cum non possit esse pœna infinita per intensionem, quia creatura non est capax alicuius qualitatis infinitæ , requiritur*

ut sit saltem duratione infinita.

Probatur secundò alio egregio discursu eiusdem S. Doctoris hic quæst. 87. artic. 3. Peccatum dicens inordinationem irreparabilem, per se & ex malitia sua intrinseca, reatum poenæ æternæ inducit: Sed peccatum mortale dicit inordinationem irreparabilem: Ergo per se, & ex malitia sua intrinseca, inducit reatum poenæ æternæ. Maior patet, peccatum enim inducit reatum poenæ, ratione suæ inordinationis, ut in prima suppositione declarauimus; unde tandiu debet manere reatus poenæ, quādiu remanet inordinatio culpæ, subindeque si ista sit irreparabilis, & perpetua, ille quoque æternus, & interminabilis erit. Minor verò in qua est difficultas sic potest suaderi: Peccatum mortale auertit & deordinat hominem ab ultimo fine, ut constat ex dictis §. 1. Sed deordinatio ab ultimo fine, ex sua propria ratione, & ex parte peccatoris, est irreparabilis; quia ultimus finis in moralibus est sicut primum principium in speculatiuis, error autem circa primum principium in speculatiuis, irreparabilis est: Ergo peccatum mortale dicit seu importat inordinationem irreparabilem.

Ex hac ratione sequitur peccatum veniale de se reatum poenæ temporalis solum inducere, quia non dicit inordinationem irreparabilem, cum talis deordinatio non sit circa finem, sed tantum circa media, quæ proinde potest reparari ex recta intentione finis; sicut error circa conclusiones, corrigi potest ex recta cognitione principij. Vnde peccatum mortale se habet ut mors animæ, destruens pri-

primum principium vitæ spiritualis, quod est gratia, & coniunctio ad Deum vltimum finem: peccatum verò veniale est veluti morbus & ægrotudo illius, quæ principium vitæ spiritualis non destruit, sed tantum languorem & debilitatem spiritualem inducit. Alias rationes adducit D. Thomas 4. contra Gen. cap. 144. quæ ibidem videri possunt.

Ad rationem verò dubitandi dicendum est, inter culpam & poenam non requiri æqualitatem quantum ad omnia, & præsertim quoad durationem; nam in iudicijs humanis videmus pro breuissimo delicto, perpetuam vitæ priuationem, aut perpetuum exilium sæpe infligi, sed sufficere quod sit proportio inter reatum poenæ, & inordinationem culpæ, ita vt si ista æterna sit & irreparabilis, ille quoque perpetuus & interminabilis esse debeat. Ad do quod, licet actus peccati mortalis sit transitorius, & aliquando momentaneus, tamen voluntas peccandi est aliquo modo æterna; in quantum ille qui peccat, & qui voluptatem v. g. Deo præfert, ita affectus est, vt si semper viueret, in peccato semper vellet perseuerare, & tali voluptate perpetuò frui. Vnde Gregorius 4. Dialog. cap. 4. *Peccator vellet sine fine viuere, vt sine fine posset peccare.* Et cap. 44. *Iustum est quod qui in suo æterno peccauit contra Deum, in æterno Dei puniatur.* Quæ verba exponens S. Thomas hic quæst. 87. artic. 3. ad 1. subdit: *Dicit autem aliquis in suo æterno peccasse, non solum secundum continuationem actus in tota hominis vita durantis; sed quia ex hoc ipso quod finem in peccato constituit, voluntatem habet in æternum peccandi.*
S. VI.

§. VI.

Peccatum veniale in damnato, si non sit remissum quoad culpam in hac vita, per accidens punietur in inferno pœna eterna; secus verò si in hac vita quoad culpam dimissum fuerit, sed non quoad pœnam.

Prima pars huius assertionis expressè docetur à D. Thoma quæst. 7. de malo artic. 10. in corp. & quæst. 5. art. 2. ad 8. probaturque ratione quam ibidem insinuat: Peccata venialia in hac vita non remissa, non remittuntur in inferno quoad culpam: Ergo nec quoad pœnam. Consequentia patet, cum enim reatus pœnæ sit effectus culpæ, tandiu perseverat, quandiu permanet culpa. Antecedens verò probatur, tum quia remissio cuiuscunque peccati non fit sine aliqua applicatione meritorum Christi, quæ nulla est in inferno, cum in eo nulla sit redemptio, ut dicit Ecclesia. Tum etiam, quia existenti in termino nulla fit remissio peccati: damnati verò sunt simpliciter & totaliter in termino, cum fidem non habeant, nec spem; in quo differunt ab animalibus existentibus in purgatorio, quæ cum habeant fidem & spem, quæ sunt virtutes viatorum, non remanentes in patria, sunt secundùm quid in via; vnde licet istis remittantur peccata venialia, tam quoad pœnam, non tamen illis; præsertim cum damnati sint obstinati in malo, & displicentiam nullam peccati, quæ sit actus moraliter bonus, habere possint, sed semper habeant affe-

affectum formalem aut virtualem ad illud.

Secunda etiam pars, nimirum quod peccatum veniale dimissum in hac vita quoad culpam, non puniatur in inferno poena aeterna, sed duntaxat temporali, docetur pariter a D. Thoma in 4. dist. 22. quaest. 1. artic. 1. ad 5. ubi licet in prima responsione insinuet oppositam sententiam, in secunda tamen, quam magis approbat, aperte nostram profitetur, his verbis: *Alij dicunt quod poena cuius est aliquis debitor post culpam remissam, in inferno punietur temporaliter. Nec propter hoc sequitur quod sit in inferno redemptio, quia poena quae soluitur, non redimitur; nec est inconueniens quod quantum ad aliquid accidentale, poena inferni minuatur usque ad diem iudicii, sicut etiam augetur.*

Ratio etiam suffragatur: Ideò enim peccatum veniale non remissum in hac vita quoad culpam, non potest remitti in inferno quoad poenam, quia in inferno semper remanet, & nunquam deletur quoad culpam, & remanente culpa reatus poenae desinere nequit, ut in probatione prioris partis declarauimus: Ergo si supponatur peccatum veniale dimissum in hac vita, quantum ad culpam, non est cur per satisfactionem condignam & æqualem, poena temporalis ipsi debita, in inferno solui non possit. Nec obest quod talis satisfactio sit inuita & inuoluntaria in damnatis. Licet enim ad meritum vel satisfactionem requiratur quod poena quae toleratur, sit voluntaria, seu spontaneè acceptata, non tamen ad satisfactionem, ad illam enim sufficit æqualitas

inter pœnam & culpam . Vnde in humanis reus qui sustinet pœnam a iudice taxatam & præscriptam, soluit debitum iustitiæ , licet eam non spontaneè, sed inuitè patiatur .

Obijcies primò contra primam partem assertionis: Deus, ex communi Theologorum axiomatic, punit citra condignum, & remunerat ultra condignum: At si in inferno puniret pœna æterna peccata venialia damnatorum, non remissa in hac vita quoad culpam, ea non citra sed ultra condignum puniret, cùm pœna duntaxat temporalis peccato veniali debeatur: Ergo ea non punit in inferno pœna in æternum duratura .

Respondeo, concessa maiori, negando sequelam minoris; Deus enim punit ultra condignum peccata venialia damnatorum, in hac vita non remissa quoad culpam, etsi ea puniat pœna in æternum duratura; quia licet ipsis non sit debita per se pœna æterna, illis tamen debetur per accidens, ratione subiecti in quo reperiuntur, quod est incapax omnis veniæ & indulgentiæ, seu remissionis peccati, quia est in termino, & nulla potest illi fieri applicatio meritorum Christi: culpa autem per accidens irremissibilis, per accidens pœnam æternam de condigno meretur. Solutio est D. Thomæ quæst. 5. de malo art. 2. ad 8.

Obijcies secundò contra secundam partem: Vnanimis Ecclesiæ consensus tradit, in inferno non tantùm nullam esse redemptionem, sed nec etiam vllam pœnarum mitigationem: At si peccata venialia, dimissa in hac vita quoad culpam, non punirentur in inferno pœna

æter-

æterna, sed duntaxat temporali, daretur in damnatis quædam pœnarum remissio & mitigatio; nam quando pœna illa temporalis esset soluta, non tantam pœnam quantam antea experirentur: Ergo talia peccata in inferno pœna æterna puniuntur.

Respondeo cum D. Thoma loco in probatione secundæ partis nostræ assertionis relato, quod licet pœna inferni non remittatur aut minuatur, quantum ad aliquid essentialis; quia pœna essentialis damnatorum est invariabilis, sicut & gloria essentialis beatorum, eò quod utrique sint in termino, bene tamen quantum ad aliquid accidentale, nam sicut pœna accidentalis damnatorum augetur, ita & potest diminui.

§. VII.

Impossibile est peccatum veniale esse in aliquo cum solo originali.

ITa D. Thomas hic qu. 89. art. 6. ubi id probat duplici ratione: Prima quæ habetur in argumento *sed contra*, sumitur ab inconuenienti quòd sequeretur ex aduersa sententia. Si enim aliquis cum veniali & originali decederet, non esset locus in quo puniri posset, nam in limbo puerorum pro solo originali puniuntur homines; ad purgatorium non descendunt nisi animæ illorum, qui in gratia decedunt, ut illo igne purgatæ, in cælum conscendant; ad infernum verò propter solum peccatum mortale actuale homines detruduntur.

Nec

Nec valet quod dicunt aliqui Recentiores, quod in tali casu, veniale coniunctum cum originali, leui & temporali poena sensus puniretur in inferno. Tum quia, vt dixi, ad infernum, propter solum peccatum mortale actuale homines detruduntur. Tum etiam, quia licet in inferno poena temporali puniantur peccata venialia, quoad culpam in hac vita remissa, non tamen illa quæ non fuerunt in hac vita remissa quantum ad culpam, vt constat ex dictis §. præcedenti: Sed in casu posito a D. Thoma, peccatum veniale coniunctum cum originali, non esset in hac vita remissum quantum ad culpam, cum homo peccato originali infectus, non sit capax gratiæ, & applicatione meritorum Christi, sine qua nullum peccatum remittitur quantum ad culpam: Ergo non puniretur in inferno poena leui & temporali, vt illi Authores dicunt.

Secunda ratio quam habet idem S. Doctor in corpore eiusdem articuli, potest sic proponi. Si in homine posset reperiri peccatum veniale cum solo originali, vel hoc ei conueniret ante primum instans vsus rationis & libertatis, vel in ipso instanti, vel immediatè post illud instans? nullum ex his dici potest: Ergo &c. Maior patet a sufficienti enumeratione, minor verò probatur quantum ad singulas partes. In primis enim quod hoc non possit conuenire homini ante primum instans vsus rationis, manifestum videtur ex eo quod ante illud instans homo nec rationis nec libertatis compos sit. Quod verò id non possit ei competere in ipso instanti vsus rationis & libertatis, vel immediatè post, sic ostenditur.

Puer

Puer in primo instanti vsus rationis, aut iustificatur, aut peccat mortaliter: Ergo non potest in eo instanti, vel immediatè post, reperiri in ipso peccatum veniale cum solo originali. Consequentia patet, nam si iustificetur, consequetur per gratiam remissionem peccati originalis; si verò peccet mortaliter, peccatum veniale quod postea commitet, non erit coniunctum cum solo originali. Antecedens verò sic probatur: Puer in primo instanti vsus rationis, tenetur inexcusabiliter se conuertere in Deum, vel explicitè, vel saltem implicitè: si adimpleat hoc præceptum, eo ipso in eodem instanti a peccato originali mundatur per gratiam iustificantem, quæ ipsi a Deo infunditur; quia amor Dei super omnia non est composibilis cum hac culpa, sicut neque cum alia mortali: si verò illud non impleat, peccat mortaliter peccato omissionis: Ergo puer in primo instanti vsus rationis, aut iustificatur, aut mortaliter peccat.

Dices primò, hanc rationem D. Thomæ falsum supponere, nempe dari præceptum naturale se conuertendi in Deum in primo instanti morali vsus rationis; non enim verisimile est, nec suauitati diuinæ prouidentiae conueniens, quod Deus statim in ipsa prima vigilia rationis hominem vrgeat & quasi opprimat præcepto tunc primum explendo.

Verùm tale præceptum de facto dari, & non esse a D. Thoma gratis excogitatum, multipliciter potest ostendi. Primò quia statim atque lex aliqua alicui sufficienter promulgata est, tenetur eam acceptare, & illi se subicere: v. g. cùm primò proponitur ali-

cui lex euangelica, ipseque veritatem talis legis sufficienter agnoscit, tenetur amplecti illam, & proponere viuere secundum ipsam, saltem in communi, & nisi ita faciat, mortaliter peccat, vt satis communiter docent Theologi in tractatu de legibus: Sed homini in primo instanti morali vsus rationis, per dictamen syndereſis, & lumen naturale rationis, intimatur a Deo lex naturalis, dictans bonum honestum esse sequendum, & præferendum vtili ac delectabili: Vnde SS. Patres, præsertim Cyrillus, illud Ioan. 1. *Illuminat omnem hominem venientem in hunc mundum*, intelligunt de illuminatione in primo instanti vsus rationis, in quo homo dicitur tunc in mundum venire, quia tunc primò incipit viuere vt homo: Ergo in eo instanti tenetur homo tali legi se subijcere, & deliberare sequi bonum honestum & rationi consonum, quod est virtualiter & implicitè in Deum se conuertere; cum in amore boni honesti, Deus vt huius boni author & finis, virtualiter & implicitè contineatur.

Secundò, homo in illo primo instanti ingreditur moraliter in mundum, & viam vitæ rationalis & humanæ incipit; vnde sicut ille qui incipit aliquod longum iter, ex dictamine rectæ rationis & prudentiæ, tenetur initio illius aliquem terminum sibi præstitui; ita & homo in primo illo instanti debet certam operandi regulam, certumque & fixum scopum, quò suas operationes dirigat, sibi proponere, nempe honestè, & conformiter ad dictamen rectæ rationis viuere; aliàs maximo errandi in decursu vitæ periculo se ex-

ponet, cum parvus error in principio sit maximus in fine.

Tertiò, Angelus adstrictus fuit præcepto diligendi Deum, & conuertendi se in illum, in primo instanti suæ libertatis, quod fuit secundum suæ creationis, & correspondet primo nostro instanti morali: Ergo etiam nos tenemur in hoc nostro instanti, similem dilectionem elicere, & in Deum nos conuertere, eo modo quo in illa ætate sumus capaces, id est explicitè vel implicitè, secundum illuminationem quæ tunc nobis datur a Deo, utpote cum eadem ratio utrobique militet, nempe quod omnis creatura rationalis, ubi plenè exercet dominium suæ voluntatis, & agit ut omnino libera, tenetur se suo Creatori submittere, & primum amorem, veluti primum voluntatis fructum, illi consecrare. Et sanè rationi valde consentaneum videtur, ut Deus talis creaturæ author, pro creationis beneficio exigat ab illa ex tunc huiusmodi pensionem, atque primitias libertatis a se creatæ, sibi consecrari expostulet, sicut olim in lege mosaica præcipiebat sibi offerri omnia primogenita animalium, & omnium primitias frugum.

Demum omnia alia tempora pro impletione præcepti dilectionis Dei ab Aduersarijs assignata, non sunt ita apta & conuenientia, sicut primum illud instans morale vsus rationis, quod assignatur a D. Thoma, ut patebit ea referendo ex Tamburino lib. 2. in Decal. cap. 3. §. 2. ubi decem Theologorum sententias recenset, his verbis: *Primum tempus quod aliqui assignant, est initium vsus rationis: se-*

cundum, finis vitæ : tertium, tota vitæ indeterminate sumpta, ut saltem semel in ea ametur Deus, quartum, omnes dies festivi, in quibus debemus Deo specialiter vacare: quintum, tempus in quo adultus suscipit baptismum: sextum, tempus quo quis suscipit Eucharistiam: septimum, quando forte sumitur martyrium: octauum, quando magnum à Deo accipis beneficium: novum, quando audis aliquem contra Deum blasphemantem: decimum, quando graui urgeris tentatione, præsertim odij Dei, cum periculo consensus, nisi ad Deum per amorem te conuertas. Pater inquam omnia illa tempora non esse ita apta & conuenientia ad implendum præceptum dilectionis, sicut initium vsus rationis. Quod enim dicitur de instanti mortis; communiter reprobat; quia cum præceptum dilectionis Dei traditum sit ad rectam vitæ humanæ institutionem, per relationem operationum nostrarum in Deum, tanquam in vltimum finem, & ad conciliandam, conseruandamque amicitiam cum illo, rationi dissonat ut in solo vitæ exitu obliget, totumque vitæ spatium extra talem obligationem sit. Vnde Dominicus Soto lib. 2. de iustitia & iure qu. 3. art. 10. loquens de hac sententia sic ait: Si dix. is satis esse semel in vitæ, idque in articulo mortis, præceptum dilectionis Dei implere, profecto longè à natura huius præcepti aberras: cum enim præceptum hoc cæterorum omnium sit præambulum, & ut ait Paulus, finis (nam finis præcepti est charitas) ridiculum esset dicere, quod liceat transigere totam vitam, ante quam nos obliget.

Similiter alia sententia, quæ totum vitæ tem-

tēpus indeterminatē assignat , communiter reijcitur, eò quòd cuilibet præcepto determinato, certum & determinatum tempus in quo obliget assignari debeat ; vnde hic modus dicendi difficultatem non soluit, sed dissimulat. Aliæ etiam sententiæ , excepta vltima , omni probabilitate carent , cū elicere actus charitatis , temporibus ab illis Authoribus designatis (puta diebus festiuis, cū debet suscipi baptisumus, vel Eucharistia, vel dum instat tempus martyrij, aut magnum aliquod beneficium a Deo recipitur) non sit præceptum, sed duntaxat consilium .

Solūm potest esse difficultas circa vltimam sententiam , quam docet Thomas Sanchez lib. 2. summæ cap. 35. vbi reiectis alijs dicendi modis, docet præceptum charitatis tunc solūm obligare , cū graues odij Dei tentationes instant, & periculum illis succumbendi adest, nisi tentatus actum amoris Dei eliciat . Sed hunc etiam dicendi modum insufficientem esse demonstrant Carmelitæ Salmanticenses disp. 20. dubio 1. num. 5. Primò quia obligat o ad actum, quæ est præcisè ratione tentationis casu occurrentis & vrgentis , non est obligatio per se , sed per accidens ; sicut per accidens & non per se est , quod talis tentatio tunc occurrerit , & alia via superari non possit ; tempus autem quod quarimus non est illud in quo præceptum dilectionis Dei vrgeat per accidens, sed in quo obliget per se , quia certum est assignandum esse aliquod tempus huius per se obligationis. Secundò, quia talis obligatio debet esse communis omnibus adultis, & omnes illos constringere , sicut ipsum

præceptum commune est, & omnibus imponitur: Sed illa occasio in qua vrgent graues odij Dei tentationes, & periculum illis succumbendi, non est communis omnibus adultis; plurimi enim sunt qui toto tempore vitæ, nullis huiusmodi tentationibus vexantur: non igitur hac via assignatur sufficiens tempus prædictæ obligationi.

Ex his intelliges, D. Thomam non adinuenisse aut excogitasse nouum præceptum, dum puerum peruenientem ad vsum rationis. asseruit teneri ad se conuertendum in Deum, sed solum determinasse & declarasse tempus, quo primum & antiquissimum omnium mandatorum, scilicet charitatis, obligare incipit, nempe primum instans morale vsus rationis.

Nec obstat, si huius ætatis imbecillitatem alleges, quæ non videtur ad talem obligationem subeundam idonea: nam facilius est puero talem conuersionem seu dilectionem in illo instanti elicere, quando nulla adest indispositio, ex aliqua peccato personali relicta, quam eo transacto, vbi talis indispositio posset voluntatem retardare. Vnde suauius egisse videtur diuina providentia, restringendo tale præceptum ad primum instans, quam si vltius illud distulisset.

Addo quod puer ad annos discretionis perueniens, non tenetur se conuertere in Deum, nisi iuxta illuminationem & notitiam de Deo quæ tunc ipsi communicatur; ita vt si notitia Dei fuerit explicita, ad amorem explicitum; si implicita, ad implicitum tantum teneatur; id est ad amorem boni honesti, in quo Deus, vt huius boni author & finis, virtualiter & implicite continetur.

Di-

Dices secundò : Puer priùs peruenit ad vsum imperfectum rationis quam ad plenum & perfectum; ratio enim in homine nò incipit omnino subitò, sed successiue & paulatim ligamina eius tolluntur, per organorum depurationem, humorumque exsiccationem: Ergo cùm imperfecta deliberatio sufficiat ad peccandum venialiter, vt patet in motibus concupiscentiæ primò secundis, puer ante instans morale vsus rationis, in quo habet plenum & perfectum discursum, seu rationis & libertatis vsum, poterit peccare venialiter per aliquos motus indeliberatos, subindeque peccatum veniale cum solo originali existere.

Respondeo, dato Antecedenti, negando consequentiam, ad cuius probationem dico cum Caietano hic qu. 89. art. 6. quod *licet ad peccandum venialiter minùs libertatis sufficiat in exercitio, quam ad mortale, quia absq; deliberatione peccatur venialiter, non tamen sufficit in facultate; quia non peccatur venialiter absque libera facultate dominandi super singulos motus; quæ facultas absque plena libertate non est.* Vnde cùm puer ante primum instans morale vsus rationis, careat tali facultate, etsi fortè aliquem vsum imperfectum libertatis habere possit, tamen tunc incapax est peccandi venialiter.

Dices tertio: Cùm primum instans in quo puer, in sententia D. Thomæ, tenetur se conuertere ad Deum, non sit mathematicum, & omnino indiuisibile, sed morale claudens in se aliquod temporis spatium, potest in eo assignari tempus sufficiens, in quo puer peccet venialiter, etiam cum plena aduertentia, antequam.

quam impleat tale præceptum: Ergo poterit peccatum veniale reperiri cum solo originali.

Respondeo negando Antecedens, licet enim tale instans non sit physicum, sed morale, & aliquod temporis spatium in se includat; cum tamen in illo Deus speciali dictamine, in intellectu pueri causato, obligationem adimplendi tale præceptum illi intrinet, eumque per talem cognitionem urgeat ad deliberandum de seipso, in ordine ad debitum finem, si data opera puer tunc ad aliud cogitandum vel operandum se diuertat mortaliter peccat, subindeque peccatum originale non reperitur tunc in illo cum solo veniali.

Dices quartò: Etsi puer in instanti morali usus rationis adimpleat supra dictum præceptum, & seipsum ordinet ad bonum honestum, non tamen propterea iustificatur, & à peccato originali mundatur: Ergo ruit præcipuum fundamentum cui ratio D. Thomæ innititur. Consequentia patet ex supra dictis, Antecedens verò probatur ex eo quod ad iustificationem requiritur cognitio mysteriorum fidei, saltem mysteriorum Trinitatis, & Incarnationis, ut docent Theologi in tractatu de iustificatione, & de fide: Ergo etsi puer in primo instanti usus rationis, in bonum explicitè se conuertat, & implicitè in Deum ut talis boni authorem & finem, non tamen propterea iustificatur, nec à peccato originali mundatur.

Respondeo negando Antecedens, & ad eius probationem dico, quod sit Deus sua infinita misericordia & providentia conferat
puero

puero peruenienti ad vsum rationis, auxilium
efficax quo se conuertat in bonum honestum
explicitè, & implicitè in Deum, vt talis boni
authorem & finem, consequenter ad hanc
misericordiam & prouidentiam specialem,
vel illum immediatè per seipsum illuminabit
de prædictis mysterijs, vel aliquem prædica-
torem ad eum diriget, qui ipsum de illis in-
struat. Ita D. Thomas qu. 14. de verit. art.
11. ad 1. vbi ait quod si aliquis nutritus in
syluis, vel apud barbaras gentes, vbi nihil de
nostra fide audiuit, *ductum naturalis rationis*
sequeretur in appetitu boni & fuga mali, cer-
tissimè tenendum est, quod ei Deus vel per in-
ternam inspirationem reuelaret ea quæ sunt
ad credendum necessaria, vel aliquem prædi-
catorem ad eum dirigeret, sicut misit Petrum
ad Cornelium *Actuum*. 10. Sed de hoc fusius
in tractatu de gratia.

*Finis Tomi III. Manualis
Thomistarum.*

MAG 824



